


Kote New Testament



Portions of the Holy Bible in the Kote Language of
Mozambique

Kote New Testament

Portions of the Holy Bible in the Kote Language of Mozambique

Porções da Bíblia Sagrada no Kote Língua Moçambique

copyright © 2005-2008 Wycliffe Bible Translators, Inc.

Language: Kote

Translation by: Wycliffe Bible Translators

O utilizador pode copiar e distribuir a obra.

You may copy and distribute the work.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-30

PDF generated using Haiola and XeLaTeX on 11 Nov 2022 from source files dated 9 Oct 2020

7eacf624-a9f0-59bc-b7bf-b6190a381fc4

Contents

FRT	1
Mwanzo	2
Olaawo	74
Yuunusa	101
Matewuzhu	104
Maaruku	150
Luuka	177
Yaahaya	231
Khaazi za Maswihaapa	269
1 Timootiyu	286

Koti Bíblia
Porções da Bíblia Sagrada no Koti língua Moçambique
Portions of the Holy Bible in the Koti language of
Mozambique
Koti Bíblia
Kote

Koti Bíblia

Porções da Bíblia Sagrada no Koti língua Moçambique

Portions of the Holy Bible in the Koti language of Mozambique

[eko]
Kote Bíblia

Porções da Bíblia Sagrada no Koti língua Moçambique

Portions of the Holy Bible in the Koti language of Mozambique

[eko]

Tradução: © 2005-2008, Wycliffe Bible Translators, Inc.

Edição para a Web
2017, Wycliffe Bible Translators, Inc.

www.ScriptureEarth.org

Creative Commons Licença

Atribuição-Uso Não-Comercial-Vedada a Criação de Obras Derivadas

Você pode copiar, distribuir, exibir e executar a obra sob as seguintes condições:

Atribuição. Você deve dar crédito ao autor original, da forma especificada pelo autor ou licenciante.

Uso Não-Comercial. Você não pode utilizar esta obra com finalidades comerciais.

Vedada a Criação de Obras Derivadas. Você não pode alterar, transformar ou criar outra obra com base nesta.

<http://creativecommons.org/licenses/by-nc-nd/4.0/>

Mwanzo

Ophattuchiwa w'oolumwenku na vitthu zooshi ziriimo

¹ Omwanzo, Nluku aphattucha pinku na vathi. ² Olumwenku waari ohineeyane matthentto na khayaarimo hatha ethu, yaarivo yiizaru vatulu wa pahari yawiicha. Rooho ya Nluku yaari ozukulela vatulu wa maati.

³ Aphano Nluku khuri: "Yiiyevo nuuru!" Khwiyyavo. ⁴ Nluku khoona yoori nuuru yaari yooshapweya; khuvalula nuuru na yiiza. ⁵ Nuuru khutthaja "nthana", yiiza khutthaja "osikhu". Khuripa khucha, siikhu yamwanzo.

⁶ Aphano Nluku khulupa theenya yoori: "Wiiyevo mwaawanyo vakatthi wa maati onvalulaaye maati na maati!" ⁷ Nluku khuretta mwaawanyo ovaluliyeeyo maati vathi na vatulu. Khurettikhana etthiipo. ⁸ Mwaawanyo opule, Nluku khutthaja "pinku". Khuripa khucha, siikhu yaphiiri.

⁹ Nluku khuri: "Akusanyeye maati apa ari vathi wa pinku vahali vamote epuwe tuulu yawuma!" Khurettikhana etthiipo. ¹⁰ Tuulu yaya ethiito yawuma khutthaja nzina la "tuniya", maati apale aakusanyeyiyeeyo khutthaja n zina la "pahari". Nluku khoona yoori pi zooshapweya. ¹¹ Nluku khulupa theenya yoori: "Tuniya yoothele tthuttu: waaza nyaani ziniimaaye peewu na miitthi ziniimaaye mishumo, wakhula nshumo na phunje yaya!" Khurettikhana etthiipo. ¹² Tuniya khootthela tthuttu: nyaani ziniimaaye peewu, miitthi ziniimaaye mishumo. Nluku khoona yoori pi zooshapweya.

¹³ Khuripa khucha, siikhu yattaatthu.

¹⁴ Aphano Nluku khuri: "Otulu ziiyewo vimwasikhelo yoori ovaluleye nthana na osikhu! Ziiye alama zinthoonyezaaye elimwe na mwiita, siikhu na nyaakha. ¹⁵ Vimwasikhelo ziriye otulu ziiye zoomwasikhela vathi." Khurettikhana etthiipo. ¹⁶ Nluku khuphattucha vimwasikhelo piiri khuulu. Emwasikhelo eti khuulu yaya yoori esala elokozela nthana, eti ttiitthi esala elokozela osikhu. Na theenya khuphattucha matthottowa. ¹⁷ Nluku khutthaawo vimwasikhelo epile otulu yoori zisala zimwasikhela vathi, ¹⁸ na olokozela nthana na osikhu, zaawanye nuuru na yiiza. Khoona yoori pi zooshapweya. ¹⁹ Khuripa khucha, siikhu yanne.

²⁰ Aphano Nluku khuri: "Mpahari ziiyemo zumpe za waatta za wiiyana ohaayi, na eeyeo anyannyi anvavaaye otulu!" ²¹ Nluku khumpa zumpe z'oohaayi khuluzeene za mpahari, na jaati zooshi za zumpe zineettetaaye na ziniitaalaaye mpahari. Khumpa theenya jaati zooshi za anyannyi. Nluku khoona yoori pi zooshapweya. ²² Nluku khuparikhya araka: "Mwittheere-lane mwaattelane, mwiitaale mpahari, na anyannyi aattelane vatuniya!" ²³ Khuripa khucha, siikhu yathaanu.

²⁴ Aphano Nluku khuri: "Ziiyemo ntuniya jaati zooshi za zumpe za wi-iyana ohaayi, nyama za ntthuttu, mifuwo za vaje na nyama zoojipurula!" Khurettikhana etthiipo. ²⁵ Nluku khumpa nyama za ntthuttu za wakhula jaati, zoojipurula za wakhula jaati, na mifuwo za wakhula jaati. Khoona yoori pi zooshapweya.

²⁶ Nluku khulupa theenya yoori: "Nimumpe pinaatamu woonishapihi wa wiiya nkhama Fweeyo! Yoori eeyane owahi wooshintta swi za mpahari na anyannyi o'otulu; mifuwo za vaje na nyama za ntthuttu mpakha nyama zooshi zinjipurulaaye vathi."

²⁷ Aphano Nluku khumumpa pinaatamu

wa wiiya nkhama Ye;
nlume na muukha ompiwa ti Ye.

²⁸ Nluku khuwaaparikhiya khuwooza yoori: “Mwivokolelane, mwaattele-lane mwiitaale voolumwenku! Mwiyyane oshintta vatuniya, swi za mpahari, anyannyi o'otulu na nyama zooshi zineettettaaye vathi!” ²⁹ Nluku khulupa theenya araka: “Yoori mweeyo mwiiyane ethu-yooja, kiniwinkhani nyaani zooshi za ntuniya ziniimaaye peewu, miitthi zooshi ziniimaaye mishumo na phunje zaya. ³⁰ Kininkha mathapa ooshi nkhama vitthu-zooja za nyama zooshi ziriina ohaayi: anyannyi ooshi o'otulu na nyama zooshi mpakha epile zinjipurulaaye vathi.” Khurettikhana etthiipo. ³¹ Nluku khoona yoori pi zooshapweya channu. Khuripa khucha, siikhu yasiitha.

2

¹ Ti nanna yiishisiweezo ophattuchiwa pinku na vathi na zooshi ziriimo. ² Nluku amarisiyeevo khaazi yawe, siikhu yasaapa khuvumula. ³ Siikhu ethiito yasaapa, Nluku khuparikhiya na khuttakatthisa mwaasa woovumula khwa khaazi yawe aakholiyeeyo yoophattucha. ⁴ Eti hatiithi yoophattuchiwa pinku na vathi.

Nanna apuwiyeezo pinaatamu

Siikhu Mbwana Nnyizinku aphattuchiyeovo pinku na vathi, ⁵ vatuniya khawaarivo hatha muutthi wala nyaani zaari zihinootthe, maana Mbwana Nnyizinku aari ahinanyisele vuula vathi na khaarivo hatha ntthu woolima tuniya. ⁶ Ila maati aari opuwa vathi khusala anaanisa tuniya yooshi. ⁷ Aphano, Nnyizinku khumumpa pinaatamu khwa ottophe wa vathi. Khunvitelela mphula mwawe khumwinkha phuumu y'oohaayi, pinaatamu khwiya yumpe haayi.

⁸ Mbwana Nnyizinku khuzala woorotha nti wa Eeteni, phantte y'ookhu lintthamuwaawo njuwa, khuntthaamo pinaatamu otule aamumpiyeeyo.

⁹ Mbwana Nnyizinku khootthisa miitthi za wakhula nanna, zooshapweya woona na zootuva oja mishumo zaya. Vakatthi wa woorotha khuzalavo muutthi woohaayi, na muutthi onjuwisaaye yooshapweya na yootakhala.

¹⁰ N'Eeteni nttumpho waarimo muuttho waari okhuwaraaye woorotha opule; muuttho otthuupo khwaawanyeya khupuwavo nyuuttho mine.

¹¹ Wamwanzo oniitthiwa Pishoni, opo wazukulela nti wooshi wa Havila, ohali wa waattawo thahapu*. ¹² Thahapu za nti opo pi zooshapweya na theenya ewaakho miitthi enlazaaye manlela oonukhela na mawe ootafikhana†. ¹³ Muuttho opu waphiiri oniitthiwa Kihoni, ozukuleliyeeyo nti wooshi wa Kuushi. ¹⁴ Muuttho opo wattathu, onviraaye phantte lintthamuwaawo njuwa ya nti wa Shuur, oniitthiwa Tiikiri. Opu wanne Efwarathi.

¹⁵ Mbwana Nnyizinku khunthuula pinaatamu otule khunttha nwoorotha wa Eeteni yoori asala alimela na weekesela. ¹⁶ Mbwana Nnyizinku khunruma pinaatamu otule yoori: “Miitthi epi ziriye nwoorotha mphu oje mishumo zaya woohiina hatha shaakha. ¹⁷ Ila muutthi opo woojuwisa yooshapweya na yootakhala ohije; siikhu onttelaaye oja satakitu onta ofwa.”

¹⁸ Aphano Mbwana Nnyizinku khuri: “Khahi yooshapweya pinaatamu wi-iya otthwe, kintta omumpa pinaatamu wa wiiya nkhama ye asala ankhiza.”

¹⁹ Paata ya Mbwana Nnyizinku wumpa khwa ottophe wa vathi nyama

* ^{2:11} Leelo eti thahapu weero. † ^{2:12} Mawe apa awaara aari wiitthiwa oniikisi.

zooshi za ntthuttu na anyannyi apa o'otulu, zooshi khuntiisela Adamu[†] yoori amoone nanna aari weettelaazo otthaja; wakhula yumpe aari otthajaaye, nzina laya laari wiiya ntinttho. ²⁰ Adamu khutthaja mazina mifuwo za vaje, anyannyi o'otulu na nyama zooshi za ntthuttu. Ila khuhipuwivo hatha moote ya wiiya nkhamya ye yaari weettelaaye onkhiza.

²¹ Aphano, Mbwana Nnyizinku khuntiisela Adamu osikizi wa waatta. Eettaka olala, khunlaza likhonkolo limote la pavu yawe, aphale vaya aalaziyeovo khuttiyavo na nyama. ²² Likhonkolo limote la pavu anlaziyeeyo Adamu, Mbwana Nnyizinku khumumpa muukha, khumwinkha Adamu.

²³ Ye khuri:

“Ahee! Ntthi likhonkolo la likhonkolo laka
na nyama ya nyama yaka.
Nka eetthiwaka oriwa muukha,
maana alaziwa vamwiili wanlume.”

²⁴ Ti eto nlume oninlikha papaawe na mamaawe khukusanyeya na muukhaawe oowiiri khwiya nyama moote. ²⁵ Oowiiri, Adamu na muukhaawe aari wiiya waazu woohiina haaya.

3

Waaza wa twampi na ohoowa

¹ Nyookha yaari nlavilavi zayita nyama zooshi za ntthuttu Mbwana Nnyizinku ompiyeyo. Khumuuzela muukha eraka: “Atthi Nluku alupa yoori mwihiye mishumo za miitthi zooshi ziriye nwoorotha mphu?”

² Muukha otule khujipu yoori: “Ninaaye ruhusa yooja mishumo za miitthi ziriye nwoorotha mphu, ³ ila Nluku anuuza yoori: ‘Nshumo wa muutthi oriye vakatthi wa woorotha mwihiye wala mwihisape. Mwijaru mwintta ofwa.’”

⁴ Aphano nyookha khumuuzala muukha otule yoori: “Hatha khamwimfwa! ⁵ Maana Nluku ajuwa yoori siikhu mwinttelaavo oja nshumo opo antta ofunuwa maasho enu, mweeyo mwinttela wiiya nkhamya Ye, ojuwa yooshapweya na yootakhala.”

⁶ Muukha khoona yoori muutthi opule waari wooshapweya, mishumo zaya zaari zooshapweyela oja na zaarina fwayita yoojuwisa. Attaapho, khushuma khuja, khumwinkha mannawe na-ye khuja. ⁷ Paata ya toowo, oowiiri khufunuwa maasho aya khujuwa yoori ari waazu. Khurukela mathapa a muutthi oniitthiwaaye mfikeera* khuretta wiiya kuwo zaya.

⁸ N'osila shintto ya Mbwana Nnyizinku eettetaka nwoorotha mphule, wakathi wa pheevu ya matulayi njuwa-looveva, pinaatamu na muukhaawe khujivitha na miitthi nwoorotha ntumphule yoori Mbwana Nnyizinku ahivoone. ⁹ Mbwana Nnyizinku khunkhuwela pinaatamu khumuuzela yoori: “Ori vayi?”

¹⁰ Ye khujipu araka: “Keetta osila shintto yawo nwoorotha mphu, miiyo khoova na khujivitha mwaasa wa wiiya waazu.”

¹¹ Mbwana Nnyizinku khumuuzela theenya yoori: “Wooziwa paani yoori ori waazu? Nshumo wa muutthi opule kookhattaziyeeyo yoori ohije weetta oja?”

¹² Pinaatamu khujipu yoori: “Muukha otu okinkhiyeeyo yoori asala akikhiza, ti ye akinkhiyeeyo nshumo aya opo miiyo khuja.”

[†] **2:19** ‘Adamu’ nzina nttho khwa luuka ya Meebereewu lina maana a nlume. * **3:7** Nfikeera muutthi woolattanana muuyu oriina mishumo zootuva zinjiwaaye pi atthu.

¹³ Mbwana Nnyizinku khumuuzela muukha araka: “Niini eto orettiyeeyo?” Muukha khujipu yoori: “Nyookha ti ye ekittettekhiyeeyo miiyo khuja.”

¹⁴ Aphano Mbwana Nnyizinku khuza nyookha yoori:

“Wiiya waretta vitthu epi,
woolaanikha ti weyo vakatthi wa mifuwo za vaje na nyama zooshi za ntthuttu,
nka weettettanaka erukulu na ojaka ottophe siikhu zooshi z'oohaayi awo.

¹⁵ Kinttela otthaavo wuumani weeyo na muukha;
peewu yawo na peewu ya muukha.

Peewu ya muukha nka yuuvulalisaka eeshwa yawo,
na weeyo nka ottovolaka ekwakuno yaya.”

¹⁶ Mbwana Nnyizinku khumuza muukha yoori:

“Kintta ozitisa thwaapu yawo
amana wiimittha ompatthaka mwaana.
Weeyo onlawa watakhe onlokozela mannawo,
ila mannawo onlawa ooshintte.”

¹⁷ Ye khumuza Pinaatamu yoori:

“Wiiya wansileza muukhaawo
kuja nshumo wa muutthi opu kookhattaziyeeyo,
yalaanikha tuniya yooshi mwaasa wa weeyo,
nka okholaka khaazi yoolipa
yoori opatthe ethu-yooja
ohaayi awo wooshi.

¹⁸ Tuniya eniwinkha wakhula nanna ya miiwa,
weeyo nka ojaka mishumo za ntthuttu.

¹⁹ Okholaka khaazi yoovujuwela
yoori opatthe ethu-yooja yawo
mansha awo ooshi.

Maana weeyo wompaniwa ottophe,
n'oofwa mpakha orutele voottophie.”

²⁰ Pinaatamu khunthaja muukhaawe nzina la Haawa[†], mwaasa wa wiiya maama wa anaatamu ooshi. ²¹ Mbwana Nnyizinku khwaattala kuwo za shapala khunwalisa pinaatamu na muukhaawe.

²² Mbwana Nnyizinku khuri: “Mpakha apha pinaatamu wampattha wi-iya nkhamma fweeyo, ajuwa ethu yooshapweya na yootakhala. Ye ahili-kheleliwe oshuma nshumo wa muutthi w'oohaayi aja yoori eeyane ohaayi wa mileele.” ²³ Paata ya towo, Mbwana Nnyizinku khumwiikaramo nwoorotha wa Eeten, yoori asala alima ottophe otthuupule ompaniweeyo.

²⁴ N'oomwiikaramo pinaatamu nwoorotha phantte lintthamuwaawo njuwa ya Eeten, khutthaamo kerupiina[‡] na phanka ya moottho yaari ozukule-laaye. Ye aarettiye towo yoori esala yeekesela tarikhi yaari weettaaye okhule oriwo muutthi w'oohaayi.

[†] **3:20** Nzina la Haawa lina maana oohaayi. [‡] **3:24** Kerupiina malayikha aneekeselaaye vitthu ttakathiiifu.

4

Ovokoliwa wa Kayiini na Apeele

¹ Adamu khurapalelana muukhaawe Haawa, khwiimittha khumpattha mwaana khuntthaja nzina la Kayiini*. Ye khulupa yoori: “Khwa otakha wa Nnyizinku kampattha mwaana wanlume.” ² Khwiimittha theenya khumpattha mwaana nkina wanlume, ttwiye Kayiini. Khuntthaja nzina la Apeele.

Apeele khwiiya makhampuzi wa pwittipwitthi, Kayiini khwiiya namalima. ³ Siikhu moote, Kayiini khutiisa mishumo za mmashapa oteela omwinkha zaakha Nnyizinku. ⁴ Apeele na-ye zwaamu yawe khutiisa pwittipwitthi etile yaari yamwanzo ottheeriwa ya nliphanko mwawe, khushija khuthawula phantte epile zoosamini waya oteela omwinkha zaakha Nnyizinku, Ye khwiiya wootuveliwa ti Apeele na zaakha yawe. ⁵ Ila Kayiini na zaakha yawe etile aatiisiyeeyo, Nnyizinku khuhituveliwi. Kayiini khukatipukha khuiinamela.

⁶ Nnyizinku khumuuzela araka: “Wakatipukhela-ni khuiinamela? ⁷ Amana weeyo weettetta saana akinuukhupalela? Ila amana weeyo oheettetti saana, ojuwe yoori twampi eri vanlako entta wuuwejela yoori ewiirkhele yuushintte. Weeyo enuuhihajiya oshintta twampi yaya eto.”

⁸ Aphano Kayiini khumuza ttwiye Apeele yoori: “Nlawe ntthuttu.” N'ooziya khunzukuluwela khumuula.

⁹ Paata ya toole, Nnyizinku khumuuzela Kayiini araka: “Ttwiyo Apeele ori vayi?” Khujipu yoori: “Akijuweeni! Namweekesela wa ttwiyyaku ti miyo?”

¹⁰ Nnyizinku khumuuzela theenya araka: “Warettela-ni etthu nkhamma eti? Huula ya taamu ya ttwiyo entta okikhuwela vathi. ¹¹ Nasaapi ethiiti, woolaanikha ti weyo vatuniya ethiito enywiyeeyo taamu ya ttwiyo. ¹² Amana weeyo olima nka ohiruweraka. Vatuniya weeyo nka weettaka ojeettettela nkhamma ntthu wootthira.”

¹³ Kayiini khumuza Nnyizinku yoori: “Hukhumu yaka khuluyeene channu akinkhitiri. ¹⁴ Leelo wakiikara vatuniya apha yoori kihiiye mmote na-weyo, miiyo kinttela ojeettettela nkhamma namathira vatuniya na wakhula anttelaaye okisikana ontta okuula.”

¹⁵ Nnyizinku khunjipu yoori: “Wala! Khahiyo toowo! Wakhula otule anttelaaye owuula oniyya woohukhumwiwa swaafu sapa.” Ye khunttha alama vamwiili yoori wakhula aninsikanaaye ahimuule. ¹⁶ Aphano Kayiini khwumwazeyanana Nnyizinku khulawa khwiikhala nti wa Nooti†, okhulintthamuwaawo njuwa phantte ya Eeteni.

¹⁷ Ye khurapalelana muukhaawe, khwiimittha khumpattha mwanawewe Enookhi. Kayiini khujeka sitati khutthaja nzina ntthintthile la mwanawewe Enookhi. ¹⁸ Enookhi khunvokola Eraati, Eraati khunvokola Mehuyayele, Mehuyayele khunvokola Lameekhi

¹⁹ Lameekhi khuwaarala aakha awiri, mmote nzina lawe laari Aada. Otu nkina lawe laari Siila. ²⁰ Aada khumpattha mwanawewe khuntthaja nzina la Yapaali, paapa wa atthu apale aari wiikhalaaye mmaheema aari ofuwaaye nyama. ²¹ Ttwiye nzina lawe laari Yupaali, oto aari paapa wa atthu apale ooshi animpiyaaye tthakare na apale ampiyaaye phivi. ²² Siila khumpattha mwaana khuntthaja nzina la Tupaali-Kayiini, ye aari funti wa waattala zaana za khoopiri na zuuma. Tupaali-Kayiini aarina nlupuwe aari wiithiwaaye Naama.

* ^{4:1} Nzina nttho la Kayiini linlattana ntthakuzi linraaye kampattha † ^{4:16} Nooti nzina nttho maana aya ojeettettela.

²³ Lameekhi khuwooga aakhaawe yoori:

“Aada na Siila!
Mwikisiileze aakhaaka:
Kamuula ntthu mwaasa wookivulalisa,
na shapu mmote mwaasa wookiluwattha.

²⁴ Amana Kayini ariphwa hukhumu swaafu sapa,
Lameekhi onttela oriphwa swaafu sapiini na sapa.”

Ovokoliwa wa Seethi

²⁵ Adamu khurapalelana muukhaawe theenya khumpattha mwaana khuntthaja nzina la Seethi‡, Haawa khuri: “Nnyizinku akinkha mwaana nkinoko wonriphelavo Apeele otule ooliweeyo ti Kayini.” ²⁶ Seethi na-ye khumpattha mwaana khuntthaja nzina la Enooshi.

Wakathiaya otthuupo phi laaziyeovo waaputwiwa nzina la Nnyizinku.

5

Peewu ya Adamu

¹ Eti warakha yoovokola wa peewu ya Adamu.

Wakathi Nluku amumpiyeyo pinaatamu, aamumpiyeyo wa wiiya nkhamaye; ² nlume na muukha ti ye awompiyeyo. N'owompa khuwaaparikhya. Khuwaatthaja nzina la “anaatamu”.

³ Adamu afiyeovo nyaakha miiya na talaathiini khumpattha mwaana wa wiiya nkhamaye na khwa wumpo awe khuntthaja nzina la Seethi.

⁴ Paata yonvokola Seethi, Adamu khwiikhala theenya nyaakha miiya naane khuwaapattha aana a waatta aalume na aakha. ⁵ Adamu afwa arina nyaakha miiya tiisiya na talaathiini.

⁶ Seethi afiyeovo nyaakha miiya na mithaanu, khunvokola Enooshi.

⁷ Paata yonvokola Enooshi, Seethi khwiikhala theenya nyaakha miiya naane na sapa khuwaapattha aana akina aalume na aakha. ⁸ Seethi afwa arina nyaakha miiya tiisiya na khumi na miwiri.

⁹ Enooshi afiyeovo nyaakha tiisiini, khunvokola Kenaani. ¹⁰ Paata yonvokola Kenaani, Enooshi khwiikhala theenya nyaakha miiya naane na khumi na mithaanu, khuwaapattha aana akina aalume na aakha. ¹¹ Enooshi afwa arina nyaakha miiya tiisiya na mithaanu.

¹² Kenaani afiyeovo nyaakha sapiini, khunvokola Mahalaleeli. ¹³ Paata yonvokola Mahalaleeli, Kenaani khwiikhala theenya nyaakha miiya naane na arupayiini, khuwaapattha aana akina aalume na aakha. ¹⁴ Kenaani afwa arina nyaakha miiya tiisiya na khumi.

¹⁵ Mahalaleeli afiyeovo nyaakha siithiini na mithaanu, khumpattha mwaana khuntthaja nzina la Yareeti. ¹⁶ Paata yonvokola Yareeti, Mahalaleeli khwiikhala nyaakha miiya naane na talaathiini khuwaapattha aana akina aakha na aalume. ¹⁷ Mahalaleeli afwa arina nyaakha miiya naane na tiisiini na mithaanu.

¹⁸ Yareeti afiyeovo nyaakha miiya na siithiini na miwiri, khumpattha mwaana khuntthaja nzina la Henookhi. ¹⁹ Paata yonvokola Henookhi, Yareeti khwiikhala nyaakha miiya naane, khuwaapattha aana akina aalume na aakha. ²⁰ Yareeti afwa arina nyaakha miiya tiisiya na siithiini na miwiri.

²¹ Henookhi afiyeovo nyaakha siithiini na mithaanu, khumpattha mwaana khuntthaja nzina la Methuseela. ²² Paata yonvokola Methuseela, Henookhi khulotta mwentto wa Nnyizinku nyaakha miiya ttatthu,

‡ ^{4:25} Nzina nttho la Seethi khwa luuka ya Meebereewu linlupaaye yoori ‘oninkha’.

khuwaapattha aana akina aalume na aakha. ²³ Ye eekhaliye nyaakha miiya ttatthu na siithiini na mithaanu. ²⁴ Henookhi aarina osilana nwulweene na Nluku. Ye eettiye woophaziwa ti Nluku.

²⁵ Methuseela afiyeevo nyaakha miiya na thamaaniini na sapa, khunvokola Lameekhi. ²⁶ Paata yonvokola Lameekhi, Methuseela khwiikhala nyaakha miiya sapa na thamaaniini na miwiri, khuwaapattha aana akina aalume na aakha. ²⁷ Methuseela afwa arina nyaakha miiya tiisiya na siithiini na tiisiya.

²⁸ Lameekhi afiyeevo nyaakha miiya na thamaaniini na miwiri khumpattha mwaana mmote. ²⁹ Mwaana otule mmote ampatthiyeeyo khuntthaja nzina la Nuuhi*, ye khulupa yoori: “Khwa khaazi zoolwaaza ninkholaa zo nilimaka tuniya eti elaa niweeyo ti Nnyizinku, mwaana otu ti ye anttela wiitthaaza rooho zetthu.” ³⁰ Paata yonvokola Nuuhi, Lameekhi khwiikhala theenya nyaakha miiya thaanu na tiisiini na mithaanu, khuwaapattha aana akina aalume na aakha. ³¹ Lameekhi afwa arina nyaakha miiya sapa na sapiini na sapa.

³² Nuuhi eekhaliye nyaakha miiya thaanu khuwaapattha aana aalume khuwaatthaja mazina: Sheemu, Haamu na Yafeeti.

6

Otakhala rooho wa anaatamu

¹ Wakathi anaatamu aaziyeovo waattelana muulumwenku na khuwa-vokola aana aakha, ² mahaakhimu* khuwoona yoori aakha apale aari ooshapweya, wakhula mmote wa yo khusala awaathuula apale aari owaatakhaaye. ³ Aphano Nnyizinku khuri: “Akintela onlikhela pinaatamu phuumu z’oohaayi khwa mileele, maana ye nyama ya taamu; siikhu zawe enttela wiiya nyaakha miiya na eshiriini.”

⁴ Wakathi aya opo muulumwenku aarimo atthu awulu-awulu na oozi-vala, aruteliye wiiyavo theenya. Aari aana aalume aavokoliweeyo pi mahaakhimu n’oorapalelana aana aakha a anaatamu. Aana atthaapo, pa yo aari atthu oozivala na ootafikhana.

⁵ Nnyizinku khoona yoori vatuniya zootakhala za anaatamu zeetta ovira zeekezeleyaka; Menttezi aya ooshi aari ooretta vitthu zootakhala wakhula siikhu. ⁶ Aphano Nnyizinku khukasirikha mwaasa woomumpa pinaatamu vatuniya, khwiiya woolemeliwa nroho mwawe. ⁷ Khuri: “Kintta owaafujavo anaatamu aya apa kiwompiyeeyo voolumwenku apha; waaza anaatamu, nyama, anyanyama, na anyannyi o’otulu, kiwookasirikha mwaasa woowumpa.”

⁸ Ila Nuuhi khwiiya ntthu aapatthiyeeyo rehema omaasho wa Nnyizinku.

Aaraka wa Nuuhi

⁹ Eti hatiithi ya Nuuhi. Vakatthi wa atthu ooshi ye otthwe paasi ti ye ari ntthu w’eehkweeli na washariya, aari weettettelaaye mwentto wa Nluku ¹⁰ Nuuhi awaavokoliye aanaawe aalume attatthu; Sheemu, Haamu na Yafeeti.

¹¹ Olumwenku waazukuleliwe pi vitthu zootakhala na zoohusuti omaasho wa Nnyizinku. ¹² Nnyizinku khweekesa olumwenku khusala oona ori wooharipweya, maana zumpe zooshi zaari zooharipweya menttezi aya.

* **5:29** Nzina nttho la Nuuhi khwa luuka ya Meeberewu lalattanana na ntakhuzi liriina maana a rehema. * **6:2** Mahaakhimu apa anlupiwaaye mphu aari atthu ookhomaala na oolepisana, aari wiitthiwa yoori aana a Nluku; na aarina ofwalume nwulweene.

¹³ Nnyizinku khumuza Nuuhi yoori: “Kintta wiishisa zumpe zooshi z’oohaayi, vamote na olumwenku aya kipweche. ¹⁴ Weeyo omwaat-tale aaraka† nwulweene na thaapwa za mpila, onremule ontthe kaatthi, onkokotte ontthe piriniisi oje waya na nkatthi. ¹⁵ Omwaattale nanna eti: phiima miiya na talaathiini na thaanu olepa waya, phiima eshiriini na piiri na nuusu owula waya, phiima khumi na ttatthu chanka yaya. ¹⁶ Ontthe tarato enfiyaaye nuusu ya phiima vatulu vaya. Waawanye tarato moote vathi, moote vakatthi, kinoko vatulu, ontthe nlako mpavu mwaya.

¹⁷ Onjuwa! Miiyo kasaleela ozamisa olumwenku wooshi na maati a nnyeri, kiishise zumpe zooshi ziriina phuumu z’oohaayi ziriye vathi wa pinku. Zooshi ziriye vatuniya zinttela ofwa. ¹⁸ Ila wahati aka kinretta na-weyo, onttela weetta mmwaarakka, weeyo, muukhaawo, aanaawo na aakhaaya. ¹⁹ Othuule nyama wakhula jaati piiri-piiri, yeelume na yekha opakhire mmwaarakka mwawo yoori ziiye haayi vamote na-weyo. ²⁰ Wakhula jaati ya anyannyi, wakhula jaati ya nyama, wakhula jaati ya epile zinjipurulaaye vathi, zooshi piiri-piiri ziiye vamote na-weyo yoori ziiye haayi. ²¹ Othuule vitthu zooshi zinjiwaazo opwehe yoori osala oja weeyo na nyama epo zooshi.”

²² Nuuhi khuretta zooshi epile aarumiweezo ti Nnyizinku.

7

Nuuhi na ajamaaze ampakhira mmwaarakka

¹ Aphano Nnyizinku khumuza Nuuhi yoori: “Weeyo na ajamaazo ooshi opakhire mmwaarakka. Vakatthi wa atthu apa ooshi ariivo, Miiyo kawoona weeyo paasi wiiya ntthu washariya. ² Othuule nyama za halaali sapa zeelume na sapa zeekha ila epile zoohiiyi za halaali othuule piiri-piiri yeelume na yekha. ³ Owaathuule theenya anyannyi sapa eelume na sapa eekha yoori jaati yaya ehaashikhe. ⁴ Mmana zivira siikhu sapa kinlawaa kanyisele vuula vatuniya siikhu arupayiini nthana na osikhu, kipweteche zumpe zooshi kumpiyeezo.”

⁵ Nuuhi khuretta zooshi epile Nnyizinku anrumiyeezo.

⁶ Wakathi maati aazamisiyevo tuniya, Nuuhi aari oretta arina nyaakha miiya sitha. ⁷ Ye khupakhira mmwaarakka vamote na muukhaawe, aanaawe na aakhaaya mwaasa wa maati a nnyeri aari oteelaaye ozamisa olumwenku. ⁸ Nyama za halaali na zoohiiyi za halaali, anyannyi na nyama epile zinjipurulaaye vathi, ⁹ khupakhira mmwaarakka vamote na Nuuhi piiri-piiri zeelume na zeekha, nkhamma ethiipo Nnyizinku aamuuziyeezo. ¹⁰ Ziviriyeveo siikhu sapa, maati oozamisa olumwenku khwaaza opuwa vatuniya.

¹¹ Siikhu Nuuhi afiyeveo nyaakha miiya sitha, mweezi waphiiri orina siikhu khumi na sapa, khuphutuwa matthatta a vathi ooshi apale awiicha na milako za pinku khufukuwa. ¹² Khunya vuula vatuniya siikhu arupayiini nthana na osikhu.

¹³ Siikhu ethiito Nuuhi, muukhaawe, aanaawe Sheemu, Haamu, Yafeeti, na aakha attatthu a aanaawe aarettiye ari mmwaarakka. ¹⁴ Nuuhi aa-pakhiriye nyama zooshi za ntthuttu, mifuwo zooshi za vaje, nyama epile zooshi zinjipurulaaye, na anyannyi a wakhula jaati na epile zooshi za wiiyana mapaphelo. ¹⁵ Zumpe zooshi ziriina phuumu z’oohaayi khupakhira piiri-piiri mmwaarakka mphule vamote na-ye. ¹⁶ Nyama zooshi zeettiyeemo zaari zeekha na zeelume za wakhula jaati nkhamma ethiipo Nluku anrumiyeezo. Nawiisha opakhira, Nnyizinku khufuka nlako wa aaraka.

† ^{6:14} Aaraka yaari kalawa yawaattaliwa nkhamma kaasha.

¹⁷ Nnyeri weeshiye siikhu arupayiini vatuniya. Maati khuvira eekezelyaka mpakha khweeleela aaraka ¹⁸ Maati eetta ovira atepaka waatta mpakha aaraka otule khusala eeleela vatulu a maati. ¹⁹ Khwaatta channu mpakha khufiyelela ozamisa nyaako. ²⁰ Maati khuvikana nyaako epile kiyasi ya phiima sapa. ²¹ Zumpe zooshi z'oochaayi zaari vatuniya khufwa; anyannyi, mifuwo za vaje, nyama za ntthuttu, epile zinjipurulaaye vathi na anaatamu ooshi. ²² Zumpe zooshi epile zaariina phuumu y'oochaayi, zaari ovumulaaye voolumwenku apha khufwa. ²³ Nnyizinku khupwetechza zumpe zooshi z'oochaayi zaari vatuniya. Pinaatamu, nyama za ntthuttu, na epile zinjipurulaaye vathi na anyannyi o'otulu zooshi khupwetehya. Khusala Nuuhi otthwe na ajamaaze na nyama epile zaari vamote na-ye mmwaaraka.

²⁴ Maati aarupaziye vatuniya siikhu miiya na hamusiini.

8

Okukutthala wa Nnyeri

¹ Ila Nluku khuhinsahawu Nuuhi na nyama epile za ntthuttu na mifuwo za vaje epile aarinaazo mmwaaraka, khuperekha pheevu yoori evitelele vatuniya, maati khwaaza ovwa.

² Matthatta apale awiicha na milako za pinku khufukiwa, vuula khwaamus, ³ maati khwaaza ovwa vattiithi-vattiithi mpakha siikhu miiya na hamusiini. ⁴ Siikhu khumi na sapa ya mweezi wasaapa aaraka otule khuphweruwa vanyaako za Araraati. ⁵ Maati apale khusala avva paasi mpakha siikhu yamonsi mweezi wakhuumi khwaaza wooneya mithoma za nyaako.

⁶ N'ovira siikhu arupayiini Nuuhi khufukula ettakha* ya aaraka etile aattaliyeeyo. ⁷ Khumfukulela nakhuku khusala avava azukulelaka mpakha maati ovwa. ⁸ Elottelanaka khufukulela jiwa yoori yoone nkhamma maati avva vatuniya. ⁹ Ila jiwa etile khuhisikani puuro yoomorela khurutela mmwaaraka, mwaasa yoori tuniya nalelo yaari ehinavuuwe. Jiwa khurutela wa Nuuhi, khusarula nkhono awe khukhola jiwa etile khuvirisa mmwaaraka. ¹⁰ Nuuhi khuvira aejaka mpakha siikhu sapa, khuruma jiwa ethiitile swaafu yaphiiri. ¹¹ Khuruti njuwa-looveva elumiye nthapa liwishi l'ooluveera, aphano Nuuhi nawoona khujuwa yoori maati avva vatuniya. ¹² Khuweja theenya siikhu sapa khuruma jiwa ethiitile opheya, ila swaafu eti khuhiruti.

¹³ Siikhu yamonsi ya mweezi wa mfunko monsi wakathi Nuuhi aarinaavo nyaakha miiya sitha na mmote, maati apale aazamisiyeeyo tuniya khukakhamela. Nuuhi khufunula tarato ya aaraka khoona yoori nshaka wooma. ¹⁴ Siikhu eshiriini na sapa ya mweezi waphiiri, tuniya khuuma saaneene.

¹⁵ Aphano Nnyizinku khumuza Nuuhi yoori: ¹⁶ "Wiishukhemo mmwaaraka mpho weeyo, muukhaawo, aanaawo na aakhaaya. ¹⁷ Wiishushe nyama zooshi oriinaazo waaza anyannyi, nyama na epile zinjipurulaaye vathi. Osarule zimwazeyele vatuniya, zittheerelane zaattelane."

¹⁸ Nuuhi na muukhaawe, aanaawe na aakhaaya khwiishukha mmwaaraka mphule. ¹⁹ Khusarulamo nyama epile zooshi zinjipurulaaye vathi, anyannyi ooshi, na zooshi ethiipile zineettetaaye vatuniya, wakhula moote na jaati yaya.

* **8:6** Ettakha eleelo eti enriwa janela.

²⁰ Nawiisha, Nuhi khunjeka alitaari woorettavo twaha yoomwinkha kafwara Nnyizinku. Ye khuthawula nyama epile kinoko zaya za halaali, na anyannyi a halaali akinoko aya, khushija, khulawa khuretta twaha yoolukuziwa vaalitaari. ²¹ Nnyizinku khusiila arufu yonkhurunusha rooho khulupa mwennyeweru yoori: “Akinteela orutela theenya olaani tuniya mwaasa wa pinaatamu, eeyaru pure wootakhala rooho ovokoliwa-wene. Akinteela orutela opwetecha zumpe zooshi nkhama nanna eti kirettiyeozo.

²² Mmana olumwenku wiiyakavo oniiyana
wakathi woozala na wa wuurula,
woozizima na wa haari,
elimwe na mwiita,
nthana na osikhu,
vitthu epo khinteela wiisha.”

9

Wahati wa Nnyizinku na Nuhi

¹ Nluku khumparikhya Nuhi na aanaawe awoozaka yoori: “Mwivokolelane mwaattelane mwiitaale voolumwenku. ² Nyama zooshi za voolumwenku, epi za ntthuttu, anyannyi o'otulu, epi zinjipurulaaye vathi, na swi za mpahari, zinttela wiiya zoowoovani mweeyo channu. Zooshi epo mwinttela oshintta. ³ Zooshi zinoonaaye na zineettettaaye zinttela wiiya etthu-yooja yenu, nkhama ethiipo kiwinkhiyeenini mathapa, zooshi kawinkhani.

⁴ Ila mwihije nyama na taamu yaya, maana taamu ohaayi. ⁵ Wakhula nyama enimuulaaye ntthu, na pinaatamu animuulaaye nzaawe, anttela ojipu mmakhono Mwaka.

⁶ ‘Mwaasa yoori Nluku amumpa pinaatamu ajilattanisaka mwennyewe,
otule animuulaaye pinaatamu
na-ye ontta wuuliwa ti pinaatamu.’

⁷ Ila mweeyo mwivokolelane mwaattelane mwiitaale voolumwenku.”

⁸ Aphano Nluku khumuza Nuhi vamote na aanaawe araka: ⁹ “Nasaapi eti Kinretta wahati aka na-weyo na peewu yawo, ¹⁰ na zooshi ziriinaazo ohaayi opakhuwaniyeeyo mmwaarakira ziriye vamote na-weyo: anyannyi, mifuwo, nyama za ntthuttu na zumpe zooshi za ntuniya. ¹¹ Kinretta wahati aka na-mweyo; akinteela opwetecha theenya zumpe zooshi na maati a nnyeri, wala tuniya khinteela ozama theenya na maati a nnyeri.”

¹² Nluku khulupa theenya: “Eti alama ya wahati aka miiyo na-weyo na zumpe zooshi ziriye vamote na-weyo, khwa mileele: ¹³ katthaamo nkhankanyama mmawiku yoori wiiye alama ya wahati miiyo na tuniya. ¹⁴ Amana kifinikha pinku na mawiku, khupuwa nkhankanyama, ¹⁵ phi kinttelaaye wuupuwela wahati aka miiyo na-weyo na zumpe zooshi. Khanrutela theenya maati a nnyeri ozamisa zumpe zooshi z'oohaayi. ¹⁶ Nkhankanyama n'oopuwa mmawiku, nka kifikhiraka wahati opule kirettiyeeyo wa mileele miiyo na zumpe zooshi z'oohaayi ziriye vatuniya.”

¹⁷ Nawiisha Nluku khumuza Nuhi yoori: “Eti alama ya wahati kirettiyeeyo miiyo na zumpe zooshi ziriye vatuniya.”

Atthu ooshi ariye ntuniya peewu yaya yo

¹⁸ Aana a Nuuhi aapakhuwaniyeeyo mmwaaraka mphule pi apa: Sheemu, Haamu na Yafeeti. Haamu aari paapa wa Kanaani. ¹⁹ Apa attatthu aari aana a Nuuhi, atthu ooshi amwazeyeliyeeyo vatuniya avokoliwa khwa yo.

²⁰ Nuuhi aari namalima, ye ti tthakuzi woozala mirayi za wuuva. ²¹ Siikhu moote, khunywa viinyu ya nshumo opule khunhapala khuvuleya kuwo zawe zooshi nheema mwawe. ²² Haamu, paapa wa Kanaani, khuvira nheema khoona owaazu wa papaawe. Khulawa khuwooza attwiize apale awiri aari vaje. ²³ Aphano khulankha Sheemu na Yafeeti khuthuulaza juupa khuvikela mmafuzi mwaya khusala eettetta na enyokonyoko yoori ahoone owaazu wa papaaya n'oofiya khumfinikha.

²⁴ Wakathi Nuuhi emwaamuwiyeeyo viinyu etile, khujuwa mattakhuzi aaviriseliweeyo ti mwanawewe otu w'eefutti. ²⁵ Aphano ye khuri:

“Woolaanika ti Kanaani,
onttela wiiya mwiitthwaana wa
amwiitthwaana a attwiize.”

²⁶ Theenya khuri:

“Asifwiwe Mbwana Nnyizinku wa Sheemu,
anrette Kanaani wiiya mwiitthwaana wa Sheemu.

²⁷ Nnyizinku anwulise Yafeeti;
khabila yawe yiiye vamote na ya Sheemu,
Kanaani eeye mwiitthwaana aya.”

²⁸ Paata yawiisha nnyeri, Nuuhi eekhaliye nyaakha miiya ttatthu na hamusiini. ²⁹ Nuuhi afwa arina nyaakha miiya tiisiya na hamusiini.

10

Aana a Nuuhi

¹ Eti warakha ya peewu ya Sheemu, Haamu na Yafeeti, aana a Nuuhi. Yo aawaapatthiye aana wakathi opule wiishiyeeyo nnyeri.

² Aana a Yafeeti aari apa: Komeeri, Makooku, Matayi, Yavani, Tupaali, Mesheki na Tirasi. ³ Aana a Komeeri aari apa: Ashikenazi, Rifwathi na Tokaama. ⁴ Aana a Yavani aari apa: Elisha, Tarishishi, Kitimu na Rotanimu.

⁵ Khwa aana atthaapo, atthu khumwazeyela nkerekhere wa nttima na mvisura. Eti peewu ya Yafeeti wakhula khabila na lihimo laya na nti aya na luuka yaya.

⁶ Aana a Haamu aari apa: Kuushi, Misuri, Puuti na Kanaani. ⁷ Aana a Kuushi aari apa: Seepa, Havila, Saapita, Raama na Sapiteeka. Aana a Raama aari apa: Sheepa na Tetaani.

⁸ Kuushi khunvokola theenya Ninrooti, otu ti ye aaziyeeyo wiiya ntthu wooshintta vathi apha. ⁹ Ye aari namasaya wookhomaala omaasho wa Nnyizinku. Ti eto enlupiwaaye yoori “Ntthu nkhamma Ninrooti, namasaya wookhomaala omaasho wa Nnyizinku”. ¹⁰ Ofwalume awe waaza nti wa Babeeli, Ereki na Akati, zooshi epo zaari nti wa Shinaari. ¹¹ Khulankha nti wa Shinaari khulawa mpakha Ashuuru khujeka sitati ya Neniive, ya Rehopoothi-Yiiri na ya Kaala, ¹² na sitati ya Reseeni, sitati khuluyeene yaari vakatthi wa sitati ya Neniive na ya Kaala.

¹³ Misuri khunvokola Aluti, Anaamu, Alehaapi, Anafituhi, ¹⁴ Apaturusi na Akasuluhi (apa pa yo awaavokoliyeeyo Afiliishiti) na Akafitoori.

¹⁵ Kanaani khunvokola Sitooni mwanawewe wa mwanzo na Ahiiti, ¹⁶ theenya na Ayepuzi, Amoori na Akirikashi, ¹⁷ Ahivi, Ariki, Asiini, ¹⁸ Aravati, Azemaari na Ahamati.

Khwa ethiipo lihimo la Akanaani khumwazeya. ¹⁹ Mwiinano wa Akanaani waaziye Sitooni olawaka Keraari, mpakha Gaaza, na phantte ya Sotooma na Komoora, Atima na Sepooyimu mpakha Laasha.

²⁰ Apa aari aana a Haamu na mahimo aya, luuka zaya, miti zaya na khapila zaya.

²¹ Sheemu ntunkhulu wa Yafeeti, na-ye aawaavokoliye aana; Sheemu aari pwaapu wa aana a Heebere*.

²² Aana a Sheemu aari apa: Elamu, Ashuuru, Arifwakisaati, Luthi na Aramu. ²³ Aana a Aramu aari apa: Wuuzi, Huuli, Keteeri na Maashi.

²⁴ Arifwakisaati khunvokola Sheela, na-ye Sheela khunvokola Heebere.

²⁵ Heebere khuwaavokola aana awiri: mmote khuntthaja nzina la Peleekhi† mwaasa yoori siikhu zawe tuniya yeettiye waawanyiwa. Otu waphiiri khuntthaja nzina la Yokitaani. ²⁶ Yokitaani khunvokola Alimotathi, Shelefu, Hazarimawethi, Yeera, ²⁷ Hatoramu, Yuzaali, Tiikala, ²⁸ Opaali, Apimayeeli, Sheepa, ²⁹ Ofiri, Havila na Yopaapu, ooshi apa aana a Yokitaani. ³⁰ Apa aari wiikhala waaza nti wa Meesha mpakha nnyaako phantte ya malawa-juwa nti wa Sefaari. ³¹ Apa aari aana a Sheemu na mahimo aya, luuka zaya, miti zaya na khapila zaya.

³² Opu ojama wa aana a Nuuhi, waawanyeyiyeyo khapila khwa khapila na peewu yaya paata yawiisha nnyeri. Khapila zooshi zimwazeyelyeyo voolumwenku zalankha voojama otthuupo.

11

Otapanyeya wa Luuka

¹ Wakathi aya opo olumwenku wooshi waaria luuka moote na nanna moote yoottakhula.

² Atthu aalankhiye malawa-juwa khusikana ntta po la Shinaari khwiikhala attaapho.

³ Khusiilana yoori: “Nlaweni nuupe thizolo nooche saaneene.” Thizolo epile khuretta wiiya mawe, piriniisi khunretta wiiya mattakha. ⁴ Theenya khuri: “Nlaweni nijeke sitati yawiyyana korofwa khuluyeeene enkomaaye pinku, yoori nzina letthu liiye loojuwanikha, nihiye woomwazeyela olumwenku wooshi.”

⁵ Paata ya toole, Nnyizinku khwiishukha yoori oone sitati ya korofwa etile aari ojekaaye atthu apale. ⁶ Ye khuri: “Moone! Atthu apa amoteru, ooshi anttakhula luuka moote. Eti arettiyeeyo eetta waaza, khaavo anttelaaye owaakarawela etile awaziyeeyo. ⁷ Nlaweni niishukhe navirikanise luuka anttakhulaaye yoori ahisala asilana mmote na nzaawe.”

⁸ Ethiito, khukaraweleya ojekiwa sitati etile, Nnyizinku khuwaamwazela olumwenku wooshi. ⁹ Ti eto sitati etile khutthajiwa nzina la “Babeeli*”, mwaasa wa Nnyizinku ovirikanisa luuka ya anaatamu ooshi. Attaapho, Nnyizinku khuwaamwazela olumwenku wooshi.

Peewu ya Sheemu

¹⁰ Eti peewu ya Sheemu. Sheemu afiyyeeyo nyaakha miiya khunvokola mwanawewe Arifwakisaati, nyaakha miwiri paata ya nnyeri ovira.

* ^{10:21} Aana a Heebere pi atthaapo azaniyeeyo nzina la Hebereeewu. † ^{10:25} Nzina nttho la Peleekhi maana aya waawanyiwa.

* ^{11:9} Babeeli enlattanana ntakuzi liriina maana ootapanyeya”.

¹¹ N'onvokola Arifwakisaati, eekhaliye nyaakha miiya thaanu, khuwaavokola theenya aana aalume na aakha.

¹² Arifwakisaati afiyyevo nyaakha talaathiini na mitaanu, khunvokola Sheela. ¹³ Paata yonvokola Sheela, eekhaliye nyaakha miiya nne na mitatthu, khuwaavokola theenya aana aalume na aakha.

¹⁴ Sheela afiyyevo nyaakha talaathiini khunvokola Heebere.

¹⁵ N'onvokola Heebere, eekhaliye nyaakha miiya nne na mittathu, khuwaavokola theenya aana aakha na aalume.

¹⁶ Heebere afiyyevo nyaakha miiya nne na talaathiini khunvokola Peleekhi. ¹⁷ N'onvokola Peleekhi, eekhaliye nyaakha miiya nne na talaathiini, khuwaavokola theenya aana aalume na aakha.

¹⁸ Peleekhi afiyyevo nyaakha talaathiini khunvokola Reewu.

¹⁹ N'onvokola Reewu, eekhaliye nyaakha miiya piiri na tiisiya, khuwaavokola theenya aana aalume na aakha.

²⁰ Reewu afiyyevo nyaakha talaathiini na miwiri khunvokola Serukhi.

²¹ N'onvokola Serukhi, eekhaliye nyaakha miiya piiri na sapa khuwaavokola theenya aana aakha na aalume.

²² Serukhi afiyyevo nyaakha talaathiini khunvokola Nahoori.

²³ N'onvokola Nahoori, eekhaliye nyaakha miiya piiri khuwaavokola theenya aana aalume na aakha.

²⁴ Nahoori afiyyevo nyaakha eshiriini na tiisiya khunvokola Teera.

²⁵ N'onvokola Teera, eekhaliye nyaakha miiya na khumi na tiisiya, khuwaavokola theenya aana aalume na aakha.

²⁶ Teera afiyyevo nyaakha sapiini, khunvokola Eburamu, Nahoori na Hara.

²⁷ Eti peewu ya Teera. Teera khunvokola Eburamu, Nahoori na Hara. Hara khunvokola Loothi. ²⁸ Hara khufwa sitati ya Wuuri, nti wa Babilooniya tuniya aavokoliweewo, ila papaawe khusala ari haayi. ²⁹ Eburamu na Nahoori khuloola. Muukha wa Eburamu aari wiitthiwa Suhuriya, na-ye muukha wa Nahoori nzina lawe aari Miilika, mwaana wa Hara, aarina mwaana nkina theenya aari wiitthiwaaye Ishika. ³⁰ Ila Suhuriya khaarina aana mwaasa woohiina mavokozi. ³¹ Teera khulankha sitati ya Wuuri, nti wa Babilooniya, eettaka Kanaani. Alawaka khunthuula mwanawewe Eburamu na ntuluwe Loothi, mwaana wa Hara, vamote na nkhewewe Suhuriya, muukha wa Eburamu. Ila afiyyevo sitati ya Harani khuhivikani, khwiikhala ottuukho. ³² Teera khufwa Harani arina nyaakha miiya piiri na mitaanu.

12

Okhuwelawa wa Ebura hima ti Nnyizinku na waahitiwa wawe

¹ Siikhu moote, Nnyizinku khumuuzza Eburamu araka: "Olikhe tuniya yawo, na ajamaazo, na vaje wa apapazo olawe tuniya kinttelaaye wuthoonyeza. ² Kinteela wuuretta wiiya paapa wa peewu ya waatta, kinteela wuuparikhiya na onteela wiiya woojuwanikha, kinteela owaaparikhiya atthu akina mwaasa wa weeyo. ³ Kiniwaaparikhiya apale anuuparikhiyaaye, na kininlaani otule anuulaanaaye. Khwa weyo enteela wiiya zooparikhiyiwa khabila zooshi za voolumwenku."

⁴ Eburamu khulankha khusala alawa nkhama ethiipo Nnyizinku arrumiyeezo. Ye aalawiye vamote na Loothi, wakathi aaliyyeewo Harani aari oretta arina nyaakha sapiini na mitaanu. ⁵ Khunthuula muukhaawee Suhuriya na Loothi mwaana wa ttwiye, na mali zawe zooshi aariinaazo, vamote na amwiithwaana awe aawaapatthiyeeyo Harani, khusala alawa

tuniya ya Kanaani. N'oofiya tuniya ya Kanaani, ⁶ ye khuvira eettettaka tuniya aya etile, khulawa mpakha Shekemu, phantte ya Moore ohali waariiwo muutthi nwulweene*. Wakathi aya opule Akanaani aari oretta eekhalaka tuniya ethiitile.

⁷ Nnyizinku khunteela Eburamu, khumuza yoori: “Tuniya eti kinteela winkha peewu yawo”. Aphano Eburamu khunjekela alitaari† Nnyizinku attaphale. ⁸ Eeshiyeevo, khusala eetta phantte ya kusini onyaako wa malawa-juwa ya Beetele. N'oofiya onyaako okhule, khweemesa heema yawe. Beetele yaari okhu lintupweelaawo njuwa, Aayi yaari okhu lintthamuwaawo njuwa. Ye khunjekela alitaari Nnyizinku khwaaputu nzina la Nnyizinku. ⁹ Aphano, ye khusala avira alawaka mpakha Nikeepu, phantte ya kusini ya Kanaani.

Eburamu na Suhuriya antta tuniya ya Misuri

¹⁰ Tuniya ya Kanaani yaapuwiywero jala ya waatta, aphano Eburamu khulankha khusala alawa tuniya ya Misuri yoori eekhalewo siikh vattithiiru.

¹¹ Asaleelaka ofiya, khumuza muukhaawe Suhuriya yoori: “Osileze, miyo kajuwacha yoori weeyo o muukha wooshapweya. ¹² Amisuri n'oozoona anttela olupa yoori weeyo o muukhaaka, antta okuula yoori weeyo osale nayo. ¹³ Amana wuuzeliwa olupe yoori nlupwaaka, ahikuule na akikhole saana mwaasa wa weeyo.”

¹⁴ Wakathi Eburamu afiyyevo, Amisuri khumoona Suhuriya yoori aari muukha wooshapweya channu. ¹⁵ Mifwalume za Firawuna, amooniyeevo muukha otule, khulawa omuuza Firawuna yoori amoona muukha wooshapweya. Pi apho khunthuula khunlawana wa Firawuna.

¹⁶ Eburamu aakholiwe saana ti Firawuna‡ mwaasa wa muukha otule, khwinkhiwa pwittipwitthi, mompe, amwiitthwaana aalume na aakha, apuuru na khaval.

¹⁷ Ila Nnyizinku khunhukhunu Firawuna, khuntiisela pala ya waatta na ajamaaze, mwaasa wa Suhuriya muukha wa Eburamu. ¹⁸ Aphano, Firawuna khunkhuwelisa Eburamu, khumuuzela yoori: “Mwaasa aya niini okirettelaka toono? Wahaakuuziye yoori otu muukhaawo? ¹⁹ Khi apho waari olupaaye yoori ti nlupuwo? Mwaasa wa weeyo ori nlupuwo, ti eto yaakipathisiyeyo onrala. Apho muukhaawo otu, onthuule olawe!” ²⁰ Aphano Firawuna khuwaaruma atthu awe omperekha Eburamu yoori aleemo mmuti mphule na muukhaawe na vitthu zawe zooshi.

13

Omwazeyana wa Eburamu na Loothi

¹ Aphano Eburamu khulaawo Misuri khweetta phantte ya kashikhazini khulawa mpakha Nikeepu, ye na muukhaawe na vitthu zawe zooshi, vamote na Loothi. ² Eburamu aari thaajiri nwulweene. Aarina nyama za waatta, na feeta na thahapu.

³ Ye khulaawo Nikeepu, khulawa phantte ya kashikhazini ajeettettelaka wakhula phantte mpakha nti wa Beetele, attaphale eemesiyeevo heema yawe omwanzo, nakatthi-nakatthi ya Beetele na Aayi. ⁴ Attaaphale anjekiyeevo alitaari, ye khwaaputu nzina la Nnyizinku. ⁵ Na-ye Loothi otule aari weettettanaaye Eburamu, aarina pwittipwitthi, mompe na heema za waatta.

* ^{12:6} Muutthi opo nwulweene, waari vahali aari olompakaavo Akanaani na opiiyavo sako. ‘Moore’ maana aya ‘mwanlimu’. † ^{12:7} ‘Alitaari’ meeza a mawe othateliwa vahali yaari orettiwakaavo twaha yoolukuziwa ya Nnyizinku. ‡ ^{12:16} Firawuna: Khwa luuka ya Meebereewu nzina nttho lina maana la mfwalume wa Misuri.

⁶ Khayaari owaheya wiikhala vamote mwaasa yoori nti opule khawaarina tthuttu yoofiyela ojisa nyama zaya. ⁷ Pi apho, khupuwa onyakulisana amakhampuzi a Eburamu na amakhampuzi a Loothi. Wakathi aya opo Akanaani na Aperizi aari oretta eekhalaka nti otthuupule.

⁸ Eburamu khumuza Loothi yoori: “Ohiyevo ohisiilani miiyo na-weyo, wala amakhampuzi aka na awo, mwaasa yoori ojama ethu mmote. ⁹ Tuniya yooshi khiri mmakhono mwawo? Nlawe nimwazeyane, othawule phantte ontakhaaye olawa. Weeyo weettaru nkhono-nkha, miiyo kintta nkhono-nlume, weettaru nkhono-nlume miiyo kintta nkhono-nkha.”

¹⁰ Loothi khulansa maasho awe khoona ntta po la muuttho Yorotaani lihiniishaaye maati liri looripelela mpakha nti wa Zowaari. Ntta po ntthile laari nkhama woorotha wa Eeteni, na loolattanana tuniya ya Misuri. Wakathi aya opo Nnyizinku aarettiye ahinapweche nti wa Sotooma na Kommoora. ¹¹ Aphano, Loothi khuthawula ntta po la Yorotaani, khumwazeyana na Eburamu, khusala alawa phantte ya malawa-juwa. ¹² Eburamu khusala eekhalaka tuniya ya Kanaani, Loothi khweemesa heema zawe waattamana na Sotooma, khariju na sitati za nkerekhere wa ntta po la Yorotaani. ¹³ Ila atthu a Sotooma aari ootakhala rooho, aari annya-twampi ooziti mmakhono wa Nnyizinku.

Nnyizinku onimwaahiti Eburamu tuniya ya Kanaani.

¹⁴ Paata ya Loothi olawa, Nnyizinku khumuza Eburamu araka: Olanse maasho awo attaapho oriivo, weekese kashikhazini na kusini, na okhu lint-thamuwaawo njuwa mpakha lintupweelaawo. ¹⁵ Tuniya eto yooshi onoon-aaye kinteela owinkha weeyo na peewu yawo khwa mileele. ¹⁶ Kinteela waattisa peewu yawo nkhama mishaka za voolumwenku, nkhama ethiipo ahinteelaaye wiiyavo ntthu wa waalaka mishaka za voolumwenku, na peewu yawo khinteela waalakeya. ¹⁷ Olankhe ozukulele tuniya eti woone olepa waya na owula waya, mwaasa yoori kinttelaa owinkha weeyo.

¹⁸ Aphano Eburamu khuthamisa heema zawe, khulawa khwiikhala aphale zaariivo miitthi miwulu-miwulu nti wa Manre sitati ya Heporooni. Attaaphale ye khunjekela alitaari Nnyizinku.

14

Viittha ya afwalume na okholiwa wa Loothi

¹ Wakathi aya opo Amirafeeble aari mfwalume wa Shinaari, Ariyookho mfwalume wa Elazaari, Ketorilameeri mfwalume wa Elamu, na Titaali mfwalume wa Koyiimu, ² khulankhaza olawa wuumanana viittha Peera mfwalume wa Sotooma, Piirisha mfwalume wa Kommoora, Shinaapu mfwalume wa Aatima, Shemeepere mfwalume wa Zeboyimu, na mfwalume wa sitati ya Peela, yaari wiithiwaaye Zowaari. ³ Afwalume apa athaanu khuwaakusanya anajanka aya ntta po la Siitim (liiyieeyo ntthatta la maati majiphwaani). ⁴ Mfwalume Ketorilameeri, aawaashinttiye afwalume apale athaanu khwa nyaakha khumi na miwiri, ila mwaakha wakhuumi na ttaatthu aya khunzukuluwelaza.

⁵ Mwaakha wakhuumi na nne Ketorilameeri khuta vamote na afwalume apale aaphakanyeyaniyeeyo, khuwaashintta Arefayi o' Ashiteroothi-Karinayimu, Azuuzimu o' Haamu, na Aheemi o' Shave-Kiriyatayimu.

⁶ Theenya khuwaashintta Ahoori omwaako wa Seyiiri, khuwiikarisa mpakha Paraani ohali yaaziyeewo yaara. ⁷ Arutaka khuviraza Kateeshi waari wiittheliwakaawo Emishipathi, khuwaattapwattha atthu ooshi a

nti wa Amalekiita na theenya Amoori aari wiikhalaaye nti wa Hazaazoni-Tamara.

⁸ Aphano khulankha mfwalume wa Sotooma, mfwalume wa Komoora, mfwalume wa Atima, mfwalume wa Zeboyimu, na mfwalume wa sitati ya Peela (eti yaari wiitthiwaaye Zowaari), khulankha olawa wumanisa viittha ntapo la Siitimu. ⁹ Aari wumanaza na Ketorilameeri mfwalume wa Elamu, Titaali mfwalume wa Koyimu, Amirafeele mfwalume wa Shinaari, na Ariyookho mfwalume wa Elazaari. Aari afwalume athaanu aari wumananaaye afwalume wane. ¹⁰ Ntapo la Siitimu laarina milipu za waatta za piriniisi. Wakathi aari otthiraavo afwalume a Sotooma na Komoora, anajanka aya eetta okwela mmilipu, apale akinoko aya khutthirela nnyaako. ¹¹ Afwalume apale wane aashinttiyeeyo khuthuula maali zooshi za Sotooma na Komoora na vitthu-zooja zaya khulawaza. ¹² Na theenya khunthuula Loothi, mwaana wa ttwiye Eburamu na mali zawe zooshi, mwaasa aya ye aari wiikhala Sotooma.

Eburamu onimuusuru Loothi

¹³ Aarivo mwinyi mmote oosurukhiyeeyo, ye khulawa khumweeleza zooshi Eburamu Mwiibereewu, aari wiikhalaaye kharipu na miitthi miwulu-miwulu za Manre Mmori. Manre na attwize, Sikhoole na Aneeri, aari atthu oosilana na Eburamu. ¹⁴ Asiiliyeovo Eburamu oriwa ntuuluwe akholiwa, khuwaathuula alume miiya ttatthu na khumi na wanaane aawaakhupaliyeeyo, oovokoliwa vaje vawe, khusala aweekarisa afwalume apale wane mpakha nti wa Daani. ¹⁵ Ye khuwaawanya alume apale khuntti-khuntti, khumanisa viittha osikhu mpakha owaashintta maatuwi aya, khuweekarisa mpakha nti wa Hoopa, phantte ya kashikhazini ya Tamaashiku. ¹⁶ Khuwaanyakanya maali zooshi aathuuliyeeyo, khunthuula Loothi ntuuluwe na mali zawe, vamote na aakha na atthu akinoko aakholiweeyo khuwaarutisa.

Melikiseetekhi onimparikiya Eburamu

¹⁷ Wakathi Eburamu anshinttiyeovo mfwalume Ketorilameeri na afwalume aaphakanyeyaniyeeyo, mfwalume wa Sotooma khusala alawa ompokherela ntapo la muuttho Shaawe liniitheliwaaye “Ntapo la Mfwalume”. ¹⁸ Aarivo mfwalume wa nti wa Salemu, aari wiitthiwaaye Melikiseetekhi*. Khutiisa phaawu na viinyu. Ye aari haakhimu wa tiini ya Nluku Nwulu wa Pinkuuni, ¹⁹ khumparikiya Eburamu araka:

“Aparikhiyiwe Eburamu
ti Nluku Nwulu wa Pinkuuni,
otu ompiyepinku na vathi.
²⁰ Woottitthimisiwa eeye Nluku Nwulu wa Pinkuuni,
otu awinkhiyeeyo owaashintta
maatuwi awo.”

Aphano, Eburamu khulaza lifunku lakhuumi khwa zooshi epile aataniyeezo, khumwinkha Melikiseetekhi.

²¹ Mfwalume wa Sotooma khumuza yoori: “Miiyo okinkhe atthu paasi. Maali zooshi osalane weeyo.”

²² Eburamu khunjipu mfwalume araka: “Kalansa makhono aka kinlanse-laka Nnyizinku, Nluku Nwulu wa Pinkuuni ompiyepinku na vathi, ²³ na

* ^{14:18} Kwa luuka ya Meebereewu, nzina nttho lina maana a “mfwalume aka ti wa shariya”

kinlapha yoori akinsalana hatha ethu yaawo, wala luuzi wala nliiza wa jampali, ohiri nawiikhala, olupa yoori ‘Eburamu kanreelisa’. ²⁴ Miiyo khina ethu moote kintakhaaye, yoohiyi etile ajiiye atthu aka. Ila apale aaphakanyeyiyeeyo na-miyo, Aneeri, Sikhoole na Manre, apa ana ya wi-iyana lifunku laya”.

15

Wahati wa Nnyizinku khwa Eburamu

¹ Paata ya vitthu epile, Nnyizinku anttakhulaniye Eburamu nkattthi wa ezimu amuuuzaka yoori: “Eburamu ohoove! Miiyo ki namwaakisa awo, na tthuwo yawo enteela wiiya yooziti owula.”

² Eburamu khujipu: “Mbwanaaka Nnyizinku ontakha okinkha-ni na miiyo akina hatha mwaana wa waarithi aka? Antakhaaye orithi vaje vaka ti Elizeeri wa Tamaashiku. ³ Khukinkheeni mwaana; apho, karumeya wa vaje vaka ti ye anttelaaye orithi vitthu zaka.”

⁴ Aphano Nnyizinku khunjipu: “Namarithi vitthu zawo khanttela wiiya oto, ila mwaana woovokoliwa ti weyo ti anttelaaye orithi.” ⁵ Khunsarulamo nheema mwawe khumuaza yoori: “Weekese otulu, waalake matthottowa nkhamma analakeya. Peewu yawo enteela wiiya ethiipo.”

⁶ Ye khumwaamini Nnyizinku, na-ye khukhupaliwa ti Nnyizinku wiiya ntthu wa shariya.

⁷ Nnyizinku khumuaza Eburamu theenya: “Miiyo ki Nnyizinku kuulaziy-eyeo Wuuri nti wa Babiloniya yoori kiwinkhe tuniya eti orithi.”

⁸ Eburamu khumuuzela yoori: “Oo Mbwanaaka Nnyizinku, kihakikhi toovi yoori kinteela orithi tuniya eti?”

⁹ Nnyizinku khujipu: “Okitiisele mwaana wa mompe, wa puuzi, na wa pwittipwitthi, zooshi za wiiyana nyaakha mittatthu, na theenya likhoko na jiwa moote”.

¹⁰ Ye khutiisa nyama epile zooshi, khusala ashija vakatthi wakhula nyama n'oothata wakhula erikitthili omaasho wa erikitthili kiina yaya. Ila likhoko na jiwa khuhishiji vakatthi. ¹¹ Mirepo* khusala ziishukhela mphule zaari-imu nyama epile zooshijiwa, ila Eburamu khusala eekara.

¹² Njuwa leettelaka otupweela, Eburamu khunkhola osikizi wa waatta khusala oona yiiza ya waatta na woova. ¹³ Aphano Nnyizinku khumuaza yoori: “Ojuwache yoori peewu yawo enteela omaka nti woohiiyi waaya, enteela orettiwa omwiitthwaana na ohoochiwa nyaakha miiya nne. ¹⁴ Ila miiyo kinteela owaahukhumu atthu apo anttelaaye oretta omwiitthwaana, na enteela olaawo na maali za waatta. ¹⁵ Weeyo onttela wuuluvala ori wooparikhiiyiwa na onteela ofwa na heeri. ¹⁶ Paata yoovira nyaakha epo miiya nne, peewu yawo enteela orutela tuniya eti, amana Amoori apa aniikhalaaye ntumphu atepa oretta vitthu zootakhala, miiyo kinteela owaahukhumu na kiweekare.”

¹⁷ Litupweeliyeevo njuwa, waariipiye vathi khupuwa loosi la njocho na mweke wa moottho khuvira vakatthi wa virikitthili za nyama epile za-ashijiweezo. ¹⁸ Siikhu ethiitile, Nnyizinku khuretta wahati na Eburamu, khumuaza yoori: “Tuniya eti kinteela winkha peewu yawo, waaza muuttho wa Misuri mpakha muuttho nwulu oniithiwaaye Efwarath, ¹⁹ otthaamo nti wa Akeni, wa Akenizi, wa Akatemoni, ²⁰ wa Ahiti, wa Aperizi, wa Arefayi, ²¹ wa Amoori, wa Akanaani, wa Akirikashi na wa Ayepuzi.”

* **15:11** ‘Mirepo’ anyannyi awulu-awulu anjakaaye nyama zoofwa (zoovutta).

16

Ovokoliwa wa Esumayila

¹ Wakathi aya opo, Suhuriya muukha wa Eburamu khaari ovokola. Ye aarina njaazi mmote wa Misuri aari wiitthiwaaye Hajira. ² Siikhu moote, Suhuriya khumuza mannawe Eburamu yoori: “Nnyizinku khanikinkha mwaana, apho orapalelanel njaazi aka, khinjuweya kimpattthaka mwaana khwa ye.” Asiiliyeevo toole, Eburamu khukhupalela mattakhuzi apale a muukhaawe. ³ Suhuriya khunthuula njaazi otule khumwinkha Eburamu yoori eeye muukhaawe waphiiri. Vitthu epi zarettikhana Eburamu arina nyaakha khumi eekhalaka tuniya ya Kanaani. ⁴ Eburamu khurapalela na Hajira, ye khwiya wa wiimittha. Ooniyeevo yoori eemittha khwaaza ontwayifu nhano awe. ⁵ Suhuriya khumuza Eburamu yoori: “Miiyo kan-thuula njaazi aka khuwinkha, ye n'oojuwa yoori eemittha aaza okitwayifu. Okitwayifusha opu anikirettelaaye Hajira, khahi ethu ya shariya, ti weyo onintakhelaaye. Nnyizinku ti aniphuke miiyo na-weyo.”

⁶ Eburamu khunjipu Suhuriya yoori: “Ye nalelo njaazi awo, onrettele khwa nanna ontakhaazo.” Aphano Suhuriya khwaaza ontarawu Hajira mpakha khufiyelela otthira.

⁷ Nlayikha la Nnyizinku khunsikana Hajira n'yaara eemeliye kharipu na naattuutu wa maati aattameliyeyo tarikhi ya Shuuri. ⁸ Nlayikha ntthile khumuuzela liraka: “Weeyo Hajira njaazi wa Suhuriya! Onlankha vayi wala ontta vayi?” Ye khujipu: “Keetta otthira vaje wa nhano aka Suhuriya othuuto.”

⁹ Nlayikha khumuza yoori: “Orutele wa nhano awo, wanshututele.”
¹⁰ Khumuza theenya yoori:

“Kinteela waattisa peewu yawo
khwa nanna ehinalakeyaaye.

¹¹ Apho wiimithiyeevo onteela ompattha mwaana
ontthaje nzina la Esumayila,
mwaasa yoori Nnyizinku oona
ohoowa wawo.

¹² Ye onteela wiiya woohisiilaneyi
nkama nyama ya ntthuttu;
onteela wiiya muumani wa atthu ooshi,
na-yo anteela wuumana na ye,
na onteela wiiya wa waattuwana
na attwiize.”

¹³ Hajira khujuuzela mwennyeweru yoori: “Kamoona Nluku, nalelo kiri haayi?” Aphano khunkhuwelela Nnyizinku nzina liriina maana a “Nluku anikoonaaye”. ¹⁴ Pi apho nlipu aya opule oniittheliwa “Peeri-Lahayi-Rooyi”*. Nlipu aya opu ori enakatthi-nakatthi ya Kateeshi na Peereti.

¹⁵ Hajira khumpattha mwaana wa Eburamu. Eburamu khuntthaja mwaana otule nzina la Esumayila. ¹⁶ Wakathi Hajira ampatthiyeevo mwaana otule, Eburamu aarettiye arina nyaakha thamaaniini na sitha.

17

Okhiriya alama ya wahati

* **16:14** “Peeri-Lahayi-Rooyi” khwa luuka ya Meebereewu nzina ntthi lina maana a “nlipu wa Mwennyewe oohaayi anikoonaaye”

¹ Wakathi Eburamu afiyeevo nyaakha tiisiini na tiisiya, Nnyizinku anteeliye khusala amuuza araka: “Miiyo ki Nluku Woowahi Zooshi: weettettele mwentto kintakhaaye miiyo, wiiye ntthu nkemaani, ² yoori kirette wahati miiyo na-weyo, na kinteela owinkha peewu ya waatta.”

³ Aphano Eburamu khukokhora khulawa sijita, Nluku khusala anttakhlana ye araka: ⁴ “Wahati opu kinrettanaaye weeyo, phantte yaka kiniwaahiti yoori onteela wiiya paapa wa khapila za waatta. ⁵ Waaza leelo nzina lawo khahiyoo Eburamu*, ila Eburahiima ti linttelaaye wiiya nzina lawo, mwaasa yoori kinttela wuuretta opaapa wa khapila za waatta. ⁶ Kinteela waattisa channu peewu yawo, khwa weyo kinretta khapila za waatta, akinoko aya anteela wiiya afwalume. ⁷ Wahati opu kinrettaaaye na-weyo na peewu yawo, onttela wiiya wa mileele; Miiyo ki Nluku awo na wa peewu yawo. ⁸ Kinteela owinkha tuniya eti oniikhalaaye, weeyaru pure mmalapo. Tuniya yooshi ya Kanaani kinteela winkha peewu yawo khwa mileele, na-miyo kinteela wiiya Nluku aya.”

⁹ Nluku khurutela omuuza yoori: “Phantte yawo ona yooshututela wahati aka, weeyo na peewu yawo khwa mileele. ¹⁰ Wahati onttelaaye oshuka, waaka Miiyo na-weyo na peewu yawo pi opu: wakhula mwaana wanlume ona yookhiriysiwa. ¹¹ Okhiriya waya opo, alama ya wahati aka miiyo na-mweyo. ¹² Wakhula mwaana anvokoliwaaye wanlume vakatthi wa peewu yawo, n'ooziya siikhu yanaane ona yookhiriysiwa, hatha nkhamma karumeya woovokoliwa vaje vawo, mpakha amwiiththaana apale amalapo a wuuzanyiwa na apale ooziyi a peewu yawo. ¹³ Hatha nkhamma pi apa ovokoliwa vaje vawo mpakha apa a wuuzanyiwa ana yookhiriysiwa. Alama eti yookhiriya vamwiili venu, enthoonyeza wahati aka na-mweyo khwa mileele. ¹⁴ Otule ahinttelaaye okhiriya eekariwemo muumathi mwenu, mwaasa yoori akattha wahati aka.”

¹⁵ Nluku khumuza Eburahiima theenya yoori: “Muukhaawo khanteela wiitthiwa theenya Suhuriiya, ila nka eetthiwaka Suhura. ¹⁶ Kinteela om-parikiya na kimwinkhe mwaana wawo; khweele, miiyo kinimparikiya na onteela wiiya maama wa khapila za waatta, afwalume anteela opuwa khwa ye.”

¹⁷ Aphano Eburahiima khukokhora khusijiti, ila khusala ajitheyela nroho mwawe ajuuzelaka toono: “Nlume wa nyaakha miiya eeyane mwaana? Khi Suhura ariina nyaakha tiisiini ate ampatthe mwaana?” ¹⁸ Eburahiima khumuza Nluku: “Omparikiye Esumayila, eeye namarithi aka.”

¹⁹ Ila Nluku khunjipu: “Miiyo kiniwuza khweele yoori, muukhaawo Suhura onteela ompattha mwaana, ontthaje nzina la Esiyaakha†. Kinteela oshuka wahati aka na-ye, na peewu yawe entaaye khwa mileele. ²⁰ Kasiila oveka wawo khwa Esumayila. Kinteela om-parikiya na kinteela omwinkha peewu ya waatta. Ye onteela wiiya paapa wa mifwalume khumi na awiri, khwa ye enteela opuwa theenya khapila ya waatta. ²¹ Ila wahati aka kinteela oshuka mmakhono wa Esiyaakha, otu anttelaaye ovokoliwa ti Suhura wakathi otthuupu wa mwaakhani.” ²² Nawiisha ottakhula na Eburahiima, Nluku khulawa.

²³ Siikhu ethiitile, Eburahiima khunthuula mwanawe Esumayila na ooshi aavokoliweeyo vaje vawe na apale aawuuzanyiyeeyo. Khulawa owaakhiriisa, nkhamma ethiipo Nluku aamuuziyeezo. ²⁴ Wakathi aakhiriyyaziyevo,

* ^{17:5} Eburamu nzina ntthi maana aya “paapa woottithimisiwa.” Eburahiima nzina ntthi maana aya “paapa wa athu a waatta”. † ^{17:19} Nzina ntthi la Esiyaakha khwa luuka ya Meebereewu lina maana a “ye atheya”.

Eburahiima aarettiye arina nyaakha tiisiini na tiisiya ²⁵ na mwanawе Es-umayila aari oretta arina nyaakha khumi na mittatthu. ²⁶ Eburahiima na mwanawе aakhiriyye siikhu moote, ²⁷ vamote na apale aavokoliweeyo owawe, mpakha amalapo apale a wuzanyiwa.

18

Nnyizinku onimwaahiti omwinkha mwaana Eburahiima

¹ Siikhu moote, Nnyizinku aatiyiе ottakhula na Eburahiima vahali zaariivo miitthi miwulu-miwulu za Manre. Yaari elukuluku na yaarivo haari ya waatta, Eburahiima aarettiye eekhaliye vanlako wa heema yawe. ² Ye khulansa maasho awe khuwoona alume attatthu eemeliye kharipu. Aphano awooniyevo khulankhavo aphale vaya, khusala awaatthirela. Awaafiyelyevo khukokhora khulawa sijita.

³ Khuwooza yoori: “Mbwanaaka, nkhama kinaaye sehemu mmakhono mwenu, kinuuvekelani yoori mwihivikane vaje vaka, mwihiyumuleeni vattithiiru. ⁴ Mwiikhale vamwiivuuli wa muutthi opu mwivumule, antta otiisiwa maati vattithiiru moose moolweenu, ⁵ wiiya mwavira vaje wa karumeyeene, kintta weettela ethu ttiithiiru mwisapeye, yoori mwipatthe kuvu yoorutela safwari yenu.”

Yo khujipu yoori: “Kemaani! Erettikhane khwa nanna onlupaazo.”

⁶ Aphano Eburahiima khutthira eettaka nheema mwawе khumuuzu Suhura yoori: “Othuule miphimo miwulu mittatthu* z'oofu wa tiriku yooshapweya, okhatte wooche phaawu wa waakuvavo.”

⁷ Nawiisha, khutthirela onzizi wawe khunthuula mwaana wa mompe woonenevacha, khumwinkha karumeyaawe yoori anshije na amwiipikhe wa waakuveyavo. ⁸ Eburahiima khuthuula mompe etile yawiipikhiwa saana, manteeka na leethi khuwenkha aletto apale, ye khweemela nshini wa muutthi kharipu na aletto apale eettaka oja.

⁹ Yo khumuuzela: “Khi muukhaawо Suhura ori vayi?”

Eburahiima khujipu: “Ori nheema mpho.”

¹⁰ Mmote wa yo khuri: “N'ooira mwaakha, kinrutela vaje vawо attaapha, na muukhaawо onretta ampatthiye mwaana.”

Suhura aari oretta ari vanlako wa heema onyoko wa Eburahiima, eettaka osiila mattakhuzi apale aari ottakhuliwaaye. ¹¹ Eburahiima na Suhura aari a wuuluvala na kuvu, na Suhura zanvireliye siikhu zoovokola. ¹² Ye khusala ajitheyela nroho mwawе otthwe ajuuzelaka yoori: “Khwa nanna eti nuuluvaliyeezo miiyo na mbwanaaka, kinteela wiiyana furaha yaya eto?”

¹³ Aphano Nnyizinku khumuuzela Eburahiima yoori: “Muukhaawо ontheya-ni? Wala alupisiwa-ni yoori ‘kinteela ompattha toovi mwaana kuuluvaliye?’ ¹⁴ Ewaapho ethu yoolipa mmakhono wa Nnyizinku? Nkhama etthiipo kilupiyeyo yoori n'ooira mwaakha kinta wuuthotola, wakathi aya otthuupo Suhura onteela ompattha mwaana wanlume.”

¹⁵ Mwaasa wa woova Suhura khusala akhana yoori: “Akitheyenei.” Ye khuri: “Khahiye toowo, khweele weeyo watheya.”

Nnyizinku onimuуа Eburahiima opwechiwa wa Sotooma na Komoora

¹⁶ Wakathi alume apale attatthu alankhiyyevo eeshukhelaka nti wa Sotooma, Eburahiima alankhiye khusala awaaperekha alawaka oleezanana.

¹⁷ Aphano Nnyizinku khujuuzela mwennyeweru yoori: “Akinta kimuuze Eburahiima ethu kinttelaaye oretta? ¹⁸ Khweele-khweele Eburahiima

* ^{18:6} Wakhula mphimo waari ofiya kiilu sapa.

onteela wiiya paapa w'oomathi nwulweene woowahi; khwa ye, kinteela oparikhiya khapila zooshi za voolumwenku. ¹⁹ Maana miiyo kanthawula ye yoori awaanozele aanaawe na omathaawe, weettettela saana tarikki ya Nnyizinku, arettaka etile yiyyiye ya shariya na yoolotteya, yoori miiyo Nnyizinku kirette khwa Eburahiima etile kaahitiyeeyo.” ²⁰ Nnyizinku khumuza Eburahiima yoori; “Kinsiila nkhuwo yoori atthu a Sotooma na Komoora anretta vitthu zootakhala na twampi zaya pi zooziti. ²¹ Kineetta ottuukhu kilawe koone kхиima za twampi epo anrettaazo nkhama khweele pi etthiipo kinsiilaazo, kinttela ohakikhī.” ²² Attaaphale, alume apale awiri khusala alawa Sotooma, ila Nnyizinku khusala ari vamote na Eburahiima.

Eburahiima oninvekela Nnyizinku oswaamihiwa nti wa Sotooma na Komoora

²³ Eburahiima khunsusela Nnyizinku khumuuzela yoori: “Onttelaa owooleela vamote anashariya na anapaathuli? ²⁴ Khi amana eeyawo atthu hamusiini anashariya, ompwecha sitati etile? Khunteela owaaswaamihi mwaasa wa atthu apo hamusiini anashariya? ²⁵ Ohiiye weeyo wooretta etthu nkhama eto, yoowuuleela vamote anashariya na anapaathuli. Khawaari oteela owaahukhunu anashariya mwaasa wa vitthu zoorettiwa pi anapaathuli. Weeyo o namaphuka w'oolumwenku wooshi, khunteela ophuka na shariya?”

²⁶ Nnyizinku khujipu araka: “Amana kifiya Sotooma kiwasikana anashariya hamusiini ari nsitati nttumphule, kinttela oswaamihi sitati yaya etile kiiswa ya yo.”

²⁷ Eburahiima khurutela ottakhula araka: “Okiswaamihi na ruhusa kiriina yoottakhulana weeyo Mbwanaaka, keeyaru ottophe na fuutha. ²⁸ Khi amana asaleelaka athaanu yoori afiyele hamusiini, onipwecha sitati etile mwaasa wa apa ansaleelaaye?”

Mbwana khuri: “Amana kiwasikana arupayiini na athaanu akimpwecha.”

²⁹ Khumuuzela theenya; “Khi amana owaasikana arupayiini?”

Mbwana khujipu: “Wala, akimpwechawo mwaasa wa apale arupayiini.”

³⁰ Khuvira amuuzelaka theenya: “Mbwanaaka, ohikatipukhe amana kirutela ottakhula: khi amana owaasikana anashariya talaathiini?”

Mbwana khuri: “Amana kiwasikanawo talaathiini akinretta hatha ethu.”

³¹ Eburahiima khurutela olupa yoori: “Okiswaamihi na nthiti kiriinaayo la wuuttakhulana Mbwanaaka, khi amana owaasikana anashariya eshiriini?”

Ye khuri: “Akimpwechawo mwaasa wa anashariya apale eshiriini.”

³² Khulupa theenya Eburahiima: “Mbwanaaka, ohikatipukhe, kiniwuzela swaafu moote ethiiti paasi; khi amana owaasikanawo anashariya khumi?”

Ye khunjipu: “Akimpwechawo mwaasa wa anashariya apale khumi.”

³³ Nawiisha Nnyizinku ottakhula na Eburahiima, khulankha khusala alawa. Na-ye Eburahiima khurutela owawe.

19

Opwechiwa sitati ya Sotooma na wuusurukha wa Looti

¹ Malayikha apale mawiri khufiya Sotooma makaaripi, Looti aarettiye eekhaliye vanlako* wa sitati ethiitile, ye nawoona malayikha apale khusala athepeeza atthirelaka. N'oofiyela khukokhora khusijiti. ² Khuwooza yoori:

* **19:1** ‘Nlako wa sitati’ yaari puuro yaazoweriweevo zaari ottakhuliwakaavo milattu na vitthu za zanshara.

"Ambwana zaka kookholani moolu, kintakha mwisapuwe owaka miiyo karumeyeenu; moose moolweenu na mwilale, mwilawe meesho supuy-eene."

Yo khujipu yoori: "Khinjhithajiya, fweeyo ninwahi olala vaparasa vee-takale."

³ Loothi khuwaakhanyerela na kuvu mpakha yo okhupali olawa omaka owawe. Ye khurumisa wiipikhiwa etthu-yooja ya nnofu na khoochiwa phaawu yoohiina fwaramento, aletto apale khuja.

⁴ Ila ahinalawe olala, eetta ota alume ooshi a sitati ethiitile waaza attunkhulu mpakha mashaapu khuzukulela nyuupa ya Loothi. ⁵ Khusala anyakula ankhuwelaka Loothi araka; "Alume apa atiiyeeyo nnyupa mwawo mphu osikhu otthuupu ari vayi? Owaasarulele vaje apha, fweeyo nintakha niwaalalane".

⁶ Loothi khusaruwela vaje, khufuka nlako awe afukelaka onyoko wawe.

⁷ Khuwoza yoori: "Safwatali ajamaazaku; mwihirette etthu eto otakhala

⁸ Mweyo! Miiyo kinaaye aanaaka awiri ahiniwaajuwaaye alume. Kintta owinkhani atthaapo, mwiwaarettele wakhula etile mwintakhaaye. Ila mwi-hiwaarettele etthu yootakhala aletto apa ata nnyupa mwaka, na miiyo kina yoowiinanel."

⁹ Yo khuri: "Oleovo apha! Weeyo o mmalapo mmuti mphu, ontakhaojinkhe ofwalume na mmuti mwetthu? Fweeyo nintta wuurettela vitthuzzoziti epi naari otakhaaye owaarettela apo." Aphano yo khunsukhuma Loothi, khusala asusela nlako awe yoori apwechaze. ¹⁰ N'oorettatooke, aletto apale khunkhola Loothi khumfutthela nnyupa khufuka nlako, ¹¹ na khuwoola maasho alume apale a Sotooma aari vanlako wa Loothi. Waaza attunkhulu mpakha mashaapu khusala apapasela nlako khuhisala asikana.

¹² Alume apale khumuuzela Loothi: "Onaaye ajaama akina nsitati mphu? Oleemo, owaathuule aanaawo, akhwewo, muukhaawo na ooshi apale eeyiye aawo, ¹³ mwaasa aya nateela opwecha sitati eti. Nnyizinku asiila nkhuwo nwulweene wa vitthu zootakhala anrettaazo atthu a Sotooma, apha aniruma yoori nite nipweche sitati yaya eti."

¹⁴ Aphano ye khulawa owooza akhwewe, apale aari weettelaaye owaarala aanaawe yoori: "Mwileemo nsitati mphu, maana Nnyizinku ontela op-wecha." Ila akhwewe apale khusala oona nkhamza nzaha.

¹⁵ Lifwajiri, malayikha apale khusala amuuza Loothi antumereraka yoori: "Olankhe nasaapi ethiiti, onthuule muukhaawo na aanaawo oowiiri mwileemo mphu. N'oohiretti toowo, amana etaka hukhumu nsitati mphu mweeyo mwintta ofwa."

¹⁶ Khusala arupaza, malayikha apale khuwaakhola makhono, ye na muukhaawe na aanaawe oowiiri khuwaalawana othetekete, mwaasa wa Nnyizinku wiyana huruma na-ye. ¹⁷ Paata yoolaziwamo nsitati mphule, nlayikha limote khumuuzo yoori: "Tthira wuusuru ohaayi awo, na oheekese nyuma wala oheemele hatha vahali ohifiyeeni omwaako yoori ohipweth-eye."

¹⁸ Loothi khujipu; "Toowo wala safwatali ambwana zaka! ¹⁹ Wakirettela saana, khukoone la huruma venkivena, khuusuru ohaayi aka. Ila onyaako khu woolepawo, opwechiwa wa sitati eti ontta okisikana kihinafiye.

²⁰ Kharipu apha ewaapho sitati ttiitthiiru, kinwahi otthirela ottuukho. Hatha nkhamza yeetta opushuwa, mwikelikhe kitthirele ottuukho kuusurukhe."

²¹ Nlayikha khujipu yoori: "Kakhupali eto ovekiyeyo, akinteela opwecha sitati yaya eto olupiyeyo. ²² Ila waakuve olawe nasaapi ethiiti, miiyo

akinretta hatha etthu, weeyo ohifiyeeni ohali onttaawo.” Ti eto sitati yaya eto eniittheliwaaye Zowaari†.

²³ Njuwa litthamuwaka na-ye Loothi afiyaka nti wa Zowaari. ²⁴ Aphano Nnyizinku khukwisa mawe a moottho otulu, akwiselaka Sotooma na Kommoora. ²⁵ Khupwecha sitati epile na miti zaattamananiyeeyo, na atthu aya apale aari wiikhalaamo na ttuttu yaya. ²⁶ Ila muukha wa Loothi khuzukuluwa khweekesa onyoko ohali aari olankhaawo, khuthatuwa khwiyya sanamu ya mwiinyu.

²⁷ Supuyeene Eburahiima aalankhiye khulawa puuro etile aari ottakhulanaavo Nnyizinku. ²⁸ Khweekesa phantte ya Sotooma na Kommoora na miti zooshi za shiini yaya etile, khusala oona loosi la waatta leettaka otthuwela mmuti mphule nkhamma njocho lookhoziwa.

²⁹ Nkatthi woopwecha sitati zooshi za tuniya etile, Nluku khufikhiri etile aavekeliweeyo ti Eburahiima, khumuusuru Loothi vakaththi wa pala yaaret-tikhaniyeeyo sitati etile aari wiikhalaaye.

Peewu ya Loothi, na nchina la Amowaabu na Amooni

³⁰ Loothi eetta woova wiikhala Zowaari, khuthama na aanaawe oowiiri khusala eekhala omwaako. Oottaatthu khusala eekhala nlikurakuza.

³¹ Siikhu moote, mwanawe otu nwulu khumuaza otu nttiitthi yoori: “Papeetthu ooluvala na nti opu niriiyo khaamo alume oonirala yoori niwaap-atthe aana, nkhamma enrettikhanaazo olumwenku wooshi. ³² Nlawe nthiule viinyu ninnywise papeetthu ahapaliwe, niwahi orapalelana anivokolele aana, yoori peewu ya papeetthu ehiishe.”

³³ Osikhu otthuupule khuthuula viinyu khunnywisa papaaya, mwaana otu nwulu aya khulawa khulalana papaawe. Papantthu woohijuwi wakathi arapaleliyeovo wala alankhiyeovo.

³⁴ Mmeesho mwaya, otule nwulu khumuaza ttwiye: “Taana osikhu karpalelana paapa, apho osikhu opu wa leelo nlawe ninhapalise na weeyo olawe warapalelanelane zwaamu yawo. Anivokolele aana yoori peewu ya papeetthu ehiishe”. ³⁵ Osikhu otthuupule khumwinkha papaaya viinyu swaafu yaphiiri, na-ye otu nttiitthi aya khulawa khulalana, theenya papantthu khuhijuwi wakathi arapaleliyeovo wala alankhiyeovo.

³⁶ Aana apale oowiiri khwiimittha erukulu ya papaaya. ³⁷ Otu nwulu aya khumpattha mwaana wanlume khuntthaja nzina la Mowaabu, ye paapa wa Amowaabu apa ariiwo mpakha leelo. ³⁸ Elottelanaka otule nttiitthi aya khumpattha mwaana wanlume khuntthaja nzina la Ben-Ami‡, ye paapa wa Amooni, apa ariiwo mpakha leelo.

20

Eburahiima na Apimeleekhi

¹ Eburahiima aalankhiye Manre khulawa nti wa Nikeepu, khwiikhala enakatthi-nakatthi ya Kateeshi na Shuuri. Khuthamela theenya nti wa Kerari. ² Ottuukhule, Eburahiima aalupiye yoori Suhura nlupuwe, khupe ari muukhaawe. Aphano Apimeleekhi mfwalume wa nti aya opule, khuruma weetteliwa Suhura, ye khunthuula.

³ Osikhu aya, Nluku khunteela Apimeleekhi khusala amuuza nkatti wa jozi yoori: “Ontta ofwa mwaasa wa muukha otu onthuuliyeeyo, ye onaaye mannawe.”

† **19:22** “Zowaari” khwa luuka ya Meebereewu nzina ntthi lina maana a “ttiithiiru”. ‡ **19:38** Ben-Ami khwa luuka ya Meebereewu nzina ntthi lina maana a “mwaana wa jamaayaku”.

⁴ Ila Apimeleekhi aari ahinarapalelane muukha otule, ye khujipu: “Mb-wana, ontela okuula miiyo na atthu aka woohiivo hatha paathuli? ⁵ Ti Eburahiima aakuuziye yoori Suhura nlupuwe! Na Suhura khukuza etthiipo yoori nlupuwe. Miiyo karetta eti na rooho y'ookemaani woohijuwivo ethu.”

⁶ Nluku khunjipu njozi ntumphule yoori: “Miiyo kajuwa yoori vitthu epi warettta na rooho y'ookemaani. Ti eto miiyo kiwiinaneliyeyo yoori ohikikose, pi apho kihuutakheleeni onsapa muukha oto. ⁷ Apho, onrutisele mannawe muukha oto. Ye napiyu, ontta wuulompela yoori ohifwe, ila amana ohinrutiseli kiniwuza khweele yoori ontta ofwa weeyo na zooshi epi ziiyiye zaawo.”

⁸ N'oolankha mmeesho mwaya supu, Apimeleekhi khuwaakhuwela mawaziiri awe khusala awooga epile aalotthiyeozo, yo khwiya awoova channu. ⁹ Nawiisha, khuruma okhuweliwa Eburahiima khusala amuuzela yoori: “Niini eti oniretteliyeeyo? Kookosela-ni okikwiselaka paathuli ya twampi khuluyeene nkhamma eti, miiyo na atthu aka? Etthu okiretteliyeeyo khinrettelaniwaka. ¹⁰ Woopuweliye niini okirettelaka vitthu nkhamma epi?”

¹¹ Eburahiima khunjipu: “Miiyo kaari woona yoori atthu a nti opu khani-moova Nluku, antta okuula mwaasa wa muukhaaka. ¹² Na khweele phantte kiina nlupwaaka, mwaana wa paapa ila khahiyoo mwaana wa maama. Ti nanna afiyeleliyeeyo wiiya muukhaaka. ¹³ Wakathi Nluku akilaziyeemo mmuti wa apapazaku, kaamuuziye muukhaaka yoori: ‘Safwatali kintta wuuvekela, wakhula vahali nimfiyaavo osala olupa yoori nlupwaaka’.”

¹⁴ Aphano Apimeleekhi khuthuula pwittipwithi, mompe na amwiitth-waana aalume na aakha khumwinkha Eburahiima na theenya khunrutisela muukhaawe. ¹⁵ Apimeleekhi khuri: “Nti opu pu waaka ohiiyane shaakha, wiikhale wakhula vahali ontakhaavo.”

¹⁶ Khumuza Suhura yoori; “Kamwinkha nlupuwo mizurukhu za feeta alufu, ajamaazo ooshi ajuwe yoori khutthekeeni hatha ethu, na ahiiyeye antakhaaye owaakanyerela.”

¹⁷⁻¹⁸ Nnyizinku aawaarettiye aakha ooshi a vaje wa Apimeleekhi yoori ahisala avokola, mwaasa wa epile zanrettikhaneliyeyo Suhura muukha wa Eburahiima. Aphano Eburahiima khunvekela Nluku zwaamu ya Apimeleekhi, Nluku khunvonisa vamote na muukhaawe na akarumeyaawe aakha yoori asala avokola.

21

Ovokoliwa wa Esiyaakha

¹ Paata ya toole, Nnyizinku khumparikhya Suhura, khunrettela etile aamwaahitiyeeyo. ² Suhura khwiimittha khumpattha mwaana wa Eburahiima ari wa wuuluvala, wakathi otthuupule Nluku aamuuziyeeyo. ³ Mwaana otule aavokoliweeyo ti Suhura, Eburahiima khuntthaja nzina la Esiyaakha*. ⁴ Siikhu yanaane, Eburahiima khunthuula mwaana otule khulawa onkhiriyyisa nkhamma etthiipo Nluku anrumiyeezo. ⁵ Wakathi Eburahiima ampatthiy-eovo mwanawee Esiyaakha, aarettiye arina nyaakha miiya.

⁶ Suhura khuri: “Nluku akinkha otheya, na atthu ooshi apale anttelaaye osiila anttela otheya vamote na-miyo.

⁷ Paani aari waakanyeraaye yoori Eburahiima aari oteela ompatthela mwaana Suhura? Na wuuluvala wawe, miiyo kampatthela mwaana!”

⁸ Mwaana otule khusala awula mpakha ofiyelela olika nziwa. Alikhiyeovo nziwa mwaana otule, papaawe khuretta njampo la furaha.

* **21:3** ‘Esiyaakha’ maana aya ‘atheya’.

Wiikariwa wa Esumayila na Hajira

⁹ Ila Suhura khumooma Esumayila mwaana wa Hajira mmisuri, otule aavokoliweeyo ti Eburahiima anveyisaka mwanawe. ¹⁰ Suhura khulawa omuuza Eburahiima yoori: “Omwiikare njaazi otule na mwanawe. Ye khanteela orithi vamote na mwanaka Esiyaakha.”

¹¹ Eburahiima khwiya wozinkireya na kuvu na mattakhuzi apale mwaasa wa Esumayila wiiya mwanawe. ¹² Aphano Nluku khumuza Eburahiima yoori: “Ohizinkireye mwaasa wa mwanawo na njaazi awo, osiileze etile aniwuuzaaye Suhura, mwaasa yoori peewu yawo enttela olankha vakatthi wa Esiyaakha. ¹³ Mwaana wa njaazi otule onteela wiiyana omathi wa waatta mwaasa yoori na-ye peewu yawo.”

¹⁴ Mmeesho mwaya, Eburahiima khuthuula phaawu na ttompwiyo ya maati, khunvikelisa Hajira khunleeza vamote na mwanawe. Yo khusala alawa ajeettettelaka n'yaara ya Beeresheba ahijuwaka ohali anttaawo.

¹⁵ Wakathi amwiisheliyeevo maati ntompwiyo, ye khunlikha mwanawe nshini wa muutthi. ¹⁶ Khulankha khulawa khwiikhala ohali woolepawo vattitthiiru na okhule aariwo mwanawe, mwaasa yoori khaari otakha omoona mwanawe afwaka. Eekhaliye ethiipile, khusala alila.

¹⁷ Nluku khusiila theenya huula ya mwaana otule eettaka olila. Nlayikha la Nluku khukhuwa pinkuuni linkhuwelaka Hajira, khumuza yoori: “Wakafilikhela-ni Hajira? Ohoove, Nluku asiila huula yawe mwaana oto alilaka vahali ariivo. ¹⁸ Olankhe onlanse mwanawo onkholele nkhono, phantte yawe kinteela waattisa omathaawe.”

¹⁹ Elottelanaka Nluku khunthoonyeza Hajira nlipu wa maati, khulawa khuttekhelela ttompwiyo yawe khunnywisa mwanawe.

²⁰ Esumayila khusala awula mmakhono wa Nluku. Ye aari wiikhala n'yaara na aari njuwi wa weesa mattetthe. ²¹ Aari wiikhala n'yaara ya Paraani, mamaawe khumweekesela muukha wa Misuri khunlooza.

Osiilana wa Eburahiima na Apimeleekhi

²² Wakathi aya opo, Apimeleekhi aalokoziwe ti Fikhoole namalokozela wa anajanka, khumuza Eburahiima yoori: “Nluku ori vamote na-weyo khwa wakhula etile onrettaaye. ²³ Nasaapi ethiiti olaphe khwa nzina la Nluku yoori khunteela okihata miiyo wala aanaaka ama otuulwaka, nkama ethiipile kuuretteliyeezo zooshapweya, na-miyo okirettele ethiipo na mmuti mphu oniikhalaamo.”

²⁴ Khujipu Eburahiima araka: “Miiyo kinlapha”.

²⁵ Attaaphale Eburahiima khusala ajiliza mwaasa wa nlipu aanyakanyiweeyo pi akarumeyaawe Apimeleekhi. ²⁶ Apimeleekhi khunjipu: “Miiyo akaajuwiyeye etthu na khawaakuuziye, kintta osiilaru nasaapi ethiiti.”

²⁷ Aphano Eburahiima khuthuula pwittipwitthi na mompe khumwinkha Apimeleekhi. Oowiiri aya khusilana. ²⁸ Elottelanaka Eburahiima khuphakula pwittipwitthi sapa za nliphanko lawe. ²⁹ Apimeleekhi khumuuzela yoori: “Pwittipwitthi epo sapa omphakulaaye maana aya niini?”

³⁰ Eburahiima khujipu: “Okhupalele pwittipwitthi epi sapa kiniwinkhaaye khwa lifunku looshaahiti yoori nlipu opu ti miyo kithipiyeeyo.”

³¹ Pi apho puuro yaya eto eniitthiwaaye Beeresheba[†], mwaasa yoori oowiiri aya aalaphisanaye attaapho.

[†] **21:31** Beeresheba maana aya “nlipu woolaphisanwa” ama “nlipu wa sapa”.

³² Paata yawiisha oosiilana opule Beeresheba okhule aariiwo, Apimeelekhi na Fikhoole namalokozela wa anajanka, khurutela nti wa Afiliishiti. ³³ Eburahiima n'osala Beeresheba okhule khuzala muutthi wa nkolokope, khumwaaputu Nnyizinku, Nluku wa Mileele. ³⁴ Ye khwiikhala nti wa Afiliishiti khwa nyaakha za waatta.

22

Nnyizinku ontakha woona amini ya Eburahiima

¹ Paata yoovira nyaakha, Nluku aamweeziye Eburahiima, khunkhuwela araka: “Eburahiima!”

Ye khujipu: “Lapeekha!”

² Nluku khumuza araka: “Onthuule mwanawo Esiyaakha, othuuto mmote oriinaaye onimphetachaaye, olawe mpakha nti wa Moriya, vamwaako oriye ottuukho kinttelaaye wuuthoonyeza, onrette twaha yoolukuziwa”.

³ Ye khulankha mmeesho mwaya lifwajiri khunthuula puuru awe khu-fukavo zaana zawe, khuwaathuula akarumeyaawe awiri na mwanawo Esiyaakha. Khurema khuuni zoolawa orettela twaha yoolukuziwa, khusala alawa ottuukhule Nluku aamuuziyeeewo. ⁴ Siikhu yattaatthu, Eburahiima khweesa maasho awe khoona puuro etile ari ohali woolepawo. ⁵ Ye khuwooza akarumeyaawe apale yoori: “Mwisale attaapha na puuru otu, miiyo na shapu otu nintta aphale, ninttela omwaaputu Nluku. Amana niisha nintta oruti nite niiye vamote na-mweyo.”

⁶ Eburahiima khuthuula khuuni epile aari weettelaaye orettela twaha yoolukuziwa, khunttikha Esiyaakha mmafuzi mwawe. Ye khuthuula eesu na moottho khusala alawa. ⁷ Esiyaakha khunkhuwela papaawe yoori: “Mweyo paapa!”

Ye khujipu: “Lape mwanaka!”

Aphano Esiyaakha khumuuzela papaawe: “Nathuula moottho na khuuni, khi pwittipwithi yoolawa otwahi eri vayi?”

⁸ Ye khujipu araka: “Nluku ti ye anjuwaaye pwittipwithi ninttelaaye orettela twaha yoolukuziwa mwanaka.” Yo khusala alawa vamote.

⁹ N'oofiya ohali okhule aathoonyeziweewo ti Nluku, khunjeka alitaari vatulu vara khuthatelavo khuuni. Khumfuka mwanawo Esiyaakha khuntaa vatulu wa khuuni. ¹⁰ Khuthuula eesu, khulansa makhono awe yoori antwahi mwanawo. ¹¹ Ila nlayikha la Nnyizinku khukhuwa pinkuuni liraka: “Eburahiima! Eburahiima!”

Ye khujipu: “Lapeekha!”

¹² Khumuza yoori: “Ohimwaavulele eesu shapu oto, na ohinrettele hatha etthu. Aphano kinjuwa yoori onimoova Nluku, mwaasa woohikikhattazi mwanawo mmote othuuto oriina.”

¹³ Eburahiima khuzukuluwa khoona pwittipwithi ewayiye manyaka aya valikukhu. Ye khulawa khuthuula khurettela twaha yoolukuziwa khwa zwaamu ya mwanawo. ¹⁴ Aphano khutthaja nzina puuro etile “Nnyizinku ti ye anjuwaaye”. Mpakha eleelo eti oniitheliwavo yoori: “omwaako wa Nnyizinku ti ye anjuwaaye”.

¹⁵ Elottelanaka, nlayikha la Nnyizinku khukhuwa theenya pinkuuni linkhuwelaka Eburahiima. ¹⁶ Khumuza yoori: “Nnyizinku ari: ‘Kin-jilaphela ki mwennyeweru, mwaasa weeyo oretta etile kiwuuziyeyo, ohikikhattazi mwanawo mmote paasi oriinaayo, ¹⁷ khweele, kinteela wuu-parikhya na kiwinkhe peewu ya waatta nkhama matthottowa o'otulu na mishaka za mmattima, yo anteela othuula nti wa maatuwi aya. ¹⁸ Athu ooshi

a voolumwenku anteela oparikhiyiwa, mwaasa wa peewu yawo, maana weeyo wakishututela.”

¹⁹ Eburahiima na Esiyaakha khurutela aphale aawaalikhiiyeovo akarumeyaawe. Ooshi khurutela Beeresheba ohali Eburahiima aari wiikhalaawo.

Aana a Nahoori

²⁰ N'oovira vitthu epile khuuziwa Eburahiima oriwa: “Miilika avokoleliwa aana ti ttwiyo Nahoori; ²¹ w'oomwanzo aya nzina lawe ti Wuuzi, na ttwiye Buuzi, khulotteliwa ti Kemuweeli, papaawe Aramu, ²² Keseeti, Haazo, Pil-itashi, Yitalafu, na Betuweeli.” ²³ Betuweeli khunvokola Repeekha. Aana apo wanaane aawaavokoliye ti Miilika na Nahoori ttwiye Eburahiima. ²⁴ Nahoori aarina muukha nkinoko aari wiitthiwaaye Rewuma, na-ye avokoleliye aana; Teepa, Kahaamu, Tahaashi na Maaka.

23

Ofwa wa Suhura

¹ Suhura eekhaliye nyaakha miiya na eshiriini na sapa. ² Khufwa Kiriyati-Aarapa (oniitheliwaawo Heporooni) tuniya ya Kanaani. Eburahiima khusala alila na ojikhupanyera ofwa wa Suhura.

³ Ye khunlikha muukhaawe ari woofwa, khulawa ottakhulana Ahiiti yoori: ⁴ “Miiyo ki mmalapo na ki nletto mmuti mphu; ila kinuuvekelani okinkha ruhusa ya wiiyana vilalo yaka mmuti mwenu mphu, yoori kinzikhemmo muukhaaka.”

⁵ Ahiiti apale khunjipu Eburahiima yoori: ⁶ “Osileze mbwaneethu, fweeyo niniwinkha hishma nkhamma mfwalume wa Nluku. Apho olawe wanzikhe muukhaawo wakhula vilalo etile enuufwayaaaye. Khaavo mmote wa fweyo antakhaaye wuukhattaza khapuri yonzikhavo muukhaawo.”

⁷ Aphano Eburahiima khulankha khwiinama omaasho wa Ahiiti, ennyewe nti opule. ⁸ Khuuuza yoori: “Nkhama khweele mwinaaye niiya yookikhupalela onzikha muukhaaka, mwikivekelele Eforoni, mwaana wa Zohaari, ⁹ yoori akuuzanyeze likurakuza la Makhipeela liriiye mmwiinano wa nshapa lawe. Miiyo kininripha hisapu yoolikana mooshi moonaka, yoori likurakuza laya nttho liiye vilalo yoowaazikhamo ajamaazaku”.

¹⁰ Eforoni, Nhiiiti otule, aarettiye eekhaliye vamote na attunkhulu a sitati ethiitile, ye khunjipu Eburahiima vakatthi wa Ahiiti ooshi aari vanlako wa sitati ethiitile yoori: ¹¹ “Wala mbwanaaka! Okisileze, miiyo kiniwinkha nshapa na likurakuza liriiye ntumpho, kiniwinkha atthu ooshi apa ariiye apha eettaka woona. Olawe wanzikhe muufwi awo.”

¹² Eburahiima khwiinama swaafu yaphiiri, omaasho wa atthu apale a mmuti mphule. ¹³ Ye khumuuzu Eforoni atthu ooshi eettaka osiila yoori: “Safwatali mwikisiileze, kintta oriphia hisapu la nshapa ntthile. Okhupalele yoori kiwahi onzikhamo muukhaaka.”

¹⁴ Eforoni khunjipu Eburahiima yoori: ¹⁵ “Okisileze mbwanaaka! Nti aya opo pu wa mizurukhu za feeta miiya nne. Eto yaya niini miiyo na weeyo? Wanzikhemmo muufwi awo.”

¹⁶ Hisapu etile aalupiyeyo Eforoni atthu ooshi asiilaka, Eburahiima khukhupalela. Khuphima miphimo miiya nne za mizurukhu wa feeta khumwinkha, nkhamma etthiipo aari ophimakaazo anamuuzanyisa.

¹⁷⁻¹⁸ Waaza attaapho nshapa la Eforoni laariiye Makhipeela kharipu na Manre, na likurakuza laariimo na miitthi zooshi khwinkhiwa Eburahiima. Ahiiti ooshi apale aari vanlako wa sitati etile eettaka woona. ¹⁹ Wakathi

enkhiweevo nti aya opule, khunthuula muukhaawe Suhura khulawa khunzika nlikurakuza la Makhipeela kharipu na Manre eriye Heporooni, tuniya ya Kanaani. ²⁰ Khwa ethiipo, khuhakikhiwa nshapa ntthile na likurakuza laya pi Ahiiti wiiya vilalo ya Eburahiima.

24

Oloola wa Esiyaakha

¹ Eburahiima aarettiye ooluvaliye arina nyaakha za waatta, Nnyizinku amparikhiyiye khwa zooshi. ² Siikhmoote, khumuuzakarumeya nwulu wa vaje vawe aari weettettisaaye mali zawe zooshi aariinaazo, araka: "Othuule nkhono awo otthe vathi wa liphaja laka yoori ³ kuulaphise khwa nzina la Nnyizinku, Nluku wa pinkuuni na vathi, yoori khunteela omweekesa muukha wa nti otthuupu kiniikhalaaye wa wiiya mwaana wa Akanaani. ⁴ Ila olankhe olawe nti w'owaka wamweekese muukha vakatthi wa ajamaazaku, ate eeye muukha wa Esiyaakha."

⁵ Karumeya otule khumuuzela yoori: "Khi amana muukha aya oto ahitakhi ota na-miyo mmuti mphu, kinthuule mwanawo kinlawane nti otthuupu olankhiyeyo?"

⁶ Eburahiima khunjipu: "Phoole! Hatha vattitthiiru ohirette onlawana mwanaka.

⁷ Nnyizinku, Nluku wa pinkuuni akilaza vaje wa apapazaku nti wa ajamaazaku khukaahiti na olapha araka: 'Nti opu kinttela winkha peewu yawo.' Ye ontta operekha nlayikha lawe yoori luulokoze, omweettele muukha yoori ate araliwe ti mwanaka Esiyaakha. ⁸ Amana muukha aya oto ahitakhi ota na-weyo, olapha wawo oniiya woofujeya. Ila ohiiye wonthuula mwanaka onlawana." ⁹ Aphano karumeya otule khuthuula nkhono awe khuttha vathi wa liphaja la Eburahiima mbwanaawe. Khulapha yoori aari weettela oretta etthiipile ooziweezo.

¹⁰ Karumeya otule khuthuula enkamiya khumi za mbwanaawe na majathi apale enkhiweeyo khusala alawa nti wa Mezapotaaniya sitati ya Nahoori. ¹¹ Afiiyeevo, njuwa looveva wakathi opule aakha anttelakaaye ottekha maati, khukokhorisa enkamiya zawe epile onlipu kharipu ya sitati.

¹² Attaaphale khusala alompa araka: "Oh! Nnyizinku, Nluku wa mbwanaaka Eburahiima, kinuuvekela yoori siikhu eti ya leelo okiparikhiye, na onthoonyeze pheta ya waamineya mbwanaaka Eburahiima.

¹³ Onikoonelaavo apha kiri wa weemela kharipu na nlipu, aanaakha a attu a sitati eti antakaavo ottekha maati. ¹⁴ Mwaari othuuto kinttelaaye omuuza yoori: 'Wiinamise yuuku yawo okimeele maati kinywe,' ye khulupa yoori: 'Apa nywa, na kintta onywisa enkamiya zawo,' eeye othuuto onthawuleliyeyo Esiyaakha. Ti ethu enttelaaye okijuwisa yoori wanthroonyeza pheta ya waamineya mbwanaaka Eburahiima."

¹⁵ Ahineeshe olompa, nasaapiru onimoona Rapekha mwaana wa Betuweeli eettaka ota alankhaka nsitati athuuliye yuuku atthiye valifuzi. Betuweeli aari mwaana wa Miilika muukha wa Nahoori, ttwiye Eburahiima.

¹⁶ Rapekha aari mwaari wooshapweya channu woohinjuwi nlume, ye khwishukhela vanlipu khuttekha maati khwiitaaza yuuku yawe khuwelela.

¹⁷ Karumeya otule khulankha khusala antthirela, khumuuzakarumeya yoori: "Safwatali kimeele maati apo ari n'yuku mwawo kinywe."

¹⁸ Ye khujipu araka: "Mwiinyi apa mwinywe." Khurula yuuku khukholelela mmakhono khumwinkha khunywa.

¹⁹ Nawiisha omwinkha maati, khumuza yoori: “Kinttela ottekha makina theenya kinkhe enkamiiya zenu zinywe mpakha zooshi ziishe” ²⁰ Nasaapiru khwiithela maati apale n'yopo zaari onywaamo nyama, khwaakuva khu-lawa vanlipu ottekha swaafu za waatta yoori zinywe enkamiiya zooshi. ²¹ Mwinyi otule khusala anyamaliye amweekesaka mwaari otule saaneene yoori ajuwe nkhamma Nnyizinku aparikhiya safwari yawe ama wala.

²² Ziishiyeovo onywa enkamiiya epile, khulaza kharawu ya thahapu ya karaama sitha na kakhana piiri za thahapu zaari ochiraaye karaama mi-iya olelila waya khunwalisa mmakhono mwawe. ²³ Khumuuzela yoori: “Weeyo o mwaana waani? Safwatali nkakuze nkhamma wa papaawo ewaakho puuro y'oolalawo miiyo na ashirikhaaka apa.”

²⁴ Ye khujipu: “Miiyo ki mwaana wa Betuweeli, mwaana wa Miilika na Nahoori. ²⁵ Onti ewaakho puuro yoolalawo mweeyo, na nyaani za waatta zooja enkamiiya zenu.”

²⁶ Aphano karumeya otule khukokhora khumwaaputu Nnyizinku, ²⁷ araka: “Asifwiwe Nnyizinku, Nluku wa mbwanaaka Eburahiima, ahisahaweeni onthoonyeza pheta yowe ya waamineya, maana akilokoza mpakha vaje wa ajamaaze mbwanaaka.”

²⁸ Aphano mwaari otule khutthira eettaka owawe, khuwooza ajamaaze vitthu zaarettikhaniyezo. ²⁹ Rapekha aarina nlupuwe aari wiitthiwaaye Labani. Ye khutthira eettaka onlipu yoori amoone ntthu aya otule. ³⁰ Mwaasa wa woona kharawu na kakhana aawalisiweeyo nlupuwe, na khusiila vitthu ooziweeyo Rapekha ti nlume otule, ye khulankha khusala alawa omoona nlume otule ottuukhule aariwo na enkamiiya zawe nshini wa nlipu. ³¹ Labani khuri: “Ote okhuno, weeyo wooparikhiyiwa ti Nnyizinku! Weekhalela-ni veetakale apho? Kawaattalelela puuro ontii na vahali woop-wehavo enkamiiya zowo.”

³² Labani khuta na karumeya otule mpakha owawe, khuruma wiishushiwa mapwattha vankamiiya epile na khwinkhiwa nyaani yoori zije. Khwinkhiwa maati yoori oose moolu awe na atthu apale aarinaaye. ³³ Nawiisha khutiisiwa etthu-yooja khwinkhiwa, ila karumeya otule khuri: “Akinja kihaazeeni olupa eti kaateeliyeeyo.”

Labani khumuza yoori: “Haya lupa.”

³⁴ Aphano khwaaza olupa araka: “Miiyo ki karumeya wa Eburahiima. ³⁵ Nnyizinku amparikhiya venkivene, amwinkha maali khwiya woo-juwanikha; onaaye pwittipwitthi na mompe, feeta na thahapu, akarumeya aalume na aakha, enkamiiya na apuuru. ³⁶ Suhura muukha wa mbwanaaka Eburahiima, anvokola mwaana ooluvaliye. Mwaana aya otu amwinkha vitthu zooshi ariinaazo. ³⁷ Mbwanaaka khukilaphisa araka: ‘Nti opu kini-ikhalaaye ohimweekesemo muukha wa aana a Akanaani. ³⁸ Ila olawe wa apapazaku vakatthi wa ajamaazaku wamweekese ottuukho muukha yoori ate araliwe ti mwanaka.’

³⁹ Aphano miiyo khunjipu mbwanaaka: ‘Khi muukha aya oto amana ahitakhi ota na-miyo?’

⁴⁰ Ye khukijipu yoori: ‘Nnyizinku otu kininrumelaaye ontta operekha nlayikha luulokoze, na ontta oparikhiya safwari yaho yoolawa omweekesa muukha wa wiiya jamaayaku na wa vaje wa apapazaku yoori ate araliwe ti mwanaka. ⁴¹ Amana ofiya wa ajamaazaku yo khuhitakhi owinkha, eti koolaphisiyeeyo entta owiishela.’

⁴² Phi kiriyeovo n'oofiya onlipu leelo, khusala kimuuza Nnyizinku kiraka: ‘Oo Nnyizinku! Nluku wa mbwanaaka Eburahiima, nkhamma safwari eti

kineettaaye otakha wawo, okijaaliwe. ⁴³ Nasaapi eti miiyo kiri apha nshini wa nlipu opu wa maati; mwaari othuuto antelaaye ottekha maati amana kinvekela yoori: "Kimeele maati ariye n'yuku mwawo," ⁴⁴ ye khukuza yoori: "Apa onywe, na kinttela ottekha makina kinkhe nyama zawo," eeye othuuto muukha aya athawuliweeyo ti Nnyizinku yoori araliwe ti mwaana wa mbwanaaka.'

⁴⁵ Ahineeshevo mattakhuzi apale oolompa varoho vaka, kinimoona Rapekha athuuliye yuuku valifuzi vawe eettaka vanlipu ottekha maati, miiyo khumuza yoori: 'Safwatali kimeele maati kinywe.'

⁴⁶ Ye khwiishusha yuuku yawe nasaapiru khukuza yoori: 'Apa onywe, na kintta winkha enkamiiya zawo zinywe.' Khukinkha miiyo khunywa na khwiinkha enkamiiya zaka khunywa.

⁴⁷ Aphano miiyo khumuuzela yoori: 'O mwaana waani?' Ye khujipu yoori: 'Miiyo ki mwaana wa Betuweeli mwaana wa Nahoori na Miilika.' Ethiito miiyo khunwalisa kharawu vaphula vawe khunwalisa kakhana makhono awe. ⁴⁸ Miiyo khukokhora, khwiinama khumwaaputu Nnyizinku, khunshukhurwela Nnyizinku, Nluku wa mbwanaaka Eburahiima akeet-tettisiyeeyo tarikhi yooshapweya yoori kimweettele mwaana wa ttwiye mbwanaaka ate araliwe ti mwanawe. ⁴⁹ Aphano, nkhamma mwatakha onthoonyeza pheta ya waamineya mbwanaaka Eburahiima, mwikuuze. Nkhamma khamweepu, mwikuze kijuwe etthu yooretta."

⁵⁰ Labani na Betuwele khujipu araka: "Epo zalankha wa Nnyizinku, fweeyo khanina etthu yoowaza. ⁵¹ Rapekha aya otu ari apha, onthuule alawe eeye muukha wa mwaana wa mbwanaawo, etthiipo Nnyizinku alupiyeozo."

⁵² N'osiila mattakhuzi apale karumeya wa Eburahiima khukokhora khwiinama khufiyisa ajihi vathi omaasho wa Nnyizinku. ⁵³ Elottelanaka khusarula vitthu za feeta na za thahapu na kuwo khumwinkha Rapekha, khulaza vitthu kiina theenya za mali khumwinkha nlupuwe na mamaawe. ⁵⁴ Nawiisha, yo khuja na khunywela khulala mpakha supu.

N'oocha karumeya otule khulupa yoori: "Mwikilikhe kirutele wa mbwanaaka."

⁵⁵ Ila nlupuwe Rapekha na mamaawe khumuza yoori: "Mwaari otu eekhale attaapha na-fweyo nenkawu siikhu khumi, nawiisha osala olawa saana."

⁵⁶ Ye khuri: "Mwihikirupazise maana Nnyizinku ashapweyisa safwari yaka. Mwikilikhe kirutele wa mbwanaaka."

⁵⁷ Aphano yo khunjipu: "Nintta onkhuwela mwaari oto nimuuzele mwenyewe." ⁵⁸ Khukhuwelwa Rapekha khuuzeliwa: "Ontakha olawa na mwinyi otu?"

Ye khujipu yoori: "Kakhupali."

⁵⁹ Ajamaaze khuleezanana Rapekha na yaaya awe na karumeya wa Eburahiima na atthu apale aataniyeeyo. ⁶⁰ Khuparikhiyiwa Rapekha na mattakhuzi apa:

"Weeyo nlupweethu wiiye maama
wa peewu alufu alufu zene;
Peewu yawo eto eshintte
sitati ya maatuwi aya."

⁶¹ Rapekha khulankha na akarumeyaawe a aakha khuwela enkamiiya zaya khusala alawa na nlume otule. Attaaphale karumeya khunthuula Rapekha khusala alawa.

⁶² Esiyaakha aarettiye arutaka onlipu oniitthiwaaye Layi-Rooyi, aari wiikhala Nikeepu, phantte ya kusini ya Kanaani. ⁶³ Siikhu moote, njuwalooveva wakathi Esiyaakha aari othepeleava mmashapa, khulansa maasho khoona enkamiiya zeettaka ota. ⁶⁴ Rapekha khulansa maasho khumoonaa Esiyaakha, ye khwiishukha vankamiiya vawe. ⁶⁵ Khumuuzela karumeya: "Khi mwinyi otule anlankhaaye mmashapa mphule ataka okhuno niriiwo ti paani?"

Ye khujipu araka: "Ti mbwanaaka." N'oosiila toole ye khuthuula nshukwi lawe khujifinikha.

⁶⁶ Karumeya khumuuzza Esiyaakha zooshi epile ziviriyezo. ⁶⁷ Esiyaakha khunthuula Rapekha khunttha nheema etile yaari ya mamaawe Suhura. Khunrala khwiiya muukhaawe wompheta. Aphano Esiyaakha khumpattha ntthu wonkhiza paata yoofwa mamaawe.

25

Peewu kiina ya Eburihiima

¹ Eburihiima khunrala muukha nkina aari wiitthiwaaye Khetuura. ² Ye khunvokolela aana apa: Zimraani, Yokishaani, Medaani, Midyaani, Ishibaaki na Shuuwa. ³ Yokshaani khunvokola Sheeba na Dedaani, aana a Dedaani aari Waashuur, Waletushi na Walewumi. ⁴ Aana a Midyaani aari Eefa, Eferi, Hanooki, Abiida na Eelida. Ooshi apa aari aana na atuulu a Khetuura.

⁵ Eburihiima khumwinkha Esiyaakha vitthu zooshi aariinaazo. ⁶ Illa aanaawe apale aawaavokoleliyeeyo na aakha akina, ari haayi nalelo, khuwenkha vitthu zaya na-yo, khuweekarela phantte ya malawa-juwa yoori ahiikhale vamote na mwanawe Esiyaakha.

Ofwa wa Eburihiima

⁷ Eburihiima eekhaliye nyaakha miiya na saapiini na mithaanu. ⁸ Ye afwa ari wa wuuluvala arina nyaakha za waatta, khulawa khuzikhiwa vamote na ajamaaze apa afwiyyeeyo. ⁹ Esiyaakha na Esumayila, khunthuula khulawa khunzikha nlikurakuza la Makhipeela kharipu na Manre, nshapa la Eforoni mwaana wa Zohaari njiiti. ¹⁰ Nshapa ntintthile oozanyeziweeyo Eburihiima pi Ahiiti, pi ottuukho azikhiweewo ye na muukhaawe Suhura. ¹¹ Paata ya Eburihiima ofwa, Esiyaakha aari wiikhala nti wa Peeri-Lahayi-Rooyi, Nnyizinku khusala amparikhiya.

Peewu ya Esumayila.

¹² Eti hatiithi ya peewu ya Esumayila mwaana wa Eburihiima, aavokoliweeyo ti Hajira wa Misuri karumeya wa Suhura.

¹³ Apa mazina a aana aavokoliweeyo ti Esumayila: Nebayoothi, mwaana wa mwanzo wa Esumayila, Kedaari, Adibeeli, Mibisaamu. ¹⁴ Miishima, Duuma na Maasa. ¹⁵ Hadaadi, Teema, Yetuuri, Nafishi na Kedeema. ¹⁶ Apa aana Esumayila khumi na awiri, pi atthaapo aari afwalume, wakhula mwaana na lihimu lawe na nhali aari omakaamo. ¹⁷ Esumayila eekhaliye nyaakha miiya na talaathiini na sapa. Khufwa khulawa khuzikhiwa vamote na ajamaaze apa afwiyyeeyo. ¹⁸ Peewu yawe yeekhaliye waaza Hawila mpakha Shuuri kharipu na Misuri tarikhi yaweetta Ashuuru. Yo aari woohisilani na ojama nkina wa Eburihiima.

Ezawu na Yaakhumpa

¹⁹ Eti hatiithi ya peewu ya Esiyaakha mwaana wa Eburihiima: Eburihiima khunvokola Esiyaakha. ²⁰ Esiyaakha n'oopaththa hirimo ya nyaakha

arupayiini khunrala Rapekha mwaana wa Betuweeli, nlupuwe Labani. Yo aari Araamu aari wiikhalaaye Paata-Araamu, tuniya ya Mesopotamiya.

²¹ Mwaasa wa muukhaawe ohiina mavokozi, Esiyaakha khulompa wa shariyavo anvekelaka Nnyizinku. Ye khusiila lompa yawe Rapekha khwiimittha. ²² Aana awiri khusala oomana mwiirukulu mwawe. Ye khushanka khusala ajuuzela yoori: “Niini enrettikhanaaye mwiirukulu mwaka, nkhamma pi toono keemitthela-ni?” Aphano ye khumuuzela Nnyizinku.

²³ Nnyizinku khunjipu:

“Mahimo mawiri pi ariiye mwiirukulu mwawo.
Weeyo ontela ovokola khapila piiri zoohisiilani:
moote enttela wiiya ya kuvu zayita eti kiina.
Nttunkhulu onteela onrumeyela nsimaana.”

²⁴ Zifiiyeevo siikhu zoopattha ekumi, khuwaavokola aana a maphapo. ²⁵ Otu woovokoliwa mwanzo aari wookhuttuwa na wa waatta ovazi, ti maana yootthajiwa nzina la Ezawu*. ²⁶ Elottelanaka khuvokoliwa ttwiye, nkhono awe okholeliye ekwakuno ya Ezawu. Ti maana yootthajiwa nzina la Yaakhumpa†. Ampattikhanaru aana aya apa, Esiyaakha aarettiye arina nyaakha siithiini.

²⁷ Aana apale khuwula, Ezawu khwiiya namasaya nwulu na aari wontuvela weettetta ntthuttu, ila Yaakhumpa aari ntthu woonyamala wontuvela wiikhala vaje. ²⁸ Esiyaakha aari ompheta Ezawu, mwaasa wontuvela orafuna nyama epile aari osayaazo. Ila Rapekha aari ompheta Yaakhumpa.

²⁹ Siikhu moote, Yaakhumpa khwiipikha sekuseku, wakathi aya opo Ezawu aarettiye eettaka orutiru ntthuttu ari wookholiwa ti jala na wooshokhera. ³⁰ Ye khumuza Yaakhumpa yoori: “Okinkhe vitthu epo oniipikhaazo zookhuttuwela kije. Kintakha ofwa jala!” Ti eto Ezawu enkhiweeyo nzina la Edomu.

³¹ Yaakhumpa khumuza yoori: “Waaze okuuzanyeza lifunku lawo l'oomwaana w'oomwanzo khapula.”

³² Ye khumuza yoori: “Lina fwayita-ni lifunku laya nttho la wiiya mwaana wa mwanzo, miiyo kitakhaka ofwa jala!”

³³ Yaakhumpa khusala ankhanyarela yoori: “Olaphe.” Ye khulapha, khumuuzanyeza Yaakhumpa lifunku lawe l'oomwaana wa mwanzo.

³⁴ Aphano ye khumwinkha Ezawu phaawu na sekuseku y'eepwiri. Khuja khunywela, khusala alawa safwari zawe.

Woohooneli fwayita lifunku l'oomwaana wa mwanzo.

26

Esiyaakha na Rapekha nti wa Geraari

¹ Yaapuwiye jala nti opule nkhamma ethhiipile yaapuwiyeego wakathi wa Eburahiima. Ti eto Esiyaakha khulawa nti wa Geraari okutthanana Apimeeleekhi mfwalume wa Afiliishiti. ² Nnyizinku khunteela, khumuza yoori: “Ohilawe tuniya ya Misuri; weekhale nti kintakhaaye owuuza. ³ Ottuukho miiyo kinttela wiiya vamote na-weyo na kinttela wuuparikhiya. Weeyo na peewu yawo kinttela owinkhani nti opo wooshi, kilipiselaka

* ^{25:25} Nzina nttho la Ezawu khwa luuka ya Meebereewu lina maana la mwiili wa wiitaala ovazi.

† ^{25:26} Yaakhumpa khwa luuka ya Meebereewu linlattanana na nttakhuzi liriina maana a ekwakuno na theenya lina maana oottettekha.

wahati opule kaalaphiyeyo kimwaahitaka papaawo Eburahiima. ⁴ Kinttela waattisa peewu yawo nkhama matthottowa o'otulu, na kinttela winkha tuniya yooshi eti. Mwaasa wa peewu yawo, khapila zooshi za tuniya zinttela wiiya zooparikhiiyiwa; ⁵ maana Eburahiima asiileza huula yaka, ashututela oruma waka, mwentto aka, kano zaka na masomi aka.”

⁶ Aphano Esiyaakha khusala eekhala nti wa Geraari. ⁷ Atthu a nti opule n'oomuuzela monkoni wa muukhaawe, ye khuri: “Nlupwaaka.” Mwaasa yoori Rapekha aari wooshapweya, Esiyaakha eetta woova olupa yoori muukhaawe. Ye aari wuupuwela yoori alume a mmuti mphule eetta omuula asale na Rapekha.

⁸ Esiyaakha eekhaliye Geraari siikhu za waatta. Siikhu moote, Apimeleekhi mfwalume wa Afiliishiti eetta othurumela veettakha khumoona Esiyaakha ampapasaka muukhaawe. ⁹ Aphano Apimeleekhi khunkhwela Esiyaakha khumuza yoori: “Otu, khweele muukhaawo! Khi apho waari oraaye nlupuwo?”

Ye khujipu yoori: “Kaari woova wuuliwa mwaasa wa ye.”

¹⁰ Apimeleekhi khuri: “Epo zaya niini oniretteliyeyo? Khi eriwaka ntthu mmote wa fweyo eettiye olalana, weeyo waari onittha paathuli?”

¹¹ Apimeleekhi khuwooza atthu ooshi yoori: “Wakhula otule antakhaaye onsapa mwinyi otu ama muukhaawe ontta ofwa.”

¹² Esiyaakha khulima nshapa lawe nti otthuupule, mwaasa wa Nnyizinku omparikhya mwaakha otthuupo khuurula vitthu swaafu miiya zoomziti epile aazaliyeezo. ¹³ Ye khureela, khusala evira zeekezeleyaka mali zawe, khwiyya thaajiri nwuulweene. ¹⁴ Aarina maphanko a pwittipwitthi, puuzi, a mompe na aarina akarumeya a waatta, ti nanna Afiliishiti laawaatiyeyo nrema. ¹⁵ Milipu zooshi epile aathipiyeeyo akarumeya a Eburahiima paapa wa Esiyaakha ari haayi, khusirelaza.

¹⁶ Siikhu moote Apimeleekhi khumuza Esiyaakha yoori: “Oleemo mmuti mphu, maana wareela na kuvu waniziti fwueyo.”

¹⁷ Aphano ye khuthama nti opule, khulawa khumaka ntta po la Geraari khwiikhala ottuukho. ¹⁸ Khuthipa opheya milipu epile zaathipiweeyo wakathi wa Eburahiima, khusireliwa pi Afiliishiti paata yoofwa Eburahiima, Esiyaakha khwinkha mazina milipu epile atthaapale papaawe aatthajiyeyo.

¹⁹ Siikhu kiina, akarumeyaawe khuthipa mmattapo ntumphule, khunsikana naattuutu wa maati. ²⁰ Amakhampuzi a Geraari khusala anyakulisana na amakhampuzi a Esiyaakha araka: “Maaati apa pi eetthu,” ti eto Esiyaakha aatthajiyeyo nzina la Eseki nlipu aya opule, mwaasa yoori weetta wuumaneliwa. ²¹ Akarumeyaawe khuthipa nlipu nkina, ila amakhampuzi apale a Geraari khupuwisa wuumani theenya, ye khutthaja nzina la Sitiina (milattu). ²² Aphano khulaavo aphale vaya khulawa khuthipa nlipu nkina, khuhiiwo hatha ntthu mmote wa wuumanelana. Ye khutthaja nzina la Rehopoothi araka: “Aphano Nnyizinku aninkha puuro ya nafwaasi, na ninteela oruwnera saaneene nti otthuupu.”

²³ Attaaphale Esiyaakha khulawa Beerisheba. ²⁴ Osikhu Nnyizinku khunteela khumuza yoori: “Miiyo ki Nluku wa papaawo Eburahiima. Ohoove, kiri vamote na-weyo. Kintta wuuparikhya kaattise peewu yawo mwaasa wa papaawo karumeyaaka.”

²⁵ Attaaphale ye khunjeka alitaari, khwaaputu nzina la Nnyizinku. Khweemesa heema yawe na akarumeyaawe khuthipavo nlipu.

²⁶ Apimeleekhi aalankhiye nti wa Geraari na shawuriiya awe Ahuzaathi na Fikhoole namalokozela wa anajanka olawa okutthanana Esiyaakha.

²⁷ Esiyaakha r'oowoona khuwooza yoori: "Mweeyo khamwintuveliwa ti miyo mweettiye okiikara mmuti mwenu. Khi mwatela-ni?"

²⁸ Yo khunjipu araka: "Neetta woona yoori Nnyizinku ori vamote na-weyo. Khuupuwela yoori enshapweya olapha na winkhana wahati weeyo na-fweyo. ²⁹ Osilana waya pi opu: Olaphe yoori khunnirettela zootakhala nkhamma ethiipo na-fweyo nihuuretteleeni, nooretella zooshapweya na khu-ulikha olawa na heeri. Weeyo o wooparikhiiya ti Nnyizinku."

³⁰ Esiyaakha khuwenkha etthu-yooja yooshapweya khuja khunywela.

³¹ Mmeesho mwaya supuyeene khulaphisana. Esiyaakha khuwaaleeza, yo khusala alawa na heeri.

³² Siikhu ethiitile khuta akarumeya a Esiyaakha oteela omuuza hapari za nlipu opule aathipiyeeyo yoori: "Napattha maati." ³³ Nlipu aya opule Esiyaakha khutthaja nzina la Sheba. Mpakha leelo sitati yaya etile eniithe-liwa Beeresheba.

³⁴ Wakathi Ezawu apatthiyeevo nyaakha arupayiini khunrala Yudiithi mwaana wa nhiiti anitthiwaaye Beeri, na Basemaathi mwaana wa nhiiti nk-inoko anitthiwaaye Elooni. ³⁵ Aakha apo awiri, anshukulikhisiye Esiyaakha na Rapekha.

27

Esiyaakha onimparikhya Yaakhumpa na Ezawu

¹ Esiyaakha ooluvaliye, maasho awe aashokheriye khuhisala oona. Khunkhuwela Ezawu mwanawe otu nwulu araka "Mwanaka!"

Ye khujipu: "Lape!"

² Khumuza yoori: "Miiyo kooluvala siikhu kimfwaavo khijuweyeeni.

³ Othuule ntetthe lawo olawe ntthuttu wasaye nyama. ⁴ Wiipikhe saana wookituvvelavo okitiisele kije, kuuparikhiiye kihinafwe."

⁵ Ezawu khulankha khulawa ntthuttu osaya nyama yoori antiisele papaawe. Rapekha aari onsiila Esiyaakha attakhulanaka mwanawe Ezawu,

⁶ ye khumuza mwanawe Yaakhumpa araka: "Weyo! Kansiila papaawo amuuzaka ttwiyo Ezawu yoori: ⁷ 'Okitiisele nyama ya wiipikhiwa wookituvvelavo kije, kuuparikheye mmakhono wa Nnyizinku kihinafwe.'

⁸ Mwanaka, osiileze mattakhuzi apa kinuurumaaye, nasaapi eti ⁹ olawe oliphanko la nyama wa waathuule aana a puuzi awiri ooneneva, kite kiweepikhe saaneene anttelaaye ontuvela papaawo. ¹⁰ Onlawanele aje, ooparikhiiye ahinafwe."

¹¹ Yaakhumpa khunjipu mamaawe Rapekha yoori: "Ezawu ti wa waattana ovazi, miiyo akina. ¹² Paapa amana akipapasela ahikisikanani ovazi kinttela wiiya ntthu woohata, toowo khankiparikhya ontta okilaani."

¹³ Mamaawe khumuza yoori: "Laana yaya eto ti ekikwele miiyo mwanaka. Ila orette eti kiwuuiyeeyo: weettelle puuzi epile kuurumiyeozo."

¹⁴ Ye khulawa khuthuula puuzi khuntiisela mamaawe, khwiipikha wootuvavvo waari weettelaaye ontuvela papaawe. ¹⁵ Aphano Rapekha khuthuula kuwo epile zooshapweya za Ezawu mwanawe otule nwulu zaari owawe, khunwalisa Yaakhumpa mwaana otu nttiithi aya. ¹⁶ Khumfinikha na shapala ya puuzi makhono awe na phantte ya mmwisiko mwawe wahaariimo ovazi. ¹⁷ Khuthuula etthu-yooja yootuva etile eepikhiyeeyo na phaawu khumwinkha mwanawe Yaakhumpa.

¹⁸ Ye khulawana aphale aariivo papaawe khunkhuwela: "Paapa!"

Ye khujipu: "Lape! Weeyo o mwanaka-ni?"

¹⁹ Yaakhumpa khunjipu papaawe: "Miiyo ki Ezawu mwanenu wa mwanzo. Katiisa eti mwaakirumiyeeyo. Mwilankhe mwije nyama eti kitisiyeeyo, nawiisha mwikiparikhiye."

²⁰ Esiyaakha khumuuzela mwanawe yoori: "Wapattha toovi nasaapiru mwanaka?"

Ye khujipu: "Nnyizinku Nluku eenu eetta okiperekheza."

²¹ Khumuza yoori: "Nkakisusele apha kuupapasele, kuujuwe nkhamma khweele o mwanaka Ezawu."

²² Yaakhumpa khunsusela papaawe. Esiyaakha khusala ampapasela, khumuza yoori: "Huula ti ya Yaakhumpa, ila makhono pa Ezawu." ²³ Ye khuhinjuwi mwaasa wa makhono awe wiliyana ovuzi nkhamma apa a ttwiye Ezawu.

²⁴ Ahinamparikhiye khumuuzela theenya: "Mwanaka Ezawu ti wey-eña?"

Ye khujipu: "Aa, ti miyo."

²⁵ Aphano khuri: "Okitiisele apha nyama yaya eto osayiyeyo kije, yoori kuuparikhiye."

Yaakhumpa khumweettisela khuja na khumwinkha viinyu khunywela.

²⁶ Esiyaakha khumuza yoori: "Okaattame mwanaka okipatikhe."

²⁷ Yaakhumpa khumwaattama papaawe khumpatikha. Esiyaakha khusila muuru wa kuwo zawe, aphano ye khumparikhiya araka:

"Muuru wa mwanaka
muuru wa nshapa
looparikhijiwa ti Nnyizinku.

²⁸ Nnyizinku awinkhe
mmatte wa pinkuuni
na oruwera wa vathi,
peewu ya waatta na viinyu ya waatta.

²⁹ Khapila za waatta zuurumeele weeyo,
na mahimo a waatta ookokhorele.
Wiiye mbwana wa attwiizo,
na aana a mamaawo ookokhorele weeyo.
Oolaanikha pi apale anttelaaye wuulaani,
na ooparikhijiwa
pi apale anttelaaye wuuparikhiya."

³⁰ Paata Yaakhumpa oparikhijiwa ti Esiyaakha papaawe, ye alaakavo aphale, nasaapiru ttwiye Ezawu khufiya alankhaka wuusaya. ³¹ Na-ye khwiipikha ethu-yooja yootuva khuntiisela papaawe, khumuza yoori: "Mwilankhe paapa mwije nyama eti keetteliyeeyo osaya mwikiparikhiye."

³² Papaawe khumuuzela: "Weeyo o paani?" Ye khuri: "Ti miyo Ezawu, mwanenu otu wa mwanzo."

³³ Esiyaakha khusuthuwa channu khusala athukumela khulupa yoori: "Khi otule apatthiyeyo nyama khukitiisela ti paani? Miiyo kaja keesha weeyo ohinate. Kamparikhiya, ti wooparikhijiwa!"

³⁴ Ezawu n'oosiila mattakhuzi apale a papaawe khwiiphiiriwa khulila venkivene, khunvekela papaawe yoori: "Na-miyo paapa mwikiparikhiye!"

³⁵ Ye khulupa yoori: "Aatiyeye ttwiyo apha khukittettekha, khuthuula parakha yawo."

³⁶ Ezawu khulupa yoori: "Eto swaafu yaphiiri akishinttaka. Ti maana ootthajiwia nzina la Yaakhumpa. Yamwanzo akinyakanya lifunku laka

l'oomwaana wa mwanzo. Apho theenya akinyakanya parakha yaka. Paapa khamwinkiparikhya na miiyo?”

³⁷ Esiyaakha khujipu: “Miyo kanthawaza Yaakhumpa yoori eeye mbwanaawo weeyo na ajamaazo ooshi anttela onrumeela ye. Onteela wiiyana tiriku ya waatta na viinyu. Kuurettele niini miiyo mwanaka?”

³⁸ Ezawu khumuuzela papaawe: “Mweeyo paapa khamwisalaneeni hatha parakha? Na miiyo mwikiparikhya!” Khusala alila anyakulaka.

³⁹ Aphano Esiyaakha khunjipu:

“Weeyo onttela wiikhala
ohali woolepelana na miti zooruweriwa,
ohali woothowawo mmatte wa pinkuuni.

⁴⁰ Yoori weeyo opatthe meekhazi
onttela wumanana phanka yawo
na onttela onrumeela ttwiyo.

Amana ojilipisa
ontta olaamo nthwaapu* mwaya mphu.”

⁴¹ Ezawu khwiya wa wiippiiriwa ti ttwiye mwaasa wa parakha etile enkhiweeyo ti papaawe. Khusala oopuwela toono: “Siikhu za matthaka a paapa ziri kharipu. Amana afwa miiyo kintta omuula ttwiyyaku Yaakhumpa.”

⁴² Wakathi asiiliyeevo Rapekha mattakhuzi apale aari ottakhulaaye mwanawe otu wa mwanzo Ezawu, ye khunkhwela mwanawe Yaakhumpa otu ntiitthi aya khumuza yoori: “shawuri ariinaazo Ezawu pi zootakha owuula. ⁴³ Apho weeyo mwanaka osiile eti kiniwuzaaye. Otthire nasaapi ethiiti, weette wa nlupwaaka Labani anikhalaaye nti wa Harani. ⁴⁴ Weekhale ottuukho mpakha ttwiyo omwiishe okatipukha wawe.

⁴⁵ Amana omwiishela okatipukha wawe na asahawu eti onretteliyeyo miiyo kintta wuuperekheza nhupi yoori ote. Akintakha okipwetheya aanaaka oowiiri siikhu moote!”

⁴⁶ Aphano Rapekha khulawa omuuza Esiyaakha yoori: “Akituveliweeni ohaayi aka wooshi mwaasa wa aakha a Ahiiti apa awaaraliyeyo Ezawu. Amana Yaakhumpa na-ye awaarala aakha a tuniya ethiiti miiyo kinhithari ofwa.”

28

Othira wa Yaakhumpa

¹ Esiyaakha khunkhwela Yaakhumpa khumparikhya, khumuza yoori: “Ohinrale hatha muukha mmote wa Kanaani. ² Olankhe olawe nti wa Paata-Araamu owawe Betuweeli pwapwiyo. Olawe wanrale mwaana wa Labani nlupu wa mamaawo. ³ Nluku Woowahi Zooshi ooparikhya, awinkhe mavokozi na peewu ya waatta, yoori khwa weyo epuhe khapila za waatta. ⁴ Awinkhe weeyo na peewu yawo parakha etile aahitiweeyo Eburahiima, wiiye mwennyewe nti opu oniikhalaaye nkhama nletto enkhiweeyo Eburahiima ti Nnyizinku.” ⁵ Paata ya toole, Esiyaakha khumuza Yaakhumpa yoori aphano eta. Ye khulawa Paata-Araamu owawe Labani mwaana wa Betuweeli Mwaaramu, nlupuwe Rapekha maama wa Yaakhumpa na Ezawu.

⁶ Ezawu aajuwiye yoori Esiyaakha amparikhya Yaakhumpa, khumuza yoori alawe nti wa Paata-Araamu, amweekese muukha w'oottuukho anrale. Na khusiila yoori papaawe amuuza Yaakhumpa yoori ahiinrale muukha wa

* **27:40** Thwaapu yaya eti olaamo nhukhumu.

Kanaani. ⁷ Khujuwa theenya yoori Yaakhumpa anshututela papaawe na mamaawe alawa Paata-Araamu. ⁸ Ti nanna ye ajuwiyeozo yoori papaawe khaari ontuvela aakha a Kanaani. ⁹ Aphano Ezawu khulankha khulawa owawe Esumayila mwaana wa Eburahiima, khunrala Mahalaathi mwaana wa Esumayila, nlupu wa Nebayoothi, oohiiyi aakha apale akina aarinaaye.

Joziya Yaakhumpa Beetele

¹⁰ Yaakhumpa khulankha Beeresheba khusala alawa Harani. ¹¹ Eettaka olawa ethhiipile, n'ootupweela njuwa ye khufiya puuro yaya eto yoori alale attaapho. Khuthuula liwe laari attaaphale khuretta nsaawu khurapalela. ¹² Khulottha khoona yeemesiwe shikatta vathi, janka yaya yaari okomaaye pinku. Malayikha a Nnyizinku aari owela ethiito na wiishukha. ¹³ Nnyizinku ari kharipu na-ye khumuuzza araka: "Miiyo ki Nnyizinku, Nluku wa papaawo Eburahiima na wa Esiyaakkha. Nti opo orapaleliyeeyo kinteela owinkha weeyo na peewu yawo yooshi. ¹⁴ Peewu yawo enteela wiiya ya waatta nkhamma mishaka za voolumwenku, enteela omwazeyela malawa-juwa, makaaripi, kashikhazini na kusini. Khwa weyo na peewu yawo khapila zooshi za voolumwenku enteela oparikhiyiwa. ¹⁵ Woone! Miiyo kiri vamote na-weyo, kinteela owiinanelaa wakhula vahali oneettaavo, na kinteela wuurutisela tuniya ethiiti, akiniwanswi khhiretteeni epile zooshi kiwaahitiyeozo."

¹⁶ Yaakhumpa asisimuwiyeovo aphale aari olalaavo khuri: "Khweele, Nnyizinku ori puuro ethiiti, miiyo akaajuwiye." ¹⁷ Ye khwiiya wa woova channu, khulupa yoori: "Puuro eti ti yawoopisa! Nyuupa ya Nluku, na nlako wa pinkuuni."

¹⁸ Mmeesho mwaya supuyeene, Yaakhumpa khuthuula liwe ntthile aaphiteeziyeeyo, khweemesa khwiitthela mafuttha vatulu vaya. ¹⁹ Khutthaja nzina puuro yaya etile, la "Beetele", ila raku sitati yaya etile yaari wiithiwa "Luuzhu".

²⁰ Yaakhumpa khwaahiti yoori: "Amana Nluku eeya vamote na-miyo, eenanelaa safwari yaka eti, khukinkha ethu-yooja na kuwo zoowala, ²¹ khukirutisela vaje wa paapa kiri nkumi, Nnyizinku onteela wiiya Nluku aka. ²² Liwe ntthi keemesiyeeyo apha nkhamma nripu linnatela wiiya nyuupa ya Nluku, na wakhula etile onikinkhaaye kiwinkhaka lifunku la khuumi."

29

Ofiya wa Yaakhumpa nti wa Harani

¹ Yaakhumpa khurutela safwari yawe khulawa mpakha nti oriye phantte linnthamuwaawo njuwa. ² Siikhu moote, khweekesa nkerekhere wa nttapo khoona nlipu mmote ozukuleliwe ti maphanko mattatthu a pwittipwitthi zirapaleliye. Waari nlipu zaari onywisiwaavo maati, liwe laari ofinikhani-wakaaye nlipu opule laari liwululene. ³ Ti eto amakhampuzi aari owe-jelanakaaye yoori asusise liwe ntthile enkhe nyama zaya maati oonywa, nawiisha khurutiselavo liwe ntthile.

⁴ Yaakhumpa khuwoozela amakhampuzi apale araka: "Mweeyo attwi-izaku, mwaavayi?"

Yo khujipu araka: "Fweeyo nti etthu Harani."

⁵ Ye khuri: "Mwininjuwa Labani ntuulu wa Nahoori?"

Yo khujipu araka: "Aa, nininjuwa!"

⁶ Khuwoozela theenya yoori: "Nkumi?"

Yo khujipu yoori: "Aa, nkumi! Mwanawee Rakeele ti oto antaaye apho na pwittipwitthi za papaawe."

⁷ Yaakhumpa khulupa yoori: “Nalelo khunaripe, khunafiye wakathi wookusanya maphanko. Mwinkhe maati pwittipwithi epo mwilawe mwa-jise opheya.”

⁸ Ila yo khujipu araka: “Khaninwahi, nina yoowejela pwittipwithi zooshi zikusanyeye attaapha nisusise liwe ntthi lifinikhaniweeyo nlipu, ninkhe pwittipwithi zetthu maati zinywe.”

⁹ Eettaka ottakhula ethiipile khusala ata Rakeele na pwittipwithi za papaawe, mwaasa yoori aari nshuki. ¹⁰ Yaakhumpa n'oomoona Rakeele mwaana wa halwiye Labani eettaka ota na pwittipwithi, khulawa khu-funula nlipu khwinkha maati pwittipwithi za halwiye. ¹¹ Nawiisha khumwinkha peezhu khusala alila. ¹² Aphano Yaakhumpa khumuza Rakeele yoori: “Miiyo ki jaama wa papaawo, ki mwaana wa Rapekha.” Ye khutthira alawaka omuuza papaawe.

¹³ Labani n'oosiila hapari za Yaakhumpa mwaana wa nlupuwe, khusala atthira alawaka okutthanana. N'onsikana khumpatikha khumpejari, khunthuula khusala alawana owawe. Ye khumuza Labani zooshi epile zan-vireliyeezo. ¹⁴ Aphano Labani khulupa yoori: “Weeyo khweele ojamaayaku, taamu yetthu moote.”

Yaakhumpa khwiikhala mpakha wiisha mweezi ari ottuukho. ¹⁵ Elottelanaka Labani khuri: “Hatha nkhamma ojamaayaku, onakhola khaazi mahala? Kuuze phakari yawo.”

¹⁶ Labani aarina aanaawe awiri aakha; otu nwulu aari wiithiwa Liiya. Nttiitthi aya aari wiithiwa Rakeele. ¹⁷ Liiya aari woosizila maasho, ila Rakeele aari wooshapweya mwiili awe na omaasho wawe. ¹⁸ Yaakhumpa mwaasa wootuveliwa ti Rakeele, khulupa yoori: “Kintta okhola khaazi nyaakha sapa okilooze mwanawo otu nttiitthi aya.”

¹⁹ Labani khujipu yoori: “Kemaani! Ti yooshapweya wuulooza weeyo zayita onlooza ntthu nkinoko. Osala wiikhala attaapha na-miyo.”

²⁰ Yaakhumpa khukhola khaazi nyaakha sapa yoori anrale Rakeele. Nyaakha epile sapa ye khoona nkhamma siikhu vattitthiiru mwaasa wootuveliwa channu.

²¹ Ye khumuza Labani yoori: “Aphano kiloozeni muukhaaka, maana zafiyela siikhu naasiilaniyeezo.”

²² Labani khuwaakhuwela atthu a waatta a mmuti mphule khuretta njampo. ²³ Ila n'oripa khunthuula mwanawe Liiya khumwinkha Yaakhumpa khurapalelana. ²⁴ Labani khumwinkha karumeyaawe Ziilipa mwanawe Liiya yoori asala anrumeela.

²⁵ Ochiiyeevo, Yaakhumpa khumoona yoori ti Liiya. Ye khulankha olawa omuuzela Labani yoori: “Niini epi okiretteliyeezo? Miiyo akaari okhola khaazi mwaasa wa Rakeele? Khi kiiswa yaya niini okittettekhaka?”

²⁶ Labani khunjipu yoori: “Fweeyo mmuti mwetthu mphu khanizow-ereeni onlooza otu nttiitthi ntunkhulu ahinaraliwe. ²⁷ Amana zivira siikhu sapa za njampo ntthi, nintta wuulooza otu nkina, paata onaahitaavo okik-holela khaazi theenya nyaakha sapa.”

²⁸ Ye khukhupali, khuvira siikhu epile sapa za njampo la harusi ya Liiya, Labani khunthuula Rakeele khunlooza. ²⁹ Khunthuula karumeyaawe Biila khumwinkha mwanawe Rakeele yoori asala anrumeela. ³⁰ Yaakhumpa khurapalelana Rakeele khwiiya wontuvela zayita Liiya. Khurutela theenya onkholela khaazi Labani mpakha nyaakha sapa.

³¹ Nnyizinku nawaona yoori Yaakhumpa khaari otuveliwa ti Liiya, khumwinkha mavokozi. Ila Rakeele khaari ovokola. ³² Liiya khwiimittha khumpattha mwaana wanlume, khuntthaja nzina la Ruubeni*. Khuri: “Nnyizinku oona ohoowa waka. Aphano phi kinttelaavo ophetiwa ti mannaka.”

³³ Khwiimittha theenya khumpattha mwaana nkinoko, khuntthaja nzina la Simiyooni†. Khulupa yoori: “Nnyizinku asiila ohituveli waka, akinkha mwaana nkina.” ³⁴ Khwiimittha theenya swaafu kiina khumpattha mwaana khuntthaja nzina la Leevi‡, khulupa yoori: “Aphano mannaka onttela wiiya wookusanyeya na-miyo mwaasa wompatthela aana attatthu.”

³⁵ Khurutela wiimittha theenya, khumpattha mwaana khulupa yoori: “Swaafu eti kinttela onsifu Nnyizinku.” Ti eto antthajieeyo nzina la Yuuda§. Aphano khumwiishela mavokozi.

30

¹ Rakeele ooniyeovo yoori Yaakhumpa khaari ompatthela mwaana, khusala anlidele wiivu ttwiye. Khumuza Yaakhumpa yoori: “Okipatthele mwaana, n’oohiiyi ethiipo kintta ofwa!”

² Yaakhumpa khumwiiphiira, khumuza yoori: “Weeyo onikoona nkhamma Nluku? Ye ti ahiniwinkhaaye mavokozi.”

³ Rakeele khumuza yoori: “Kinaaye karumeyaaka Biila, onthuule othuuto orapalelane yoori ampatthe mwaana zwaamu yaka, kiiye maama khwaye.”

⁴ Rakeele khunthuula Biila khumwinkha Yaakhumpa khwiiya muukhaawe. ⁵ Khwiimittha khumpattha mwaana. ⁶ Rakeele khulupa yoori: “Nnyizinku akirettela wa shariyavo, asiila lompa yaka akinkha mwaana.” Khuntthaja nzina la Daani.

⁷ Biila karumeya wa Rakeele khwiimittha theenya khumpattha mwaana waphiiri. ⁸ Rakeele khulupa yoori: “Kaarina viitha khuluyeene na nuunu, ila kanshintta.” Mwaana otule khuntthaja nzina la Nafitaali.

⁹ Liiya nawaona yoori alikha ovokola, khunthuula karumeyaawe Ziilipa khumwinkha Yaakhumpa khwiiya muukhaawe. ¹⁰ Ziilipa karumeya wa Liiya, khupattheliwa mwaana ti Yaakhumpa. ¹¹ Liiya khulupa yoori: “Kashapweyiwa mwaani!” Khuntthaja nzina la Gaati.

¹² Ziilipa karumeya wa Liiya khunvokola mwaana nkinoko theenya.

¹³ Liiya khuri: “Kafurahi mwaani! Mpakha aakha akina anteela okuuza yoori kenkhiwa furaha!” Mwaana otule khuntthaja nzina la Asheeri.

¹⁴ Wakathi wa wuurula tiriku Ruubeni aalankhiye khusala alawa omashapa, khusikana mishumo eniitthiwaaye mathunkuja*, khuthuula khulawa khumwinkha Liiya mamaawe. Rakeele khunvekela araka: “Safwatali, kimeeleni mathunkuja vattithiiru apo atiisiyeeyo mwanenu.”

¹⁵ Ye khujipu araka: “Wanthuula mannaka, khootosheeni? Theenya ontakha othuule mathunkuja apa atiisiyeeyo mwanaka?” Rakeele khunjipu araka: “Kemaani! Nlaweni nipatili, mwikinkhe mathunkuja apo, osikhu opu Yaakhumpa mwilawe mwarapalelane mweeyo.”

* ^{29:32} Nzina nttho la Ruubeni khwa luuka ya Meebereewu linlattanana huula enraaye “omoone mwaana mmote” † ^{29:33} Simiyooni nzina lintaaye khwa ntthakuzi la Meebereewu liriina maana oosiila. ‡ ^{29:34} Nzina nttho la Leevi khwa luuka ya Meebereewu linlattanana huula enraaye “okusanyeya, olutta”. § ^{29:35} Nzina nttho la Yuuda khwa luuka ya Meebereewu linlattanana ntthakuzi liriina maana oosifu. * ^{30:14} Atthu a raku aari wuupuwela yoori mathunkuja aniishusa tafwawuthi zoohivokoli.

¹⁶ Njuwa-looveva Yaakhumpa arutaka omashapa, Liiya khunthepeeza khusala amuuza yoori: “Leelo onttela orapalelana miiyo, maana keetta wuurentteri na mathunkuja atiisiyeyo mwanaka.” N’ooripa Yaakhumpa khulala vamote na Liiya.

¹⁷ Nnyizinku khusila lompa ya Liiya, khwiimittha khumpattha mwaana wathaanu wa Yaakhumpa. ¹⁸ Liiya khulupa yoori: “Nnyizinku akithuva mwaasa wonthuula karumeyaaka khumwinkha mannaka.” Ti eto khuntthaja nzina la Esakhaari.

¹⁹ Khwiimittha theenya khumpattha mwaana wasiitha. ²⁰ Ye khuri: “Nnyizinku akinkha etthu ya fwayita, aphano mannaka onteela otuveliwa venkivene ti miyo mwaasa wompatthela aana sitha.” Ti eto mwaana otule khuntthaja nzina la Zabulooni.

²¹ Wiishela waya Liiya khumpattha mwaana nkina wankha khuntthaja nzina la Diina.

²² Nnyizinku khumuupuwela Rakeele, khusila lompa yawe khumwinkha mavokozi. ²³ Ye khwiimittha khumpattha mwaana. Khulupa yoori: “Nnyizinku eeshisa haaya yaka.” ²⁴ Khunthaja nzina la Yuusufu, alupaka yoori: “Nnyizinku ti akinkhe mwaana nkina.”

Labani na Yaakhumpaansiilana opheya

²⁵ Paata ya Rakeele ompattha Yuusufu, Yaakhumpa khumuza Labani yoori: “Kilikheni kirutele nti kivokoliweeyo. ²⁶ Mwikinkhe aakhaaka apa kiwaakholeliyeeyo khaazi na aanaaka kilawe. Mweeyo mwinjuwa khaazi kuukholeliyeenini.”

²⁷ Labani khujipu yoori: “Safwatali nkhamma onikisiileza ohilawe, miyo sako zaka zakuuza yoori Nnyizinku akiparikhya mwaasa wa weeyo.

²⁸ Apho okuuze phakari ontakhaaye kisala kuuripha.”

²⁹ Yaakhumpa khunjipu: “Mweeyo mwinjuwa khaazi kuukholeliyeenini yoori ti ya waatta na nanna kaari oshukisaazo nyama zenu mpakha waatta.

³⁰ Miiyo kihinate nyama zenu zaari vattitthiiru leelo pi za waatta: Nnyizinku ooparikhiani mwaasa wa miiyo. Khi ajamaazaku kinttela owaatthantta lini?”

³¹ Labani khumuuzela yoori: “Kuuriphe niini?” Khujipu Yaakhumpa: “Mwihibkiriphe hatha ethu. Kintta orutela oshukisa nyama zenu amana nisiailana saana. ³² Leelo kinttela woona maphanko ooshi a nyama zenu, kilazakamo pwittipwitthi zooriipa, zoottweleela na za malepa, puuzi zootweleela na za malepa. Eto ti enttelaaye wiiya phakari yaka. ³³ Etthiipo enttela okhwuya woona okho ninttaawo nkhamma ki wa waamineya. Wakathi mwinttelaaye woona nyama zaka, amana yiiyamo nliphanko mwaka puuzi yoottweleela ama yoohiina malepa ama pwittipwitthi yoohiiyi yooriipa, mwintta ojuwa yoori keetta wiiya.”

³⁴ Labani khuri: “Osilana wetthu wiiye ethiipo olupiyeeyo.” ³⁵ Siikhethiitile, Labani khuphakula puuzi zeelume na zeekha zaariina malepa oolakala, na pwittipwitthi epile zaariina malepa ooriipa khuwenkha aanaawe oshukisa. ³⁶ Labani khuruma osusisiwa liphanko ntthile, khulawaniwa ohali woolepawo kiyasi ya siikhu ttatthu ntthu ari nsafwari na okhule aariiwo Yaakhumpa. Yaakhumpa khusala ashukisa nyama za Labani epile zaasaliyeeyo.

Nanna ariphiweezo Yaakhumpa ti Labani

³⁷ Yaakhumpa khushija virapi piishi za miitthi mittatthu zoofwarikhana khuwaka. ³⁸ Ye aajuwiyeye yoori vahali aari onywaavo maphanko a nyama phi vahali zaari opepheranaavo. Ti eto aari otthaakaaye puutta epile zoophaka

omaasho waya amana zinywaka. ³⁹ Amana zipepherana paata yawoona puutta epile, aana zaari owaapatthaaye aari wiiya oophaka, oottweleela, na a malepa. ⁴⁰ Yaakhumpa khuphakula nyama epile khuttha mphule zaariimo pwittipwitthi zeekha zoolakala yoori zisala zeekesa okhule ziriiwo epile zooriipa na za malepa za nliphanko la Labani. Khufuwa maphanko awe khuphakula khuhikusanyi na epile za Labani. ⁴¹ Amana zipepheriwaka epile zeekha za ruthupa, ye eetta otthaka puutta omaasho waya vahali zaari onywakaavo yoori zisala ziimittha zoonaka puutta epile. ⁴² Ila nawoona yoori nyama eti ti yawootta khaari ottheela puutta. Epile za wootta zaari wiiya za Labani ila epile za ruthupa zaari wiiya za Yaakhumpa. ⁴³ Wa nanna ethiito aari orettaaaye, ye khwiya thaajiri nwulweene khwiyyana maphanko a waatta a nyama, akarumeya aakha na aalume, nkamiiya na apuuru.

31

Nnyizinku oninruma Yaakhumpa orutela nti wa apapaze

¹ Yaakhumpa khuuziwa mattakhuzi aari olupaaye aana a Labani araka: “Yaakhumpa athuula zooshi paapa aariinaazo, areela mwaasa wa maali za paapa”. ² Yaakhumpa khoona yoori Labani khaari omweettettisa saana nkhamma aari omweettettisaazo raku.

³ Nnyizinku khumuza Yaakhumpa yoori: “Orutele nti wa apapazo okhu ovokoliweewo, miiyo kinttela wiiya vamote na-weyo.”

⁴ Yaakhumpa khuruma okhuweliwa Rakeele na Liiya yoori alawe otthuttu okhule aari ojisaawo nyama zawe. ⁵ N'oofiya khuwooza yoori: “Kinoona yoori papeenu khanikeettettisa saana nkhamma raku. Ila Nluku wa paapa ori vamote na-miyo siikhу zooshi. ⁶ Mweeyo mwinjuwa yoori kakhola khaazi ya papeenu khwa kuvu zaka zooshi. ⁷ Papeenu khukittettekha na khuzukulisa phakari yaka swaafu khumi, ila Nluku khuhintakheli yoori akirettete zootakhala. ⁸ N'oolupa yoori nyama epile zooshi za wiiyana malepa phakari yaka, nyama epile khusala ziwaapattha aana awiiyana malepa paasi. N'oolupa yoori nyama zoottweleela pi zaawo, nyama epile khusala ziwaapattha aana oottweleela. ⁹ Nluku othuuto ti ye athuuliyeeyo nyama za papeenu khukinkha miiyo.

¹⁰ N'oofiya wakathi zaari wiimitthaavo nyama epile, kooniye muulottha mirurumpi zaari opepheraaye ziri za malepa, zoottweleela na zooriipa.

¹¹ Nlayikha la Nluku khukikhwela muulottha liraka: ‘Yaakhumpa!’ Mi-
iyo khujipu: ‘Lape!’ ¹² Nlayikha ntthile khulupa yoori: ‘Olanse maasho awo woone nyama zimpeheriwa pi mirurumpi za malepa, zoottweleela, na zooriipa. Miiyo koonoza mwaasa yoori kinoona zooshi epile Labani anuurettelaazo. ¹³ Miiyo ki Nluku otule oopuweleliyeeyo Beetele okhule waavaaziyeewo mafuttha liwe na khukaahiti. Oleemo mmuti mphu nasaapi ethiiti orutele nti ovokoliweewo.’”

¹⁴ Rakeele na Liiya khujipu araka: “Fweeyo khanina hatha etthu yoorithi mmakhono wa papeetthu. ¹⁵ Oninoona nkhamma amalapo! Anuuazanyisa, nzurukhu etthu wa mahari wooshi aja. ¹⁶ Maali epi zooshi Nnyizinku alaziyeeyo mmakhono wa papeetthu pi zeethu fweeyo na aaneetthu. Apho orette zooshi epi Nnyizinku awuuziyeeyo.”

¹⁷ Yaakhumpa khuwaapkira aanaawe na aakhaawe vankamiiya.

¹⁸ Khuthuula nyama zawe na mali zawe zooshi aapathhiyeeyo Paata-Araamu, khusala alawa wa papaawe Esiyaakha tuniya ya Kanaani.

¹⁹ Wakathi Labani alawiyeovo okasa ovuzi wa pwittipwitthi zawe, Rakeele khwiya sanamu za papaawe aarettiyeeyo wiiya miluku zawe. ²⁰ Ti nanna

Yaakhumpa anretteliyeezo Labani Mwaarameewu, khutthirawo owawe woohinleezi.²¹ Khutthirisa vitthu zawe zooshi arinaazo, khulokha muuttho wa Efwarathi khusala alawa nti wa nyaako Gileyaadi.

Labani onimwiikarisa Yaakhumpa

²² Eviriyeevo siiku ttatthu, Labani khuuziwa yoori Yaakhumpa atthira. ²³ Ye khuwaathuula ajamaaze khusala amwiikarisa Yaakhumpa mpakha siiku sapa, khunsikana onyaako wa Gileyaadi. ²⁴ Aphano Nnyizinku khunlotthisa Labani osiku eettaka olala yoori: “Phoole! Ohimuuze etthu yooshapweya Yaakhumpa ama yootakhala.”

²⁵ Labani khunsikana Yaakhumpa eemesiye heema zawe onyaako wa Gileyaadi ye na ajamaaze, n'oofiya khumaka kharipu na attaphale aamakiyyevo Yaakhumpa. ²⁶ Ye khumuuzela Yaakhumpa yoori: “Epi okiretteliyeezo niini, zookittetekha khuwaathuula aanaaka nkhamma atthu ookholiwa viitha? ²⁷ Wakittetekhela-ni khutthira sirini? Okijuwiysiye khaneetta oleezana na furaha niipaka maliipo, koma na tthakare? ²⁸ Weeyo khuhikiweji khapula kileezanana aanaaka na atuulwaka! Epi orettiye vitthu zoololo. ²⁹ Miiyo kinaaye owahi wa wuuhoowisa, ila osiku wa taana Nluku wa papaawo khukuza yoori: ‘Phoole! Ohimuuze etthu yootakhala ama yooshapweya.’ ³⁰ Aphano nkhamma weeyo watthira mwaasa wa wuunukhela wa papaawo, miluku zaka weeyela-ni?”

³¹ Yaakhumpa khunjipu Labani araka: “Keetta woova, kaari wuupuwela yoori mwintta okinyakanya aaneenu. ³² Amana mwinsikanana ntthu miluku zenu epo, ahiye haayi. Mashaahiti ajamaazethu apa; n'oosikana etthu ya wiiya yeenu kirina miiyo mwithuule.” Yaakhumpa khaajuwiye yoori Rakeele ti ye eeyiyeyo miluku epile.

³³ Labani khuvira nheema wa Yaakhumpa na nheema wa Liiya na etile ya akarumeya apale awiri, ila khuhisikano. Asaruwiyeemo nheema wa Liiya, khweetta nheema wa Rakeele. ³⁴ Rakeele aarettiye atthiye vathi wa nsaawu wa enkamiiya eekhaleliye. Labani khuwaathola mmaheema wooshimo khuhivaasikani. ³⁵ Rakeele khumuuzza papaawe yoori: “Mwhikatipkhe mbwanaaka mwaasa woohilankhi n'oofoonani, keetta wiiya mmweezi.” Ye khweekesa miluku zawe epile ila khuhipatthi.

³⁶ Yaakhumpa khwiippiiriwa, khusala ammaruwela Labani yoori: “Niini kitthekiyeyo? Wala kakosa-ni yoofiyelela okiikarisa mwiri wookatipukhawene? ³⁷ Mapwattha aka ooshi mwathola, mwasikanamo niini ya wiiya yeenu? Nkhama mwasikanamo etthu yeenu mwitiise apha ariivo attwiizaku na attwiizenu aniphuke fweeyo awiri.

³⁸ Nyaakha eshiriini kiri vamote na-mweyo. Khina pwittipwitthi yenu wala puuzi yenu enaharipweye erukulu yaya na akinarafune hatha pwittpwitthi moote ya liphanko lenu. ³⁹ Akinoottiseleni hatha nyama moote yoovulalisiwa khufwa: miiyo keetta oriphelaka. Mweeyo mwaari oveka oriphewa wakhula nyama yaari wiiyiwaaye osiku na nthana. ⁴⁰ Nthana keetta ohoowa mwaasa wa haari, osiku keetta ohoowa mwaasa wookizizima, osikizi khawaari okikhola. ⁴¹ Ti nanna miiyo keekhaliyeyo vaje venu nyaakha eshiriini: kookholelani khaazi nyaakha khumi na mine yoori eeye mahari a aaneenu oowiiri, na nyaakha sitha kishukisaka nyama zenu phakari yaka yiyyaka nyama ethiipo, ila mweeyo khuzukulisa phakari yaka swaafu khumi. ⁴² Eriwaka khaari Nluku wa paapa, Nluku wa Eburahima otu amooviyeyo Esiyaakha, wiiya vamote na-miyo, mweetta okiikara woohikinkhi etthu. Ila Nluku khoona ohoowa waka na khaazi kikholiyeyo, taana osiku Ye khuulikhisan.”

Wahati wa Yaakhumpa na Labani.

⁴³ Labani khunjipu Yaakhumpa yoori: “Aakha apa aanaaka, aanaaya atuwaka, nyama epo oriina pi zaaka. Zooshi epi onoonaazo pi zaaka. Miyo kiwaarettele niini aanaaka na aanaaya apa awaavokoliyeeyo? ⁴⁴ Apho, nirette wahati miiyo na-weyo, otthuupo wiiye pi oshaahiti ethhu.”

⁴⁵ Aphano Yaakhumpa khuthuula liwe khweemesa nkhamma nripu. ⁴⁶ Ye khuwoza ajamaaze yoori: “Mwilokotthele mawe muukele.” Yo khulokotthela, khwiikhala khusala aja nshini wa mawe atthaapale ookeliyeeyo.

⁴⁷ Labani khutthaja nzina puuro yaya etile la Yakaare Sahatuuta, na-ye Yaakhumpa khutthaja nzina la Kaleeti.

⁴⁸ Aphano Labani khulupa yoori: “Mawe apa nuukeliye apha leelo, os-haahiti ethhu miiyo na-weyo.” Ti eto yaari wiittheliwaaye nzina la Kaleeti.

⁴⁹ Khusala yiitteliwa theenya nzina la Misipha, mwaasa ye woolupa araka: “Nnyizinku asala aneekesela amana naattuwana. ⁵⁰ Amana owaahazula aanaaka na khuweekesa aakha akina oohiiyi yo, hatha nkhamma khajuweeni ntthu, wuupuwele yoori Nnyizinku shaahiti ethhu.”

⁵¹ Labani khumuza Yaakhumpa yoori: “Woone mawe apa ariye apha na nripu ntthi keemesiyeeyo vakatthi vetthu miiyo na-weyo. ⁵² Kulu eti ya mawe na nripu, oshaahiti yoori akinteela wiirukhela kaapu yawo oteela wuuharipwela, wala weeyo ohiirkhe otaaka kaapu yaka oteela okiharipwela. ⁵³ Nluku wa Eburahiima, Nluku wa Nahoori, Nluku wa papaawo ti aniphuke miiyo na-weyo.”

Yaakhumpa khulapha khwa nzina la Nluku wa Esiyaakha otule aari omoovaaye. ⁵⁴ Yaakhumpa khuretta twaha vamwaako khuwaakhuwela ajamaaze ooshi aariinaaye yoori aje vamote, n'ooja nawiisha khulala vamwaako attaapho.

⁵⁵ Mmeesho mwaya lifwajiri Labani khulankha khuwaapejari aanaawe na atuuluwe, khuwaaparikhiya, nawiisha khusala arutela owawe.

32

Yaakhumpa onjilokotthela yoori alawe akutthanane Ezawu

¹ Yaakhumpa khulankha khusala alawa safwari yawe khukutthanana malayikha a Nnyizinku. ² Ye nawoona khuri: “Eti puuro ya anajanka a Nluku.” Aphale vaya khutthajavo nzina la Manayimu*.

³ Yaakhumpa khuwaaruma akarumeyaawe yoori alokoze wa ttwiye Ezawu nti wa Seyiiri tuniya ya Edomu. ⁴ Khuwaaruma yoori: “Mwilawe mwamuuze mbwanaaka Ezawu yoori karumeyaawo Yaakhumpa alupa toono: ‘Keekhala vaje wa Labani siiku za waatta mpakha leelo. ⁵ Kapatthawo mompe, apuuru, pwittipwitthi na puuzi, akarumeya aalume na aakha. Aphano kinimperekheza hapari epi mbwanaaka yoori akipokherele wooshapweyavo.’”

⁶ Akarumeya apale khurutela wa Yaakhumpa khumuza yoori: “Naalawiye mpakha wa ttwiyo Ezawu. Nanlikha eettaka ota, ontana atthu awe miiya nne oteela okutthanana weeyo.”

⁷ Ye khwiya wa woova na wooshukulikha, khuwaawanya atthu apale aariina na maphanko a nyama khuntti piiri, pwittipwitthi, puuzi, mompe, na enkamiya. ⁸ Arettaka toowo oopuweliye yoori: “Ezawu amana ata okuumanana khushintta khuntti moote, eti kiina entta otthira.”

⁹ Aphano Yaakhumpa khulompa araka: “Nluku wa paapa Eburahiima na Nluku wa paapa Esiyaakha, Oo Nnyizinku okuuziyeyo yoori: ‘Orutele

* ^{32:2} Manayimu maana aya heema piiri.

nti wa apapazo miiyo kinttela oweettettisa saana', ¹⁰ akinsuhi pheta yawo ya waamineya khwa nanna okikholiyeozo miiyo karumeyaawo; wakathi kaari ololhaavo muuttho Yorotaani miiyo kaathuuliye pakhora yaka paasi, aphano kapattha khuntti piiri za atthu na nyama. ¹¹ Okuusuru mmakhono wa ttwiyyaku Ezawu, maana kinimoova oteela okuula vamote na aakha apa na asimaana. ¹² Ila weeyo wakaahiti yoori onttela okeettettisa saana, na waattise peewu yaka nkhamma mishaka za mmattima epi zihinaalakeyaaye."

¹³ Waari osikhu, ye khulala attaphale. Mmaphanko wa nyama zawe khuthawulamo nyama zoomwinkha ttwiyye Ezawu: ¹⁴ miiya piiri puuzi zeekha na mirurumpi eshiriini, miiya piiri za pwittipwithi na mirurumpi eshiriini, ¹⁵ enkamiiya talaathiini zeekha na aanaaya awaamwa, mompe zeekha talaathiini na zeelume khumi, apuuru eekha eshiriini eelume khumi. ¹⁶ Wakhula liphanko la nyama epile khusala amwinkha karumeya mmote, khuwooza yoori: "Mwilokozise, maphanko apa mwaattuwani."

¹⁷ Otule aalokoziyeoyo khumuza araka: "Weeyo onlawa wakutthanane ttwiyyaku Ezawu. Amana awuuza yoori 'Nyama epi pi zaani wala weeyo onta vayi?' ¹⁸ Weeyo onjipu yoori, 'Pi za karumeyeenu Yaakhumpa, vitthu animperekhezaaye mbwanaawe Ezawu, ye aya onta ota nyuma wetthu.' "

¹⁹ Khunruma otule waphiiri na wattaaanthu na apa akinoko aya aari operekhaaye maphanko a nyama, awoozaka yoori: "Amana mwikutthanana Ezawu, mooshi mwimuuze ethu moote. ²⁰ Mwihisahawu olupa yoori: 'Yaakhumpa karumeyeenu onta ota onyuma wetthu okho.' " Maana Yaakhumpa aari wuupuwela yoori: "Kintta onnyamaza wiiphiiriwa wawe Ezawu mwaasa wa vitthu epi kilokozisiyeozo. Amana kikutthanana talili onteela okipwekherela saana." ²¹ Khulokozisa vitthu epile, ila ye khulala attaphale aamakiyeovo.

Wuumana wa Yaakhumpa nti wa Peniyele

²² Osikhu othuupule Yaakhumpa khulankha khuwaathuula aakhaawe oowiri na akarumeyaawe apale awiri aakha, na aanaawe khumi na mmote, khuwaalosa muuttho wa Yabokhi. ²³ Khuwaalosa atthu apale na vitthu zawi zooshi aariinaazo. ²⁴ Yaakhumpa khusala otthwe, khumpuwelela nlume mmote khusala oomanana mpakha ocha. ²⁵ Nlume otule ooniyeovo yoori khaari onkhitiri khumpiya n'yuunu mwawe khukurukunyuwa liphaja lawe eettaka wuumana. ²⁶ Aphano nlume otule khuri: "Okilikhe kilawe wacha." Ye khuri: "Akinuulikha olawa ohikiparikhieeni."

²⁷ Nlume otule khumuuzela yoori: "Nzina lawo o paani?"

Khujipu araka: "Miiyo ki Yaakhumpa."

²⁸ Nlume otule khutukhuru yoori: "Khunteela wiitheliwa theenya nzina la Yaakhumpa, ila nka okhuweleliwaka Ezirayeele. Mwaasa yoori weeyo woamanana Nnyizinku na atthu, khushintta."

²⁹ Yaakhumpa khumuza yoori: "Kakhola moolu kuuzeni nzina lenu."

Ye khujipu araka: "Ontakha oretta-nne nzina laka?" Khumparikhya attaphale.

³⁰ Yaakhumpa khulupa yoori: "Miiyo kamoona Nnyizinku wuuso khwa wuuso ila nalelo kiri haayi." Ti eto khutthaja nzina puuro etile la Peniyele†.

³¹ Yaakhumpa lantthamuwelie njuwa alankhaka Peniyele eettaka okokoja muulu mmote. ³² Ti eto mpakha leelo atthu a Ezirayeele khanja ntika wa nyama opu onluttaaye liphaja, mwaasa yaari phantte ya mwiili wa Yaakhumpa waapiweeyo khukurukunyuwa.

† ^{32:30} Peniyele maana aya 'wuuso wa Nnyizinku'.

33

Okutthana wa Ezawu na Yaakhumpa

¹ Yaakhumpa khweekesa okhule aari weettaawo khumoona Ezawu eet-taka ota na atthu awe miiya nne. Khuwaawanya aanaawe khumwinkha Liiya, Rakeele na akarumeyaawe apale awiri aakha. ² Khuwaalokozisa akarumeyaawe apale na aanaaya, khusala alottiwa ti Liiya na aanaawe, khwiishela Rakeele na Yuusufu. ³ Yaakhumpa khuwaalokozela, khukokhora khwiinama swaafu sapa mpakha ntunkhulu awe ofiya aphale aariivo.

⁴ Ezawu khutthira khulawa khumpatikha khumpejari, oowiiri khusala alila. ⁵ Ezawu khulansa maasho khuwoona aakha na aana, ye khuuzela yoori: “Khi apa apaani?”

Yaakhumpa khunjipu: “Aana apa rehema Nnyizinku amwinkhiyeeyo karumeyeenu.”

⁶ Aphano akarumeya apale na aanaaya khumwaattama khukokhora khwiinama. ⁷ Elottelanaka Liiya khuta attaphale na aanaawe khukokhora khwiinama. Wa wiishela aari Yuusufu na Rakeele, na-yo khuta khukokhora khwiinama.

⁸ Ezawu khuuzela yoori: “Nyama epile zooshi kisikaniyeeyo ntarikhi ontakhela-ni?”

Yaakhumpa khujipu: “Kintakha kipatthe osuhi mmakhono mwenu mb-wanaaka.”

⁹ Ezawu khulupa yoori: “Miiyo kinaaye pure ttwiyyaku, epo zaawo osalane omwennyewe.”

¹⁰ Yaakhumpa khusala ankhanyarela araka: “Mwihiatthale! Nkhama kinsuhi mmakhono mwenu safwatali pokherani vitthu epi, maana n'oooonani mweeyo koona nkhamma kimooniye Nnyizinku khwa nanna mwituveliweeo ti miyo. ¹¹ Kinuuvekelani yoori mwipokherele vitthu epi kuutiseliyeenini mwaasa yoori Nnyizinku akiparikhya, akinkha zooshi epile kinhhajiyaa.” Ye khunkhanyarela Ezawu mpakha okhupali.

¹² Ezawu khuri: “Nlawe nivire neettettaka.”

¹³ Ila Yaakhumpa khuri: “Mbwanaka, mwinjuwa yoori aana apa nalelo asimaana na kinaaye pwittipwitthi na mompe zinaamwisaaye. Amana kikhanyarela weettettisa channu zooshi zintta ofwa siikhu moote. ¹⁴ Apho mwilokoze mbwanaaka, miiyo kintta ota vattiitthi-vattiitthi khwa mwentto wa aanaaka na nyama zaka, mpakha ofiya nti wa Seyiiri.”

¹⁵ Ezawu khuri: “Kintakha atthu aka akina kuulikhele weeyo.”

Yaakhumpa khuuzela yoori: “Mwaasa wa niini? Khinhithajya. Ethiiti mwikiphereliyeeyo saana paasi.”

¹⁶ Siikhu ethiitile Ezawu khulankha khusala arutela owawe Seyiiri.

¹⁷ Yaakhumpa khulankha khusala alawa Sokoota. Ottuukhule khujeka nyuupa yawe na mazizi a nyama zawe. Ti eto atthajiyeovo nzina la Sokoota*.

Yaakhumpa ontta Shekemu

¹⁸ Yaakhumpa arutiyeovo Paata-Araamu khufiya Shekemu tuniya ya Kanaani ari nkumi, khweemesa heema zawe kharipu ya sitati ethiitile.

¹⁹ Khuuzanya phantte moote ya nshapa puuro ethiitile eemesiyeevo heema zawe, na aana a Hamori, paapa wa Shekemu, khwa hisapu miiya nzurukhu wa feeta. ²⁰ Attaaphale khunjeka alitaari khuntthaja “Nluku yoori Nluku wa Ezirayeele.”

* ^{33:17} Sokoota maana aya masaasa ama mapantta.

34

Ojiwamo wa Tiina

¹ Siikhu moote, Tiina mwaana wa Yaakhumpa na Liiya, aalankhiye olawa owaathotola aanaakha a nti otthuupule. ² Shekemu mwaana wa Hamori nhiivi mfwalume wa nti aya opule, n'oomoona, khunkhola khunjansili. ³ Erettiyeevo toole khwiya wootuveliwa ti Tiina mwaana wa Yaakhumpa, khumpheta, khumuaza mattakhuzi oomwiitthaaza rooho. ⁴ Shekemu khumuaza Hamori papaawe yoori: "Mwakuurele mwaari otu kinrale."

⁵ Wakathi Yaakhumpa asiliyeevo yoori mwanawe Tiina ajansiliwa ti Shekemu, aarettiye aanaawe ari ntthuttu ashukisaka nyama. Ye khunyamala khusala awaaweja aanaawe mpakha oruti.

⁶ Khulankha Hamori paapa wa Shekemu olawa ottakhulana Yaakhumpa. ⁷ Wakathi arutiyeevo aana a Yaakhumpa ntthuttu, n'oosiila vitthu epile yo khwiya ooshanka channu, khuweephiira mwaasa yoori Shekemu aarettiye etthu yoopatthisa haaya vakatthi wa Meezirayeele, onjansili mwaana wa Yaakhumpa; eto etthu yahaari orettiwaayo.

⁸ Hamori khuwooza yoori: "Mwanaka Shekemu atuveliwa ti mwanenu, apho safwatali mwinlooze eeye muukhaawe. ⁹ Nirette ojama; aaneenu awaarale aaneetthu, na apa eetthu awaarale eenu. ¹⁰ Mwiikhale vamote na-fweyo, nti opu pu weetthu mwihupalee wakhula phantte mwintakhaaye. Mwiikhale nttumphu mwirette zanshara zenu mpakha muuzanye nti eenu."

¹¹ Aphano Shekemu khumuaza papaawe Tiina na alupuwe yoori: "Safwatali mwikikhupalee mattakhuzi apa, kintta owinkhani wakhula etile mwintelaaye olupa. ¹² Mwilupe mahari a waatta a mwanenu na tthuuo mwintakhaaye, kintta wuuriphani khwa nanna mwintakhaazo okuuza, ila mwikilooze."

¹³ Aphano aana a Yaakhumpa khunjipu Shekemu na papaawe wonhatavo, mwaasa wonjansili nlupwaaya Tiina. ¹⁴ Khunjipu yoori: "Khaninwahi onthuula nlupweethu khunlooga nlume woohikhiri koma, enttela wiiya haaya. ¹⁵ Fweeyo ninkhupali wuuloozani nlupweethu amana alum ooshi a mmuti mwenu eeya ookhiriya koma nkhamma fweeyo. ¹⁶ Toowo phi ninttelaaovo wuuloozani aaneetthu na-fweyo owaarala aaneenu, ninttela wiikhala vahali vamote niiye ojama mmote. ¹⁷ Ila amana mwihikhupali okhiriya koma, nintta onthuula mwanetthu nileemo mmuti mwenu." ¹⁸ Mattakhuzi apale Hamori na mwanawe Shekemu khukhupalela. ¹⁹ Shekemu, shapu wooshitahiwa pi atthu ooshi a vaje wa papaawe, khuhirupazi khulawa khuretta etile aavekeliweeyo mwaasa wontuvela mwaana wa Yaakhumpa.

²⁰ Hamori na mwanawe Shekemu khulankha khulawa vanlako* wa sitati ethiitile owoozza alum ooshi araka: ²¹ "Atthu apa pi oosiilaneya, nlaweni niwaalikhe eekhale mmuti mweththu mphu arettaka zanshara zaya. Nti opu nwulweene ewaamo puuro eniwaafiyelaaye, anilooze aanaaya na-fweyo niwaaloze aaneetthu. ²² Ila yo ankhupali wiikhala vamote na-fweyo khwiya ajamaazetthu amana alum ooshi akhiriya koma nkhamma etthiipo na-yo akhiriyyeazo. ²³ Nyama zaya zooshi na mali zaya zooshi zinttela wiya zeethu; nlaweni nikhupalele shawuri zaya yoori eekhale vamote na-fweyo."

²⁴ Alume ooshi apale aakusanyeyiyeeyo vanlako wa sitati khukhupalela mattakhuzi apale aalupiyeeyo Hamori na mwanawe Shekemu; alum ooshi a sitati ethiitile khukhiriya koma.

* ^{34:20} 'Nlako wa sitati' yaari puuro yaazoweriweeyo zaari ottakhuliwakaavo milattu na vitthu za zanshara. Moone suura 19v1.

Alupuwe Tiina aneekesa ojiripha mwaasa wa nlupwaaya

²⁵ Siikhu yattaatthu, wakathi alumé apale aari woonachaavo olwaaza, aana awiri a Yaakhumpa, Simiyooni na Leevi alupuwe Tiina, khuthuula phanka zaya, khweetta nsitati mphule woohijuwi ti hatha ntthu. Khuwoola alumé ooshi. ²⁶ Khumuula Hamori na mwanawewe Shekemu. Khunthulawo Tiina owawe Shekemu khusala alawa. ²⁷ Khuta aana a Yaakhumpa apale akina ositati ottuukhule ooliweewo atthu, khuttapwattha vitthu za mali mwaasa woojansiliwa nlupwaaya. ²⁸ Khuthuula liphanko la pwittipwitti, la puuzi, mompe, na apuuru, na vitthu zaari nsitati nttumphule na epile zaari omashapa. ²⁹ Yo khuwaathuula aakha na aanaaya na vitthu zooshi za mali zaari mmamanyupa mwaya.

³⁰ Aphano Yaakhumpa khumuuzela Simiyooni na Leevi yoori: "Mweeyo mwakizinkula! Mwaretta yoori atthu apa aniikhalaaye nti otthuupu, Akanaani na Apirizi asala eephiiriwa ti miyo. Fweeyo khanaatteeni, yo amana akusanyeya ateela okuumanana antta okuula na ajamaazaku."

³¹ Yo khujipu araka: "Ti yooshapweya yo onretta omalempe nlupweet-thu?"

35

Yaakhumpa oninjeka alitaari wa Nnyizinku Beetele

¹ Nluku khumuza Yaakhumpa yoori: "Olankhe olawe Beetele weekhale ottuukho, wanjekewo alitaari wa Nluku otu oopuweleliyeeyo wakathi waari ontthiraavo ttwiyo Ezawu."

² Yaakhumpa khuwooza ajamaaze na atthu apale aariina yoori: "Mweeselele okho miluku zenu epo zoohifwayi mwiriinaazo, mwijitwaharishe mwiwale kuwo kiina. ³ Nilankhe nilawe Beetele, ottuukho kinlawaa kan-jekewo alitaari woomwaaputuvu Nluku otu aakipuweleliyeeyo siikhu epile kaari mmashakha, otu aakilokoziyeeyo tarikhi zooshi kiviriyeeko." ⁴ Yo khumwinkha Yaakhumpa miluku zaya zooshi epile zoohifwayi aariinaazo, na pirinku epile aawaliyeeyo aakha ooshi, ye khuthuula khuthipela nshini wa muutthi nwulweene waari nti wa Shekemu. ⁵ Wakathi yo alankhiyeovo alawaka, Nluku khuweeshushela woova atthu a sitati epile aattamananiye-ezo, mphule aari oviraamo, yo khuhiseekarisi aana a Yaakhumpa.

⁶ Yaakhumpa khufiya na atthu awe ooshi nti wa Luuzu oniithiwaaye Beetele, tuniya ya Kanaani. ⁷ Khunjeka alitaari, puuro yaya etile khutthajavo nzina la Nluku wa Beetele mwaasa yoori Nluku aajithoonyeziye attaphale wakathi opule Yaakhumpa aari ontthiraavo ttwiye.

⁸ Deebora, yaaya wa Rapekha khufwa, khuzikhiwa kharipu ya Beetele nshini wa muutthi nwulweene oniittheliwaaye Aloon-Pakuuti*.

⁹ Yaakhumpa n'ooruti Paata-Araamu, ari Beetele, Nluku ampuweleliye swaafu yaphiiri khumparikhya. ¹⁰ Khumuza yoori: "Nzina lawo o Yaakhumpa ila waaza leelo walikha, aphano nzina lawo o Ezirayeele." Ti nanna Nluku antthajieeyo nzina la Ezirayeele.

¹¹ Nluku khumuza theenya araka:

"Miiyo ki Nluku Woowahi Wooshi,
mwivokolelane na mwaattelane.
Khwa peewu yawo weeyo
enteela opuwa khapila
na khuntti ya khapila za waatta

* ^{35:8} Aloon-Pakuuti maana aya muutthi zaakwisiweevo mishozi

na anlawa apuvevo afwalume.

¹² Nti kimwinkhiyeeyo Eburahiima na Esiyaakha kinteela owinkha weeyo na peewu yawo.”

¹³ Nawiisha ottakhulana Yaakhumpa, Nluku khulawa.

¹⁴ Yaakhumpa khweemesa nripu la mawe vahali attaphale aattakhulaniyeevo Nluku. Khwiitthela viinyu nripu laya ntthile na khuvaaza mafutha. ¹⁵ Ye khutthaja nzina la Beetele puuro yaya etile aari ottakhulanaavo Nluku.

Ovokoliwa wa Bejami na ofwa wa Rakeele

¹⁶ Yo khulankha Beetele, nalelo ahinafiye Efwarata Rakeele khwiyyana tafwawuthi khuluyeene ya woona olwaaza asaleelaka ompattha mwaana.

¹⁷ Oonaka olwaaza channu, mwaatani[†] khumuuzza yoori: “Ohoove! Weeyo wampattha mwaana nkina theenya wanlume.” ¹⁸ Ettaka oshakhi ahinattiye phuumu, khuntthaja nzina mwaana otule la Benooni[‡], ila papaawe na-ye khuntthaja nzina la Bejami[§].

¹⁹ Aphano Rakeele khufwa khulawa khuzikhiwa tarikhi ya Efwarata (yiyyiye Belemu). ²⁰ Yaakhumpa khutthaavo alama ya nshuhuti vakhapuri ya Rakeele, mpakha leelo eti liwaapho.

²¹ Ezirayeele khulankha khuvikana korofwa ya Eeteri khulawa khweemesa heema zawe.

²² Siikhu moote, Ezirayeele eekhalaka nti otthuupule, mwanawe Ruubeni khulawa khulalana Biila, mwiitthwaana otule aari muukha nkina wa papaawe, ila hapari epile khumfiyela papantthu. Ezirayeele aarina aana khumi na awiri.

Aana a Yaakhumpa

²³ Aana aavokoleliweeyo Liiya ti Yaakhumpa pi apa: wamwanzo ti Rububen, alottiwaka ti Simiyooni, Leevi, Yuuda, Esakhaari na Zabulooni.

²⁴ Aana aavokoleliweeyo Rakeele: ti Yuusufu na Bejami.

²⁵ Na-ye aana a Biila karumeya wa Rakeele pi apa: Daani na Nafitaali.

²⁶ Aana a Ziilipa karumeya wa Liiya pi apa: Gaati na Asheeri.

Aari atthaapo aana a Yaakhumpa awaapatthiyeyo nti wa Paata-Araamu.

²⁷ Aphano Yaakhumpa khurutela wa papaawe nti wa Manre kharipu na Kiriyyati-Aarapa wiyyiye Heporooni, ohali aari wiikhalaawo Eburahiima na Esiyaakha. ²⁸ Esiyaakha eekhaliye nyaakha miiya na thamaaniini. ²⁹ Afwa ari wa wuuluvala arina nyaakha za waatta, aanaawe Ezawu na Yaakhumpa khunzikha.

36

Peewu ya Ezawu

¹ Eti peewu ya Ezawu anjuwanwaaye nzina la Edomu.

² Ezawu khuwaarala aakha a Kanaani. Mmote aari wiithiwa Aada aari mwaana wa Elooni, njiiti. Nkinoko aari wiithiwa Olipama mwaana wa Anahi ntuulu wa Zipiyooni Njiivi, ³ na Basemaathi mwaana wa Esumayila nlupuwe Nepayoothi.

⁴ Aada aavokoleliwe mwaana ti Ezawu khuntthaja nzina la Elifazi, na Basemaathi khunvokola Rewele. ⁵ Na Olipama khunvokola Yewuushi,

[†] **35:17** mwaatani: pariteera [‡] **35:18** Benooni maana aya mwaana woopattikhana na tafwawuthi

[§] **35:18** Bejami maana aya mwanaka wa nkhono-nlume.

Yalaamu na Koora. Apa aari aana Ezawu awaavokoliyeeyo tuniya ya Kanaani.

⁶ Ye khuwaathuula aakhaawe na aanaawe na atthu ooshi aari wiikhalaaye na vitthu zooshi aapatthiiyeezo tuniya ya Kanaani waaza pwit-tipwitthi zawe, puuzi na mompe zawe zooshi, khumwazeyanana ttwiye Yaakhumpa khulawa khwiikhala nti nkina. ⁷ Ye khuthama mwaasa wa nti opule aari wiikhalaaye khawaarina ethu-yooja yoofiyela oja nyama zaya zooshi, mali zaya zaari za waatta khuhisala ewaheya wiikhala vahali vamote. ⁸ Ezawu, otu aniitthiwaaye Edomu, khuthama khulawa khwiikhala onyaako wa Seyiiri.

⁹ Eti peewu ya Ezawu paapa wa Meedomu aniikhalaaye onyaako wa Seyiiri.

¹⁰ Apa mazina a aana a Ezawu:

Elifazi mwaana wa Aada muukha wa Ezawu, Rewele mwaana wa Base-maathi muukha wa Ezawu.

¹¹ Apa mazina a aana a Elifazi:

Teemani, Omari, Zeefo, Katamu na Kenaazi.

¹² Tinna, muukha nkina wa Elifazi mwaana wa Ezawu, aavokoleliwe mwaana aari wiitthiwaaye Amaleekhi. Apa atuulu a Aada muukha wa Ezawu.

¹³ Apa aari aana a Rewele:

Nahathi, Zeera, Shaama na Miiza. Apa atuulu a Basemaathi muukha wa Ezawu.

¹⁴ Apa aana a Olipama muukha wa Ezawu, mwaana wa Anahi, ntuulu wa Zipyooni:

Yewuushi, Yaalamu, na Koora.

¹⁵ Apa mahaakhimu a mahimo a peewu ya Ezawu:

Elifazi, mwaana wamwanzo wa Ezawu, aanaawe aari apa:

Haakhimu Teemani, haakhimu Omari, haakhimu Zeefo, haakhimu Ki-naazi, ¹⁶ haakhimu Koora, haakhimu Katamu, na haakhimu Amaleekhi. Apa aari mahaakhimu a peewu ya Elifazi nti wa Edomu. Aari atuulu a Aada.

¹⁷ Aana a Rewele, mwaana wa Ezawu aari apa:

Haakhimu Nahathi, haakhimu Zeera, haakhimu Shaama na haakhimu Miiza. Apa mahaakhimu a Rewele nti wa Edomu na atuulu a Basemaathi muukha wa Ezawu.

¹⁸ Aana a Olipama muukha wa Ezawu, aari apa:

Haakhimu Yewuushi, haakhimu Yaalamu na haakhimu Koora. Apa mahaakhimu a peewu ya Olipama muukha wa Ezawu mwaana wa Anahi.

¹⁹ Ooshi apa mahaakhimu na aana a Ezawu otu anjuwanipaaye nzina la Edomu.

Peewu ya Seyiiri

²⁰ Apa aana a Seyiiri, nhoori aari wiikhalaaye nti otthuupule; Lotaani, Shobaali, Zipyooni, Anahi, ²¹ Diishoni, Eseeri na Diishani. Apa aari mahaakhimu a nti wa Hoori, aana a Seyiiri nti wa Edomu.

²² Aana a Lotaani aari apa:

Hoori, Hemani, na Tinna nlupu wa Lotaani.

²³ Aana a Shobaali aari apa:

Aluvani, Manahati, Ebali, Shefo na Onamu.

²⁴ Aana a Zipyooni aari apa:

Aaya na Anahi othuuto ooneliyeeyo nlipu wa maati oolukuza n'yaara ashukisaka apuuru za papaaawe Zipyooni.

²⁵ Aana a Anahi aari apa:

Diishoni na Olipama.

²⁶ Aana a Diishoni aari apa:
Hemetaani, Eshipaani, Ethirani na Keerani.
²⁷ Aana a Eseri aari apa:
Bilani, Zaawani na Akani.
²⁸ Aana a Diishani aari apa:
Wuuzi na Araani.
²⁹ Apa aari mahaakhimu a Ahoori:
Lootani, Shopali, Zipyiooni, Anahi, ³⁰Diishoni, Eseeri na Diishani. Apa aari
mahaakhimu a ahoori, ti nanna aawanyeyiyezo mahimo aya nti wa Seyiiri.

Afwalume na mahaakhimu a nti wa Edomu

³¹ Apa afwalume aariina yenzi nti wa Edomu ahineeyeyevo hatha mfwalume
mmote wa mwizirayeele.

³² Beela mwaana wa Bewoori ti ye aathawaliyeeyo tuniya ya Edomu,
sitati yawe yaari wiitthiwa Dinaapa. ³³N'oofwa Beela, khuthawala Yobaabu
mwaana wa Zeera wa sitati ya Bozara.

³⁴ Yobaabu khufwa, khuthawala Hushamu wa nti wa Temaani.

³⁵ Khufwa Hushamu, khuthawala Hadaadi mwaana wa Bedaadi
aawaashinttiyeeyo Amidiyaani nti wa Mowaabu. Sitati yawe yaari
wiitthiwa Avithi.

³⁶ Hadaadi khufwa, khuthawala Samula wa nti wa Masareka.

³⁷ Samula khufwa, khuthawala Shawulu wa nti wa Rohopoothi waat-
tameliyeeyo muuttho Efwarathi.

³⁸ Shawulu khufwa, khuthawala Baali-Hanani mwaana wa Akiboori.

³⁹ Afwiyyeeyo Baali-Hanani mwaana wa Akiboori khuthawala Hadaari,
sitati yawe yaari wiitthiwa Paawu, muukhaawe aari Mehetabeeli mwaana
wa Matereeti ntuulu wa Mezahaabu.

⁴⁰ Mahaakhimu apa aari a peewu ya Ezawu, na mahimo aya na miti zaya:
Haakhimu Tinna, Aluvani, Yeteteeti, ⁴¹ Oholipama, Elaahi, Pinoni,
⁴² Kenaazi, Temaani, Mibizaari, ⁴³ Makidiyeeli na Iramu. Apa aari
mahaakhimu a Edomu; wakhula mmote aari wiikhala puuro etile aari
othawalaaye.

Meedomu ooshi peewu ya Ezawu.

37

Joziya Yuusufu

¹ Yaakhumpa aari wiikhala tuniya ya Kanaani ottuukho aasaafireliyeewo
papaawe.

² Eti hatiithi ya peewu ya Yaakhumpa.

Yuusufu arina nyaakha khumi na sapa, aari nshuki wa pwittipwitthi na
puuzi za papaawe vamote na attwiize aana a Biila na Ziilipa, aakha a pa-
paawe. Yuusufu eetta omuuzaka papaawe vitthu zootakhala aari orettaazo
attwiize.

³ Ezirayeele* aari ompheta Yuusufu zayita aana apale akinoko aya,
mwaasa yoori ampatthiye ooluvaliye. Khunsonela ajapi ya kisawu za
waatta. ⁴ Attwiize nawoona yoori oniiya ophetiwa ti papaaya zayita yo,
khwaaza wiiphiiriwa ti ye khuhisala awahi onttakhulana saana.

⁵ Siikhu moote, Yuusufu khulottha jozi, n'ooowooza attwiize yo khutepa
wiiphiiriwa ti ye.

* ^{37:3} Ezirayeele nzina likina la Yaakhumpa. Moone kithaapu ya mwanzo suura 32v38.

⁶ Ye khuwoza yoori: “Mwisiileze jozi kilotthiyeyo! ⁷ Kalottha niri mmashapa nifukaka misama za tiriku, nsama aka khweemela, misama zenu mweeyo khuzukulela khwiinamela opu waaka.”

⁸ Attwiize khumuuzela yoori: “Apho niri weeyo onttela wiiya mfwalume etthu fweeyo? Ama niri ti weyo onttelaaye onilokozela?” Khutepa wiiphi-iriwa mwaasa wa jozi etile na mattakhuzi awe.

⁹ Khurutela olottha khuwoza attwiize yoori: “Kalottha theenya! Njuwa, mweezi na matthottowa khumi na limote zikiinameliye.”

¹⁰ N'oomuuza papaawe na attwiize, papaawe khunshowera araka: “Jozi-ni eto olotthiyeyo? Niri miiyo, attwiizo na mamaawo ninteela wuukokhorela weeyo?” ¹¹ Waaza attaapho attwiize khuwaata nrimala na-ye, papaawe khusala apheleleza vithu epile varoho vawe.

Wuuzanyisiwa wa Yuusufu pi attwiize

¹² Siikhu moote, attwiize Yuusufu aalawiye oshukisa nyama za papaaya kharipu ya sitati ya Shekemu. ¹³ Aphano Ezirayeele khumuuzza Yuusufu araka: “Attwiizo anshukisa nyama kharipu ya Shekemu. Apho kintakha yoori weeyo olankhe olawe ottuukho.”

Ye khujipu: “Kemaani, kasiila paapa.”

¹⁴ Papaawe khumuuzza: “Wawoone nkhama akumi na nyama zaya, ote okuuze.” Yaakhumpa oninrumaru aarettiye ari mmujokowa wa Heporooni, Yuusufu khulankha khusala alawa Shekemu.

¹⁵ Asaleelaka ofiya Shekemu khuthowelela. Khusikanika ti mwinyi mmote eettaka ojeettettela ntthuttu khumuuzela yoori: “Weyo! Oneekesani?”

¹⁶ Ye khunjipu araka: “Kiniweekesa attwiizaku; safwatali kuuzeni ohali anshukisaawo nyama zaya?”

¹⁷ Mwinyi otule khujipu yoori: “Apha avikanavo, kawaasiila araka: ‘Nintta Dotaani.’”

Yuusufu khusala aweekesa, khuwaasikana asaleelaka ofiya Dotaani.

¹⁸ Attwiize n'oomoona eettaka ota, ari peetiwene ahinawaafiyele khuwaza shawuri zoomuula.

¹⁹ Yo khuuzana yoori: “Ahee! Namalottha nwulu oto ontta ota! ²⁰ Aphano akhweya. Nlaweni nimuule nimweeselele valiphotto nalupe yoori eetta orafuniwa ti nyama za ntthuttu. Noone olottha wawe vahali onttelaaye wiishelavo.”

²¹ Ruubeni n'oosiila khumwaakisela khulupa yoori: “Nihimwankameze!”

²² Khulupa theenya yoori: “Nihimuule. Nimweeselele vanlipu oriye n'yaara mpho, ila mwihinvulalise.” Ye alupaka toowo, aariye amuusuru ttwiilye arutele wa papaawe ari haayi.

²³ Yuusufu n'oowaafiyela attwiize, yo khunvula ajapi etile yooshapweya aawaliyeyo, ²⁴ khuntthempa khumweeselele vanlipu woohiivo hatha etthu na oohivo maati.

²⁵ Yo khwiikhala yoori aje, khuwoona annya-zanshara eettaka ota ari ohali woolepawo, annya-esumayila aari olankhaaye Kileyati na enkamiiya zaya apakhiriye viluko, paalasamu†, na mafuttha oonukhela eettaka Misuri.

²⁶ Yuuda khuwoozela attwiize yoori: “Ena fwayita-ni omuula ttwiyyetthu khunvitha? ²⁷ Nihimuule, niwoozanyeze annya-esumayila apo, maana ye ti ttwiyyetthu, taamu yetthu moote.” Attwiize apale akinoko aya khukhupalela.

† ^{37:25} Paalasamu yaari pumata aari ottukuntteliwakaaye ntthu amana afwa yoori ahivutte.

²⁸ Khunlazavo vanlipu aphale aamweeseleliyeevo, khuwoozanyeza annya-esumayila aari oviraaye, a nti wa Midyaani, na nzurukhu eshiriini wa feeta. Yo khunthuula khusala alawana Misuri.

²⁹ Wakathi Ruubeni aruteliyeevo vanlipu aphale, khuthurumelavo khuhinsikanivo, attaphale khuvarula kuwo zawe athoonyezaka yoori ori nhuzuni. ³⁰ Khurutela aphale aariivo attwiize khuwooza yoori: "Mweyo! Shaapu otule khaavo vanlipu aphale! Kiri toovi?"

³¹ Khuthuula ajapi ya Yuusufu, khuula puuzi moote, taamu yaya khutukunttelu. ³² N'oreetta toole, khuthuula ajapi etile ya waatta kisawu khumweettisela papaaya, khumuuzu yoori: "Ajapi eti neetta olokottha. Nkoonani nkhamma khahiyo ya mwanenu."

³³ Ezirayeele khufwahamu khuri: "Ajapi ya mwanaka! Khweele-khweele nyama yoohusuti yeetta omuula khunrafuna."

³⁴ Aphano Yaakhumpa khuvarula kuwo zawe khuwala saakhu khusala anlidele mwanawe siikhu za waatta. ³⁵ Aanaawe ooshi aalume na aakha khuteela onzuru, ila ye khukatthala ozurwiwa waya alupaka yoori: "Kini-ikhala woolila ethiipi mpakha olawa okutthanana mwanaka aahera." Khwiya wonlidele mwanawe Yuusufu.

³⁶ Wakathi aya opo Amidiyaani aarettiye amuuzanyisiye Yuusufu wa Potifwaari ntunkhulu wa anamweekesela a Firawuuna.

38

Hatiithi ya Yuuda na Tamaara

¹ Wakathi aya opo Yuuda aamwazeyananiye attwiize khusala eekhala wa mwinyi mmote aari wiithiwaaye Hiira nti wa Atulaamu. ² Ottuukho Yuuda ansikaniyewo mwanankha mmote aari mwaana wa nkanaani aari wiithiwaaye Shuuwa, ye khunrala. ³ Khwiimittha khumpattha mwaana khuntthaja nzina la Eeri. ⁴ Khwiimittha theenya khumpattha mwaana nkina khuntthaja nzina la Onaani. ⁵ Khurutela theenya khumpattha mwaana khuntthaja nzina la Shela, ompattikhinaru Yuuda aarettiye ari nti wa Kezipu.

⁶ Ye khumweekesa muukha aari wiithiwaaye Tamaara khunlooza mwanawe Eeri. ⁷ Ila Nnyizinku khuhintuveli thwapiya za Eeri, khufiyelela omuula.

⁸ Aphano Yuuda khumuuzu Onaani yoori: "Onrale muukha wa marehemu ttwiyo, ompatthele aana yoori ttwiyo eeyane peewu khwa weyo." ⁹ Ila Onaani aajuwiiye yoori aana aari weettelaaye opattikhana, khaari weettela wiiya awe. Ti eto, amana arapalelana muukha wa ttwiye, zina yawe aari wiithelaka vathi yoori ahiwaapatthe aana eeya a ttwiye. ¹⁰ Nnyizinku khuhisala zintuvela vitthu epile aari orettaazo khufiyelela omuula.

¹¹ Aphano Yuuda khumuuzu Tamaara muukha wa mwanawe yoori: "Orutele wa apapazo ori nankhwele onwejaka mwanaka Shela owula." Ye aalupiye toowo mwaasa woomoovisa mwanawe Shela ofwa. Tamaara khulawa khwiikhala wa papaawe.

¹² Ziviriyeovo siikhu za waatta, khufwa muukha wa Yuuda mwaana wa Shuuwa, nawiisha matthaka khulankha na swaahipu awe Hiira wa nti wa Atulaani, khusala alawa owoona atthu apale ari okasaaye ovazi wa nyama zaya nti wa Tinna.

¹³ Khuuziwa Tamaara yoori: "Nkhwewo ontta ovira, oneetta Tinna olawa okasisa nyama zawe." ¹⁴ Khuvula kuwo zawe epile aawaliyeezo z'oonankhwele, khujifinikha nshukwi yoori ahijuwiwe, khulawa khwiikhala vanlako wa sitati ya Enayimu waattamana na tarikhi ya Tinna.

Ye aarettiye toowo mwaasa woojuwa yoori Shela awula, ila khwiya ahinalooziwe.

¹⁵ Yuuda n'oomoona khumwaakanyerela omalempe, mwaasa yoori aa-jifinikhaniye nshukwi omaasho wawe.

¹⁶ Ye khunkhwela araka: "Nkati! Kinuutakha, kuulalane." Ye ahijuwaka yoori ti nkhwewe muukha wa mwanaawe.

Tamaara khumuuzela yoori: "Amana kilalana weeyo onikinkha-ni?"

¹⁷ Yuuda khunjipu yoori: "Kintta wuuperekheza puuzi moote ya nliphanko mwaka."

Tamaara khuri: "Aayo! Kasiila. Ila okilikhele etthu kinwahaaye waamini yoori onlawa wakiperekheze puuzi yaya eto."

¹⁸ Ye khumuuzela araka: "Kuulikhele niini?"

Tamaara khujipu yoori: "Okilikhele peetthe yawo, mfukho awo na pakhora eto oriina mmakhono mwawo." Yuuda khumwinkha zooshi epile anvekeliyeego, khunlalana khwiimittha. ¹⁹ Nawiisha Tamaara khurutela owawe khuvula nshukwi khuwala kuwo zawe epile z'oonankhwele.

²⁰ Yuuda khuthuula puuzi khumwinkha swaahipu awe Hiira yoori alawane athuule vitthu epile anlikheliyeeyo muukha otule, ila ye khuhinsikani. ²¹ Hiira khuwoozela atthu a nti aya opule yoori: "Ori vayi malempe otule aniikhalaaya ntarikhi?"

Yo khujipu araka: "Mmuti mphu khaamo hatha malempe wa wiiya wa ntumphu."

²² Ye khurutela wa swaahipu awe Yuuda, khumuuzza yoori: "Akinsikanneeniwo, atthu a nti aya opule akuuza yoori khaawo hatha malempe wa wiiya wa mmuti ntumphule."

²³ Yuuda khulupa yoori: "Ti asalane epile kimwinkhiyeego yoori ehikikwele paathuli, miiyo kaaperekhiye puuzi yaya, ila weeyo khuhinsikani ye aya."

²⁴ N'ovira nyeezi mittatthu, khuuziwa Yuuda yoori: "Nkhwewo Tamaara araruwa, apha eemittha."

Ye khuri: "Athuuliwe alawe alukuziwe!"

²⁵ Athuuliweeo alawaka olukuziwa, khumperekheza nhupi nkhwewe araka: "Erukulu eti kiriina ti ya mwennyewe vitthu epi." Khulupa theenya yoori: "Moone pakhora eti, mfukho opu na peetthe eti nkhamma mwininjuwa mwennyewe."

²⁶ Yuuda nawoona vitthu epile khulupa yoori: "Ye ti wa shariya zayita miyo, maana kamwaahitiye oraliwa ti mwanaka Shela." Na Yuuda khuhiruteli orapalelana.

²⁷ Ofiyeevo wakathi woopattha ekumi, mwiirkulu mwawe aarimo aana awiri. ²⁸ Apatthaka ekumi otu mmote aya khusarula nkhono awe mmote, mwaatani khuthuula luuzi lookhuttuwa khumfukela khuri: "Otu ti eeyiye tthakuzi woosaruwa." ²⁹ Otule aasaruliyeeyo nkhono awe khurutisalamo, khusaruwa otule ahaasaruliyeeyo, mwaatani khuri: "Huu! Wapattha toovi tarikhi yoosaruwa?" Khuntthaja nzina la Pereezi*. ³⁰ Aphano, khusaruwa ttwiye otule aafukeliweeyo luuzi lookhuttuwa nkhono awe, khutthajiwa nzina la Zeera.

* ^{38:29} Nzina nttho la Pereezi maana aya tarikhi yoosaruwa

¹ Yuusufu aathuuliwe khulawaniwa Misuri pi annya-esumayila. N'oofiya khuuzanyeziwa Potifwaari mmisuri, karumeya nwulu wa Firawuna, namalokozela wa anamweekesela.

² Nnyizinku aari vamote na Yuusufu, khunjaaliwa eekhalaka Misuri vaje wa mbwanaawe. ³ Mbwanaawe otule khoona yoori Nnyizinku ori vamote na Yuusufu, wakhula ethu aari orettaaye Nnyizinku eetta onjaaliwa, ⁴ Yuusufu khwiya woofwayi mmakhono wa Potifwaari khumwinkha ottunkhulu wa weettettisela vaje vawe na mali zawe zooshi. ⁵ Paata yoomwinkha ottunkhulu wa vaje vawe na wa mali zawe zooshi, Nnyizinku khuparikhiya vaje aphale mwaasa wa Yuusufu. Parakha ya Nnyizinku yeeshukheliye khwa zooshi epile aariinaazo, waaza vaje mpakha mmashapa mwawe.

⁶ Zooshi aariinaazo ntunkhulu aya khwiya Yuusufu, Potifwaari khaari ojali hatha ethu yoohiiyi etthu-yooja etile ari ojakaaye. Yuusufu aari wooshapweya wumpo na wa weeziwa.

⁷ N'oorettikhana vitthu epile, muukha wa Potifwaari khwaaza ontakha Yuusufu. Siikhu moote khumuza yoori: "Weeyo nlawe wakilalane." ⁸ Ye khukatthala, khumuza muukha wa mbwanaawe yoori: "Moone! Mbwanaaka khanjali vitthu za vaje apha; zooshi ariinaazo, ziri mmakhono mwaka. ⁹ Khaavo mmote akizitiyeeyo miiyo vaje apha, khaiivo hatha ethu moote akikhattaziyeeyo ila mweeyo wala, mwaasa yoori mwa muukhaawe. Etthu yootakhala nkhama eto, kirette mwaasa wa niini? Toowo kintta onkosa Nnyizinku!" ¹⁰ Wakhula siikhu muukha otule eetta onkhanyarela yoori alawe anlalane, ila Yuusufu khuhisala ansileza na khusala anwerawera.

¹¹ Siikhu moote, ye khuvira nnyupa olawa okhola khaazi zawe, aarettiye ahiwo hatha mwiithwaana mmote. ¹² Muukha wa Potifwaari khukhola orempo awe khumuza yoori: "Haya okilalane!" Yuusufu khunlikhela orempo awe mmakhono mwawe khutthirela vaje.

¹³ Muukha otule ooniyeovo yoori atthira khulikha orempo awe, ¹⁴ khuwaakhuwela akarumeya khuwooza yoori: "Mmoone! Mwiibereewu otu atisiweeyo ti mannaka aaza onitarawu. Aaviriye okatthi waka khusala atakha okilalana, ila miiyo khusala kikhuwa kinyakulaka. ¹⁵ Ye nawoona yoori keetta onyakula khukilikhela orempo awe khutthirela vaje."

¹⁶ Ye khupweha orempo opule mpakha mbwanaawe ota. ¹⁷ Wakathi atiiyeovo khumuza mattakhuzi apale araka: "Mwiithwaana awo otule wa mwiibereewu onitiiseliyeeyo apha, aakiteeliye khusala atakha okilalana. ¹⁸ Kikuhiyeovo ye khukilikhela orempo awe khutthira."

¹⁹ Paata yoosiila mattakhuzi apale aari wuuziwaaye ti muukhaawe, araka: "Mwiithwaana awo vitthu akiretteliyeozo pi epo," ye khukasirikha venkivene. ²⁰ Khuruma weetteliwa Yuusufu khulawa khutthiiwa nkalapooso, ntumpho mfwalume Firawuna aawaafukeliyeemo atthu awe. ²¹ Ila Nnyizinku ari vamote na Yuusufu anthoonyezaka pheta ya waamineya, ntunkhulu wa anamweekesela kalapooso khunkola saana. ²² Khumwinkha ottunkhulu Yuusufu wa anamfukeliwa ooshi, khwiya namalokozela vitthu zooshi za nkalapooso mphule. ²³ Ntunkhulu wa anamweekesela a kalapooso etile khuhisala ajali hatha ethu, zooshi zaari mmakhono wa Yuusufu mwaasa yoori Nnyizinku aari vamote na-ye; na wakhula etile aari orettaaye aari wiiya woojaaliwa.

¹ Paata yoovira vitthu epile, namootela zoonywa za mfwalume na namuupa-phaawu khunkosa mbwanaaya, mfwalume wa Misuri.

² Firawuna khwiya wa wiiphiiriwa pi annya-khaazi awe apo awiri; nttunkhulu wa wootela zoonywa na nttunkhulu wa wuupa phaawu.

³ Khuruma olawa ofukeliwa nkalapooso ya nttunkhulu wa anamweekesela, nttumphule aafukeliweemo Yuusufu. ⁴ Nttunkhulu wa anamweekesela khumwinkha Yuusufu atthu apale awiri yoori asala awaatthantta, yo khwiikhala siikhu za waatta nkalapooso.

⁵ Osikhu mmote oowiri khulottha, wakhula jozi yaarina maana aya, etile ya namuupa-phaawu na ya namootela zoonywa.

⁶ Mmeesho mwaya supu Yuusufu khulawa owaathotola, khuwaasikana ari ooshukulikha. ⁷ Aphano ye khuwoozela annya-khaazi a Firawuna apale aafukelaniweeyo araka: “Leelo mwakafilikhela-ni?”

⁸ Yo khunjipu yoori: “Neetta wiiyana jozi khuhivo ntthu wootaphulela maana aya.”

Yuusufu khujipu yoori: “Ila Nluku paasi ti ye anttelaaye otaphulela jozi epo, kuuzeni jozi zaya epo.”

⁹ Nttunkhulu wa wootela zoonywa khumuza jozi yawe Yuusufu araka: “Kaalonthiye okiteeliye nrayi wa wuuva omaasho waka. ¹⁰ Orina virapi ttatthu za waaleya na khwiima mishumo zaari ottokotthaaye miwawa-miwawa. ¹¹ Pilawuri ya Firawuna eri mmakhono mwaka. Miyo khuthuula mishumo za wuuva khuvinyela mpilawuri mphule kimwinkha mmakhono mwawe.”

¹² Yuusufu khuri: “Maana a jozi yawo eto pi apa: virapi ttatthu enlupa siikhu ttatthu. ¹³ Nkatthi wa siikhu ttatthu Firawuna ontta wuulazamo nkalapooso orutele khaazi yawo ya wootela zoonywa za mfwalume na omwinkha pilawuri mmakhono mwawe, nkhamma ethiipo waari oret-takaazo raku. ¹⁴ Ila amana zooshi ziweetteltaka saana ohikisahawu, kinuuhirimiza yoori okoonele huruma omuuze mfwalume monkoni wa miiyo, okaawuni yoori kileemo nkalapooso mphu. ¹⁵ Miyo keetta wiiyiwa nti wa Meebereewu khutiisiwa mmuti mphu khweeseleliwa nkalapooso hatha etthu kihireeteni.”

¹⁶ Asiliyeevo nttunkhulu wa wuupa phaawu yoori Yuusufu aataphuleliye jozi etile wooshapweyavo, ye khumuza yoori: “Na-miyo kinaaye yaaka, kalottha kipwecheriye phaawu khelenke ttatthu. ¹⁷ Khelenke eti ya vatulu zaarimo wakhula nanna ya phaawu epile zontuvela Firawuna, ila anyanyi khusala ajoropoja ziri veeshwa vaka.”

¹⁸ Aphano Yuusufu khunjipu yoori: “Jozi yawo eto maana pi apa, khelenke ttatthu epo enthoonyeza siikhu ttatthu. ¹⁹ Nkatthi wa siikhu ttatthu ethiipo, Firawuna onlawa athomeye eeshwa mmutthi, mwiili awo osala ojoropojwa pi anyanyi.”

²⁰ Siikhu yattaatthu yaari siikhu Firawuna aari orettaaye mwaakha, ye khujisa njampo na annya-khaazi awe ooshi, khuruma okhuweliwa apale aari nkalapooso namuupa-phaawu na namootela zoonywa. ²¹ Namootela zoonywa khurutiseliwa khaazi yawo ya wootela na yoomwinkha pilawuri Firawuna mmakhono mwawe. ²² Ila Firawuna khunthomeya namuupa-phaawu nkhamma ethiipile aalupiyeezo Yuusufu.

²³ Aphano namootela zoonywa otule khuhinfikhiri Yuusufu khunsahawu eperepere.

¹ Eviriyeevo nyaakha miwiri, Firawuna khulottha ari nshini wa muutto oniitthiwaaye Niilu. ² Mmuttho nttumpho zivuuwakamo mompe sapa zooneneva na zooshapweya khusala zittepula nyaani. ³ Elottelanaka theenya khusala zivuuwamo mmutho Niilu mompe sapa zootakhala za wootta, khulawa khwiya vamote na epile zaavuuwiyeeyo omwanzo. ⁴ Epile zootakhala za wootta khurafuna epile zooshapweya zooneneva, attaphale Firawuna khusisimuwa.

⁵ Khurutela olala khulottha theenya, misaasi sapa za tiriku zooshapweya za wiitaala zaari owulaaye vanchina limote. ⁶ Elottelanaka khoona misaasi sapa za maveya a tiriku a wuuma oolukuziwa ti pheevu ya n'yaara. ⁷ Misaasi epile sapa za maveya khumiza epile za wiitaala na zooshapweya. Firawuna khusisimuwa khujuwa yoori eetta olottha.

⁸ N'oocha mmeesho mwaya supu, nafusi yawe khwiya yooshukulikha, khurumisa olawa okhuweliwa anamajintta ooshi na anampiya sako a Misuri. Firawuna khuwooza jozi alotthiyeeyo, ila khuhiiwo hatha ntthu mmote aajuwiyeeyo otaphulela waya.

⁹ Aphano namootela zoonywa khumuza Firawuna yoori: "Leelo kafikhiri koosa zaka. ¹⁰ Siikhu moote mweephiriseweeyo pi annya-khaazi eenu mwaarumisiye ofukeliwa miiyo na ntunkhulu wa wuupa phaawu nkalapooso wa ntunkhulu wa anamweekesela. ¹¹ Osikhu mmote fweeyo awiri khulottha wakhula ntthu jozi yawe, wakhula jozi yaarina maana aya. ¹² Ila nkalapooso nttumphule aarimo shapu mmote wa mwilibereewu aari mwiithwaana wa ntunkhulu wa anamweekesela, fweeyo khumweeleza jozi zethu epile ye khutaphulela. ¹³ Khurettikhana zooshi nkhamma ethiipile aanuuziyeeko: miiyo khurutiseliwa khaazi yaka, otu nkina khuheyiwa."

¹⁴ Firawuna khuruma olawa okhuweliwa Yuusufu, khulaziwamo nkalapooso nasaapiru. Khunyoola ttevu zawe khuwala kuwo kinoko khulawaniwa wa Firawuna.

¹⁵ Ye khumuza Yuusufu yoori: "Miiyo keetta olottha jozi moote khuhipuwi hatha ntthu mmote wookitaphulela. Ila khusiila yoori weeyo amana wuuziwa jozi onwahi otaphulela maana aya."

¹⁶ Ye khunjipu Firawuna araka: "Miiyo akina owahi, ila Nnyizinku onwahi wuutaphulelani wooshapweyavo."

¹⁷ Aphano Firawuna khusala amuuza jozi etile Yuusufu yoori: "Kalottha keemeliye nshini wa Niilu. ¹⁸ Mmuttho mwaya mphule khusala zivuuwamo mompe sapa zooshapweya na zooneneva khusala zittepula nyaani nshini wa Niilu. ¹⁹ Theenya khuvuuwa mompe sapa za wootta zootakhala. Nti wooshi wa Misuri akinone mompe zootakhala nkhamma epo. ²⁰ Mompe zaya ethiipile zootakhala na za wootta khumiza mompe epile zooneneva na zooshapweya, ²¹ ila khusala zumpuwa nkhamma zihijeeni ethu nalelo, khwiya za wootta na zootakhala nkhamma zaariizo. Ethiito miiyo khusisimuwa.

²² Khurutela olala khulottha theenya misaasi sapa za tiriku zooshapweya za wiitaala zaari owulaaye vanchina limote. ²³ Elottelanaka khoona misaasi sapa za maveya a tiriku a wuuma oolukuziwa ti pheevu ya n'yaara. ²⁴ Misaasi epile sapa za maveya khumiza epile za wiitaala na zooshapweya, miiyo khuwooza anamajintta ila khuhiiwo hatha mmote aawahiyeeyo otaphulela."

²⁵ Aphano Yuusufu khumuza Firawuna yoori: "Jozi zenu epo z'oopiri enlupa etthu moote paasi, Nluku eetta wuuthoonyezani eti anttelaaaye oretta.

²⁶ Mompe epo sapa zooshapweya zinlupa nyaakha sapa. Misaasi sapa zooshapweya na-yo zinlupa nyaakha sapa. Jozi zaya epo mooteru. ²⁷ Mompe

epo sapa za wootta na zootakhala zaavuuwiyeeyo ziwelela aphale zaariivo epile zooshapweya enlupa nyaakha sapa. Misaasi epo sapa za maveya zaalukuziweeyo ti pheevo ya n'yaara, khumiza epile zooshapweya enlupa nyaakha sapa za jala.

²⁸ Mattakhuzi apa kiniwuzaanini mfwalume, Nluku eetta wuuthoonyezani etile anttelaaaye oretta. ²⁹ Nyaakha sapa tuniya ya Misuri enteela oruwera venkivene. ³⁰ Ila theenya zinlawwa zate nyaakha sapa za jala, oruwera opo onlawa wasahawiwe. Jala yaya eto enlawa yashintte nti aya opu. ³¹ Khunteela ofikhireliwa oruwera opule, mwaasa wa jala enttela wiiya yootepa waatta tuniya eti ya Misuri. ³² Eto mwilotthisiweeyo swaafu piiri enlupa yoori Nluku alakela na onretta woohirupazi.

³³ Apho mweeyo mfwalume, mwinthawule ntthu mmote woojuwa na wa akhili eeye ntunkhulu wa weettettisa tuniya eti ya Misuri. ³⁴ Mwirette ethipo, mwiwaattheemo attunkhulu mmuti mphu asala alokothela phantte ya thaanu za vitthu zinuuruliwaazo tuniya ya Misuri, khwa nyaakha epo sapa zooruweriwa. ³⁵ Yo ana yookusanya epile anttelaaazo opattha nyaakha epo zooruwera, theenya ekusanyiwe tiriku yooshi epwehiwe yiiye mmakhono wa Firawuna, yiiye ethu-yooja ya mmasitati. ³⁶ Vitthu-zoojiwa zaya epo zinttelaa orumeyeliwa nyaakha epo sapa za jala enttelaaye ota tuniya ya Misuri yoori jala eto ehishintte tuniya eti.”

Yuusufu oninkhiwa ottunkhulu wa Misuri.

³⁷ Firawuna na mashawuriya awe khoona yoori akhili epile za Yuusufu pi zooshapweya. ³⁸ Ye khuwoza mashawuriya awe yoori: “Naari oteela ompattha ntthu nkhamma otu wa weettettisiwa ti rooho ya Nluku?”

³⁹ Firawuna khumuza Yuusufu araka: “Wiiya Nluku ooothoonyeza vitthu epi, khaavo nkinoko aya wa akhili na woojuwa nkhamma weeyo. ⁴⁰ Weeyo ti ye ontelaaye wiiya ntunkhulu wa vaje vaka, atthu apa ariivo ooshi nka ashututelaka mattakhuzi awo, ila nkathi woofwalume miiyo ki ntunkhulu zayita weeyo. ⁴¹ Mpakha nasaapi eti kawinkha ottunkhulu wa tuniya eti ya Misuri yooshi.” ⁴² Aphano, Firawuna khuvula peetthe yawe khunwalisa Yuusufu, khuruma yoori awalisiwe kuwo zooshapweya na nkufu wa thahapu* mmwisiko mwawe. ⁴³ Khupakhiriwa mmwikukutta opule waphiiri, khulokoza anamalaleya alupaka yoori: “Mwinkokhorele!” Yuusufu enkhiweeyo ottunkhulu wa Misuri yooshi.

⁴⁴ Khulupa theenya Firawuna amuuzaka Yuusufu yoori: “Miiyo ki Firawuna, ila khina mmote antakhaaye oretta ethu tuniya eti ya Misuri ahaazeeni wuusikana weeyo.” ⁴⁵ Firawuna khuntthaja Yuusufu nzina la Zafenathi-Paneeya. Khunlooga muukha aari wiitthiwaaye Asenaathi, mwaana wa Potifweera, ntunkhulu wa tiini ya Ooni. Aphano Yuusufu khuzukuleliwa tuniya yaya etile yooshi ya Misuri.

⁴⁶ Ye azaka khaazi ya mfwalume Firawuna aarettiye arina nyaakha talaathiini na sitha, khunleeza Firawuna khwaaza weettetta miti zooshi za Misuri. ⁴⁷ Nkatthi wa nyaakha sapa epile zooruwera tuniya etile khuruweriwa tiriku ya waatta. ⁴⁸ Yuusufu khukusanya tiriku yooshi yaaruweriweeyo khwa nyaakha sapa tuniya ya Misuri khupweha mmasitati. Wakhula mashapa apale aattameliye sitati, tiriku yaari wuurluwaaye yaari opwehiwa ottuukho. ⁴⁹ Yuusufu khukusanya tiriku ya waatta yahaari waalakeyaaye nkhamma mishaka za mmattima, khulikha waalaka mwaasa wa waatta channu.

* **41:42** weero

⁵⁰ Ehinafiye nyaakha epile za jala, muukha wa Yuusufu Asenaathi, mwaana wa Potifweera, khuwaapattha aana awiri. ⁵¹ Otu wa mwanzo Yuusufu khuntthaja nzina la Manaase, alupaka yoori: “Nluku akisahawisa ohoowa waka na vaje wa apapazaku.”

⁵² Otu waphiiri aya khunthaja nzina la Efwarayiimu, khulupa yoori: “Nluku akirizikhiya nti opu kihooziyeeyo.”

⁵³ Aphano nyaakha epile sapa zooruweriwa tuniya ya Misuri khwiisha.

⁵⁴ Khufiya nyaakha epile sapa za jala aalupiyeyo Yuusufu. Khupuwa jala tuniya yooshi, ila miti za Misuri zaarina etthu-yoojiwa. ⁵⁵ Wakathi epariziyeovo jala Misuri, atthu ooshi khunvekela Firawuuna etthu-yoojiwa. Ila ye khuwoza atthu ooshi a Misuri yoori: “Mwilawe mwakutthanane Yuusufu. Wakhula etile anttelaaye owuuzani mwirette ethiito.”

⁵⁶ Yuusufu nawoona yoori jala yamwazeyela tuniya yooshi khufukulela tiriku etile aapwehiyeeyo, khusala awoozanyeza Amisuri mwaasa yoori jala etile yaashinttiye. ⁵⁷ Atthu a tuniya kiina aari ota Misuri oteela wuuzanya tiriku wa Yuusufu, mwaasa yoori jala yaamwazeyeliye olumwenku wooshi.

42

Attwiize Yuusufu antta tuniya ya Misuri.

¹ Yaakhumpa n'oojuwa yoori Misuri ewaakho etthu-yoojiwa, khuwoza aanaawe araka: “Mwineekesana yoori niini? ² Kasiila oriwa Misuri ewaakho tiriku, apho mwilawe moozanye nite njilelane nihifwe jala.”

³ Aphano khulankha attwiize Yuusufu khumi khusala alawa Misuri wuuzanya tiriku. ⁴ Yaakhumpa khunkhattaza Bejami ttwiye Yuusufu owaalotta attwiize amoovisaka ompattha etthu yootakhala. ⁵ Aana a Yaakhumpa khulawa wuuzanya tiriku nkhamma etthiipo aari olawaazo atthu akina, maana tuniya yooshi ya Kanaani yaarina jala.

⁶ Yuusufu ntunkhulu wa Misuri, ti ye aari owoozanyezaaye tiriku atthu ooshi a mmuti. Attwiize n'oofiya khunkokhorela ajahi zaya khufisa vathi.

⁷ Wakathi awooniyeovo khuwaajuwa, ila khumpuwa nkhamma ahiwaajuweeni. Khusala awoozela awaatuturuchaka araka: “Mweeyo! Mwinlankha vayi?”

Yo khunjipu “Ninlankha tuniya ya Kanaani, naateeliye wuuzanya etthu-yoojiwa.”

⁸ Yuusufu khuwaajuwa attwiize ila yo khuhinjuwi. ⁹ Ye khupayini jozi epile aawooziyeeyo khuri: “Mweeyo mw'aahankawaani! Mwaateeliye ojuwa siiri za mmuti mwetthu mphu.”

¹⁰ Yo khunjipu araka: “Wala mbwaneethu! Fweeyo akarumeyeenu naateeliye wuuzanya etthu-yoojiwa. ¹¹ Fooshi papeethu mmote, n'aatthu awaamineya. Khahi n'aahankawaani.”

¹² Yuusufu khusala akhanyarela owooza yoori: “Wala mweeyo mwateela ojuwa kiphenyo za mmuti mwetthu mphu.”

¹³ Yo khuri: “Fweeyo ninlankha tuniya ya Kanaani, niri aana khumi na awiri paapa mmote. Otu w'eefutti aya nasaapi eti asala onti na paapa, ila otu nkina aya afwa.”

¹⁴ Khurutela owooza araka: “Pi etthiipo kilupiyeezo! Mweeyo mw'aahankawaani! ¹⁵ Apho kintakha kiwooneni. Kinlapha khwa ohaayi wa Firawuuna, yoori khamwinlaavo apha mwihintiiseeni ttwiyyenu oto w'eefutti. ¹⁶ Mwinrume ntthu mmote amweettele, ila apa akina ansalaaye anttela ofukeliwa. Noone nkhamma mattakhuzi apa mwilupiyeyo pi

ookhweele. Ila mmana ehiyi toowo kinlapha khwa ohaayi wa Firawuuna yoori phi mwinttelaavo ojuweya wiiya ahankawaani.” ¹⁷ Ye khuwaattha nkalapooso siikhu ttatthu.

¹⁸ Siikhu yattaatthu khuwooza yoori: “Miiyo kinimoova Nluku, apha nkhamma mweeyo mwintakha wuusuru nafusi zenu, mwiri toono: ¹⁹ nkhamma mw'aatthu awaamineya mwinlikhe ttwiyyenu mmote nkalapooso, apa akina athuule tiriku awenkhe ajamaazenu ahifwe jala. ²⁰ Mwikitiisele ttwiyyenu oto w'eefutti kihakikhi nkhamma mattakhuzi enu pi ookhweele, mwirettaru toowo khamwinuuliwa. Yo khukhupalela oretta epile ooziweezo.”

²¹ Aphano khusala oozana yoori: “Khweele ninaaye paathuli mwaasa wa ttwiyyetthu. Maana wakathi aashankiyeovo aanivekeliye yoori nimoonele huruma ila fweeyo khuhitakhi, apha t'iiti na-fweyo anipatthiyeeyo matteso apa.”

²² Ruubeni khujipu araka: “Miiyo akaalupiye yoori shapu oto mwihinrettele vitthu zootakhala? Ila mweeyo khuhitakhi okisiileza! Apha nina yoojipu mwaasa w'oofwa wawe.”

²³ Yo khaari ojuwa yoori Yuusufu aari osiila epile aari ottakhulaazo, mwaasa yoori attakhulaka aarivo ntthu aari otaphulelaaye.

²⁴ Yuusufu khuwaasusa vattithiiru khusala alila. Nawiisha khurutela attaphale khusala attakhula, aphano khunthawula Simiyooni khuruma yoori afukiwe eettaka omoona.

Orutela Kanaani

²⁵ Elottelanaka Yuusufu khuwaaruma anakhaazi awe wiitaaza tiriku visurupa za attwiize na owaarutisela nzurukhu aya sirini atthaaka mvisurupa nttumpho, na owenkha etthu-yooja ntarikhi. Khurettiwa etthiipo.

²⁶ Khuthuula visurupa epile wakhula ntthu khuttha vavuuru vawe khusala alawa.

²⁷ N'oofiya vahali aalaliyeevo, mmote khufukula esurupa yawe yoori alazemo etthu-yoojiwa enkhe puuru yawe, khusikana nzurukhu awe ori mwiisurupa nttumphule. ²⁸ Khuwooza attwiize yoori: “Moone! Nzurukhu aka karutiseliwa, opu ori mphu!”

Aphano yo khusuthuwa khusala athukumela na woova oozelanaka yoori: “Niini epi Nluku aniretteliyeozo?”

²⁹ N'oofiya wapapaaya Yaakhumpa tuniya ya Kanaani, khusala amuuza zooshi za waavireliyeezo araka: ³⁰ “Nttunkhulu wa Misuri eetta oniturucha anuuzaka yoori n'aahankawaani. ³¹ Ila fweeyo khujipu yoori: ‘Khahi n'aahankawaani n'aatthu awaamineya. ³² Niri khumi na awiri paapa mmote, mmote afwa, nkina aya w'eefutti asala onti na paapa tuniya ya Kanaani.’

³³ Aphano nttunkhulu wa nti aya opule khunuza yoori: ‘Mwinlikhe ttwiyyenu mmote attapha, toowo phi kinttelaavo ojuwa yoori mweeyo mw'aatthu awaamineya: mwithuule etthu-yoojiwa mwilawee mwawenkhe ajamaazenu ahifwe jala. ³⁴ Mwitaaka mwintiise ttwiyyenu otu w'eefutti aya, kaamini yoori mweeyo khahi mw'aahankawaani ila mw'aatthu awaamineya. Ttwiyyenu kintta wuurutiselani, kiwinkheni ejaaza yooretta zanshara zenu mmuti mphu.’”

³⁵ Wakathi afukuliyeovo visurupa zaya, wakhula esurupa khusikanamo mfukho wa nzurukhu, yo na papaaya nawoona nzurukhu opule khusala oova. ³⁶ Aphano papaaya khulupa yoori: “Mweeyo! Mwintakha okiishisela aanaaka. Yuusufu ti otule aashikhiyeeyo, Simiyooni khaavo apha na Bejami mwintakha onthuula theenya! Zooshi epo othunku aya ti miyo kinoonaaye.”

³⁷ Ruubeni khumuza papaawe yoori: “Mwikinkhe miiyo khanaashikha kininrutisa, amana kihinrutisi mwiwoole aanaaka apale awiri.”

³⁸ Yaakhumpa khujipu araka: “Akinintakhisa Bejami olawa na-mweyo, Yuusufu afwa, ye ti asaliyeeyo. Amana empattha ethu yootakhala ntarikhi okho mwineettaawo, mwintta okishukhelisa aahera na pwi zaka kirina huzuni yoototheliwa ti mweyo.”

43

Attwiize Yuusufu anrutela Misuri theenya.

¹ Jala etile yeetta otepa yaattaka mmuti. ² N'ooeweeshela tiriku etile aalaziyeeyo Misuri, papaaya khuwoza yoori: “Mwirutele theenya Misuri moozanye ethu-yoojiwa.”

³ Ila Yuuda khujipu araka: “Kiniwuuzani khweele, nttunkhulu wa Misuri anihirimiza channu yoori nihirutelewo nihinlawaneeni ttwiyyetthu otu w'eefutti. ⁴ Amana mwinlikha ttwiyyetthu olawa na-fweyo, ninlawa noozanye ethu-yooja yenu. ⁵ Ila amana mwihininkhi khaninlawa, maana nttunkhulu oto anuuza yoori amana nihinlawani ttwiyyetthu nihirutelewo.”

⁶ Ezirayeele khuwoozela: “Mwamuuzela-ni yoori mwinaaye ttwiyyenu nkina? Mwakitothela pala khuluyeene.”

⁷ Yo khujipu araka: “Mwiinyi oto eetta onuuzela yoori anijuwe fweeyo na ajamaazetthu. Khuvira anuuzelaka theenya yoori: ‘Papeenu ori haayi? Mwinaaye ttwiyyenu nkina theenya?’ Fweeyo naarina yoojipu epile aari onuuzelaazo. Fweeyo naajuwiye yoori onttela oniila onlawana ttwiyyetu?”

⁸ Aphano Yuuda khumuza papaawe yoori: “Mwinlikhe shapu otu kialwena miiyo nasaapi ethiiti, nihifwe jala fweeyo na-mweyo na aaneeththu.

⁹ Mwikikhupali miiyo, kinjaahiti omwiinanelna na ontthantta. Amana kihinrutisi ari nkumi, kiniiyana paathuli ohaayi aka wooshi mmakhono mwenu mweeyo. ¹⁰ Eriwaka khanaarupaziye nka nilawiye niruteliyewo swaafu yaphiiri.”

¹¹ Aphano Ezirayeele, papaaya khuwoza yoori: “Nkhama pi ethiipo khina nanna kiina. Mwithuule vitthu zooshapweya za mmuti mphu, waaza paalasamu, asali, viluko, mafuttha oonukhela, na vitthu kiina nkhama amentowa, mwilawe mwamwinkhe mwiinyi oto. ¹² Mwithuule nzurukhu wa feeta swaafu piiri na opu mwisikaniyeeyo mvisurupa mwenu mwilawane, khinjuweya eettiye ovonyela. ¹³ Mwinthuule ttwiyyenu mwilawe mwakutthanane mwiinyi oto. ¹⁴ Nluku Woowahi Wooshi amwinkhe wiyyana huruma na-mweyo, yoori oorutiseleni ttwiyyenu otu nkina na anlikhe Bejami ate. Maana, amana miiyo akaashikha aanaaka kinsala ethiipo woohiina mwaana.”

¹⁵ Yo khuthuula vitthu epile enkhiweezo na nzurukhu vamote na Bejami khusala alawa Misuri wa Yuusufu. ¹⁶ Yuusufu n'oomoona Bejami ari vamote na attwiize khumuza karumeyaawe nwulu yoori: “Owaathuule atthu apa owaalawane owaka, yashiijiwe nyama yiipikhiwe, yo anttela oja na-miyo nthana opu.”

¹⁷ Ye khuretta ethiipile ooziweezo, khuwaathuula atthu apale khuwaalawana owawe Yuusufu. ¹⁸ Yo n'oofiya owawe Yuusufu khusala oova oopuwelaka yoori: “Talili natiiseliwavo mwaasa wa nzurukhu opule naarutiseliyeeyo swaafu etile yamwanzo mvisurupa mwetthu. Ye ontakha onihukhumu, aniphuke anirette wiyya amwiithwaana zawe, aninyakanye apuuru ethu.”

¹⁹ Khumweettela karumeya w'oowawe Yuusufu yoori anttakhulane vanlako. ²⁰ Khulupaza yoori: "Safwatali mbwaneetthu! Swaafu etile naatiyyeeyo apha yamwanzo naateeliye wuuzanya etthu-yoojiwa. ²¹ Ila n'oofiya vhali naalaliyeovo, naafukuliye visurupa zetthu wakhula mmote wa fweto khusikanamo omilomo waya nzurukhu opule naateeliyeeyo wuuzanyela etthu-yoojiwa ori woolikana. Apha, naateeliye orutisa, ²² na theenya natana nzurukhu nkinoko yoori nuuzanye ele etthu-yoojiwa. Khaninjuweeni nlupa aatthiiyeemo nzurukhu aya opu mvisurupa mwetthu."

²³ Aphano karumeya otule khujipu araka: "Mwihoove na wala mwihisuthuwe. Nluku otu weenu mweeyo na otu wa papeenu ti ye atthiiyeemo nzurukhu mvisurupa mwenu, ila miiyo kaapokhereliye nzurukhu opule mwaataniyeeyo." Karumeya khumfukulela Simiyooni khuntiisa attaphale aariivo attwiize. ²⁴ Nawiisha khuwaathuula khuwaavirisa nnyupa wa Yuusufu, khuwenkha maati khoosa moolu aya na khwinkha etthu-yoojiwa apuuru aya. ²⁵ Attwiize Yuusufu khwaattalela tthuvo epile aataniyeeko khusala anwejela, maana aajuwiyeye yoori nthana aari oteela oja vamote na-ye.

²⁶ Wakathi Yuusufu afiyeovo owawe, yo khweettela tthuvo epile aatisiyeezo khumwinkha khukokhoraza omaasho wawe khufisa ajihi zaya vathi. ²⁷ Ye khuwenkha hapari, nawiisha khuwoozela yoori: "Papeenu otule mwaakuuziyeeyo nalelo ori haayi?" Owaakho nkumi?

²⁸ Yo khunjipu yoori: "Karumeyeenu papeetthu ori haayi, owaakho nkumi." Yo khukokhora khwiinama.

²⁹ Ye khulansa maasho awe khumoona ttwiye Bejami mwaana wa mamaawe. Khuwoozela yoori: "Ttwiyyenu otu mwaari onlupaaye w'eefutti ti othuutu?" Ye khumuza Bejami yoori: "Nluku awinkhe rehema mwanaka!"

³⁰ Yuusufu khwiyyana furaha khuluyeene mwaasa wa ttwiye, khusala atakha olila, nasaapiru khulaavo khweetta okatthi wawe khusala alila.

³¹ Nawiisha, khufuushula khurutela vansana ari woojiithaaza khulupa yoori: "Mwininkhe etthu-yoojiwa."

³² Khusaruliwa etthu-yoojiwa meeza mattatthu, mamote a Yuusufu, makina a attwiize na makina a Amisuri aari ottuukho. Mwaasa yoori yaari haraamu atthu a Misuri oja na Meebereewu. ³³ Attwiize Yuusufu khwiikhala vameeza kharipu na-ye, khuthataanya waaza ntunkhulu mpakha efutti, khusala eekesana mmote na nzaawe ari ooshanka. ³⁴ Yuusufu khuruma winkhiwa etthu-yoojiwa ethiitile enkhiweeyo vameeza vawe, sahani ya Bejami khuziti swaafu thaanu sahani za attwiize. Yo khuja, khunywa, khufurahi vamote na Yuusufu.

44

Pilawuri ya Yuusufu mwiisurupa wa Bejami

¹ Yuusufu khunruma karumeya nwulu wa vaje vawe yoori: "Wiitaaze saaneene etthu-yoojiwa visurupa za atthu apa anwahaaye othuula, ottheemo nzurukhu aya omilomo wa visurupa zaya. ² Nawiisha, othuule pilawuri yaka ya feeta otthe omilomo w'eesurupa y'ootu w'eefutti aya na nzurukhu aya opo atiisiyeeyo wuuzanyela tiriku." Karumeya otule khuretta etthiipo ooziweezo ti Yuusufu.

³ Mmeesho mwaya supuyeene, attwiize Yuusufu khunleeza khuthuula apuuru aya khusala alawa. ⁴ N'oolaazamo nsitati mphule ahinafiyyaze peeti-wene, Yuusufu khunruma karumeyaawe yoori: "Olankhe nasaapi apha owaatthirele atthu apale eettiye aphale, amana owaasikana wa woozele yoori: Oretteliwa vitthu zooshapweya mweeyo mwinripha zootakhala?"

⁵ Mweeyela-ni pilawuri ya mbwanaaka? Khahiyo ethiito annywelakaaye na anjuwanaaye vitthu zoorettikhana? Mweeyo mwaretta vitthu zootepa otakhala.”

⁶ Ye khuwaatthirela mpakha owaasikana khuwooza etthiipile ooziweezo ti Yuusufu. ⁷ Yo khujipu araka: “Mwaasa aya niini mbwaneetthu alupaka toowo? Fweeyo akarumeyaawe khaninwahi oretta vitthu zaya epo! ⁸ Onupuwela yoori fweeyo nawahi orutisa nzurukhu Kanaani naasikaniy-eeyo omilomo wa visurupa zetthu? Toowo n'aatthu ninwahaaye wiiya feeta ama thahapu ya vaje wa mbwanaawo? ⁹ Apha niriivo, karumeya otule onttelaaye onsikanana pilawuri eto afwe. Fweeyo ninttela osala niri amwiithwaana za mbwaneetthu.”

¹⁰ Ye khuri: “Kakhupali epo mwilupiyeego, ila othuuto kinttelaaye on-sikanana ti ye anttelaaye wiiya mwiithwaana aka, mweeyo khamwiniiyana hatha koosa.”

¹¹ Wakhula ntthu khupakhula esurupa yawe khupweha vathi khufukula nasaapiru. ¹² Karumeya otule khwaaza weekesa mwiisurupa y'ootu nwulu khwiishela esurupa y'ootu w'eefutti aya. Attaaphale khusikana pilawuri etile mwiisurupa ya Bejami. ¹³ N'ooretta toole, khuvarula kuwo zaya, khupakhira opheya visurupa zaya vappuru khusala arutela ositati ottuukhule.

¹⁴ Yuuda na attwiize n'oofiya owawe Yuusufu khunsikana ye ari ottuukho, khukokhora khwiinama attaaphale aariivo Yuusufu. ¹⁵ Yuusufu khuwoozela yoori: “Mwarettela-ni etthu eti? Mweeyo khamwinjuwa yoori ntthu nkama miiyo kinwahi woona vitthu nkama epo?”

¹⁶ Yuuda khujipu araka: “Niwuuze niini mbwanaaka! Apho nijihakikki toovi? Nluku avithula twampi zetthu. Aphano n'aamwiithwaana za mbwaneetthu nkama otule asikananiweeyo pilawuri.”

¹⁷ Yuuda khulupa yoori: “Miiyo akinwahi oretta etthu aya eto! Othuuto asikananiweeyo pilawuri yaka ti ye anttelaaye wiiya mwiithwaana aka, mweeyo mwirutele wapapeenu na heeri.”

¹⁸ Yuuda khunsusela Yuusufu khumuza yoori: “Safwatali mbwanaaka! Mwinlikhe karumeyeenu awuuzeni ntthakuzi na mwihinkatipukhele, mwaasa yoori mweeyo mwiri nkama Firawuna mwennyeweene. ¹⁹ Mbwanaaka mwaawoozeliye akarumeyeenu mwiraka: ‘Mwinaaye papeenu na ttwiyyenu?’ ²⁰ Fweeyo khujipu yoori: ‘Ninaaye paapa ila ooluvala na ninaaye ttwiyyethu w'eefutti apattikhaniyeeyo paapa ooluvaliye. Aarina ttwiyye afwa, ye asala otthwe wuumamani wawe, ti woophetiwa na kuvu ti papaawe.’

²¹ Mweeyo mwaawaarumiye akarumeyeenu yoori antiise mwite mwimoone khwa maasho enu. ²² Ila fweeyo kхуujipuni mweeyo mbwanaaka: ‘Mwaana oto khanwahi olkhwa ti papaawe. Amana ampwethaya, papantthu ontta ofwa.’ ²³ Ila mweeyo khunuza yoori: ‘Amana mweeyo mwihintiisi mwihirutelevo vaje vaka apha.’ ²⁴ N'oofiya onti, fweeyo khumuza papeetthu mattakhuzi apale mwaanuuziyeeyo mbwaneetthu.

²⁵ Nawiisha ye khuniruma yoori mwirutelewo mwilawe moozanye ethuyoojiwa. ²⁶ Fweeyo khumuza yoori: ‘Khaninwahi orutelawo nihilawaneeni ttwiyyethu otu wa w'eefutti, amana nihilawani khaninlawa okutthanana mwiinyi oto.’

²⁷ Karumeyeenu papeetthu khunuza yoori: ‘Mweeyo mwinjuwa yoori muukhaaka akipatthela aana awiri, ²⁸ otu mmote akaashikha mpakha leelo eti akinamoone. Kakhupali yoori ooliwa ti nyama ya ntthuttu khunra-funa. ²⁹ Amana mwinlazavo otu n'ompattha etthu yootakhala, mwintta

okiishukhelisa aahera na pwi zaka kirina huzuni yoototheliwa ti mweyo.³⁰⁻³¹ Aphano amana nirutela onti ninlikha ye, nintta omuulaana huzuni papeethu, mwaasa yoori mwanawе animphetachaaye. Akarumeyeenu anttela ompatthisa papaaya wiishukhela aahera na pwi zawe arina huzuni.

³² Olikha eto, miiyo kamwaahiti paapa yoori kininrutisa, amana kihinrutisi kookosani ohaayi aka wooshi.

³³ Aphо kinuuvekela yoori safwatali, miiyo kintta osala kiri mwiitthwaa-neenu mbwanaaka zwaamu ya shapu otu, mwinlikhe ye arutele onti na attwiize. ³⁴ Toowo kinttela orutela toovi wapaapa woohilawani shapu otu? Miiyo akinwahi woona ari mmatteso paapa.”

45

Yuusufu onjijuwisa attwiize

¹ Nawiisha Yuuda ottakhula, Yuusufu khusala oojeela ojilipisela. Khuwooza akarumeyaawe ooshi olaavo, khuhivo hatha ntthu ajijuvisaka attwiize. ² Ye khusala alila anyakulaka mpakha khufiyelela osiila Amisuri, hapari epile khufiya wamfwalume Firawuuna.

³ Ye khuwooza attwiize yoori: “Miiyo ki Yuusufu! Nkahayani, paapa ori haayi?” Attwiize khuhisala awahi onjipu mwaasa yoori aari ooshanka channu.

⁴ Khuwooza attwiize yoori: “Mwisusele apha kiriivo.” Yo khunsusela khuwooza yoori: “Miiyo ki Yuusufu, otule mwaamuuzanyisiyeeyo khutaniwa Misuri. ⁵ Aphо mwihihanke wala mwihihowerane mwaasa wooku-uzanyisa khutaniwa okhuno. Ila Nluku eettiye okilokozisa yoori muusuru nafusi zenu. ⁶ Zavira nyaakha miwiri za jala mmamiti mphule ila zasa-la theenya nyaakha mithaanu atthu ahintelaaye olima wala wuurula. ⁷ Nluku akiperekha vakathi venu mweeyo yoori kuusuru ohaayi eenu muulumwenku mphu na apa anttelaaye ovokoliwa.

⁸ Khahiyо mweeyo mwikiperekhiye okhuno, ila Nluku ti ye akiperekhiye, khukiretta wiya nkhamma paapa wa Firawuuna, na ntunkhulu wa vaje vawe na tuniya ya Misuri. ⁹ Mwaakuve mwirutele wapaapa mwamuuze yoori: Mwanenu Yuusufu alupa yoori: Nluku akinkha ottunkhulu wa Misuri yooshi. Ate okhuno, ahirupaze! ¹⁰ Mwite mwiikhale nti wa Gosheni kharipu na-miyo, mweeyo na atuulwenu, aaneenu, pwittipwithi zenu, mompe zenu, na vitthu zenu zooshi mwiriinaazo. ¹¹ Ottuukho kisala kiwinkhani etile enuuhihajiyaaanini, mweeyo na vaje venu na zooshi mwiriinaazo yoori mwihihoe, maana zasala nyaakha epi mithaanu za jala.

¹² Mweeyo mwinikoona na maasho enu, na ttwiyyaku Bejami onikoona, yoori khweele ti miyo kinlupaaye mattakhuzi apa. ¹³ Mwilawe mwamuuze paapa owahi kiriina Misuri na zooshi epile mooniyeezo. Aphо mwaakuve mwilawe mwantiise ottuukhuno.”

¹⁴ Yuusufu khumpatikha ttwiyye Bejami khusala alila, na-ye Bejami khumpatikha khusala alila. ¹⁵ Nawiisha khuwaapejari attwiize ooshi khusala alila. Attaaphо attwiize phi awahiyeevo ottakhula na-ye.

¹⁶ Hapari epile khumfiyela Firawuuna, yoori attwiize Yuusufu ata. Firawuuna n'ooziila khwiya wootuveliwa vamote na akarumeyaawe.

¹⁷ Aphano Firawuuna khumuza Yuusufu yoori: “Owooze attwiizo: Athuule nyama zaya arutele tuniya ya Kanaani. ¹⁸ Amweettele papeenu na ajamaazenu ooshi ate okhuno. Miiyo kintta Owenkha puuro swaafi mmuti mphu, yoori asala aja vitthu zootuva zinruweriwaaye ntumphu.

¹⁹ Athuule mikukutta za Misuri ethiiti aweettele aanaaya, aakhaaya na papeenu. ²⁰ Mwihiyane hatha shaakha na mali zenu zooshi mwiriinaazo, maana vitthu zooshapweya za tuniya yooshi ya Misuri zinttela wiiya zeenu.”

²¹ Aana a Yaakhumpa khuretta ethhiipile. Yuusufu khuwenkha mikukutta nkhamma ethhiipile aalupiyeezo Firawuna, khuwenkha vitthu-zooja ntarikhi alawaka. ²² Wakhula ntthu khumwinkha kuwo pheeya ila Bejami khumwinkha miya ttatthu za nzurukhu wa feeta na kuwo thaanu pheeya.

²³ Khuperekha apuuru khumi zipakhiriye vitthu zaariiwo Misuri zootuva yoori alawe enkhiwe papaaawe, khuperekha theenya apuuru khumi zipakhiriye tiriku na phaawu na vitthu kiina za akhipa yoori asala aja ntarikhi. ²⁴ Nawiisha, khuleezana na attwiize yo khulankha khusala alawa, ye khuwooza yoori: “Mwihishowerane ntarikhi.”

²⁵ Yo khulankha Misuri khusala alawa Kanaani wa papaaaya Yaakhumpa.

²⁶ N'oofiya khumuza papaaaya yoori: “Yuusufu nalelo ori haayi, nt-tunkhulu wa Misuri yooshi!” Yaakhumpa n'oosila khuzileya mwaasa woohaamini. ²⁷ Ila nawuuziwa mattakhuzi apale aalupiyeyo Yuusufu, na khoona mikukutta epile aaperekhiyeozyo yoori zilawe zanthuule papaaawe, rooho yawe khutamo. ²⁸ Yaakhumpa khulupa yoori: “Mwanaka ori haayi! Kintta olawa kamoone kihinafwe.”

46

Yaakhumpa onthamela Misuri na ajamaaze

¹ Ezirayeele khuthuula vitthu zawe zooshi aariinaazo, khulawa mpakha Beresheba. N'oofiya okhule, khuretta twaha anrettelaka Nluku aari omwaa-putwaaye papaaawe, Esiyaakha. ² Nluku anteeliye Ezirayeele osikhu nkathhi wa jozi khusala ankhuwela araka: “Yaakhumpa! Yaakhumpa!”

Ye khujipu yoori: “Lapeekha!”

³ Ye khuri: “Miiyo ki Nluku, Nluku wa papaaowo. Ohoove olawa tuniya ya Misuri, maana khwa weyo kinttela opuwisa khapila khuluyeene. ⁴ Miiyo kinlawwa vamote na-weyo Misuri na kinlawwa koorutisele mmuti ntumphu. Amana ofwa Yuusufu ti ye anttelaaye ophulula maasho awo.”

⁵ Aphano, Yaakhumpa khulankha nti wa Beresheba na aanaawe na aakhaaya na aanaaya khupakhira mmikukutta epile zaaperekhiweeyo ti Firawuna. ⁶ Khuthuula maphanko a nyama, na mali zaya zooshi epile aapatthiyeeyo tuniya ya Kanaani, Yaakhumpa khusala alawa Misuri na ajamaaze ooshi. ⁷ Aanaawe aalume na aanaaya, aanaawe aakha na-yo na aanaaya, ajamaaze ooshi khuwaathuula khusala alawa Misuri.

⁸ Apa mazina a meeziyeele, Yaakhumpa na ajamaaze aalawaniyeeyo Misuri:

Ruubeni, mwaana wamwanzo wa Yaakhumpa.

⁹ Aana a Ruubeni pi apa:

Enookhi, Phaalu, Hezorooni na Khariimu.

¹⁰ Aana a Simiyooni pi apa:

Yemuweeli, Yamiini, Ohaati, Yakhini, Sohaari
na Shawuuli mwaana wa nunu mmote wa Kanaani.

¹¹ Aana a Leevi pi apa:

Geerishoni, Kohaathi na Meraari.

¹² Aana a Yuuda pi apa:

Eeri, Onaani, Sheela, Pereezi na Zeera.

Eeri na Onaani afwa tuniya ya Kanaani.

Aana a Pereezi pi apa:

Hezorooni na Hamuuli.

¹³ Aana a Ezakaari pi apa:

Toola, Phuuva, Yashuubu na Shimrooni.

¹⁴ Aana a Zabulooni pi apa:

Seredi, Elooni, na Yaleeli.

¹⁵ Apa atuuulu na aana a Yaakhumpa aawaavokoliyeeyo na Liiya nti wa Paata-Araamu, ohintthiimo mwanawewe Tiina. Ooshi aari talaathiini na attatthu.

¹⁶ Aana a Gaadi pi apa:

Sefiyooni, Haaki, Shuuni, Esbooni, Eeri, Aroodi na Areeli.

¹⁷ Aana a Asheeri pi apa:

Imunna, Eshwiiva, Eshwiivi, Beriiya na ttwiye Zeera.

Aana a Beriiya pi apa;

Hepeere na Malikiyeeli.

¹⁸ Apa aana a Yaakhumpa na Ziilipa, karumeya otule Labani aamwinkhiyeeyo mwanawewe Liiya. Ooshi aari khumi na sitha.

¹⁹ Aana a Rakeele muukha wa Yaakhumpa aari apa:

Yuusufu, na Bejami.

²⁰ Asenaathi mwaana wa Potifweera, ntunkhulu wa tiini ya Ooni aavokoleliwe aana awiri ti Yuusufu tuniya ya Misuri, Manaase na Efwarayimu.

²¹ Aana a Bejami pi apa:

Beela, Beekheri, Ashibeeli, Geera, Naamani,

Eehi, Rooshi, Muupimu, Huupimu na Haridi.

²² Apa aana a Rakeele aavokoleliweeyo ti Yaakhumpa, ooshi aari khumi na wane.

²³ Mwaana wa Daani aari Hushimu.

²⁴ Aana a Nafitaali pi apa:

Yaseeli, Kuuni Yesereri, na Shileemu.

²⁵ Apa aana a Yaakhumpa na Biila, karumeya otule Labani aamwinkhiyeeyo mwanawewe Rakeele. Ooshi aari sapa.

²⁶ Attu ooshi apale aalawaniyeeyo Yaakhumpa Misuri aari ajamaaze, ohiaatthiimo aakha a aanaawe, aari siithiini na sitha athweene.

²⁷ Owaatthaamo aana a Yuusufu aavokoliweeyo tuniya ya Misuri, ojama wooshi wa Yaakhumpa waari wa attu saapiini.

²⁸ Aphano Yaakhumpa khunlokozisa Yuuda wa Yuusufu, yoori alawe amuuze anthepeeze nti wa Gosheeni. Afiyeevo nti wa Gosheeni, ²⁹ Yuusufu khuthuula nkukutta awe khusala alawa okutthana na papaawe, Ezirayele. N'oomoona khuntthirela khulawa khumpatikha, khuvira wakathi wa waatta eettaka olila.

³⁰ Yaakhumpa khumuuzza Yuusufu yoori: "Aphano kiwooniyeovo yoori ori haayi, kimfwa kihina shaakha."

³¹ Yuusufu khuwooza attwiize na ajaama a papaawe yoori: "Kintta wa Firawuna kamuuze yoori attwiizaku na ajamaaze paapa apa aari wiikhalaaye tuniya ya Kanaani, ata mmuti mphu. ³² Kinttela omuuza yoori yo amakhampuzi, ataaka atiisa nyama zaya, pwittipwitthi, mompe na vitthu zaya zooshi ariinaazo. ³³ Amana Firawuna arumisa oteela okhuwelawa mweeyo, na awuuzelani yoori 'Mwinkhola khaazi-ni?' ³⁴ Mwinjipu yoori: 'Fweeyo akarumeyaawo khaazi yetthu oshukisa nyama, waaza osimaana etthu mpakha apha, nkhama etthiipo aari orettaazo apapazetthu.' Toowo, mwintta okhupaleliwa wiikhala nti wa Gosheeni, mwaasa yoori amakhampuzi ooshi pi ootarawiwa pi a Misuri."

47

Yuusufu onimuuba Firawuuna ofiya wa papaawe tuniya ya Misuri.

¹ Yuusufu khulankha olawa omuuza Firawuuna yoori: “Paapa na attwiizaku ata ari nti wa Gosheeni, atana maphanko a nyama, mompe, pwittipwitthi na vitthu zaya zooshi ariinaazo.” ² Khuwaathuula attwiize athaanu olawa owaajuwisa Firawuuna.

³ Aphano Firawuuna khuwoozela attwiize Yuusufu araka: “Mwinkholaa khaazi-ni?” Yo khunjipu yoori: “Mbwaneeetthu, fweeyo khaazi yetthu oshukisa nyama nkhamma apapazethu apa aviriyeeyo. ⁴ Fweeyo nateela wiikhala mmuti mphu siikhu vattithiiru, mwaasa yoori tuniya ya Kanaani yeetta opuwawo jala ya waatta nyama zetthu khuhisala ziiyana etthu-yooja. Safwatali wa safwatali, mwinilikhe niikhale nti opu wa Gosheeni.”

⁵ Aphano Firawuuna khulupa yoori: “Papaawo na attwiizo ata wiiya vamote na-weyo. ⁶ Tuniya ya Misuri eri mmakhono mwawo. Apho, papaawo na attwiizo Owenkhe Gosheeni ti yiyyiye phantte yooshapweya ya mmuti mphu, eekhale ottuukho. Na amana woona yoori vakatthi wa ajamaazo awaapho atthu ariina akhili, Owenkhe ottunkhulu wa mompe zaka.”

⁷ Yuusufu khunthuula papaawe Yaakhumpa khulawa onjuwisa Firawuuna, Yaakhumpa khumparikhya. ⁸ Firawuuna khumuuzela Yaakhumpa araka: “Mwina nyaakha mikavi?”

⁹ Yaakhumpa khunjipu araka: “Kinaaye nyaakha miiya na talaathiini, keettaka osaafiri kijeettettelaka. Nyaakha epi kivirisyeeyo vattithiiru na pi zootakhala, mpakha apha akinafiye nyaakha epile eekhaliyeeko amarehemu apapazaku.” ¹⁰ Aphano Yaakhumpa khumparikhya Firawuuna, nawiisha khuruti.

¹¹ Yuusufu khumwinkha meekhazi papaawe na attwiize phantte yooshapweya ya tuniya ya Misuri waattamana na nti wa Ramesesi, nkhamma etthiipile Firawuuna aalupiyeeko. ¹² Ye khumwinkha papaawe na attwiize na ajamaaze ooshi etthu-yooja, yowaafiyela wakhula ntthu na aanaawe.

Nyaakha za jala.

¹³ Khuthowa etthu-yooja tuniya ya Misuri mpakha Kanaani yooshi. Atthu khusala akureya mwaasa wa jala waatta. ¹⁴ Aphano Yuusufu khukusanya nzurukhu wooshi, opule waari orumeeliwaaye Misuri na wa Kanaani opule waari wuzanyeliwaaye tiriku, khulawa khupweha owawe Firawuuna. ¹⁵ Wakathi wiishiyeovo nzurukhu wa Kanaani na Misuri, khulankha Amisuri khulawa onvekhela Yuusufu araka: “Safwatali, oninkhe etthu-yooja nihifwe onoonaka mwaasa woohiina nzurukhu.”

¹⁶ Yuusufu khujipu araka: “Nkhamma mweeyo khamwina nzurukhu, mwikiisele nyama zenu nipatili na etthu-yooja.” ¹⁷ Amisuri khuthuula pwittipwitthi zaya, mompe, khavaloo, na apuuru aya, khulawa khumwinkha Yuusufu, ye khuwenkha etthu-yooja aari weettelaaye oja mwaakha wooshi.

¹⁸ Mwaakha aya opule khwiisha, mwaakha nkina khurutelawo wa Yuusufu olawa omuuza yoori: “Mbwaneeetthu khaninoona etthu yoovitha, nzurukhu etthu waniishela, nyama zetthu p'iipile niwinkhiyenini. Khanisalaneeni hatha etthu, nasalana mwiili etthu na mashapa etthu paasi.

¹⁹ Ohinilikhe nifwaka na mashapa etthu apwecheyaka weettaka woona. Wuuzanye mashapa etthu na-fweyo aya, oninkhe etthu-yooja. Toowo niniiya amwiitthwaana za Firawuuna na mashapa eetthu anttela wiiya awe. Oninkhe peewu yoozala yoori nipatthe wiiyana meekhazi, nihifwe jala na nti etthu ohiiye yaara.”

²⁰ Khwa nanna ethiito Yuusufu khuuzanya mashapa ooshi a Misuri khwi-ya a Firawuuna. Amisuri ooshi aarina yawuuzanyisa mashapa aya mwaasa wa jala yeetta otepa yaattaka, nti wooshi khwiiya wa Firawuuna. ²¹ Yuusufu khuwaareetta omwiitthwaana atthu ooshi a phantte yooshi ya Misuri. ²² Ila mashapa a attunkhulu a tiini khoozanyiye mwaasa yoori yo aari winkhiwa etthu-yooja ti Firawuuna, ti etthu ahoozanyiseliyeeyo mashapa aya.

²³ Aphano Yuusufu khuwooza atthu yoori: “Mwikisiileze! Kawuuzanyani mweeyo na miti zenu zooshi. Waaza leelo mweeyo na mashapa enu anttela wiiya a Firawuuna. Peewu eti mwilawe mwazale. ²⁴ Wakhula etile mwinttelaaye oruwera mwisala mwithuula lifunku la thaanu mwimwinkha Firawuuna. Mafunku apa mane mwinsalanaaye mwisala mwija mweeyo na aaneenu na atthu apale mwiniikhalaanaaye. Kinoko khupweha yoori mwirette peewu.”

²⁵ Yo khujipu araka: “Weeyo mbwaneetthu wanuusuru, wanirettela vitthu zooshapweya, fweeyo nakhupali na rooho zetthu zooshi wiiya amwiitth-waana za Firawuuna.”

²⁶ Yuusufu khulaleya kano moote eriivo mpakha leelo eti, yoori lifunku la thaanu la vitthu zooshi zinruweriwaazo tthi la Firawuuna. Mashapa apale paasi a attunkhulu a tiini khuhinkhiwi wiiya awe.

Otakha wa wiishela wa Yaakhumpa.

²⁷ Meezirayeele khuthamela Misuri nti wa Gosheeni. Ottuukho khpattawo meekhazi khuvokolelana khwaattelana.

²⁸ Yaakhumpa eekhaliye tuniya ya Misuri nyaakha khumi na sapa, nyaakha eekhaliyeeko Yaakhumpa ohaayi awe wooshi zaari miiya na arupayiini na sapa. ²⁹ Ooniyeovo yoori mansha awe asala vattithiiru khunkhuwela mwanawe Yuusufu khumuza yoori: “Nkhama onikipheta othuule nkhono awo otthe vathi wa liphaja laka, olaphe nkhama onteela oretta na pheta ya waamineya etile kuuvekeliyeeyo, yoori ohikizikhe tuniya ethiiti ya Misuri. ³⁰ Amana kifwa okilazemo tuniya eti olawe wakizikhe nti opule azikhiweewo apapazaku, kilawe keeye vamote na-yo.”

Yuusufu khujipu araka: “Kinttela oretta ethiipo mwikirumiyeeko.”

³¹ Aphano Yaakhumpa khunkhanyerela yoori alaphe, Yuusufu khulapha, Yaakhumpa khwiinamela ovishwa w'oolili.

48

Yaakhumpa onimparikiya Manaase na Efwarayiimu

¹ Wakathi ziviriyeovo vitthu epile, khuuziwa Yuusufu oriwa: “Papaawo nlwele.” Ye khulankha khusala alawa omoona, alawaka khuwaathuula aanaawe awiri, Manaase na Efwarayiimu. ² Khuuziwa Yaakhumpa yoori: “Mwanenu Yuusufu ontta ota oteela owoona.” Ezirayeele khujilipisela khulankha khwiikhala voolili.

³ Aphano Yaakhumpa khumuza Yuusufu: “Nluku Woowahi Wooshi aakipuweleliye nti wa Luuzu tuniya ya Kanaani khukiparikiya, ⁴ akuuzaka yoori: ‘Kinteela owinkha mavokozi na kaattise peewu yawo yoori khwa weyo epuwe khuntti za waatta na kinkhe nti opu peewu yawo khwa mileele.’

⁵ Aanaawo apa awiri avokoliweeyo Misuri miiyo kihinate, Manaase na Efwarayiimu apa aya pi aka aanaaka, nkhama ethiipo Ruubeni na Simiyooni eeyiyeezo aanaaka. ⁶ Ila apa onttelaaye owaavokola theenya anttela wiiya awo apa pa yo anttelaaye orithi zwaamu ya attwiizaya. ⁷ Kirutaka Paata-Araamu akifwela muukhaaka Rakeele tuniya ya Kanaani, kiri ntarikhi

kisaleelaka ofiya nti wa Efwarata. Miiyo khunzikha phantte ya tarikhi ya Efwarata oniithiwaawo Belemu.”

⁸ Ezirayeele n'oowoona aana a Yuusufu khuuzela araka: “Khi apa apaani?”

⁹ Yuusufu khunjipu papaawe yoori: “Apa aana akinkhiyeeyo Nluku mmuti ntumphu.”

Ezirayeele khulupa yoori: “Okitiisele apha kiriivo yoori kiwaaparikhie.”

¹⁰ Maasho awe Ezirayeele khaari woona saana mwaasa wa wuuluvala, Yuusufu khuwaathuula aana apale khumwaattamisela pwapwaaya, ye khuwaapatikha khuwaapejari.

¹¹ Ezirayeele khumuza Yuusufu yoori: “Wala akaari wuupuwela yoori kaari oteela woonanana weeyo theenya, ila Nluku akiniza mpakha aanaawo!”

¹² Elottelanaka Yuusufu khuwaalazavo aana apale vamakutha wa pwapwaaya khwiinama khufiyisa ajihi yawe vathi. ¹³ Yuusufu khuwaathuula aanaawe oowiiri, Efwarayiimu nkhono-nlume phantte ya nkhono-nkha wa Ezirayeele, Manaase khunthuula nkhono-nkha phantte ya nkhono-nlume wa Ezirayeele khunttha khuwaattamisela pwapwaaya. ¹⁴ Ezirayeele khookola nkhono awe weelume veeshwa wa Efwarayiimu, otu ntiitthi aya, nkhono-nkha khuttha veeshwa wa Manaase otu nwulu.

¹⁵ Aphano khumparikhya Yuusufu araka:

“Nluku otu anrumeyeliyeeyo apapazaku,

Eburahiima na Esiyaakha,

Nluku otu ankishukaaye

ohaayi aka wooshi mpakha leelo,

¹⁶ Nlayikha ntthi likilaziyeemo nkatthi wa vitthu zootakhala,

liwaaparikhie asimaana apa.

Khwa yo livuwisiwe nzina laka

na mazina a apapazaku,

Eburahiima na Esiyaakha,

eeyane peewu ya waatta vatuniya.”

¹⁷ Wakathi Yuusufu amooniyeevo papaawe athuuliye nkhono awe nlume khuttha veeshwa wa Efwarayiimu, ye khuhintuveli. Khulazavo nkhono-nlume wa papaawe veeshwa va Efwarayiimu khuttha veeshwa va Manaase.

¹⁸ Khumuza papaawe yoori: “Khahiytoowo paapa, otu ti ye eeyiye ntunkhulu, aphi nkhono-nlume mwinttheele othuuto veeshwa vawe.”

¹⁹ Ila papaawe khuhitakhi khuri: “Miiyo kinjuwa mwanaka ethu kinret-taaye. Manaase ontela wiiya khuntti khuluyeene na onteela wiiyana peewu ya waatta, ila ttwiye otu ntiitthi onteela onziti ye, peewu yawe enttela wiiya khuntti za waatta.” ²⁰ Aphano khuwaaparikhya siikhu ethiitile araka:

“Atthu a Ezirayeele anteela owaaparikhya azaaya arumeyelaka mazina enu araka:

‘Nluku ooretteni nkhama Efwarayiimu na Manaase.’” Paata ya toowo, khunwulisa Efwarayiimu zayita Manaase.

²¹ Elottelanaka, Ezirayeele khumuza Yuusufu yoori: “Apha miiyo nasaapi kimfwa, ila Nluku ontela wiiya vamote na-mweyo na ti ye anttelaaaye wuрутисели nti wa apapazenu. ²² Aphi kawinkha nti w'oonyaako wa Shekemu weeyo owaazitiyeeyo attwiizo, etile kiwaanyakanyiyeeyo amoori kuumananaka phanka yaka na mattetthe aka.”

49

Yaakhumpa oniwaaparikhya aanaawe

- ¹ Yaakhumpa khuwaakhuwela aanaawe khuwooza yoori: “Mwite apha kiwuuzeni vitthu zinttelaaye orettikhana siikhu epo zintaazo.
- ² Mwisusele apha mwisiile aana a Yaakhumpa,
mwinsiileze papeenu Ezirayeele.
- ³ Weeyo Ruubeni, mwaana woomwanzo aka,
kuvu zaka,
nshumo woomwanzo woojikhitiri wooshapu aka,
mwanzo wooshitahiwa channu na wookhomaala.
- ⁴ Weeyo o wootumpunyeya nkhama maati a mpahari,
omwanzo awo wafujeya,
mwaasa woolalana muukha wa papaawo,
waphuja voolili wa papaawo*.
- ⁵ Na-ye Simiyooni na Leevi, ntthu na ttwiye,
phanka zaya puntukhi zoorettana vitthu zoohusuti.
- ⁶ Shawuri zaya miiyo akeepu,
na rooho yaka khiri vamote na-yo,
mwaasa wa wiiphiiriwa waya awoola atthu
khushija ttottopwa za mompe za watthu mwayiini.
- ⁷ Woolaanikha wiiye wiiphiiriwa waya yo, maana pu woowali,
woolaanikha yiiye katapu yaya yo, maana pi zookhomaala.
Kinlawa kawaaphakulevo vakatthi wa khapila ya Yaakhumpa,
kiwaamwazelaka vakatthi wa Ezirayeele.
- ⁸ Weeyo Yuuda, attwiizo anteela wuuttottopela;
onttela owaashintta maatuwi awo,
aana a papaawo anlawa
awiinamele weeyo.
- ⁹ Yuuda, mwaana wa siipa,
amana akhola nyama khininsuruwa;
onlattanana siipa nwulweene arapaleliye,
paani amminyalaaye khunlansa?
- ¹⁰ Khweele Yuuda khanteela onyakanyiwa ofwalume awe,
wala pakhora y'oofwalume eriiye mmwinyoka mwawe,
mpakha ate mwennyewe ofwalume,
otu anttelaaaye oshututeliwa pi atthu ooshi.
- ¹¹ Ye onteela ofukelela puuru yawe
vanrayi wa wuuva,
na mwaanaaya anfukelele
veerapi yooshapweya ya nrayi otthuupo.
Kuwo zawe nka afulanaka viinyu
na ajapi yawe nka afulanaka taamu ya wuuva.
- ¹² Maasho awe anttela wiiya awaara
mwaasa woonywa viinyu ya wuuva,
meeno awe anttela wiiya oolakala
mwaasa w'onywa leethi.
- ¹³ Zabulooni onttela wiikhala phantte ya phwaani,
onttela wiiya patari ya makalawa;
mwiinano awe onlawa mpakha nti wa Sidooni.

* **49:4** Moone Mwanzo 35v22.

- ¹⁴ Ezakaari puuru wookhomaala
arapaleliye vakathi wa mapwattha mawiri.
- ¹⁵ Wakathi ooniyeovo yoori tuniya etile yaari ya shirehe
na yooshapweya ovumula,
ye khwiinamisa mafuzi awe
khuvikela mapwattha,
khusala akhola khaazi
nkhamma mwiithwaana.
- ¹⁶ Daani, onteela ophuka washariyavo khapila yawe
nkhamma lihimo limote la Ezirayeele.
- ¹⁷ Ye onteela wiiya nkhamma nyookha
eniiyaaye nshini wa tariki.
Nkhama evili yoovithaaleta
enlumaaye ekwakuno ya khavalo,
namweettettisa khavalo
khukwana enyokonyoko.
- ¹⁸ Oo Mbwanaaka! Miiyo kinweja nusura yawo!
- ¹⁹ Gaadi onteela wuumananiwa pi annya-viittha
ila ye eettaka owikarisa.
- ²⁰ Vitthu-zoojiwa za Azeeri enttela wiiya za nnofu,
ye nka avahaka etthu-yooja ethiitile ensuhaaye oja afwalume.
- ²¹ Nafitaali nazoro woojaphula
aniwaapatthaaye aana ooshapweya.
- ²² Yuusufu muutthi wa wiima channu
waattameliyeeyo nshini wa maati,
virapi zaya khrapela vatulu wa muuri.
- ²³ Maatuwi awe anlawa amuumanane amwiikarisaka
na mattetthe aya,
- ²⁴ ila ntetthe lawe tthi lookhomaala,
makhono awe pi oozivala
khwa kuvu za Nwali wa Yaakhumpa,
khwa kuvu za Nshuki nwulu, Mwaako wa Ezirayeele,
- ²⁵ khwa kuvu za Nluku wa papaawo,
Nluku Woowahi Wooshi.
Ye ooparikhiiye weeyo Yuusufu na parakha za pinkuuni,
na parakha za mmaati ariiyie vathi w'oolumwenku,
na parakha za nyama za waatta na parakha zoovokola.
- ²⁶ Parakha za papaawo pi za waatta zayita
parakha epile za nyaako epi za raku,
na maali za nyaako mittiitthi za mileele.
Parakha zooshi epi ziiye veeshwa wa Yuusufu
mpakha vaajiji va otule athawuliweeyo
vakathi wa attwiize.
- ²⁷ Bejami miji woosaya,
supuyeene ontta okhola nyama na orafuna,
njuwa looveva na waawanya epile zinsalaazo.”
- ²⁸ Pi atthaapa mahimo khumi na mawiri a Ezirayeele, na mattakhuzi
aawooziyeeyo papaaya awaaparikhiiyaka, na amwinkhaka wakhula ntthu
parakha yawe etile yaamweeziyeeyo.

²⁹ Elottelanaka Yaakhumpa khuwooza araka: “Kinttela ofwa kilawe kazikhiwe vamote na ajamaazaku apa afwiyyeeyo. Mwakizikhe vamote na apapazaku nlikurakuza liriiye mmashapa wa Eforoni Niiiti, ³⁰ nttintthile liriiye Makhipeela kharipu ya Manre tuniya ya Kanaani, nttinttho Eburahiima oozanyeziweeyo ti Eforoni Niiiti yoori yiye vilalo yawe. ³¹ Ottuukho azikhiweewo Eburahiima na muukhaawe Suhura, na-ye Esiyaakha na muukhaawe Rapekha na theenya ottuukho phi kinzikhiyeewo Liiya.

³² Nshapa laya na likurakuza laya nttho oozanyaniye Ahiiti.”

³³ Nawiisha mattakhuzi apale aari owozaaye aanaawe, Yaakhumpa khurutisela moolu awe voollili khurapalela khwiittha phuumu khufwa.

50

Olileliwa wa Yaakhumpa na ozikhiwa wawe

¹ Yuusufu khumwiinamela papaawe omaasho wawe khumpejari khusala alila. ² Elottelanaka khuwooza anamajisa thiipa awe yoori anvaaze thiipa ya paalasamu papaawe yoori ahivutte; yo khuretta ethiipo. ³ Ottukuntteliwa thiipa Ezirayeele weeshiye siikhu arupayiini, nkhama ethiipo aazowereliyeezo Amisuri. Yo eeshiye siikhu saapiini ari mmatthaka.

⁴ Nawiisha matthaka apale, Yuusufu khuwooza attunkhulu apale aari wiikhalaaya Firawuna araka: “Kookholani moolu mwilawe mwamuuze Firawuna yoori; ⁵ Paapa ahinafwe, aakilaphisiye yoori: ‘N'oofwa kilawe kanzikhe attaapho azikhewevo ajamaaze tuniya ya Kanaani.’ Safwatali mwilikhe kilawe kanzikhe ottuukho nawiisha kintta ota.”

⁶ Firawuna khunjipu araka: “Wiiya oolaphisiye etta wanzikhe papaawo.”

⁷ Aphano Yuusufu khulankha khusala alawa onzikha papaawe vamote na attunkhulu, akarumeya ooshi a Firawuna na mamunu-munu ooshi a tuniya ya Misuri. ⁸ Aalawiye vamote na ajamaaze Yuusufu na attwiize, na ajaama ooshi a Yaakhumpa aasaliyyeeyo aari asimaana na pwittipwitthi na mompe. ⁹ Atthu aalawiye mmwikukutta akina vakhaval, atthu aalawiyeyo aari a waatta.

¹⁰ Afiiyeevo nti wa Ataati oriyye phantte ya malawa-njuwa ya muuttho Yorotaani, khwiikhala siikhu sapa Yuusufu ari mmatthaka wa papaawe eettaka olila. ¹¹ Wakathi Akanaani apale aari wiikhalaaya ottuukhule awooniyyeeyo Amisuri apale eettaka olila nti wa Ataati yo khuri: “Olila opu anlilaaya Amisuri apa nwulweene.” Pi apho khuthhaja nzina aphale vaya la Apee-Misurayiila, eniiyaaye malawa-njuwa ya muuttho Yorotaani.

¹² Aana a Yaakhumpa khuretta ethiipile aawooziyyeeyo ahinafwe.

¹³ Khunthuula khunlawana tuniya ya Kanaani khulawa khunzikha nlikurakuza la Makhipeela waattamana na Manre, nshapa nttintthile Eburahiima oozanyaniyyeeyo Eforoni Niiiti yoori asala awaazikhawo ajamaaze. ¹⁴ Nawiisha ozikha, Yuusufu khurutela Misuri vamote na attwiize na atthu ooshi apale aalawaniyyeeyo ozikha.

Yuusufu oniwaakuza rooho attwiize

¹⁵ N'oofwa papaaya, attwiize Yuusufu khuri: “Talili Yuusufu khana liphuta varoho vawe mwaasa wa vitthu epile nanretteliyyeeyo zootakhala, na-ye khanteela onirettela ethiipo?” ¹⁶ Attwiize khumperekheza nhupi Yuusufu yoori: “Papaawo ahinafwe aanirumiye ¹⁷ yoori niwuze toono: ‘Safwatali, owaaswaamihi attwiizo khwa koosa na twampi epile ooretteliyyeeyo mwaasa woohuukholi saana.’ Apho nasaapi eti ninuuvekela yoori, oniswaamihi koosa zetthu, fweeyo niiyiye akarumeya a Nluku otu aari omwaaputwaaye papaawo.” Ye n'osiila mattakhuzi apale khusala alila.

¹⁸ Aphano khuta attwiize khwiinama khukokhora anvekelaka nswammaha araka: “Nata n'aamwiithwaana awo.”

¹⁹ Yuusufu khuwooza yoori: “Wala mwihiikoove. Miiyo aki Nluku. ²⁰ Khweele mweeyo mwaakiwazeliye shawuri zootakhala. Ila Nluku khuzukulisa khwiya zooshapweya. Khwa toowo Nluku awoosuru atthu a waatta mpakha leelo eti. ²¹ Apho mwihoove. Miiyo kintta wuukholani mweeyo na aaneenu.” Khwa ethhiipo Yuusufu khuwaanyamaza attwiize, mattakhuzi apale aawooziyeeyo aawaafiyiye nroho mwaya.

Ofwa wa Yuusufu

²² Yuusufu aari wiikhala Misuri vamote na ajaama a papaawe, ye eekhaliye nyaakha miiya na khumi. ²³ Khuwoona aana a Efwarayiimu peewu yattaatthu, theenya khuwaathuula aana a Makhiiri, mwaana wa Manaase, khuwaattha vamoolu vawe.

²⁴ Yuusufu ahinafwe khuwooza attwiize yoori: “Apha miiyo kinttela ofwa, ila Nluku onteela owaawunini oolazenimo mmuti mphu oolawaneni tuniya etile aamwaahitiyeeyo alaphaka yoori onteela omwinkha Eburahiima, Esiyaakha na Yaakhumpa.” ²⁵ Ye khuwaalaphisa aana a Ezirayeele araka: “Kiniwuuzani khweele, Nluku onteela owaawunini. Amana zirettikhana epo zaya, mwilawaka nti aya opo mwithuule makhonkolo aka.”

²⁶ Yuusufu afwa arina nyaakha miiya na khumi. Khuvaaziwa thiipa ya paalasamu mwiili awe yoori ahivutte, khutthiiwa mwiiluza khuzikhiwa tuniya ya Misuri.

Olaawo

Ohukhumwiwa wa meezi rayi ilu nti wa Misuri

¹ Apa mazina a aana a Yaakhumpa eettiyeeyo Misuri, wakhula ntthu na ajamaaze: ² Ruubeni, Simiyooni, Leevi, Yuuda; ³ Ezakaari, Zebulooni, na Bejami; ⁴ Daani, Nafitaali, Gaati, na Asheeri. ⁵ Aana na atuuluwe Yaakhumpa ooshi aalawaniyeeyo aari sapiyiini; ila Yuusufu aari Misuri ottuukho rakuzeene.

⁶ Ziviriyeovo siikhu zawaatta, Yuusufu khufwa na attwiize apale na peewu ya etile. ⁷ Ila meezi rayi ilu apale aasaliyeeyo khuvokolelana khweekezeleya khwaattelana khwiiya okhomaala mpakha khufiyelela omwazeyela mmuti mphule wooshimo. ⁸ Aphano Misuri khuthawala mfwalume nkinoko ahaari ojuwaaye hatha ethu monkoni wa Yuusufu. ⁹ Aphano ye khuwoza atthu awe yoori: “Mwiwoone meezi rayi ilu pi awaattelana na ookhomaala zayita fweeyo. ¹⁰ Nlaweni niwaalazele olavilavi yoori ahitepe waattelana, ehiri amana enipuwela viitha yo akusanyeya na maatuwi eetthu anirinkaanyela atthiramo mmuti mphu.”

¹¹ Aphano amisuri khuwaareetta yo wiiya anamalokozela a khaazi za nku-umu yoori apatthe owaahukhumu na khaazi zoolipa. Khwa ethiipo meezi-rayi ilu khunjekela Firawuna sitati piiri za sakafu zaari wiithiwaaye Pito na Rameesi. ¹² Nakhataalikha zaama aari ohukhumwiwaavo, pi aari otepaavo waattelana, tiito amisuri khuwaapaththa woova mwaasa wa meezi rayi ilu; ¹³ aphano amisuri khwaaza owaakholisa khaazi zoolipa. ¹⁴ Khweekezelaa hukhumu muuhaayi mwaya, khwa owenkha khaazi zoolipa nkhamma omeya ottophe na waattala thizolo, na okhola khaazi zooshi za mmashapa. Zooshi aari okholisiwa khwa oviithwaana wootakhalavo.

¹⁵ Mfwalume wa Misuri khuttakhulana anamavokoza a meepereewu aariwitthiwaaye Siifwara na Puuwa yoori: ¹⁶ “Amana mwiwaawunaka meezi rayi ilu atakhaka ovokola, mwisala mwiwoona aanaaya. Eeyaru aalume, mwisala mwiwoola, ila eeyaru aakha, mwisala mwiwaalikha wiyya haayi.” ¹⁷ Ila anamavokoza apale khumoova Nluku khuhiretti etile ooziweeyo ti mfwalume wa Misuri, khusala awaalikha aana alumee wiiya haayi. ¹⁸ Aphano mfwalume wa Misuri khuwaakhuwela khuwoozela yoori: “Mwaari toovi owaalikha aana aalume wiiya haayi?”

¹⁹ Anamavokoza apale khujipu yoori: “Aakha a meezi rayi ilu afwarikhana na apa a Misuri. Yo pi oojikhitiri, ampattha ekumi ahinafiyeye hatha namavokoza.”

²⁰ Nluku khwiiya wemaani khwa anamavokoza apale, na meezi rayi ilu khusala avira eekezeleyaka wookhomaalavo. ²¹ Mwaasa wa anamavokoza apale omoova Nluku, ye khuwenkha owahi wa wiiyana ojama waya.

²² Tiito Firawuna khuwaaruma atthu awe ooshi yoori: “Wakhula mwaana wa meepereewu anvokoliwaaye eeyaru wanlume amweeselele mmuttho oniithiwaaye Niilu, ila eeyaru wankha asala anlikha.”

2

Ovokoliwa wa Munsa

¹ Mwinyi mmote wa lihimo la Leevi anraliye muukha wa lihimo limote na ye. ² Khumwiimitthisa khunvokolela mwaana. Amooniyeyevo yoori aari wooshapweya khunvitha khwa nyeezi mittatthu. ³ Nawoona yoori

khayaari owaheya ovira anvithaka theenya, khuthuula khelenke ya ttekethe khumattha na piriniisi khuntthaamo mwaana otule, khulawa khunttha nttekethe nkhome wa muuttho Niilu. ⁴ Nlupuwe mwaana otule eemeliye toole sirini yoori oone niini yaari weettelaaye onrettikhanelia.

⁵ Mwaana wankha wa Firawuna khwiishukhela mmuttho olawa woowa, ajaazi awe aarina khusala avira nkhome wa muuttho, ye khoona khelenke etile eri nttekethe khunruma njaazi awe khweettela. ⁶ Afunuliyeovo, khunsikanamo mwaana eettaka olila. Khumoonela huruma khuri: "Mwaana otu tuwa meeziyayiilu."

⁷ Aphano, nlupuwe mwaana otule khumwaattama mwaana wa Firawuna khumuuzela yoori: "Onuupuwela toovi? Ontakha miiyo kilawe kankhuwele nunu mmote mwiizirayiilu ate asala amwaamwisa?"

⁸ Mwaana wa Firawuna khunjipu yoori: "Haya etta." Aphano mwanankha khulawa onkhuwela maama wa mwaana othuutule. ⁹ Aphano, mwaana wa Firawuna khumuuzela yoori: "Onthuule mwaana otu omwaam-wise zwaamu yaka, kintta wuuriphaphakari yawo." Nunu otule khunthuula mwaana khusala amwaamwisa. ¹⁰ Paata ya mwaana otule owula khunttiisela mwaana wa Firawuna khunretta wiiya mwanawewe. Khuntthaja nzina la Munsa, araka: "Maana koolaza mmaati."

Munsa onimuula mmisuri na khutthirela Miitiya

¹¹ Siikhu moote, wakathi Munsa apatthiyeovo omwinyi, khulankha khulawa wa attwiize meepereewu khoona khaazi yoolipa aari okholisiwaaye na theenya khumoonaa mmisuri aari ompiyaaye na onvulalissa mwiipereewu. ¹² Khweekesa okhuno na okhuno nawoona yoori khaari otawo hatha ntthu, khumuula mmisuri otule khunttukuttha vanshaka.

¹³ Siikhu yaphiiri khuwaasikana meepereewu awiri oomanaka khumuuzaa otule aariina paathuli yoori: "Onimpiyela-ni nzaawo?" ¹⁴ Ye khumuuzela yoori: "Paani awinkhiyeeyo onamalokozela weethu ama onamaphuka? Ontakha okuule nkhamma omuuliyeozo mmisuri otule?" Munsa khoova khuri: "Ee, ajuwa eththu kirettiyeeyo!"

¹⁵ Firawuna nawuuziwa vitthu epile khujilakelela omuula Munsa; ye khutthira khulawa mpakha nti wa Miitiya khwiikhala nshini wa nlipu.

¹⁶ Namalokozela a tiini wa Miitiya aarina aanaawe sapa aakha, yo khuteela ottekha maati atthe n'yopo mwaya enkhe nyama za papaaya. ¹⁷ Aphano khuta mishuki mikina khusala aweekara, ila attaphale Munsa khulankha khusala awaakisa na khwinkha maati nyama zaya.

¹⁸ Wakathi aruteliyeovo wa papaaya Rewele,* ye khuwoozela yoori: "Leelo mwaruti supuyeene mwaasa wa niini?"

¹⁹ Yo khujipu yoori: "Mmisuri mmote ti anaakisiye mmakhono wa mishuki mikina na othuuto khunittekhela maati khunywisa nyama zeetthu."

²⁰ Khuuzeliwa ti papaaya yoori: "Apha yaya ori vayi? Mwanlikhelani? Mwankhuwele ate aje na fweeyo."

²¹ Munsa khukhupalela na khutakha wiikhala mwinyi otule, mwanawewe aari wiitthiwaaye Zipoora khunlooza. ²² Zipoora khunvokola mwaana, Munsa khuntthaja nzina la Yeerisoni† alupaka yoori: "Kasaafirela nti wa malaponi."

²³ Ziviriyeovo siikhu zawaatta khufwa mfwalume wa Misuri; athu a Ezirayiilu khusala asisimira na okhuwa monkoni wa oviitthwaana, nkhuwo aya opule khunfiyela Nluku. ²⁴ Nluku noosiila osisimira waya opule khufikhiri

* ^{2:18} Yeeturu † ^{2:22} Yeerisoni khwa luuka ya hebereewu enlattanana na ntakhuze linraaye omaka.

wahati aarettaniyeeyo Eburahiima, Esiyaakha na Yaakhumpa. ²⁵ Nluku khuwoona meeziyayiilu khumweeleya tafwawuthi aariinaayo.

3

Munsa na muutthi wookholela

¹ Munsa aari oshukisa nyama za nkhwewe Yeeturu, namalokozela a tiini wa Miitiya; siikhu moote khuthuula nyama khusala eettana phantte kiina ya n'yaara khufiya mpakha va mwaako wa Nluku, waari wiitthiwaaye Hereebe.

² Attaapho khumpuwelela nlayikha la Nnyizinku va nlimi la moottho waari olankhaaye vakatthi wa muutthi. Munsa khweekesa khoona yoori moottho weetta okholela ila muutthi opule khawaari olukula. ³ Aphano ye khuri: "Vitthu zootikinisa kintta attaaphale kilawe koone, moottho ontta okholela ila muutthi opule khunlukula mwaasa aya niini?"

⁴ Nnyizinku khumoona yoori ye eetta waattama muutthi opule, olawa woona, Nluku khunkhewela enakatthi-nakatthi ya muutthi othuupule araka: "Munsa! Munsa!" Ye khujipu araka: "Lapeekha!"

⁵ Aphano Nnyizinku khumuza yoori: "Ohaattamevo apha! Ovule mmoolu mpho jampali zaho maana puuro yaya eti oriivo ttakatthiifu."

⁶ Khurutela olupa yoori: "Miiyo ki Nluku wa papaawo, Nluku wa Eburahiima, Nluku wa Esiyaakha na Nluku wa Yaakhumpa." Munsa khufinikha wuuso awe maana aari woova omweekesa.

⁷ Nnyizinku khulupa yoori: "Khweele khweele kinoona nanna an-hukhumwiwaazo atthu aka Misuri na kasiila nkhuwo aya mwaasa wa khaazi ankholiswiwaazo pi anamalokozela a Firawuna na kinjuwa yoori antta ohoowa; ⁸ tiito kiishukhiyeeyo oteela owuusuru mmakhono wa amisuri na kiwaalazakamo mphu kiwaalawanaka nti wooshapweya na nwulweene, ohali liniittikhawo leethi na asali; ottuukho aniikhalaawo akanaani, ahiiti, amoori, aperizi, amwiivi na ayepuzi. ⁹ Maana nkhuwo wa atthu a Ezirayiilu wakifyela miiyo, na kinoona nanna amisuri ani-waahukhumwaazo. ¹⁰ Kinuuruma nasaapi ethiiti Misuri wa Firawuna, wawaalazewo atthu aka meeziyayiilu." ¹¹ Aphano Munsa khulupa amuuzaka Nluku yoori: "Ki paani miiyo woolawa wa Firawuna olawa owaalazawo meeziyayiilu?"

¹² Nluku khunjipu yoori: "Miiyo kiniiya vamote na-weyo. Eto ti alama yoori keetta wuurma: Amana owaalazawo atthu Misuri wate vamwaako attaapha okaaputu."

¹³ Munsa khumuuzela Nluku yoori: "Miiyo amana kilawa vakatthi wa meeziyayiilu kiwooza kiraka: 'Nluku wa apapazenu akiruma vakatthi-venu,' khi amana akuuzela yoori: 'Nzina lawe paani?' Kiwooze niini?"

¹⁴ Nluku khumuza Munsa araka: "MIIYO TI MIIYO. Owooze ethiipo meeziyayiilu, yoori: 'MIIYO TI MIIYO ti akirumiyeeyo vakatthi venu.'

¹⁵ Nluku khulupa theenya amuuzaka Munsa yoori: "Wawooze meeziyayiilu yoori: 'Nnyizinku, Nluku wa apapazenu Nluku wa Eburahiima, Nluku wa Esiyaakha na Nluku wa Yaakhumpa, akiruma vakatthi ve.' Nttho ti nzina linsalaaye kuupuwelaniwaka peewu khwa peewu mileele."

¹⁶ "Olawe wawaakusanye attunkhulu a meeziyayiilu, owooze yoori Nnyizinku, Nluku wa amarehemu apapazenu, Eburahiima, Esiyaakha na Yaakhumpa aakipuweleliye khukuza yoori: 'Khweele khweele, Miiyo kinoona tafwawuthi zenu na kinjuwa etthu anuurettelaanini a Misuri.'

¹⁷ Miiyo kaahiti wuulazanimo nhukhumu za amisuri kiweettaneni nti wa akanaani, wa ahiiti, wa amoori wa aperizi wa amwiivi na wa ayepuzi nti oniithaaye leethi na asali.'

¹⁸ “Attunkhulu anteela wuusileza. Olankhe na attunkhulu a atthu aya atthaapo mwilawe wa Firawuna wamuuze yoori: ‘Nnyizinku, Nluku wa meepereewu eettiye oniteela. Apho onilikhe nilawe neettette mwentto wa siikhu ttatthu neette n’yaara namwinkhe twaha Nnyizinku, Nluku etthu.’ ¹⁹ Miiyo kinjuwa yoori mfwalume wa Misuri khanteela wuulikhani olawa woohiiyi khwa okhanyareliwa pi nkono woowahi. ²⁰ Nakatalikha kinteela wookola nkono aka kiwaavulaze amisuri khwa vitthu zootikinisa zooshi kinttelaaazo oretta vakatthi vavo, paata ya toowo ontaa wuulikhani olawa.

²¹ Na kinteela owenkha amisuri wiiyana niiya na atthu apa na amana mwilaakawo, khamwinlaawo makhono-ru. ²² Aakha ooshi ana ya owaavekela anamwaattamanana aya na apale aawaamakeliyeeyo vitthu za feeta na za tahapu, na kuwo za owaawalisa aaneenu, aalume na aakha. Khwa etthiipo mwintta ovulula maali zooshi za amisuri.”

4

Alama za minjuza enkhiweeyo oretta Munsa ti Nluku

¹ Munsa khunjipu Nnyizinku araka: “Wala yo khanteela okhupalela, na khanteela okisiileza, na anlupa yoori: ‘Nnyizinku khoopuweleleeni!’”

² Nnyizinku khumuuzela Munsa araka: “Eto oriina mmakhono niini?” Ye khuri: “Pakhora.”

³ Aphano khumuuzza yoori: “Weeselele vathi!” Ye khweesa khuthatuwa khwiyya nyookha Munsa khutthira. ⁴ Nnyizinku khumuuzza Munsa theenya yoori: “Wookole nkono awo okhole nkhira aya.” Khookola nkono awe khukhola, khurutela wiiya pakhora. ⁵ “Eto ti ya owaakhupalisa yoori oopuwelelieye Nnyizinku, Nluku wa amarehemu apapazaya, Nluku wa Eburahima, Nluku wa Esiyaakha, Nluku wa Yaakhumpa.”

⁶ Nnyizinku khumuuzza theenya yoori: “Otthe nkhono awo vamweyo!” Khutthaavo, alazakavo khwiyyana maaharaja khulakala nkhamma liwiku.

⁷ Nnyizinku khumuuzza theenya yoori: “Othuule nkhono awo opheya otthe vamweyo.” Khutthaavo, noolazavo khurutela wiiya sawasawa na mwili awe wooshi.

⁸ Nnyizinku nalelo khuvira amuuzaka araka: “Amana yo ahikhupaleli ama ahitakhi, alama yamwanzo, yaphiiri anteela okhupalela. ⁹ Ila amana nalelo eeya ahinakhupalele alama epo piiri wala khuhuusiilezi, ottekhe maati vattithiiru a mmutho Niilu, wiitthele tuulu, antta othatuwa maati aya apo a tuulu eeye taamu.”

¹⁰ Aphano Munsa khumuuzza Nnyizinku yoori: “Oo, Mbwana, thanku raku miiyo akinwahi ottakhula saana; mpakha nasaapi eti waaziyeeyo ottakhulana miiyo, amana kittakhulaka kintta okukuma.”

¹¹ Nnyizinku khunjipu yoori: “Paani amwinkhiyeeyo milomo pinaatamu? Paani amwinkhiyeeyo ottakhula wala paani awuumpiyeyo apale ohisiili? Wala apale awoona ama apale ohooni? Khahiyo miiyo Nnyizinku? ¹² Apho olawe, Miiyo kinttelaazo wiiya vamote na milomo zawo na kinuunozela etthu ontelaaye ottakhula.”

¹³ Ye khujipu araka: “Oo Mbwanaaka, kinuuvekela yoori onrume ntthu nkina.”

¹⁴ Aphano Nnyizinku khumpattha katapu khwa Munsa, khumuuzza yoori: “Weeyo khuna ttwiyo Arawu, nleevi? Miiyo kinjuwa yoori ye onwahi ottakhula saaneene. Nasaapi eti ye ontta ota oteela okutthanana weeyo, ye ontela wiiya woofurahi amana oosikana. ¹⁵ Weeyo ontela ottakhulana omuuze mattakhuzi anttelaaye olupa; miiyo kintta owaawunini moowiiri

yoori mwittakhule na kiwuuzeni etthu yooretta. ¹⁶ Arawu onttela ottakhula atthu khwa zwaamu yawo, onttela wiiya nlomo awo, weeyo onttela wiiya nkhamma Nluku khwa ye. ¹⁷ Othuule pakhora eti mmakhono, ti ethiiti onttelaaye orettana alama za minjuza.”

Munsa onrutela Misuri

¹⁸ Aphano Munsa khurutela wa nkhwewe Yeeturu khumuza yoori: “Safwatali, kilikheni kilawe Misuri kawoone ajamaazaku nkhamma nalelo ari haayi.”

Yeeturu khujipu araka: “Olawe na heeri.”

¹⁹ Nnyizinku aamuziye Munsa ari Miitiya yoori: “Orutele Misuri maana ooshi apale aari otakhaaye owuula afwa.” ²⁰ Aphano Munsa khunthuula muukha awe na aanaawe khuwaattha va puuru vawe khusala arutela Misuri. Mmakhono mwawe aathuuliye pakhora ya Nluku.

²¹ Nnyizinku khumuza theenya Munsa yoori: “Miiyo kawinkha owahi wooretta minjuza zawaatta. Amana orutelawo Misuri wiiye woojitthenka yoori orette omaasho wa mfwalume wa nti aya opule minjuza zaya epo, ila miiyo kinlawa koomise rooho yawe ahiwaalikhe atthu apo olawa.

²² Omuze Firawuna oraka: ‘Nnyizinku alupa toono: Ezirayiilu mwanaka wamwanzo. ²³ Miiyo kalupa yoori: “Onlikhe mwanaka alawe akaaputu.” Ila weeyo amana okatthala kintta omuula mwanawo wamwanzo.’”

²⁴ Eettaka Misuri vahali aamakiyeevo ntarikhi Nnyizinku khunteela Munsa yoori amuule. ²⁵ Ila Zipoora khuthuula liwe loothokolowa khushija shapala ya soola ya mwanawe khupiyana moolu a Munsa. Khuri: “Weeyo omannaka miiyo khwa taamu.” ²⁶ Zipoora khuri: “Omannaka khwa taamu,” athoonyezaka okhiriya opule. Wakathi otthuupule Nnyizinku khunlikha Munsa.

²⁷ Aphano Nnyizinku khumuza Arawu yoori: “Olawe n'yaara wakutthanane Munsa.” Ye khulawa khukutthanana va mwaako wa Nluku, khunchelisa. ²⁸ Munsa khunthateela Arawu zooshi epile Nnyizinku anrumiyeezo omuuza, na khumuza alama zooshi za minjuza arumiweeyo oretta.

²⁹ Aphano Munsa na Arawu khulawa khuwaakusanya attunkhulu ooshi a meeziyaiilu. ³⁰ Arawu khuwooza zooshi Nnyizinku amuziyeeyo Munsa. Nawiisha naye Munsa khuretta alama za minjuza vakatthi wa atthu apale, ³¹ yo khukhupali. Wakathi ajuwiyeevo yoori Nnyizinku awoopuweliye meeziyaiilu na aawoniye nanna aari ohoowaazo yo khwiinama khwaaputu.

5

Firawuna oneekezela hukhumu

¹ Paata ya toole Munsa na Arawu khulawa ottakhulana Firawuna amuuzaka yoori: “Nnyizinku, Nluku wa meeziyaiilu alupa toono: ‘Owaalikhe atthu aka alawe akirettele njampo n'yaara.’”

² Firawuna khujipu araka: “Nnyizinku paani wonshututela miiyo khuwaalikha olawa meeziyaiilu? Akininjuwa Nnyizinku aya na akiniwaalikha meeziyaiilu olaamo mphu.”

³ Munsa na Arawu khukhanyarela araka: “Nluku wa meepereewu ettiye oniteela, safwatali onilikhe nilawe narette safwari ya siikhu ttatthu neettaka n'yaara, namwinkhe twaha Nnyizinku, Nluku etthu, noohiiyi etthiipo antta oniteela marati ama ontta onuula na phanka.”

⁴ Aphano mfwalume wa Misuri khumuza Munsa na Arawu yoori: “Mwaasa aya niini mweeyo mwiwantipwaka atthu na khaazi zaya? Haya!

Mwilawe mwakhole khaazi zoolipa.” ⁵ Theenya Firawuna khulupa yoori: “Atthu apa pi awaatta ila mwintta owaalikhisa okhola khaazi zaya.”

⁶ Siikhu ethiitile Firawuna khuwenkha nrumo anamalokozela awe na masuphayi anakhaazi, araka: ⁷ “Waaza leelo ethiiti mwihirutele Owenkha malala awaattalana thizolo nkhamma mwaari orettaazo; asala alawa weekesa eenyewe. ⁸ Ila mwiwaakhanyarele waattala thamani ethiitile aari waattalakaaye, mwihiwaavukule hatha etthu; apa aya anamaviliwa, ti eto aaziyeyeo okhuwa araka ‘ninttela omwinkha twaha Nluku etthu.’ ⁹ Mweekezele khaazi yaya yoolipa yoori ashikheye ahisiileze vitthu zoohatiwa.”

¹⁰ Anamalokozela na masuphayi khulawa khuwooza atthu apale yoori: “Firawuna alupa toono: ‘Nilikhe owinkhani malala. ¹¹ Mwilankhe mwilawe mwawooze yoori alawe akusanye malala nhali anwahaaye opatthamo, na khaazi yenu yoolipa khinteela ovukuwavo hatha etthu.’ ¹² Aphano atthu apale khumwazeyela nti wooshi wa Misuri khukusanya nyaani khwa zwaamu ya malala. ¹³ Anamalokozela a khaazi khuwaattitta awoozaka yoori: “Mwiishise khaazi khwa nanna mooziweezo okhola wakhula siikhu wakathi opule mwaari winkhiwaavo malala.” ¹⁴ Khujalitiwa masuphayi ameezirayiilu apale atthomiweeyo pi anamalokozela a anakhaazi a Firawuna, na khusala oozeliwa yoori: “Mwaasa aya niini mwihiishisaka khaazi yenu ya waattala thizolo taana wala leelo nkhamma mwaari orettazo raku?”

¹⁵ Aphano masuphayi a meezipirayiilu khulawa ojiliza wa Firawuna yoori: “Mwaasa aya niini owaatthantaka toono akarumeya awo? ¹⁶ Malala khaninkhiwa na ninuuziwa waattala thizolo. Woone, nintta ojalitiwa; ila atthu awo pi ariina paathuli.”

¹⁷ Ila Firawuna khujipu yoori: “Anamaviliwa! Mweeyo oviliwa! Tiito mwinraaye; ‘Nintakha olawa omwinkha twaha Nnyizinku.’ ¹⁸ Nasaapi ethiiti mwirutele okhaazi. Khamwinteela opokhera malala! Ila mwina yauuupa thizolo thamani ethiito mwaari wuupakaaye!”

¹⁹ Masuphayi apale a meezipirayiilu khujuwa yoori aari nhukhumu, mwaasa woosila yoori ahivukule thamani ya thizolo ooziweeyo waattala wakhula siikhu. ²⁰ Paata ya masuphayi apale noolaavo aphale aariivo Firawuna, khunsikana Munsa na Arawu eettaka owaaweja. ²¹ Yo khulupa yoori: “Nnyizinku ti awooneni na oophukeni; maana mweeyo mwanireetta fweeyo wiiya atthu awiiphira omaasho wa Firawuna na wa akarumeya awe khuwenkha phanka mmakhono mwaya yoori anuule.”

Nnyizinku onlaleya otaphuliwa wa atthu

²² Aphano Munsa khuzukuluwela wa Nnyizinku khumuza yoori: “Oo Mbwana, wawaahukhumwelani atthu apa? Khi wakirumeliyeeni? ²³ Maana thanku kilawiyeovo ottakhulana Firawuna khwa nzina lawo yoori ontta owaahukhumu atthu apa, weeyo khawaarettiye hatha etthu yoori owaata-phule!”

6

¹ Nnyizinku khumuza Munsa yoori: “Aphano attaapha ontta woona etthu kinttelaaaye onrettela Firawuna, khwa nkono aka woowahi ontta owaalikha olawa, khwa nkono aka woowahi ontta owiiikara mmuti mwawe.”

² Nluku khumuza theenya yoori: “Miiyo ki Nnyizinku. ³ Kampuweleliye Eburahima, Esiyaakha, na Yaakhumpa nkhamma Nluku wa Owahi Wooshi, ila akiwaalikheeni okijuwana nzina la Nnyizinku. ⁴ Na theenya kaarettaniye wahati aka wa owenkha nti wa Kanaani, nti aari wiikhalaaye ari aletto.

⁵ Nasaapi eti kasiila ojiliza wa meezi-rayi-ilu atthaapo amisuri awaarettiyeeyo oviithwaana na kafikhiri wahati aka karettaniyeeyo.

⁶ Nakatalikha owooze meezi-rayi-ilu yoori: Miiyo ki Nnyizinku na kin-teela owaalazamo nkathhi wa oviithwaana arettiweeyo pi amisuri. Ki-waataphule khaazi zoolipa epo enkhiweezo na kiniwoosuru na nkhono wookhomaala na owahi nwulweene na hukhumu. ⁷ Kinuuthuulani mwiye atthu aka na-miyo kiiye Nluku enu, aphano pi mwinttelaavo ojuwa yoori miiyo ki Nnyizinku, Nluku enu kuulaziyeenini vathi wa khaazi zoolipa mwenkhiweeyo pi amisuri. ⁸ Na kinuuthuulani kiweettaneni nti kaalaphiy-eeyo omwinkha Eburahiima, Esiyaakha na Yaakhumpa; apha kiniwinkhani mweeyo wiiye wenu. Miiyo ki Nnyizinku.”

⁹ Munsa khuwooza ethiipo meezi-rayi-ilu, ila yo khuhitakhi onsiileza, mwaasa wa othunku na hukhumu aari woonaayo nkathhi wa oviithwaana.

¹⁰ Aphano Nnyizinku khumuuzu Munsa araka: ¹¹ “Olawe wamuuze Firawuna mfwalume wa Misuri yoori awaalikhe meezi-rayi-ilu aleemu mmuti mwawe.”

¹² Munsa khunjipu Nnyizinku araka: “Meezi-rayi-ilu khanikisiila, khi nan-nani anttelaa ye okisileza Firawuna, khupe miiyo kihijuwaka ottakhula saana?”

¹³ Ila Nnyizinku anrumiye Munsa na Arawu, yoori awooze meezi-rayi-ilu na Firawuna, mfwalume wa Misuri, yoori etta orumiwa owaalazawo meezi-rayi-ilu Misuri.

Ojama wa Munsa na Arawu

¹⁴ Attunkhulu a ojama aari apa:

Aana a Ruubeni, mwaana nwulu wa Yaakhumpa aari apa: Enookhi, Phaalu, Hesherooni, na Khariimu; opu pi waari ojama wa Ruubeni

¹⁵ Aana a Simiyooni aari apa: Yemuweeli, Yamiini, Ohaati, Yakiini, Zowaari na Shawaali mwaana wa nunu mmote wa Kanaari; opu pi waari ojama wa Simiyooni.

¹⁶ Apa mazina a aana a Leevi khwa ovokoliwa waya: Yeerisoni, Kowaati, na Meraari. Leevi eekhaliye nyaakha miiya na talaathiini na sapa.

¹⁷ Aana a Yeerisoni khwa ojama aya pi apa, Lipiini na Simeeyi.

¹⁸ Aana a Kowaati pi apa: Anraawu, Izaari, Heporooni na Uziili. Kowaati eekhaliye nyaakha miiya na talaathiini na mittatthu.

¹⁹ Aana a Meraari pi apa; Mali na Muushi. Ntthi laari lihimo la Leevi khwa nanna ya ovokoliwa waya.

²⁰ Anraawu khunrala Yokipeeti nlupu wa papaawe, khunvokolela Arawu na Munsa, Anraawu eekhaliye nyaakha miiya na talaathiini na sapa.

²¹ Aana a Izaari pi apa: Koora, Nefekhe, na Zikiiri.

²² Aana a Uziili pi apa: Mizayeele, Elizaafwa, na Sithiiri.

²³ Arawu anraliye Elisheepa mwaana wa Aminataapi, nlupu wa Nashooni; ye khunvokolela Nataapi, Apiiwu, Elizaari na Itamaari.

²⁴ Aana a Koora pi apa: Asiiri, Elikana na Apiyasaafi; ntthi laari lihimo la Akoora.

²⁵ Elizaari, mwaana wa Arawu, khunrala mwaana mmote wa Putiyelee, khunvokola Fineeya; apa pi attunkhulu a ojama wa Leevi.

²⁶ Ti Arawu na Munsa atthaapo Nnyizinku awaarumiyeeyo yoori: “Mwilazewo Misuri lihimo la meezi-rayi-ilu.” ²⁷ Pi atthaapo, Munsa na Arawu, anttakhlaniyeeyo Firawuna mfwalume wa Misuri na niiya ya owaalazawo meezi-rayi-ilu.

Nluku oninkhuwela Munsa na Arawu

²⁸ Siikhu Nnyizinku attakhulaniyeevo Munsa ari nti wa Misuri,
²⁹ Nnyizinku aamuziye yoori: "Miiyo ki Nnyizinku. Omuuze Firawuuna mfwalume wa Misuri zooshi epile kiniwuzaaye." ³⁰ Munsa khunjipu Nnyizinku araka: "Miiyo akinttakhula saana; Firawuuna onttela okisiila toovi?"

7

Munsa na Arawu enakathi ya firawuuna

¹ Aphano Nnyizinku khumuza Munsa yoori: "Miiyo kooretta wiiya nkhamma Nluku khwa Firawuuna na ttwiyo Arawu wiiya nkhamma napiyu awo. ² Weeyo omuuze zooshi epile kuurumiyeeyo, na ttwiyo Arawu amuuze Firawuuna awaalikhe meeziyaiilu aleemo mmuti mwawe. ³ Ila miiyo kinteela wuumisa rooho ya Firawuuna na kinteela wenkeza alama zaka na vitthu zaka zootikinisa nti wa Misuri. ⁴ Ye khanteela wuusilezani, ila miiyo kinteela wookola nkhone aka khwa Misuri, na khwa khaazi khuluzeene za ophuka, kinteela owaalazawo Misuri atthu a Ezirayiilu. ⁵ Phi amisuri anttelaavo ojuwa yoori miiyo ki Nnyizinku, amana kookola nkhone aka khwa Misuri kiwaalazavo meeziyaiilu vakatthi vaya."

⁶ Munsa na Arawu khuretta etthiipo Nnyizinku awaarumiyeego. ⁷ Wakathi aattakhulaniyeevo Firawuuna Munsa aarina hirimu ya nyaakha thamaaniini, Arawu aarina hirimu ya nyaakha thamaaniini na mittatthu.

Pakhora ya Arawu

⁸ Nnyizinku khumuza Munsa na Arawu yoori: ⁹ "Amana Firawuuna awuzani yoori: 'Mwirette minjuza awahi wuukhupalini,' omuuze Arawu: 'Athuule pakhora yaho eeselele enakathi ya Firawuuna,' pakhora ya eto entta othatuwa yiiye nyookha."

¹⁰ Aphano Munsa na Arawu khulawa mpakha wa Firawuuna, noofiya khuretta etthiipile Nnyizinku aawaarumiyeeyo. Arawu khuthuula pakhora etile khweeselala enakathi ya Firawuuna na mashawuriya awe pakhora etile khuthatuwa khwiya nyookha. ¹¹ Aphano naye Firawuuna khuruma olawa okhuweliwa ajuwi na anamajintta; na yo khuretta etthiipo khwa majintta aya. ¹² Wakhula mmote wa yo khusala eesa pakhora yawe na othatuwa nyookha, ila pakhora ya Arawu khumiza pakhora epile. ¹³ Ila Firawuuna khuumisa rooho yawe khuhitakhi owaasiileza, nkhamma etthiipo Nnyizinku aalupiyeezo.

Pala Yamwanzo: Taamu

¹⁴ Nnyizinku khumuza Munsa yoori: "Rooho ya Firawuuna tiya nthiti khanteela owaalikha atthu apo olawa. ¹⁵ Olawe wakutthanane Firawuuna supuyeene; ye onlawa woowa omuttho. Weemele nshini wa muuttho osala onweja, olawaka othuule pakhora yaho mmakhono etile yaathatuwiyeeyo nyookha. ¹⁶ Omuuze yoori: Nnyizinku, Nluku wa meeziyaiilu, akiruma owuuza yoori: Owaalikhe atthu aka alawe akaaputu n'yaara, mpakha leelo khuntakha okisileza. ¹⁷ Nnyizinku alupa toono: Ethiito ti enttelaaye wuujuwisa yoori miiyo ki Nnyizinku: khwa pakhora eti kiriina mmakhono kintakha kipiye maati a Nniilu athatuwe eeye taamu. ¹⁸ Swi ziriye mmuttho zinteela ofwa zooshi, osala onukhamo woohifwayivo. Aphano amisuri ewaapatthe enanaari ya onywa maati a mmuttho mphule."

¹⁹ Nnyizinku khumuza Munsa theenya yoori: "Omuuze Arawu athuule pakhora yaho ookolele nkhone maati a Misuri, a mmuttho na mpakha a mmatthatta na a mmazuuku athatuwe eeye taamu, Misuri yooshi yiitaale taamu, mpakha zoopo za thaapwa na za mawe."

²⁰ Munsa na Arawu khuretta nkhamma etthiipo Nnyizinku awaarumiyeego. Arawu khushashula pakhora etile, khujapha maati a mmuttho Firawuna ari attaapho na mashawuriya awe, maati apale ooshi khuthatuwa taamu. ²¹ Swi zooshi zaariimo mmuttho mphule khufwa khusala onukhamo woohifwayivo, Misuri khuhisala owahi onyweyawo maati a mmuttho mwaya mphule nti wooshi waaria taamu.

²² Nayo anamajintta a Misuri khuretta etthiipo na ojuwa waya woojivitha, ila rooho ya Firawuna nalelo khusala eri yawuma khuhitakhi onsiileza Munsa na Arawu nkhamma etthiipo Nnyizinku aalupiyeezo. ²³ Firawuna khuzukuluwa khusala alawa owawe khuhijali epile zaya. ²⁴ Amisuri ooshi khulawa khuthipa nshini wa muuttho yoori apatthe maati oonywa, maana maati apale a mmuttho khaari onyweya.

²⁵ Zaaviriye siikhu sapa paata ya Nnyizinku othatusha maati apale a mmuttho.

8

Pala yaphiiri: Anaphulu

¹ Nawiisha Nnyizinku khumuza Munsa yoori: “Olawe wa Firawuna wamuze yoori Nnyizinku alupa toono: Owaalikhe atthu aka alawe akaaputu.

² Amana weeyo ohitakhi owaalikha olawa, kintta operekha pala ya anaphulu nti awo wooshi. ³ Mmuttho Niilu wooshimo anttela ottheerelanamo anaphulu awaatta, awelele afiye owawo okatthi wawo mpakha voolili vawo na mmanyupa wa mashawuriya awo mpakha wa atthu awo ooshi na mphule enkhattiwaamo na enoochiwaamu phaawu. ⁴ Anaphulu aya apo anttela wuuteela weeyo na mashawuriya awo na atthu awo ooshi.”

⁵ Aphano Nnyizinku khumuza Munsa araka: “Omuuze Arawu yoori: Wookole nkhono awo othuule pakhora wookolele mmuttho, mmilipu na mmatthatta yoori owaaweelise anaphulu Misuri yooshi.”

⁶ Arawu khookolela nkhono yawe maati a Misuri, anaphulu khuwelela khufinikha nti wooshi wa Misuri. ⁷ Aphano anamajintta na ojuwa waya woojivitha khuwaapuwisa anaphulu Misuri yooshi.

⁸ Firawuna khuruma olawa okhuweliwa Munsa na Arawu khuwooza yoori: “Mwinvekele Nnyizinku akilaze anaphulu apa miiyo na atthu aka, yiyyaru etthiipo kintta owaalikha atthu apa alawe amwinkhe twaha Nnyizinku.”

⁹ Munsa khumuza Firawuna yoori: “Ruhusa ti yawo ya okuuza lini ontakhaaye yoori kuulompele weeyo na mashawuriya awo, atthu awo ooshi, yoori weeyo na vaje vawo mwilaziwe anaphulu asale mmuttho paasi.”

¹⁰ Firawuna khujipu araka: “Meesho.” Munsa khuri: “Enttela wiiya etthiipo ojipwiyeego opatthe ojuwa yoori khaavo anlikananaaye Nnyizinku Nluku ethu. ¹¹ Anaphulu antta wuulikha weeyo, vaje vawo, mashawuriya awo na atthu awo; anttelaaye osala pi apale ari mmuttho paasi.”

¹² Aphano, Munsa na Arawu khulaavo aphale aarivo Firawuna, Munsa khunvekela Nnyizinku mwaasa wa anaphulu, nkhama etthiipo aasilaniyeego na Firawuna. ¹³ Nnyizinku khujipwelela oveka wa Munsa; anaphulu apale ooshi aari mmanyupa, vaje na mmashapa khufwa. ¹⁴ Khulokottheliwa khuukeliwa nti opule khusala onukha woohifwayivo. ¹⁵ Ila wakathi Firawuna ajuwiyeego yoori avumula, khurutela wuumisa rooho yawe khuhinsiilezi theenya Munsa na Arawu, khwa epile alupiyeezo Nnyizinku.

Pala yattaatthu: Shaawa

¹⁶ Nnyizinku khumuza Munsa yoori: “Omuuze Arawu: Athuule pakhora yawo ookole nkhono ajaphe lifufu la vathi, lithatuwe liiye shaawa khwa Misuri yooshi.” ¹⁷ Khuretta etthiipo; Arawu khookola nkhono awe na pakhora etile khujapha lifufu ntthile khuthatuwa khwiya shaawa khuweetaala atthu mpakha nyama na nti aya opule wooshi khwiitaala shaawa. ¹⁸ Anamajintta khweezelela etthiipo na ojuwa waya woovitheya ila khuhiwahi othatusha; shaawa epile khusala evira eweetaalaka atthu na nyama.

¹⁹ Aphano anamajintta apale khumuza Firawuna yoori: “Eti yaala ya Nluku,” ila rooho yawe Firawuna khuumisa khuhitakhi owaasiileza, nkhamma etthiipo Nnyizinku aalupiyeezo.

Pala yanne: Mempe

²⁰ Aphano Nnyizinku khumuza Munsa yoori: “Olankhe supuyeene wakutthanane Firawuna ye onlawa omuttho, omuuze yoori: Nnyizinku alupa toono: Owaalikhe atthu aka alawe akaaputu. ²¹ Amana weeyo ohiwalikhi atthu aka olawa, kintta wuuperekheza pala ya mempe zawaatta yoori ziwiiphirise weeyo, mashawuriya awo, atthu awo na mmavaje mwaya. Manyupa a Misuri na vathi anluwatthaavo zinttela wiitaalavo mempe. ²² Ila siikhu yaya etile kinttela otthantta khwa nanna yoofwarikhana nti wa Gosheeni, okhule anikhalaawo atthu aka; khinteela opuwawo hatha pala moote ya mempe, yoori weeyo ojuwe yoori miiyo Nnyizinku kiri mmuti ntumphu. ²³ Kinlawa kawaafwarikhane atthu aka na atthu awo. Meesho entta opuwa alama ya eto.

²⁴ Nnyizinku khuretta etthiipo, mempe zawaatta khwiitaala nnyupa wa Firawuna na mmanyupa wa mashawuriya awe, nti wooshi khwiya wootapanyeya mwaasa wa mempe.

²⁵ Aphano Firawuna khuruma okhuweliwa Munsa na Arawu khuwooza yoori: “Mwilawe mwamwinkhe twaha Nluku enu, mmuti ntumphu.”

²⁶ Ila Munsa khujipu araka: “Khahi yoolikana fweeyo oretta toowo, maana twaha ninttelaaye omwinkha Nnyizinku Nluku eetthu, ti yoohifwayi khwa amisuri, amana nireetta twaha nkhamma eto anoonaaye ohifwayi, amisuri antta onuula na mawe. ²⁷ Nina yooretta safwari ya siikhu ttatthu niri ntarikhi neettaka n'yaara olawa omwinkha twaha Nnyizinku, Nluku etthu, nkhamma etthiipo anuuziyeezo.”

²⁸ Aphano Firawuna khulupa yoori: “Kintta wuulikhani mwilawe, mwamwaaputu Nnyizinku, Nluku enu n'yaara, ila mwiheette peetiwene, noofiya mwikilompele namiyo.”

²⁹ Munsa khujipu yoori: “Nasaapi eti amana kilaavo vakatthi vawo kinttela onvekela Nnyizinku; meesho mempe epo entta owaattuwa weeyo na mashawuriya awo na atthu awo, ila safwatali ohikkittettekhe theenya ohiwalikhi atthu apa olawa omwinkha twaha Nnyizinku.”

³⁰ Aphano Munsa khulaavo vakatthi wa Firawuna khunvekela Nnyizinku. ³¹ Nnyizinku khujipu lompa ya Munsa, mempe epile khumwaattuwa Firawuna na mashawuriya awe mpakha atthu awe, khuhisali hatha mempe moote. ³² Ila nalelo khusala ari wa wuumisa rooho, khuhitakhi owaalikha atthu apale olawa.

9

Pala ya thaanu: Ofwa wa nyama

¹ Nawiisha Nnyizinku khumuza Munsa araka: “Olawe wa Firawuna wamuuze yoori: Nnyizinku, Nluku wa meepeereewu, alupa toono: Owaalikhe atthu aka alawe akaaputu. ² Amana weeyo nalelo ohitakhi owaalikha olawa

na khukhanyarela owaakhattaza, ³ ojuwe yoori nkhono wa Nnyizinku ontta otiisa pala yawoopisa khwa nyama zaho ziriye omashapa, khwa khavaloo zaho, khwa apuuru awo, khwa nkamiiya zaho, khwa mompe zaho mpakha pwittipwitthi zaho. ⁴ Na Nnyizinku onteela ophakula nyama za amisuri na epi za meeziyayilu, yoori ehifwe hatha nyama moote ya meeziyayilu.”

⁵ Nnyizinku atthoma wakathi araka: “Meesho Nnyizinku ontta oretta mmuti mphu etile aahitiyeeyo.” ⁶ Mmeesho mwaya Nnyizinku khuretta etthiipo: nyama za amisuri zooshi khufwa, ila za meeziyayilu hatha moote khuhifwi. ⁷ Firawuna khunruma ntthu olawa woona, khusikana hatha moote ya meeziyayilu ehifweeni; ye khuumisa rooho khuhitakhi owaalikha olawa atthu apale.

Pala yasiitha: Makhwatta a puupa

⁸ Aphano Nnyizinku khumuza Munsa na Arawu yoori: “Mwisavule fuutha ya vamafiya yawiitaala mmakhono Munsa amwazele otulu, Firawuna ari attaapho. ⁹ Entta othatuwa yiiye lifufu khwa nti wooshi wa Misuri, puupa entta owaapuwa atthu mpakha nyama, Misuri yooshi.”

¹⁰ Yo khuthuula fuutha ya vamafiya khulawa wa Firawuna; Munsa khumwazela fuutha etile otulu, puupa khuwaapuwa atthu mpakha nyama. ¹¹ Wala anamajintta khuhisala awahi omwaattama Munsa, mwaasa wa makhwatta, awaapatthiyeeyo vamote na amisuri ooshi. ¹² Ila Nnyizinku khuumisa rooho ya Firawuna, ye khuhinsiili Munsa na Arawu nkhamma etthiipo Nnyizinku amuuziyeeyo.

Pala yasaapa: Vuula ya mawe

¹³ Nnyizinku khumuza Munsa yoori: “Olankhe supuyeene olawe wakutthanane Firawuna, omuuze oraka: Nnyizinku, Nluku wa meepereewu, alupa toono: “Owaalikhe atthu aka alawe akaaputu. ¹⁴ Olikha toowo, swaafu eti pala yaka yooshi kinuutiisela omweenyewe, na mashawuriya awo na atthu awo, yoori ojuwe yoori khina eeyiye nkhamma miiyo olumwenku wooshi. ¹⁵ Maana miiyo kinwahi wookola nkhono aka khuulwaaza weeyo na atthu awo khwa pala yaari owahaaye wuulazavo voolumwenku. ¹⁶ Ila miiyo kinuulikha weeyo ori haayi yoori kithoonyeze owahi waka, yoori nzina laka lilaleyiwe mmuti wooshimo. ¹⁷ Nalelo ontta ojikhutupulana atthu aka, khuntakha owaalikha alawa? ¹⁸ Ila meesho wakathi otthuupu, kinlawaa kanyise vuula ya mawe ehinanyeke nti opu wa Misuri thanku owaziwe mpakha leelo. ¹⁹ Apho owaarume atthu awo alawe alokotthele nyama zaho ziriye omashapa na vitthu zaho ziriyo waaza atthu mpakha nyama ziriyo. Amana ohilaziwo otana ontai, khunyeliwa vuula ya mawe entta ofwa.”

²⁰ Akarumeya a Firawuna aari woovaaye ntakhuizi la Nnyizinku khwaakuva khulawa khuwaalazawo, aviithwaana aya mpakha nyama zaya khulawa khupwehiwa. ²¹ Ila apale ahaari woovaaye ntakhuizi la Nnyizinku khuwaalikha amwiithwaana aya na nyama zaya omashapa.

²² Aphano Nnyizinku khumuza Munsa yoori: “Olanse makhono awo yoori ewaanyelee vuula atthu, nyama, na miitthi zooshi za ntthuttu nti wooshi wa Misuri.” ²³ Munsa khulansa pakhora yowe khuthoonyeza otulu, Nnyizinku khuvumisa taari na vuula ya mawe, Nnyizinku khwiishusha ozerima na taari khwa nti opule wa Misuri na vuula ya mawe khusala enya. ²⁴ Vuula ya mawe na taari khuvuma yoopakhanyeya na mawe awoopisa ehinanyeke Misuri yooshi thanku ewaziwe. ²⁵ Misuri yooshi vuula etile khutapanya vitthu zaari mmashapa, waaza atthu, nyama na mathapa

mpakha miitthi zooshi za ntthuttu. ²⁶ Khusala nti wa Gosheeni paasi, okhule aari wiikhalaawo meeziyayiilu, okho khayaanyiyewo vuula ya mawe.

²⁷ Aphano Firawuna khuruma olawa okhuweliwa Munsa na Arawu khuwooza yoori: "Swaafu eti kakosa. Nnyizinku ti wa shariya, ila miiyo na atthu aka, na makaafiri. ²⁸ Mwilompe wa Nnyizinku, maana ottithima wa Nluku na mawe ankwaaye a vuula pi awaatta, miiyo kintta wuulikhani mwilawe mwiheekesele etthu kiina theenya."

²⁹ Munsa khujipu yoori: "Amana miiyo kilaamo nsitati mphu kintta wookolela nkhone aka wa Nnyizinku. Taari enyamale na vuula yaamuse yoori weeyo ojuwe yoori olumwenku pi wa Nnyizinku. ³⁰ Ila weeyo na akarumeya awo, miiyo kinjuwa yoori khamwinimoova Nnyizinku Nluku."

³¹ Alikutawu na ntthama zaharipweya mwaasa ntthama waaria phunje na alikutawu aaleyiye. ³² Naye tiriku khayaaharipweyiye maana yaari ehinootthe.

³³ Munsa khulaavo aphale aariivo Firawuna na nsitati mphule, khu-mookolela nkhone Nnyizinku, taari na vuula khwiisha. ³⁴ Firawuna na-woona yoori taari na vuula zeeshaa khurutela okufuru oomisaka rooho yawe na mashawuriya awe. ³⁵ Ari wawuumisa rooho ethiipo, khuhwaalikhi meeziyayiilu olawa, nkhamma ethiipo Nnyizinku aamuziyeego Munsa.

10

Palyanaane: Mapalaka

¹ Nnyizinku khumuza Munsa yoori: "Olawe wakutthanane Firawuna, maana miiyo koomisa rooho yawe na rooho za mashawuriya awe, yoori miiyo kithoonyeze alama zaka epo vakatthi vaya yo, ² na yoori mwiaathatele aaneenu na atuulwenu nanna miiyo kiwaahukhumwiyeego amisuri na minjuza zootikinisa kirettiyeego vakatthi vaya, khwa ethiipo pi mwinttelaavo ojuwa yoori miiyo ki Nnyizinku."

³ Aphano Munsa na Arawu khulawa okutthanana Firawuna, yo khumuza yoori: "Nnyizinku, Nluku wa meepereewu alupa toono: 'Mpakha lini weeyo okatthalaka ojipushuwisa mmakhono mwaka miiyo? Owaalikhe atthu aka alawe akaaputu. ⁴ Amana okhanyarela ohitakhi owaalikha atthu aka olawa, meesho kintisa pala ya Mapalaka mmuti mwawo.

⁵ Yo anteela ofinikha vathi ohisala wooneyavo, maana anteela orafuna zooshi epile zaalikhieeyo ti vuula ya mawe mpakha na miitthi epile zin-phutuwaazo mmashapa; ⁶ anttela wiitaala nnyupa mwawo na mmanyupa wa mashawuriya awo na wa amisuri ooshi. Vitthu amarehemu apapazenu ahooneeni siikhu epo eekhaliyeego mphu mpakha leelo." Elottelanaka Munsa khulankha khulaavo aphale aariivo Firawuna.

⁷ Aphano mashawuriya a Firawuna khusala alupa yoori: "Mpakha lini ntthu otu anituturushaka? Owaalikhe atthu apa alawe amwaaputu Nnyizinku Nluku aya. Khiniweeleya yoori Misuri yatapanyeya?"

⁸ Aphano khuthuuliwa Munsa na Arawu opheya khulawaniwa mpakha wa Firawuna, ye khuwooza yoori: "Ettani mwamwaaputu Nnyizinku, Nluku enu. Oweje, anlawaaye paani?"

⁹ Munsa khujipu yoori: "Ninlawa na mashaapu etthu, na anakhuuluvale etthu, aaneetthu, pwittipwitthi zeethu mpakha mompe zeethu. Maana ninttela onrettela njampo Nnyizinku eetthu."

¹⁰ Firawuna khuwooza yoori: "Mweeyo mwinttela onhithajiya Nnyizinku amana kuulikhani olawa na aakha enu na aana enu! Eto enthoonyeza yoori mweeyo mwinwaza shawuri zootakhala. ¹¹ Khahiyo toowo! Mwilawe

alume-ru mwamwaaputu Nnyizinku maana eto ti waakivekeliyeeyo.” Munsa na Arawu khwiikariwa aphale aariivo Firawuuna.

¹² Aphano Nnyizinku khumuza Munsa yoori: “Wookolele nkhono nti wa Misuri yoori ate nazope vathi apha arafune mathapa ooshi ariimo na zooshi epile zaalikheweeyo ti vuula ya mawe.”

¹³ Munsa khookola pakhora yawe ookolelaka nti wa Misuri, Nnyizinku khutiisa pheevu ya ntulayi khuvuma nthana wooshi mpakha osikhu. Noocha pheevu etile khutana nazope. ¹⁴ Misuri yooshi khwiitaala nazoperu woohilikhathatha vahali, aari awaatta venkivene. Aari ahinapuwewo nkhama apo na paata ya opo khapuviyewo theenya nkhama apo. ¹⁵ Maana aafinikhiiye phantte zinki za Misuri mpakha nti wooshi khwiya wooriipa. Khurafuna zooshi epile zaalikheweeyo ti vuula ya mawe, mathapa na mishumo za miitthi woohisali hatha etthu piishi waaza mmitthi mpakha mmashapa, nti wooshi wa Misuri.

¹⁶ Firawuuna khuruma olawa okhuweliwa Munsa na Arawu woohirupazi, khuwooza yoori: “Kankosa Nnyizinku, Nluku enu na kookosani mweeyo! ¹⁷ Apho kinuuvekelani yoori mwikiswaamihitwampiyaka swaafu eti theenya na mwinvekele Nnyizinku, Nluku enu yoori akilaze pala eti yoofwiwa.”

¹⁸ Munsa paata ya olaavo aphale vaya aariivo Firawuuna khunvekela Nnyizinku. ¹⁹ Aphano Nnyizinku khuvumisa pheevu yawaatta ya phalalazi, ethiito khukhupa mapalaka ooshi khwiithela mpahari yookhuttuwa; khuhisalimo hatha lipalaka mmote nti opule wa Misuri. ²⁰ Ila nalelo Nnyizinku khuumisa rooho ya Firawuuna; ye khuhitakhi owaalikha meeziyayilu olawa.

Pala yatiisiya: Yiiza

²¹ Aphano Nnyizinku khumuza Munsa yoori: “Makhono awo olansele pinkuuni yoori Misuri yooshi yiye yoofinikhia ti yiiza yookhomaala.”

²² Munsa khookolela nkhono awe otulu, Misuri yooshi khufinikhia ti yiiza yookhomaala khwa siikhu ttatthu. ²³ Khuhisala oonana mmote na nzaawe, khaarivo mmote aaliyeevo vahali aariivo khwa siikhu ttatthu; ila meeziyayilu ooshi mmanyupa mwaya yaarimo nuuru.

²⁴ Aphano Firawuuna khunkhwela Munsa khumuza yoori: “Ettani mwamwaaputu Nnyizinku enu. Ila esale pwittipwitthi zenu na mompe zenu paasi; ila aakha na aana mwilawane.”

²⁵ Munsa khujipu yoori: “Weeyo ona ya oninkha nyama za orettela twaha na olukuza, yoori nimwinkhe Nnyizinku, Nluku eetthu. ²⁶ Na nyama zeethu nilawaka nintta othuula hatha likhope khalinsala, maana ninttela orumeyela ethiipo yoori nimwaaputu Nnyizinku Nluku eetthu, khanijuweeni nyama-ni ninttelaaye omwaaputu-na Nnyizinku mpakha ofiya.”

²⁷ Ila Nnyizinku khuumisa rooho ya Firawuuna, ye khuhitakhi owaalikha olawa. ²⁸ Firawuuna khumuza Munsa yoori: “Oleevo apha na ohirutelevo theenya! Siikhu ontelaavo okoona theenya ontta ofwa.”

²⁹ Munsa khuri: “Walikanisa! Akinteela woona theenya wuuso awo.”

11

Olaleyiwa wa pala yakhuumi

¹ Nnyizinku khumuza Munsa yoori: “Kinimperekheza pala moote theenya Firawuuna na Misuri yooshi. Khwa ethiito ye onlawa awaalikhe olaamo mmuti mphu mpakha onlawa aweekaremo eperepere. ² Apho owooze meeziyayilu ooshi, waaza alume mpakha aakha, yoori awaavekele

anamwaattamanana aya vitthu za feeta na za tahapu.” ³ Nnyizinku khuwaaretta yoori atthu awe apatthe wooneliwa-vahali pi amisuri. Theenya Munsa aari nlume nwulweene nti opule wa Misuri, waaza mmaasho wa mashawuriya a Firawuuna mpakha wa atthu ooshi.

⁴ Munsa khuri: “Nnyizinku alupa toono: ‘Osikhu layili kinvira Mmisuri. ⁵ Aana ooshi aalume amwanzo a nti wa Misuri anttela ofwa, waaza mwaana wa mwanzo wa Firawuuna, anttelaaye orithi khukulu ya mfwalume, mpakha mwaana wa mwanzo wa njaazi ankholaaye khaazi yoochila na aana a mwanzo a nyama zaya. ⁶ Misuri yooshi onlawa wapuwewo olila nwulweene; waari ohinapuwewo na ohinttelaaye opuwawo theenya. ⁷ Ila khwa meezi rayiilu, waaza atthu mpakha nyama, wala mwanapwa khan-lawa owahowula.’ Paata ya toowo, mwinttela ojuwa yoori Nnyizinku awavirikanisa amisuri na meezi rayiilu. ⁸ Aphano mashawuriya awo ooshi apa, anlawa akeekese na akikokhorele, akivekelaka yoori: ‘Olawe na atthu awo ooshi.’ Attaaphale miiyo kinttela olaawo!” Munsa na okatipukha wawe channu khulaavo aphale aariivo Firawuuna.

⁹ Aphano Nnyizinku khumuza Munsa yoori: “Firawuuna khanteela wuusilani, yoori minjuza zaka zeekezeleye nti wa Misuri.”

¹⁰ Munsa na Arawu khuretta minjuza epile zooshi khwa Firawuuna; ila Nnyizinku khukhomaaza rooho ya Firawuuna, khuhisala atakha owaalikha olaamo mmuti mphule meezi rayiilu.

12

Njampo la Paashikowa

¹ Nnyizinku khumuza Munsa na Arawu nti wa Misuri yoori: ² “Opu ona ya wiiya mweezi wa mwanzo wa mwaakha khwa mweeyo. ³ Munsa na Arawu ana ya olupa yoori: “Ajaama ooshi a Ezirayiilu, siikhu ya khuumi ya mweezi otthuupu, alume ooshi ana yoovalula nshapi la pwittipwitthi leelume ya wakhula liphanko ya wakhula nyuupa. ⁴ Ojama amana wi-iya vattithiiru ohinwahaaye orafuna nyama yooshi, ona yoowaalaleya anamwaattamanana aya apale a kharipu awaameele nyama enwahaaye owaafiyela khwa hisapu ya atthu aya. ⁵ Nyama yaya enttelaaye othawuliwa ena ya wiiya yeelume ya mwaakha mmote, yoohiirakali hatha vhahali. Ena ya wiiya pwittipwitthi ama puuzi. ⁶ Mwipwehe mpakha siikhu khumi na nne ya mweezi, mpakha wakathi ajaama ooshi a meezi rayiilu anttelaaye oshija njuwa leettelaka otupweela. ⁷ Mwittukunttele taamu yaya vatulu na mpavu wa milako za manyupa, apale mweeyo mwirafuniyeemu nyama. ⁸ Osikhu otthuupo mwina ya orafuna nyama yoomanikhiwa va moottho, na mathapa oowaawa* na phaawu yoohiina fwaramento. ⁹ Mwihirafune nyama piishi wala yawiipikhiwa, ila yoomanikhiwa va moottho waaza eeshwa, moolu na marupo aya. ¹⁰ Mwihisalise hatha ethu efiya supu; amana esala mwilukuze. ¹¹ Mwiwale, nzako n'yuunu, jampali mmoolu na mwikholele pakhora mmakhono, mwirafune wawaakuuvavo; otu paashikowa wa Nnyizinku.

¹² Maana osikhu aya otthuupo kinttela ovira nti wa Misuri na kiwoole aana ooshi amwanzo aalume waaza atthu mpakha a nyama, na kiwaahukhumu a miluku ooshi a Misuri: Nnyizinku ti Miiyo! ¹³ Taamu mwivaziyeeyo

* ^{12:8} Mathapa oowaawa ajiweeyo siikhu ya Paashikowa waari nthoonyezo wa hukhumu meezi-rayiilu aari woonaaye Misuri.

milako zenu enttela wiiya alama yoori ethoonyeze manyupa mwiniikha-laaye, amana kiwaavulalisaka amisuri, miiyo kinttela woona taamu kisala kuuvikanani wooheemeli yoori mwihiyiye wootapanyiwa ti pala yaya eto.

¹⁴ Mwitthapele siikhu ethiito nkhamma njampo la tiini muupuwelele yoori ti miiyo, Nnyizinku, kirettiyeeyo epo. Mweeyo na peewu yenu mwina yooretta njampo la paashikowa khwa mileele. ¹⁵ Nkatthi wa siikhu sapa mwina yooja phaawu yoohiina fwaramento. Siikhu yamwanzo mwilazemo fwaramento mmanyupa mwenu, maana wakhula otule anttelaaye oja etthu yawiyyana fwaramento, ntthu aya oto ontta wiikariwa vakatthi wa meezi-rayiilu. ¹⁶ Siikhu yamwanzo na siikhu yasaapa ona yawiyyavo nthukumano ttakatthiifu, ahiiyevu hatha ntthu mmote antakhaaye okhola khaazi siikhu zaya epo, woohiiyi wenttekhezelu etthu-yoojiwa ya wakhula siikhu; mwina yooretta ethiito paasi.

¹⁷ Mwirette njampo la phaawu yoohiina fwaramento, maana siikhu yaya ethiito ti kilaziyeeyo nti wa Misuri mahimo a atthu ooshi a meezi-rayiilu. Mwitthapele siikhu yaya eto wiiye nrumo wa mileele, waaza wa apaapa mpakha wa aana aya. ¹⁸ Mwina yoorafuna phaawu yoohiina fwaramento makaaripi siikhu yakhuumi na nne ya mweezi wamwanzo mpakha makaaripi siikhu zeettettaka eshiriini na moote. ¹⁹ Siikhu epi sapa ahiiyevu ntthu mmote anttelaaye wiiyana fwaramento owawe. Wakhula antakhaaye oja etthu ya wiiyana fwaramento ontta wiikariwa muujama wa meezi-rayiilu, hatha nkhamma mmalapo ama nnyunti. ²⁰ Mwihiye hatha etthu ya wiiyana fwaramento mmanyupa mwenu wooshimo, ila mwina yooja phaawu yoohiina fwaramento.”

Paashikowa wamwanzo

²¹ Munsa khuruma okhuweliwa attunkhulu a atthu ooshi a meezi-rayiilu khuwoza yoori: “Mwinthawule nshapi la pwittipwitthi yoori ajaama ooshi a Ezirayiilu ashije pwittipwitthi ya Paashikowa. ²² Mwithuule zankalala mwinaanise na taamu eriiye mpasiya mwittukunttele milako zenu vatulu na mpavu mwaya. Ahiiyevu hatha ntthu mmote antakhaaye osaruwa nnyupa mwawe mpakha ocha. ²³ Maana Nnyizinku aviraka mmuti mphule yoori awoole amisuri; amana oona taamu etile mwittukuntteliyeeyo nlako enu phantte na phantte na vatulu vaya, Nnyizinku onttela ovira attaapho khanlawa onlikha namatapanya ovira mmanyupa mwenu yoori awuuleeni.

²⁴ Mwipwehe nrumo opu mweeyo na aana enu ooshi khwa mileele. ²⁵ Amana mwifiya nti opule Nnyizinku awahitiyeenini owinkhani, mwina yooretta njampo ntthi. ²⁶ Aaneenu amana awuuzelani yoori: ‘Njampo laya ntthi maana aya niini?’ ²⁷ Mwiwaajipu yoori: ‘Twaha ya Paashikowa wa Nnyizinku, aviriyeeyo vatulu wa manyupa a meezi-rayiilu nti wa Misuri, na khwiinanelu manyupa eetthu wakathi aari owoolaavo amisuri.’ Attaaphale meezi-rayiilu khukokhora khumwaaputu Nnyizinku. ²⁸ Meezi-rayiilu khu-laavo, khulawa khuretta nanna ethiitile Nnyizinku amuuziyeeyo Munsa na Arawu.

Pala ya Khuumi: Ofwa wa aana amwanzo oovokoliwa pi amisuri

²⁹ Aphano osikhu layili, Nnyizinku khuwoola aana ooshi amwanzo a misuri, waaza mwaana wamwanzo wa Firawuna, namarithi ofwalume awe, mpakha mwaana wamwanzo wa napherezu aari nkalapooso na theenya aana amwanzo a nyama. ³⁰ Osikhu otthuupule, Firawuna na mashawuri-iya awe ooshi na amisuri ooshi khulankha na wapuwiye olila nwulweene, maana khayaarivo nyuupa yahaafwiweemo.

Olaawo

³¹ Osikhu otthuupule Firawuuna khuruma okhuweliwa Munsa na Arawu khuwoza yoori: “Mwileemo nasaapi mmuti mwaka, mweeyo na meeziyayi-ilu! Mwilawe mwamwaaputu Nnyizinku enu, nkama etthiipo mwivekiyeezo. ³² Mwithuule pwittipwithi zenu mompe zenu na puuzi zenu, nkama mwaalupiyeezo na mwikiparikhie theenya.”

³³ Amisuri aari owaakhanyarela atthu apale yoori aleemo mmuti mphule, alupaka yoori: “Amana mwhiliimo fooshi fweeyo nintta ofwa!”

³⁴ Aphano atthu apale khuthuula tiriku yookhattiwa yoohiina fwaramento, khuputaputela pasiya yaya vakuwo khuvikela mmafuzi. ³⁵ Meeziyayi-ilu khushututela nrumo wa Munsa, khuwaavekela amisuri vitthu za feeta za tahapu na kuwo. ³⁶ Nnyizinku khuwaaretta atthu awe wooneliwa huruma pi amisuri, khwa nanna awenkhiyeevo etile avekiyeyo; khwa etthiipo khuvulula maali zooshi za amisuri.

³⁷ Meeziyayi-ilu khulankha khusala alawa mwentto khuvira Rameesi eettaka Sukooti. Aari alume alufu miiya sitha, ohiwaalaki aakha na aana.

³⁸ Khuntti khuluzeene zoofwarikhana za amalapo aawaalottiye, na theenya maphanko mawulu-mawulu a nyama, mompe, pwittipwithi na puuzi.

³⁹ Khoocha phaawu zoohiina fwaramento khwa tiriku etile aathuuliyeyo Misuri, maana khayaarina fwaramento mwaasa wawiikariwa Misuri, khuhiwahi otthenkeza ethu-yoojiwa.

⁴⁰ Meeziyayi-ilu eekhaliye Misuri nyaakha miiya nne na talaathiini.

⁴¹ Siikhu ethiito afisiyeevo nyaakha miiya nne na talaathiini, atthu ooshi a Nnyizinku eetta olaawo Misuri. ⁴² Waari osikhu wa weekesela wa Nnyizinku yoori awaalazewo meeziyayi-ilu Misuri wooshiwo. Tiito, osikhu nkama otthuupu na yo anttela ojeekesela na ojama aya ontaaye mileele.

Kano monkoni wa Paashikowa

⁴³ Nnyizinku khumuaza Munsa na Arawu yoori: “Epi kano za Paashikowa: ahiiyeyo hatha mmalapo mmote anttelaaye onja. ⁴⁴ Mwiithwaana wawuzanyiwa ona yonja Paashikowa, amana eeya wookhiriya. ⁴⁵ Ila apale eettiye omaka na apale aateeliye okhola khaazi ahinje.

⁴⁶ Mweeyo mwina yonja nnyupa nttumpho aattaliweemo, mwhithule hatha phittula moote mwistarulelaka vaje, wala mwihipweche hatha likhonkolo la nyama mwintelaaye orafuna. ⁴⁷ Atthu ooshi a Ezirayi-ilu ana yontthapela Paashikowa.

⁴⁸ Wakhula mmalapo anikhalaaye nttumphu antakhaaye oretta njampo ntthi la Paashikowa wa Nnyizinku, mwina yowaakhiriyyisa alume ooshi a muujama mwaya; apo ana yontthapela nkama aana a muujama. Ahiiyeyo ntthu woohikhiriyi anttelaaye ontthapela. ⁴⁹ Kano ethiito enttela orumeyeliwa pi anyunti na amalapo apale amakiyemmo.”

⁵⁰ Meeziyayi-ilu ooshi khuretta nkama etthiipo Nnyizinku amuuziyeezo Munsa na Arawu. ⁵¹ Siikhu ethiitile Nnyizinku khuwaalazawo meeziyayi-ilu Misuri, khuwaatthenkeza lihimo khwa lihimo.

13

Otwahareshiwa wa aana a mwanzo

¹ Nnyizinku khumuaza Munsa yoori: ² “Okithawulele aana aalume ooshi a mwanzo. Aana aalume a mwanzo a meeziyayi-ilu pi aka, khahiyoo aana-ru paasi na nyama zooshi za mwanzo zeelume.”

³ Aphano Munsa khuwooza atthu yoori: “Mwifikhirele siikhu eti mweeyo mwiliyeewo Misuri, nti opule mwarettiweeyo omwiitthwaana, maana Nnyizinku oolazaniwo okhule khwa owahi wa makhono awe. Tiito mwihiye hatha ethu yootthiiwa fwaramento. ⁴ Siikhu ethiiti ya mweezi wa Habibi mweeyo mwintta olaawo Misuri. ⁵ Amana Nnyizinku oofisani nti wa akanaani, wa ahiiti, wa amoori, wa amwiivi na wa ayepuzi nti opule alaphaniyeeyo amarehemu apapazethu yoori aari oteela owinkhani, nti liniittikhaa wo leethi na asali, mweeyo mwina yooretta njampo ntthi mweezi otthuupu. ⁶ Nkatthi wa siikhu sapa mwina yooja phaawu yoohiina fwaramento siikhu yaya eti ya saapa mwitthapele njampo la Nnyizinku. ⁷ Mwije phaawu yoohiina fwaramento nkatthi wa siikhu sapa epo, mwihihithuule hatha ethu yawiyyana fwaramento wala mmuti mwenu ehiyemo.

⁸ Siikhu yaya etile wakhula mmote ona yoomuuza mwanawe yoori: “Mwaasa wa epi Nnyizinku oretteliyeenini mwilankhaka Misuri.” ⁹ Epi enttela wiiya nkhama alama ya mmakhono mwawo na opheleleza wa mmwishwa mwawo yoori oruma wa Nnyizinku wiiye vanlimi vawo, maana Nnyizinku oolaza Misuri khwa nkhono awe woowahi. ¹⁰ Mwishututele nrumo opu khwa siikhu eththomiweeyo, mwaakha khwa mwaakha.

¹¹ Amana Nnyizinku oofisani nti wa akanaani na khuwinkhani, nkhama ethiipo alaphaniyeeyo mweeyo na amarehemu apapazenu, ¹² mwinthawulele Nnyizinku aana ooshi amwanzo ovokoliwa aalume. Nyama za mwanzo ovokoliwa zooshi zeelume za maphanko enu pi za Nnyizinku. ¹³ Mwiwoosuru aana a puuru ooshi a mwanzo mwipatilanaka pwittipwitthi, ila amana mwihitakhi owoosuru waya, mwivuje siiko zaya. Mwiwoosuru theenya aana enu ooshi aalume amwanzo.

¹⁴ Meesho amana aaneenu awuuzelani yoori: ‘Maana aya niini?’ Mwiwooze yoori: ‘Khwa oowahi wa nkhono awe, Nnyizinku anilazawo Misuri, nti narettiweewo oviiitthwaana. ¹⁵ Wakathi Firawuna aari okhijilaaye na okatthala onilikha olaawo, Nnyizinku khuwoola aana ooshi a mwanzo aalume mpakha aana a mwanzo a nyama. Tiito kinimwinkhaaye twaha Nnyizinku aana aalume a vitthu zooshi na niniwoosuru aaneethu ooshi a mwanzo ovokoliwa.’

¹⁶ Eto enttela wiiya nkhama alama mmakhono mwenu na nthoonyezo wa vaachihi venu yoori Nnyizinku anilaza Misuri na owahi wa nkhono awe.”

Olawa wa meezi rayi ilu

¹⁷ Wakathi Firawuna awalikhiyeevo olaawo meezi rayi ilu, Nluku khawaavirisiji tarikhi ya Afiliishiti, yeettiye wiiyaru tarikhi yoofupheya. Khulupa yoori: “Yo amana awoomanana, talili anttela owaza orutela Misuri.” ¹⁸ Etthiipile, Nluku khuwaazukulelisa atthu apale n’yaara mphule, phantte ya pahari yookhuttuwa. Meezi rayi ilu khulaawo Misuri khujitthenka yoori oomane.

¹⁹ Munsa khuthuula makhonkolo a Yuusufu, mwaasa aalaphisaniye na aana a meezi rayi ilu wakathi aalupiyeyo yoori: “Weekhweele Nluku onta awaakiseni mweeyo, amana mwilawaka mwitthulewo makhonkolo aka.”

²⁰ Meezi rayi ilu khulankha Sukooti khulawa khumaka Eeta, ohali yaaziyeewo yaara. ²¹ Nnyizinku aari vamote na yo, nthana aari owaalokoza nkhama nripu la liwiku yoori eettette saana ntarikhi; amana wiiya osikhu eetta owaalokoza na nuuru ya nripu la moottho amwasikhelaka tarikhi; ethiipo pi aari owahaaye weettetta nthana na osikhu. ²² Nripu la liwiku ntthile khalaari owaasusa meezi rayi ilu nthana, wala nripu la moottho opule osikhu khalaari owaasusa.

14

Lupattha ya amisuri

¹ Nnyizinku khumuza Munsa yoori: ² “Owooze meezi-rayi-ilu yoori asa-puwe alawe amake kharipu ya Piharoote enakatthi-nakatthi ya Mikotooli na pahari. Mwamake nshini wa pahari omaasho ya Baale-Zefooma. ³ Paata ya toole Firawuna khusala oopuwela yoori meezi-rayi-ilu antta ojeettettela athowelela n'yaara. ⁴ Khwa ethiipo kinlawa koomise rooho ya Firawuna, ye onlawa awiikariseni, paata ya toowo miiyo kinlawa kattithimisiwe vakatthi wa Firawuna na anajanka awe ooshi. Amisuri anlawa ajuwe yoori miiyo ki Nnyizinku.” Meezi-rayi-ilu khuretta ethiipo.

⁵ Ila wakathi ooziweeveo mfwalume wa Misuri yoori meezi-rayi-ilu atthira, ye na anakhaazi awe khuzukulisa akhili zaya na khulupa yoori: “Niini nirettiyeeyo? Nawaalikha meezi-rayi-ilu olawa anaashikha amwiithwaana etthu!” ⁶ Aphano mfwalume khuruma weetteliwa nkukutta awe wa vi-ittha na anajanka awe. ⁷ Khuthuula theenya mikukutta miiya sitha epile zookhomaala na mikukutta zooshi za Misuri na anamalokozela ooshi. ⁸ Nnyizinku khukhomaaza rooho ya Firawuna mfwalume wa Misuri, khusala aweekarisa meezi-rayi-ilu aaliyewo khwa nanna wooshinttavo. ⁹ Firawuna khusala aweekarisa na khavallo zawe zooshi, mikukutta zawe zooshi na anakhavallo awe na anajanka awe, khuwaasikana amakiye nshini wa pahari kharipu ya Piharoote omaasho wa Baale-Zefooma.

Olokha pahari

¹⁰ Firawuna asaleelaka owaasikana, meezi-rayi-ilu khweekesa nyuma khuwoona amisuri eettaka ota phantte etile aariiwo. Khuwaapattha woova channu, khusala ankhuwela Nnyizinku. ¹¹ Na khumuuzela Munsa yoori: “Misuri zeetta othowawo vilalo tiito onilaziyeewo yoori nite nifwele n'yaara mphu? Niini eti weeyo oniretteliyeeyo, yoonilazawo okhu? ¹² Tiito nawu-uziyeeyo Misuri yoori: ‘Onilikhe niye aviithwaana amisuri! Afwataali wiiya amwiithwaana amisuri ehiiyeeni ofwa n'yaara.’”

¹³ Munsa khuwaajipu atthu apale yoori: “Mwihoove, mwiye wookhomaala na moone nusura Nnyizinku anttelaaye wuutiselani leelo. Maana khamwinttela owoona theenya amisuri apa mwiniwoonaaye leelo. ¹⁴ Nnyizinku ontela wuumana mwaasa wa mweeyo, mwiye woonyamala.”

¹⁵ Khulupa theenya Nnyizinku amuuzaka Munsa yoori: “Mwaasa aya niini mwikikhuelaka miiyo? Owooze meezi-rayi-ilu avire alawaka. ¹⁶ Weeyo olanse pakhora yawo ojaphe maati, antta waawanyeya yoori meezi-rayi-ilu alokhe eri tuulu yawuuma. ¹⁷ Miiyo kinttela wuumisa rooho za amisuri, yo anttela wuulottelelani mpahari ntumpho. Miiyo kinttela wiiya woottithimisiwa amana kinshintta mfwalume wa Misuri na anajanka awe ooshi na mikukutta zawe zooshi za nvittha na anakhavallo awe ooshi. ¹⁸ Amisuri anttela ojuwa yoori miiyo ki Nnyizinku amana kittithimisiwa khwa Firawuna na mikukutta zawe na anakhavallo awe.”

¹⁹ Aphano nlayikha la Nluku ntthile lawaalokoziyeeyo atthu a Ezirayi-ilu khuwaalikha khurutela nyuma waya; theenya nripi la liwiku khuwaalikha khurutela nyuma waya, ²⁰ khwiya vakatthi wa amisuri na meezi-rayi-ilu. Liwiku laari wiiya looripa phantte ya amisuri khusala liwaamwasikhela meezi-rayi-ilu; mwaasa wa ethiito khuhisala liwaattamanisa meezi-rayi-ilu na amisuri osikhu wooshi.

²¹ Munsa khookolela nkhono awe pahari, Nnyizinku khuvumisa pheeveo zookhomaala za ntulayi osikhu wooshi mpakha pahari waawanyeya khupuwa mishaka zawuuma mwaasa wa waawanyeya wa maati.

²² Meezirayiilu khulokha vakatthi wa maati khwa mishaka zawuma, khupuwa muuri phantte ya nkhono nlume na nkhono nkha.

²³ Amisuri khusala aweekara na khavalo zaya zooshi, mikukutta zaya za nvittha na anakhavaloo ooshi a Firawuuna khusala awaalotta mpakha vakatthi wa pahari. ²⁴ Osaleelaka ocha nkatthi wa nripu la moottho na la liwiku, Nnyizinku khuwoona anajanka amisuri khuwaakarawela.

²⁵ Khuretta ethu yoophara maroota za mikukutta za amisuri nkhama ahaari ojuwaaye weettettisa na khusala akhuwa araka: “Nlaweni niwaatthire meeziyayiilu! Nnyizinku onta wumanana amisuri khwa zwaamu yaya yo.”

Amisuri anfwa mpahari

²⁶ Nnyizinku khumuuzaa Munsa yoori: “Wookolele nkhono awo khwa pahari, yoori maati awaakhutele amisuri na mikukutta zaya na anakhavaloo aya.” ²⁷ Munsa khookolela nkhono awe pahari osaleelaka ocha, maati khu-rutela ethiipile aariizo. Wakathi amisuri aari ariiye atthire, khukutthanana maati a pahari, aphano Nnyizinku khuwaakhutela na pahari. ²⁸ Maana maati aarutiye khukhutela mikukutta na anakhavaloo, na anajanka ooshi a Firawuuna eeshukheliyeeyo mpahari; hatha mmote khaarutiye.

²⁹ Ila meeziyayiilu khulokha pahari etile eettaka oluwatthela mishaka, maati aari nkhama muuri phantte ya nkhono nlume na phantte ya nkhono nkha. ³⁰ Ethiipile Nnyizinku khuwoosuru meeziyayiilu siikhu etile mmakhono wa amisuri, na meeziyayiilu khuwoona amisuri ari oofwa mmattima wa pahari etile. ³¹ Meeziyayiilu khoona owahi nwulweene wa Nnyizinku na khumoova Nnyizinku aya na khunkhupali Nnyizinku na Munsa karumeya awe.

15

Liipo la Munsa

¹ Aphano Munsa na aana a meeziyayiilu khumwiipela liipo ntthi, Nnyizinku yoori:

“Kinimwiipela Nnyizinku,
mwaasa yoori ashintta wooshapweyavo,
khutupweeza mpahari khavalo
na anakhavaloo aya.

² Nnyizinku ti kuvu yaka
na liipo laka,
ye ti nusura yaka!
Ye ti Nluku aka na miiyo kininsifu,
ti Nluku wa papaaka na miiyo kinimwaaputu!

³ Nnyizinku ti naviittha,
nzina lawe ti Nnyizinku.

⁴ Khutupweeza mpahari
mikukutta za nvittha
na anajanka a Firawuuna;
anamalokozela awe apale awaakhupaliyeeyo
khukhuteliwa ti pahari yookhuttuwa.

⁵ Maati apale awiicha khuwaakhutela
khwiya oozama nkhama mawe.

⁶ Oo Nnyizinku, nkhono nlume awo
onaaye owahi nwulweene;

Oo Nnyizinku, nkhono nlume awo
wawaashijela maatuwi.

⁷ Khwa owula wa ofwalume awo
wawaakhitiri maatuwi awo,
katapu yaho khuwaaja nkhamma malala.

⁸ Khwa ovitelela wa phula yaho
maati na mawipi ajikusanya
khujakhuwa nkhamma muuri,
vathi wa pahari
khwiya awuuma nkhamma liwe la manlela.

⁹ Maatuwi khusala alupa yoori:
'Niweekarise niniwaasikana
niwaanyakanye maali nafusi zeethu zinlawa zatoshiwe pi yo,
nasarule phanka yeethu
na makhono eetthu niniwaatapanya.'

¹⁰ Khuperekha pheevu yaho,
na pahari khuwaafinikha.

Khuzama nkhamma chumpwi
mpahari wawiichamo.

¹¹ Khazziivo miluku zinlikananaaye weeyo
oo Nnyizinku.
Khaavo woottithimisiwa woottakatthifu,
wawoopisa khwa oretta vitthu zootikinisa na oretta minjuza.

¹² Wookoliye nkhono nlume awo
nti khuwaamiza.

¹³ Khwa pheta yaho
wawaalokoza atthu awo apale owoosuruyeeyo;
na kuvu zaho,
khuwaattha puuro yaho yoottakatthifu.

¹⁴ Khapila khusiila epile onrettaazo,
khusala zithukumela na woova.

Afiliishiti khuwaapattha huzuni.

¹⁵ Attunkhulu a Meedomu
khwiya ooshanka
na anamalokozela a amowaabu
khuwaapattha othukumela;
akanaani khuwaapattha otteettheya.

¹⁶ Osuthuwa na woova khuwaapattha
khwa owahi wa nkhono awo,
kuhisala asakhinyeya nkhamma mawe
mpakha ovira atthu awo,

Oo Nnyizinku,
mpakha ovira
atthu apale owoozanyiyeyo.

¹⁷ Oo Nnyizinku, weeyo oniwalawana na waweehkaze
vamwaako wa eritho yaho
puuro ttakatthiifu
nyuupa yaho
ojekiyeyo na makhono awo.

¹⁸ Nnyizinku mfwalume wa mileele."

¹⁹ Wakathi khavaloz za Firawuuna na mikukutta zawe za nvittha na anakhavaloz awe eettiyeovo mpahari, Nnyizinku khuwaazamisa a Misuri na maati a pahari etile; ila meeziyayilu aaviriye mwentto aluwatthelaka mishaka zawauma vakathhi wa pahari. ²⁰ Nhupiri Miiriyamu nlupuwe Arawu khuthuula nttowu na aakha ooshi khusala anlotta eettaka opiya na wiina.

²¹ Miiriyamu aari owaajipu eettaka wiipa araka:

“Nimwiipele Nnyizinku,
mwaasa yoori ashintta wooshapweyavo.
Khutupweeza mpahari khavaloz
na anakhavaloz aya.”

²² Aphano Munsa khuwaalokoza meeziyayilu waaza pahari yookhut-tuwa mpakha n'yaara ya Shuuri. Siikhu ttatthu eettaka weettetta n'yaara ahipatthaka maati. ²³ Aphano khufiya Maara, ila khuhiwahi onywa maati ottuukho mwaasa wa owaawa. Ti maana aya wiittheliweeyo nzinala Maara.

²⁴ Tiiro meeziyayilu khusala amwaapa Munsa araka: “Ninttela onywa-ni?”

²⁵ Munsa khunkhuwela Nnyizinku ye khuthoonyeziwa muutthi khuthu-ula khweeselela mmaati khwiya ootuva. Puuro etile ya Maara Nnyizinku khuwenkha kano na oruma na khuweeza, ²⁶ awoozaka yoori: “Mweeyo amana mwinsileza Nnyizinku, Nluku enu na osiileza etile enintuvelaaye na khusileza mirumo zawe na khushututela kano zawe zooshi, khamwini-iyana hatha orati opule kiwaatiseliyeeyo amisuri, maana miiyo ki Nnyizinku anvonisaaye.

²⁷ Aphano khufiya nti wa Elimu, ottuukho zaariiwo milipu khumi na miwiri na mikokonoothi sapiyiini; khumaka ottuukho khwaattamela maati.

16

Nluku omperekha Mana

¹ Mahimo a atthu a meeziyayilu khulankha nti wa Elimu khulawa mpakha yaara ya Siimu, eriiye enakatthi-nakatthi ya Elimu na Sinaayi. Zaari siikhu khumi na thaanu ya mweezi wa phiiri paata ya olaawo Misuri. ² N'yaara mphule mahimo a atthu a meeziyayilu khusala amwaapa Munsa na Arawu.

³ Alupaka yoori: “Afwataali nkhono wa Nnyizinku onuuleeliye Misuri! Maana okhu fweeyo naari wiiya nshini wa vikhakalo za nyama na naari ojaka etthu-yoojiwa woohiivo hatha shaakha mpakha orupala, ila mweeyo khunitisa n'yaara mphu yoori mwinuule jala fooshi fweeyo.”

⁴ Aphano Nnyizinku khumuuzza Munsa yoori: “Miiyo kintta okwisa etthu-yoojiwa ya pinkuuni. Atthu nka asaruwaka na ollokothela wakhula siikhu khwa kiiima eniwaafiyelaaye siikhu yaya etile, khwa etthiipo kinttela oweeza yoori kiwoone nkhamma yo anshututela kano yaka. ⁵ Siikhu ya sitha mwina yoolokothela swaafu piiri zayita epile mwinlokothelakaaye siikhu kiina zaya.”

⁶ Aphano Munsa na Arawu khuwooza meeziyayilu ooshi yoori: “Makaaripi mwinttela ojuwa yoori ti Nnyizinku oolaziyeenini nti wa Misuri,

⁷ meesho supu mwinttela woona siifwa ya Nnyizinku maana asiila waapa wenu. Fweeyo na paani mwinnaapaaye?” ⁸ Khurutela olupa theenya araka: “Nnyizinku oniwinkhani nyama yoorafuna makaaripi na etthu-yoojiwa ya supu yoori mwirupale, maana asiila waapa wenu. Fweeyo na a paani? Mweeyo khamwinnaapa fweeyo, ila Nnyizinku.”

⁹ Munsa khumuuz Arawu yoori: “Wuuze mahimo a atthu ooshi a meezi-rayiilu oraka: Mweette mmakhono wa Nnyizinku, maana asiila waapa wenu”.

¹⁰ Arawu eettaka ottakhulana meezi-rayiilu, ooshi khusala eekesa phantte ya n'yaara na siifwa ya Nnyizinku khupuwa mmawiku, ¹¹ na Nnyizinku khumuuz Munsa yoori: ¹² “Kinsiila waapa wa meezi-rayiilu, ila owaajipu yoori: ‘Njuwa leettelaka otupweela mweeyo mwinrafuna nyama, na supu mwiniiyana-yoojiwa ya wuutoshani. Toowo mwinttela ojuwa yoori miiyo ki Nnyizinku Nluku enu.”

¹³ Makaaripi khupuwa khwaali khwiitaala aphale aamakiyeovo, supu waariovo mmatte phantte yaya etile. ¹⁴ Wakathi mmatte opule wuumiyeyo, vathi aphale khupuwa vitthu nkhamma mavalako zoolattanana cheelu vatulu wa nshaka. ¹⁵ Wakathi meezi-rayiilu ooniyeovo vitthu epile, khwaaza wuuzelana atthaaporu araka: “Niini epiza?” Maana khaari ojuwa ethhu yaari orettikhanaaye. Elottelanaka, Munsa khuwooza yoori: “Eti ethhu-yoojiwa Nnyizinku awinkhiyeenini yoori mwije. ¹⁶ Nnyizinku khurumisa yoori: ‘Wakhula mmote wa mweeyo ona yookusanyela epile antakhaaye yoori aje, khwa hisapu ya atthu ariina vaje vawe, ttompwiyo piiri wakhula ntthu.”

¹⁷ Meezi-rayiilu khuretta ethiipo ooziweezo; akina khukhupa zawaatta, akina vattitthiiru. ¹⁸ Wakathi aphimiyeeyo na ttompwiyo, otule aalokot-theliyeeyo zawaatta na otule alokottheliyeeyo vattitthiiru ooshi khupattha sawa-sawa. Wakhula mmote aapatthiye epile aari ohithajyaaye oja.

¹⁹ Munsa khuwooza yoori: “Ahiiyeyo hatha mmote antakhaaye opweha yoori aje meesho.”

²⁰ Ila yo khuhinsiilezi Munsa, akina khulikha vattitthiiru mana aya yoori aje mmeesho mwaya; ochiyeyo khwiitaala nyunku na khusala anukha. Munsa khuwaakatipkhela yo venkivena.

²¹ Wakhula siikhu supu, yo eetta ollokothaka epile aari otakhaaye oja, maana haari ya njuwa yeetta othulushaka etile yaari osalaaye vathi. ²² Siikhu ya siitha, khulokottha swaafu piiri, theenya ttompwiyo phiiri khwa wakhula ntthu; attunkhulu a atthu khulawa omuuza Munsa. ²³ Khuwaajipu Munsa araka; “Nnyizinku aruma yoori: ‘Meesho enttela wiiya siikhu yoovumula, Saapatu ttakatthiifu ya Nnyizinku etile mwintakhaaye wuumisa vamoottho muumise na etile mwintakhaaye wiipikha na maati, mwiipikhe, zooshi zinttelaaye osala mwipwehe mpakha mmeesho mwaya.”

²⁴ Khupweha mpakha mmeesho mwaya nkhamma ethiipo Munsa aalupiyeezo; wala khuhivutti na hatha nyunku khuhiiina. ²⁵ Aphano Munsa khulupa yoori: “Mwije leelo maana Saapatu ttakatthiifu ya Nnyizinku maana leelo khamwinsikanavo hatha etthu valipuwa. ²⁶ Siikhu sitha mwina yoolokotthela ila siikhu ya saapa, Saapatu, khazintela wiiyavo.”

²⁷ Siikhu ya saapa aalankhiye atthu onlawa ollokotha ila khuhisikani. ²⁸ Aphano Nnyizinku khumuuz Munsa yoori: “Mpakha lini mwikhijilaka oshututela mirumo zaka na kano zaka? ²⁹ Moone yoori Nnyizinku awinkhani Saapatu, tiito siikhu ya siitha oniwinkhani etthu-yoojiwa ya siikhu piiri yoori siikhu ya saapa wakhula ntthu eeye attaphale aniiyaavo ahiiyeyo ntthu antakhaaye weettetta.” ³⁰ Aphano atthu apale khuvumula siikhu ya saapa.

³¹ Atthu a Ezirayiilu khutthaja etthu-yoojiwa etile nzina la mana. Zaari nkhamma peewu ya phunje zoolakala zootuva nkhamma mishikoto za asali.

³² Munsa khulupa araka, “Nnyizinku aruma yoori: ‘Mwilogotthele mana apa

ttompwiyo moote mwipwehe, yoori khapila entaaye yoone etthu-yoojiwa mwenkhiweeyo ti Nnyizinku wakathi oolaziyeenini Misuri.”

³³ Aphano Munsa khumuza Arawu yoori: “Othuule ttompwiyo moote ya mana, otthe mmakhono wa Nnyizinku, yoori epweheliwe khapila eto entaaye.”

³⁴ Khwa oshututela etile Nnyizinku aamuuziyeezo Munsa, Arawu khuthuula mana apale khuttha mmakhono wa oshaahiti wa Mbwana.

³⁵ Meezirayiilu khuja mana nyaakha arupayiini mpakha ofiya nti waari wiikhaleyaaye; khuvira ajaka mpakha ofiya mmwiinano wa Kanaani.

³⁶ Mphimo waari ophimaniwaaye mana waari wiithiwa ttompwiyo*, phantte ya khuumi ya eefwa.

17

Maaati aniittikha va mwaako

¹ Mahimo a atthu a meeziyayiilu khulaamo n'yaara ya Siimutta, khusala eettetta avumulaka alawaka, nkhama ethiipo aarumiyeeyo Nnyizinku. Khumaka Refidimu ila khaariwo maati oonywa. ² Mwaasa wa ethiito khusala anyakulisana na Munsa araka: “Oninkhe maati oonywa.” Ye khuwaajipu yoori: “Mwaasa wa niini mwinyakulisanaka na miiyo? Mwinimweezelani Nnyizinku?”

³ Ila atthu apale aarina nnyottha khusala omwaapa Munsa araka: “Waani-lazeliyeniwo Misuri? Ontakha onuula na nnyottha na aana eetthu na nyama zeetthu?”

⁴ Aphano Munsa khunyakula ankhuwelaka Nnyizinku araka: “Kiwaarettele niini atthu apa? Ansaleela okivonya na mawe!”

⁵ Nnyizinku khunjipu yoori: “Olokoze, olawe wawaathuule attunkhulu a atthu a meeziyayiilu na wiiyane pakhora mmakhono ethiito waapiyaniyeeyo muuttho Niilu, olawe. ⁶ Woone, Miiyo kinttela wiiya ottuukho vatulu wa liwe la Horeepe. Weeyo opiye liwe laya, nttinttho lintta olaza maati yoori atthu apo anywe.” Munsa khuretta ethiipile, attunkhulu a meeziyayiilu eettaka omoona. ⁷ Puuro yaya etile khutthaja nzina la Maasa na Mariiba, maana aphale vaya meeziyayiilu aanyakulisananiye na khumweeza Nnyizinku araka: “Nnyizinku ori vamote na fweeyo ama wala?”

Meezirayiilu anuumanana Amalekiita

⁸ Elottelanaka khuta Amalekiita oteela owoomanana meeziyayiilu nti wa Refidimu. ⁹ Aphano Munsa khumuza Yoshuwa yoori: “Owaathawule atthu aalume oomanane Amalekiita. Meesho kinttela wiiya vatulu wa mwaako na pakhora ya Nluku mmakhono mwaka.”

¹⁰ Yoshuwa khulawa wumanana Amalekiita nkhama ethiipile Munsa aalupiyeeyo. Munsa, Arawu na Huri khuwelaza vatulu wa mwaako.

¹¹ Amana Munsa alansa makhono awe meeziyayiilu eetta oshintta, amana eeshusha makhono awe Amalekiita ti aari oshinttakaaye. ¹² Amana makhono a Munsa ashokhera, Arawu na Huri eetta othuulaka liwe yoori Munsa eekhalevo. Oowiiri khukholelala makhono a Munsa, mmote nkhono nkha nkina nkhone nlume yoori makhono a Munsa eeye aweemela mpakha njuwa otupweela. ¹³ Yoshuwa khuwaashintta sawasawa anajanka a Amalekiita na phanka.

¹⁴ Aphano Nnyizinku khumuza Munsa yoori: “Waatikhe hapari epi nkithaapu yoori zisala zuupuweleliwa na omuuze Yoshuwa yoori Amalekiita anttelia wiiya oosahawiwa khwa mileele vathi wa olumwenku.”

* **16:36** Eefwa enlikanana phantte ya khuumi ya malituru 20/40

¹⁵ Munsa khunjeka alitaari na khuntthaja yoori: “Nnyizinku akinkha oshintta”, ¹⁶ na khuri: “Nkhono mmote vakhukulu ya Nnyizinku; Nnyizinku ori nvittha na Amalekiita khpila khwa khpila.”

18

Othotola wa Yeeturu

¹ Aphano Yeeturu, haakhimu wa Miitiya, nkhwewe Munsa, khusiila vitthu zooshi Nluku anretteliyeeyo Munsa vamote na atthu a Ezirayiilu khwa nanna Nnyizinku awaalaziyeewo Misuri.

² Raku, Munsa amperekhiye Zipoora muukha awe owawe nkhwewe Yeeturu, ye khumpwekherela, ³ vamote na aana awe awiri. Mmote aya aari wiitthiwa Yeerisoni,* maana aalupiye yoori “Miiyo kaasafireliye nti wa malaponi”; ⁴ nkina aari wiitthiwa Elizeeri, maana aalupiye yoori: “Nluku wa paapa ti eeyiye awuni yaka na akaawuni khwa phanka ya Firawuuna.”

⁵ Aphano Yeeturu nkhwewe Munsa na muukhaawe Munsa na aanaawe awiri khulawa n'yaara omwaako wa Nluku okhule Munsa aamakiyeewo.

⁶ Yeeturu khurumisa nhupi wuuziwa Munsa yoori: “Miiyo, nkhwewo, kata na muukhaawo na aanaawo awiri.”

⁷ Aphano Munsa khumwaattama nkhwewe khumwiinamela khumpatikha, khusala oozelana hapari mmote na nzaawe eettaka ovira nheema. ⁸ Elottelanaka Munsa khwaaza omuuza nkhwewe vitthu zooshi Nnyizinku anretteliyeeyo Firawuuna na amisuri mwaasa wa pheta ya meeziyaiilu na tafwawuthi zooshi akholiyeeyo ntarikhi na nanna Nnyizinku awaataphuliyeeyo.

⁹ Yeeturu noosiila mattakhuzi apale ooshapweya Nnyizinku awaretteliyeeyo meeziyaiilu, awaataphulaka mmakhono wa amisuri, khwiya woofurahi. ¹⁰ Yeeturu khulupa yoori: “Woottottopeliwa eeye Nnyizinku, ootaphuliyeenini mmakhono wa amisuri na mmakhono wa Firawuuna na khuwaataphula atthu awe vathi wa nkhono wa amisuri. ¹¹ Leelo kajuwa yoori Nnyizinku nwulweene zayita miluku zooshi, maana khwa vitthu epile aari ojikhutupulanaaye atapanya.” ¹² Aphano Yeeturu nkhwewe Munsa, khuretta twaha yoolukuziwa khwa Nluku; khuta Arawu na attunkhulu ooshi a meeziyaiilu, yoori aje ethu-yoojiwa na nkhwewe Munsa omaasho wa Nluku.

Akhili za Yeeturu

¹³ Mmeesho mwaya Munsa khwiikhala yoori aphuke onyakulisana wa atthu, atthu apale khweemela ya supu mpakha makaripi. ¹⁴ Wakathi nkhwewe ooniyeeyo epile aari owaarettelaaye atthu apale, khuri: “Eto onrettaayo niini? Weekhalela-ni atthu ooshi khweemela na khuuzukulela otthowe ya supu mpakha makaripi?”

¹⁵ Aphano Munsa khumuza nkhwewe yoori: “Mwaasa aya atthu apa anikiteela miiyo okuuzela vitthu za Nluku. ¹⁶ Amana eeyana milattu zaya, antta okiteela yoori kiphuke mmote na nzaawe na kiwoozaka mwentto wa Nluku na kano zawe.”

¹⁷ Nkhwewe Munsa khulupa yoori: “Eto onrettaaye khahiyoo ooshapweya oretta. ¹⁸ Weeyo na atthu awo mwinttelaa oshokhera, maana khaazi yaya eto ti yoolipa channu; khunwahi oretta otthowe. ¹⁹ Osile huula yaka! Miiyo kiniwinkha shawuri na Nluku ti eeye vamote na weeyo. Wiye weeyo namalokozela wa atthu omaasho wa Nluku na othuula tafwawuthi zaya zooshi khwa Nluku. ²⁰ Owooze mwentto na kano na owaajuwise

* ^{18:3} Yeerisoni khwa luuka ya hebereewu linlattanana na nttakhuzi linraaye omaka.

tarikhi ya weettettela na khaazi ya okhola. ²¹ Ila weeyo vakatthi wa atthu apo, owaathawule atthu a makhaamu ooretta etthu, oomoova Nluku, atthu a haakhi eniweephiraaye ophattha fwayita ya haraamu. Owenkhe ottunkhulu wa atthu alufu wa atthu miiya wa atthu hamusiini wa atthu khumi. ²² Yo anttela wiiya vakatthi wa atthu yoori asala aphuka tafwawuthi zaya. Nka ootiselaka weeyo tafwawuthi epile zoolipa; epile zookhwuya anttela waattalela ottho. Amana oretta toowo enttela wiiya yookhwuya khaazi yawo, maana yo anttela wuulikhela otthowe. ²³ Amana weeyo oretta etthiipo, nkhama Nluku anrumaazo, nka owahaka oshintta tafwawuthi zaya epo na atthu apa ooshi eettaka orutela onti tafwawuthi zaya ziri zawaat-taleliwa.”

²⁴ Munsa khukhupalela wuuiziwa ti nkhwewe na khuretta etthiipile oozi-weeyo ti ye. ²⁵ Khuwaathawula atthu amakhaamu vakatthi wa meeziyaiilu ooshi khuwaarettta wiiya anamalokozela atthu aya apale; ntunkhulu wa atthu alufu, wa atthu miiya, wa atthu hamusiini, na wa atthu khumi. ²⁶ Apa khwiya nkhama anamaphuka awakhula siikhu, atafwawuthi za atthu. Amana wiiya mwaasa woolipa aari weettiseliwaka Munsa, amana ziyya zookhwuya aari ophukaka atthaapo.

²⁷ Aphano Munsa khuleezanana nkhwewe Yeeturu khusala arutela owawe.

19

Nluku ontakhulana Munsa vamwaako Sinaayi

¹ Mweezi wa ttaatthu siikhu ethiitile, paata ya aana a meeziyaiilu olaawo Misuri, khufiya mpakha n'yaara ya mwaako Sinaayi. ² Noolaawo Refidimu, khulawa mpakha n'yaara ya Sinaayi, meeziyaiilu khulawa khumaka ottuukho omaasho wa mwaako Sinaayi.

³ Elottelanaka Munsa khuwela vamwaako yoori akutthanane Nluku. Nnyizinku khunkhwela vamwaako attaaphale araka: “Olupe mattakhuzi apa wuuzaka peewu ya Yaakhumpa, atthu ooshi a meeziyaiilu yoori: ⁴ ‘Mweeyo moona etthu kiwaaretteliyeeyo amisuri na nanna kiwaathamisiyeeyo nkattihi wa mapaphelo a saaka kijitiiselaka miiyo. ⁵ Aphano, amana mwikishututela wawaamineyavo mwisiila huula yaka na khuthokorela wahati aka, mweeyo mwinttela wiiya atthu aka, ootafikhana zayita khapila kiina, maana olumwenku wooshi pi waka. ⁶ Mweeyo mwinttela wiiya ofwalume aka wa anamalokozela a tiini na khapila ttakatthiifu.’ Apo pi mattakhuzi ontelaaye owooza meeziyaiilu.”

⁷ Munsa khuruti khulawa khuwaakhuwela attunkhulu ooshi atthu a meeziyaiilu na khuwoza zooshi Nnyizinku anrumiyeyo olupa. ⁸ Atthu ooshi khujipu wa swaafu moote yoori: “Ninretta zooshi Nnyizinku arumiyeezo.” Aphano Munsa khulawa khumuaza Nnyizinku mattakhuzi ajipwyeyo atthu apale.

⁹ Nnyizinku khumuaza Munsa yoori: “Woone! Kinttela wuuttakhulana weeyo nkattihi wa liwiku looriipa yoori atthu amana akisiila kittakhulanaka weeyo asala ookhupali khwa mileele.”

Aphano Munsa khumuaza Nnyizinku mattakhuzi ooziweeyo pi atthu apale. ¹⁰ Nnyizinku khurutela omuuza theenya Munsa araka: “Olawe vakatthi wa atthu apo, wawaattakathise leelo na meesho. Yo ana ya ofula kuwo zaya, ¹¹ yoori eeye oolikana siikhu ya ttaatthu, maana siikhu ya ttaatthu Nnyizinku ontela wiishukha vamwaako Sinaayi, mooshi mweeyo mwimoone. ¹² Otthe mwiinano nkerekhere wa mwaako na owooze atthu yoori: ‘Eeyane phoole ya ohiweli mwaako na ohisapi. Otule anttelaaye osapa

mwaako ona ya wuuliwa; ¹³ ohinsape na nkhono ila onvonye na mawe ama ntetthe, hatha nkhama ntthu ama nyama, khiniiya haayi.' Ila amana nlope livuma swaafu moote apho pi anttelaavo owela."

¹⁴ Munsa khwiishukhela aphale aariivo atthu apale khuwaattakaththisa na yo khufulaza kuwo zaya. ¹⁵ Khuwooza atthu apale yoori: "Mwiiye woolikana ovirisa siikhu ya ttaatthu. Ila ahiiyevu antakhaaye okutthanana muukha awe."

¹⁶ Noocha, siikhu ya ttaatthu khupuwa taari na ozerima, liwiku looriipa khufinikha mwaako na khuvumisiwa nlope channu. Atthu ooshi khuwaap-attha woova aphale aarivo. ¹⁷ Munsa khuwaalazavo atthu apale aphale vaya yoori akutthanane Nluku, yo khulawa khweemela waattamanana mwaako.

¹⁸ Mwaako Sinaayi wooshi weetaaliye loosi, maana Nnyizinku eeshukheliye attapho na moottho, na loosi laya leetta owela nkhama loosi la vanjocho na mwaako wooshi weetta othukumela channu. ¹⁹ Ovuma wa nlope weetta ovira otepaka, elottelanaka Munsa khuttakhula na huula ya Nluku khunjipu.

²⁰ Nnyizinku khwiishukhela vatulu wa mwaako Sinaayi, khunkhewela Munsa vatulu attaphale Munsa khuwelela khulawa. ²¹ Nnyizinku kumuza Munsa yoori: "Wiishukhe wawooze atthu apo yoori ahivikane mwinano atakhaka omoona Nnyizinku. Amana avikana enkeene antta ofwa. ²² Hatha nkhama anamalokozela a tiini amana amwaattamelaka Nnyizinku ana yoojittakaththisa. Amana ahijittakaththisi Nnyizinku ontta owaatapanya."

²³ Aphano Munsa khumuza Nnyizinku yoori: "Atthu khanwahi owela vamwaako Sinaayi maana weeyo waanilikhisie oraka: 'Mwirette mwinano omaasho wa mwaako mwiphakule.'

²⁴ Nnyizinku khunjipu Munsa amuuzaka yoori: "Wiishukhe orutele owela theenya, operekhiwaka ti Arawu. Ila anamalokozela a tiini na atthu ahirkhe mwinano yoori awelele apha ariivo Nnyizinku, amana arettu toowo Nnyizinku ontta owaatapanya."

²⁵ Aphano Munsa khwiishukha khulawa owooza atthu apale.

20

Mirumo Khumi

¹ Nluku alupa mattakhuzi ooshi apa araka:

² "Miiyo ki Nnyizinku, Nluku awo, kuulaziyeeyo nti wa Misuri ohali waaret-tiweewo omwiithwaana. ³ Ohiiyane miluku mikina omaasho waka miiyo. ⁴ Ohijaattalele sanamu wala ratarato ya etthu ya otulu wala ya vathi ama vathi a mmaati. ⁵ Ohikokhorele wala ohaaputu, maana Miiyo ki Nnyizinku, Nluku awo; kintakha wiiye waka paasi, kinnoon-aaye twampi za apaapa na kifikhirelaka twampi zaya khwa aana aya mpakha khapila ya ttaatthu ama yanne ya apale aari okiphiriisaaye, ⁶ ila kintthantta na thkaraka mpakha khapila alufu epile zinikiphetaaye na zinshututelaaye mirumo zaka.

⁷ Ohilupe nzina la Nnyizinku Nluku awo mahala, maana Nnyizinku khan-lawa onlikha ahinhukhumweeni otule anlupaaye nzina lawe mahala.

⁸ Wuupuwele Saapatu yoori siikhu ttakatthiifu. ⁹ Ona yookhola khaazi zaho zooshi siikhu sitha, ¹⁰ ila siikhu ya saapa Saapatu ti yomwinkha Nnyizinku Nluku awo, siikhu yaya eti ohikhole hatha khaazi moote, waaza weeyo, mwanawo wa nlume ama wankha, wala mwiithwaana awo wala njaazi awo, wala nyama zaho wala aletto ariiyie nlikokoro mwawo. ¹¹ Maana khwa siikhu sitha, Nnyizinku eetta wumpa pinku na vathi, pahari na vitthu zooshi ziriimo, ila Saapatu khuvumula.

Paata ya toowo, Nnyizinku khuparikhya Saapatu ya etile na khut-takatthisa.

¹² Onshitahi papaawo na mamaawo, yoori wiikhale siikhu zawaatta vathi apha Nnyizinku, Nluku awo awinkhiyeeyo.

¹³ Ohuule.

¹⁴ Ohiraruwe.

¹⁵ Ohiyiye.

¹⁶ Ohinlokoveze nzaawo.

¹⁷ Ohilazele omaashokopho vaje wa nzaawo, wala muukha wa nzaawo, wala amwiitthwaana ama ajaazi awe, wala mompe zawe ama puuru zawe na wala etthu moote etile yiyyiye yawe.”

Atthu a Ezirayiilu wawaapatthiye woova

¹⁸ Wakathi atthu apale aari osiilaavo taari na ozerima na ovuma wa nlope na khoona mwaako olazaka loosi, ooshi khusala athukumela mpakha osusela petiwene. ¹⁹ Khumuuzza Munsa yoori: “Weeyo ottakhulane ye, fweeyo nintta osiila. Ila Nluku amana attakhulana fweeyo nintta ofwa.”

²⁰ Munsa khuwooza atthu apale yoori: “Mwihoove! Nluku aateeliye oweezani, yoori mwisala mwimoova na ooweraweriseni twampi.”

²¹ Ila atthu apale nalelo khwiya peetiwene, Munsa khusala avira aattame-laka liwiku ntthile looriipa aariivo Nluku.

Kano monkoni wa alitaari wa Nnyizinku

²² Nnyizinku khumuuzza Munsa yoori: ‘Owooze meezi-rayiilu mattakhuzi apa yoori: ‘Mweeyo moona na maasho enu yoori pinkuuni kattakhulana mweeyo. ²³ Mwihaattale miluku za feeta wala miluku za tahapu yoori mwikiphakanyane.

²⁴ Mwikaattalele alitaari wa mattophe mwurettevo twaha ya olukuziwa na zaakha za heeri, pwittipwitthi na mompe zenu wakhula vahali mwin-rettaavo nka mwifikhirelaka nzina laka, kintta wuuteelani mweeyo na kuperikhiyeni. ²⁵ Amana mwikijekela alitaari wa mawe mwihinjekane mawe ooshijaniwa zaana, eeyaru mawe awaattaliwa saana mwintta onkufurwela.

²⁶ Mwihiabwele na shikatta alitaari aka amana mwinjekaka, maana mwintta onfulamela.

Yuunusa

Yuunusa onintthira Nnyizinku

¹ Siikhu moote Nnyizinku anrumiye Yuunusa mwaana wa Amitayi yoori:
² “Olankhe olawe sitati khuulu ya Neniive, walaleye ottuukhu, yoori miiyo kinjuwa zooshi zootakhala zaya anrettaazo.”

³ Ila Yuunusa asiiliyeevo toole, khuwaza otthirela tuniya yoolepelana Neniive, antthiraka Nnyizinku. Khulawa mpakha sitati ya Yooke khusikana pankaya vapatari, yaari weettaaye Taarisi. Khuripha pasaji yawe, khweetta mpankaya yoori atthirele Taarisi, antthiraka Nnyizinku.

⁴ Aphano, alawaka, Nnyizinku khuperekha pheevo ya waatta na pahari khutakhala khusala esaleela opwecheya pankaya. ⁵ Mamalinyero ooshi khwiya awoova, wakhula mmote wayo khusala akhuwa anvekelaka nluku awe, yoori apatthe wuusurukha, na khusala atupweeza mapwattha aya mpahari, yoori eveyaveye pankaya yaya.

Wakathi aya opo Yuunusa, aarettiye eeshukheliye mpurawu eettaka olala ajisahawiye. ⁶ Nahota khwiishukhela mpurawu mphule aari olalaamo Yuunusa, khumuuzela yoori: “Weeyo! Onlala-ni? Olankhe onvekele nluku awo! Khinjuweya anoonelaka huruma yoori anuusuru nihifwe.”

⁷ Paata ya toole, mamalinyero khusilana yoori: “Nlaweni neekese nasipu, ninjuwe nlupa otu anitotheliye hasara eti.” Yo khweekesa nasipu etile, khusala emoona Yuunusa.

⁸ Khuuzeliwa Yuunusa: “Weeyo o nlupa onitotheliyeeyo hasara eti. Nkanuuze! Weeyo onkhola khazi-ni? Wala onlankha vayi? Nti awo nti-ni? Ama lihimo lawo lihimo-ni?”

⁹ Ye khujipu araka: “Miiyo ki Mwipereewu, kinimwaaputu Nnyizinku, Mwennyewe pinku, otu ompiyi nti na pahari.”

¹⁰ Elottelanaka Yuunusa khuwooza yoori aari ontthira Nnyizinku. Wakathi ajuwaziyeevo etthu yaari onrettikhanelaa, yo khwiya ootepa woova, na khumuuzela Yuunusa: “Apho niini orettiyeeyo!”

¹¹ Pheevo yeetta otepa yaattaka, khufiyelela mamalinyero omuuzela Yuunusa: “Yoori pheevo na pahari eshapweye, fweeyo nuurettele niini?”

¹² Yuunusa khujipu araka: “Miiyo kajuwa yoori pheevo eti yapuwelela mwaasa wa miiyo. Apho, mwikitthempe mwikeeselele mpahari. Mwiretaru toowo, mwintta woona pahari na pheevo zinyamaliye.”

¹³ Ila mamalinyero apale khuhintupweezazi, khwaaza ofuttha reemu na kuvu zaya zooshi yoori afiye vathi. Khuhisala ewaheya, mwaasa yoori pahari yeetta ovira etepaka otakhala. ¹⁴ Yo khukhuwa ankhuwelaka Nnyizinku araka: “Oo, Nnyizinku, ohinilikhelele nifwaka mwaasa wa pinaatamu otu, na ohinikwisele paathuli ofwa wa mwinyi otu. Zooshi zarettikhana khwa nanna olakeliyeezo.” ¹⁵ Nawiisha khuntthempaza Yuunusa khumweeselele mpahari. Aphano pahari na pheevo, zooshi khunyamala. ¹⁶ Ooniyeovo toole, mamalinyero ooshi khwiya awoova channu na khumwaaputu Nnyizinku. Khunrettelaza twaha na theenya ahiti.

¹⁷ Amweeselelaziyeevo mpahari, Nnyizinku khuperekha swi khuluyeene yoori emmize Yuunusa, ye khwiya mmatthupo wa swi siikhu ttatthu nthana na osiku.

- ¹ Ari mmatthupo wa swi, ye khwaaza olompa anshukhurwelaka Nnyizinku awe:
- ² “Nhuzuni mwaka kankhuweliye Nnyizinku,
na aakijipwiye.
Mithili za ahera kaakhuwiye
na waasiiliye huula yaka.
- ³ Waakitupweeziye mpahari wa wiichamo,
nkatthi wa khilintti,
nziko wa maati khukizukulela,
na mawipi awo khukikhutela.
- ⁴ Miiyo khulupa yoori keekareliwa peeti-wene
na omaasho waho weeyo Nnyizinku.
- Kinta kirutele woona theenya
nyuupa yaho yoottakatthiifu?
- ⁵ Maati khukifiya vakhulo,
khilintti khukizukulela
na mirawa khukizokonzela eeshwa yaka.
- ⁶ Khuzama mpakha vanchina la nyaako,
tuniya ya vathi, puuro enimfukelaaye ntthu khwa siikhu zooshi.
Ila weeyo Mbwanaaka Nnyizinku khuusuru nafusi yaka
nkhapuri mphule.
- ⁷ Wakathi kaari osaleelaavo ofwa,
koofikhiriye weeyo Nnyizinku,
khuuperekheza lompa yaka,
yoori efiye nnyupa mwawo woottakatthiifu.
- ⁸ Apale anaputwaaye sanamu zoohiina fwayita,
antarawu tthakaraka ya Nnyizinku.
- ⁹ Ila miiyo kinteela wuushukhurwela Nnyizinku
na maliipo a siifwa na owinkha twaha,
na kinteela oretta eti kaahitiyeeyo,
maana nusura ti yaawo weeyo Nnyizinku.”
- ¹⁰ Aphano, Nnyizinku khuruma swi etile, yoori yanchuwe Yuunusa nshini
wa nttima.

3

Otafusiri wa Yuunusa sitati ya Neniive

- ¹ Aphano Nnyizinku khunruma Yuunusa swaafu ya phiiri yoori:
² “Olankhe olawe sitati khuulu ya Neniive, walaleyeye ottuukhu mattakhuzi
apa kinuurumaaye.”

³ Ye khulankha khulawa Neniive, nkhama ethiipo Nnyizinku anrumiy-eozo. Neniive yaari sitati khuluyeene ntthu aari wiishishaaye siikhu ttatthu eettaka weetteta mwentto. ⁴ Ila ye n'oofiya sitati etile eettettiye siikhu moote, alaleyaka yoori: “Nkatthi wa siikhu arupayiini Nnyizinku onteela opwecha Neniive.” ⁵ Aneniive khwiya wonkhupali Nluku khulaleyana yoori afuke, waaza attunkhulu mpakha asimaana, ooshi khuwalaza saakhu.

⁶ Hapari epile za Yuunusa zamfiyeliye mfwalume wa Neniive, ye khwiishukha vakhukulu yoohaakhimu, khuvula kuwo zoofwalume khuwala saakhu na khwiikhala vafuutha. ⁷ Aphano khuruma olaleyiwa Neniive yooshi yoori:

“Khwa nzina la mfwalume na mawaziri awe:

Ahiiyeveo atha ntthu mmote antakhaaye oja na onywa, wala ojisa na ony-wisa nyama zawe, mompe zawe ama pwittipwitthi zawe. ⁸ Atthu ooshi awale saakhu, na awalise nyama zaya, na akhuwe khwa nzina la Nluku na kuvu zaya zooshi. Attharuwe oretta vitthu zootakhala na ohusuti. ⁹ Khinjuweya Nluku omwiishelaka wiiphiiriwa wawe, anooonele huruma yoori nihifwe.”

¹⁰ Wakathi Nluku ooniyeovo yoori alikhaza oretta vitthu zootakhala, ye khulikha etile aari wuupuwelaaye owaarettela na khuhiwaaahukhumu.

4

Katapu ya Yuunusa na huruma ya Nnyizinku

¹ Erettiyeovo toole, Yuunusa khuhintuveli etile yaya, na khwiiya wookatipukha. ² Ye khusala amuuza Nnyizinku araka: “Oo Nnyizinku aka, khahiyo eti kaalupiye nalelo kiri onti? Ti ethiito yaakipatthisiyeeyo otthira keettaka Taarisi. Miiyo kaajuwiye yoori weeyo o Nnyizinku wa tthakaraka na wa huruma, woovilela na woopheta channu, onaahitaaye ohukhumu ila khulevelela mmana wiiyavo othupwiya. ³ Aphano Mbwanaaka okilaze nafusi yaka, kinhithari ofwa kihiyeeni wiiya haayi.”

⁴ Ye Nnyizinku khulupa: “Weeyo onaaye shariya yookatipukha?”

⁵ Yuunusa aalawiye khwiikhala mashaarikhi ya sitati ethiitile. Khujeka lipantta lawe, khwiikhala vamwiivuuli, khusala aweja etthu-ni yaari weet-telaaye orettikhana sitati etile. ⁶ Aphano, Nnyizinku khooththisa nrayi khu-rapela vatulu valipantta aphale aariivo Yuunusa, yoori eeye vamwiivuuli na aawuneye haari. Nrayi opule waamwinkhiye furaha ya waatta Yuunusa. ⁷ Ila mmeesho mwaya supuyeene, Nluku khumperekha mwanyanyama khurafuna nrayi opule, khuuma. ⁸ Etthamu-tthamu ya njuwa, Nluku khuperekha pheevu ya mashaarikhi yoolukuza channu, naye njuwa khusala lipiyela veeshwa vawe Yuunusa, khusala asaleela ozileya. Eviriyeovo toole, ye khusala ajitakhela ofwa, na khuri: “Toono afwataali ofwa ehiyeeni wiiya haayi.”

⁹ Ila Nluku khumuuzela Yuunusa: “Weeyo onaaye shariya yookatipukha mwaasa wa nrayi?” Ye khujipu: “Ayo, kinaaye! Na ki wookatipukha kintakha hatha ofwa.”

¹⁰ Aphano Nnyizinku khumuuzza: “Weeyo onoonela huruma nrayi opo, ohikholeeni khaazi wala ohiwuliseeni, woottha osikhu mmote na osikhu nkina khufwa. ¹¹ Ila Neniive awaakho atthu anzitaaye eshiriini wa miiya alufu, ahinjuwaaye othawula etthu yooshapweya wala etthu yootakhala, na nyama za waatta. Miiyo akaari oteela wiiyana huruma na sitati khuluyeene etile?”

Matewuzhu

Ntathaari wa mazina a ojama wa Yinsa

¹ Eti warakha ya peewu na mazina aya a amarehemu a phantte ya Yinsa Al-Masiihu, peewu ya Daawuuda na Eburahiima.

² Eburahiima khunvokola Esiyaakha;
Esiyaakha khunvokola Yaakhumpa;
Yaakhumpa khunvokola Yuuda na attwiize;

³ Yuuda khunvokola Pereezi na Zeera,
mamaawe aari Tamaara;
Pereezi khunvokola Hezorooni,

Hezorooni khunvokola Arawu;

⁴ Arawu khunvokola Aminataapi;
Aminataapi khunvokola Nashooni;

Nashooni khunvokola Salimooni;

⁵ Salimooni khunvokola Bowaazi,
mamaawe aari Rahaape;

Bowaazi khunvokola Obeedi,
mamaawe aari Ruuti;

Obeedi khunvokola Yeese;

⁶ na Yeese khunvokola mfwalume Daawuuda.

Daawuuda khunvokola Seleyimaana,
mamaawe aari muukha wa Uriiya;

⁷ Seleyimaana khunvokola Ropowaawu;
Ropowaawu khunvokola Apiiya;

Apiiya khunvokola Aasa;

⁸ Aasa khunvokola Zhuzaafwa;
Zhuzaafwa khunvokola Joraawu;

Joraawu khunvokola Uziiya;

⁹ Uziiya khunvokola Jotaawu;

Jotaawu khunvokola Akaaze;

Akaaze khunvokola Ezakiyya;

¹⁰ Ezakiyya khunvokola Manaase;

Manaase khunvokola Amooni;

Amooni khunvokola Joziiya;

¹¹ Joziiya khunvokola Jekoniiya na attwiize,
wakathi eekareliweeyo Babilooniya.

¹² Paata ya weettaniwa Babilooniya:

Jekoniiya khunvokola Sheyalitiyeeli; Sheyalitiyeeli khunvokola Zorobabeeli; ¹³ Zorobabeeli khunvokola Apiwuute;

Apiwuute khunvokola Eliyakhiimu;

Eliyakhiimu khunvokola Azoori;

¹⁴ Azoori khunvokola Satookhi;

Satookhi khunvokola Akiini; Akiini khunvokola Eliwuuti;

¹⁵ Eliwuuti khunvokola Eliyazaari;

Eliyazaari khunvokola Maata;

Maata khunvokola Yaakhumpa;

¹⁶ na Yaakhumpa khunvokola Yuusufu,
manna wa Mariyamu,

otule anvokoliyeeyo Yinsa,
othuuto aniitthiwaaye Al-Masiihu.

¹⁷ Khwa ethiipo waaviriye ojama khumi na nne waaza va Eburahiima mpakha Daawuuda, na khumi na nne waaza va Daawuuda mpakha va okholiwa olawaniwa Babiloniya, na khumi na nne waaza Babiloniya mpakha va ovokoliwa wa Yinsa.

Ovokoliwa wa Yinsa Al-Masiihu

¹⁸ Ovokoliwa wa Yinsa Al-Masiihu pi toono. Mariyamu ari wooposiwa ti Yuusufu ahinarapalelane, khwiimittha khwa Rooho Ttakatthiifu. ¹⁹ Ila Yuusufu, mposi awe, khwiiya ntthu wa shariya na woohitakhi ontwayifusha, ye khulakela sirini okayiri onrala. ²⁰ Ila, paata ya wuupuwela vitthu epile, khumpuwelela nlayikha la Mbwana nkaththi wa olottha, khumuza yoori: “Yuusufu, mwaana wa Daawuuda, ohoove ompokhera Mariyamu wiiya muukhaawo, maana ye eemittha khwa Rooho Ttakatthiifu. ²¹ Ye onteela om-pattha mwaana, weeyo ontthaje nzina la Yinsa, maana ye onteela owoosuru atthu awe khwa twampi zaya.”

²² Zooshi epo enteela orettikhana yoori ziretteye zooshi epile Mbwana alupiyeeyo khwa napiyu yoori: ²³ “Mwaari onteela wiimittha ampatthe mwaana, anttelaaye wiitthiwa Emanuweele, enlupaaye yoori ‘Nluku ori vamote na fweeyo’.”

²⁴ Paata ya olankha, Yuusufu khuretta etile nlayikha la Mbwana laamuziyeeyo khumpokhera Mariyamu muukhaawe. ²⁵ Ye khaarapalelaniye mpakha om-pattha mwaana. Khuntthaja nzina la Yinsa.

2

Othotola wa ajuwi a matthottowa

¹ Paata ya Yinsa ovokoliwa Belemu ya Yudeya yenzi ya mfwalume Herooti, ajuwi alankhiye malawa-juwa khuta Yeruzaleemu. ² Khuuzela yoori: “Mwaana ntteetthe otu avokoliweeyo, mfwalume wa mayahuuti ori vayi? Fweeyo noona ntthottowa lawe malawa-juwa nateela omwaaputu.”

³ Wakathi mfwalume Herooti asiiliyeovo epo zaya, khwiiya woovelavela, na atthu ooshi a Yeruzaleemu. ⁴ Aphano khuwaakusanya mahaakhimu a tiini ooshi na anamanozela a kano, khuwoozela vayi aari weettelaawo ovokoliwawo Al-Masiihu. ⁵ Yo khunjipu yoori: “Belemu ya Yudeya, maana napiyu aatikha toono:

⁶ ‘Weeyo Belemu,
 ya nti wa Yudeya,
weeyo hatha vattithiiru khahi owoohafwiifweya
 khwa sitati khuulu za Yuuda,
maana khwa weeyo onteela opuwa mfwalume
 anttelaaye oweettettisa atthu aka a Ezirayilu.’ ”

⁷ Herooti khuwaakhuwela ajuwi sirini khuwoozela wakathi laapuwiyeeyo ntthottowa nttho. ⁸ Aphano khuwaaruma Belemu awoozaka yoori: “Mwilawe mweekese ojuwa saaneene monkoni wa mwaana oto, na amana mwinsikana, mwite mwikuuze yoori na miyo kilawe kamwaaputu.”

⁹ Paata ya onsiila mfwalume yo khusala alawa, ntarikhi khoona ntthottowa ntintthile ooniyeeyo malawa-juwa, khulokoza khulawa khweemela

puuro etile aariivo mwaana. ¹⁰ Noorutela woona ntthottowa ntthile, khwi-iya oofurahi venkivene. ¹¹ Khuvira nnyupa mphule khunsikana mwaana na Mariyamu mamaawe, khukokhora khumwaaputu. Nawiisha, khu-fukula maphuta aya khumwinkha tthuvo: Thahapu, ovupa, na mafuttha oonukhela. ¹² Khuuziwa muulottha yoori ahirutele wa Herooti, khurutela owaya khwa tarikhi kiina.

Ottirela Misuri

¹³ Paata ya ajuwi olawa, nlayikha la Mbwana khumpuwelela Yuusufu muulottha khumuza yoori: “Olankhe, onthuule mwaana oto na mamaawe, otthirele Misuri. Weekhale ottuukho mpakha miiyo kiwuze, maana Herooti onteela omweekesa mwaana oto yoori amuule.” ¹⁴ Aphano ye khulankha, khunthuula mwaana na mamaawe osikhu, khweetta Misuri. ¹⁵ Ottuukho eekhaliyeeyo mpakha Herooti ofwa. Khwa ethiipo khuretteya etile Mbwana alupiyeeyo khwa napiyu yoori: “Kankhewela mwanaka aari nti wa Misuri.” ¹⁶ Herooti ooniyeovo yoori attettekhiwa ti ajuwi, khwiyya wookatipukha, khuruma wuuliwa aana ooshi a nyaakha miwiri zeettaka vathi, Belemu na miti zawaattamanana nkhamma wakathi otthuupo oozi-weeyo pi ajuwi. ¹⁷ Aphano khurettikhana epile zaalupiweeyo ti napiyu Yeremiya: ¹⁸ “Khusiileya huula nti wa Rama ya olila na ojikhupanyisa nwulweene; aari Rakeele awaalilelaka aana awe akatthalaka ozurwiwa, mwaasa wa ooshi ofwa.”

Orutela Ezirayiilu

¹⁹ Paata ya Herooti ofwa, nlayikha la Mbwana khumpuwelela Yuusufu muulottha Misuri, ²⁰ khumuza yoori: “Olankhe, onthuule mwaana na mamaawe, olawe Ezirayiilu, maana apale aari otakhaaye omuula afwa.” ²¹ Ye khulankha, khunthuula mwaana na mamaawe, khweetta nti wa Ezirayiilu ²² Ila noosiila yoori Arikileewu mwaana wa Herooti ti asalaneyeeyo ofwalume wa papaawe, khwiyya wa woova weettawo. Nawuuziwa muulottha, khweetta nti wa Kalileya. ²³ Khusala eekhala sitati eniithhiwaaye Nazareeti, yoori erettikhane epile zaalupiweeyo pi manapiyu araka: “Ye onteela wiitthiwa Nnazare.”

3

Yaahaya Namoosa Ontthenkeza Tarikhi

¹ Siikhu zaya epile khupuwa Yaahaya Namoosa, alaleyaka n'yaara ya Yudeya. ² Ye aari okhuwa araka: “Mwithupwiye, Ofwalume wa pinkuuni ori kharipu.” ³ Maana otu ti otule alupiweeyo ti napiyu Ezaaya yoori: “Huula enkuwa n'yaara eraka: ‘Mwitthenkeze tarikhi ya Mbwana na mookolele miphitelo zawe.’”

⁴ Kuwo za Yaahaya zaattalaniwe ovazi wa nkamiiya, na aari ovalaka nzako wa shapala n'yuunu. Etthu yoojiwa yawe aari mapalaka na asali ya ntthuttu. ⁵ Atthu a nti wa Yeruzaleemu na a Yudeya na miti zooshi za nkerekhere ya Yorotaani aari onteela ye. ⁶ Yo aari otukhuru twampi zaya, nawoosiwa ti Yaahaya mmutho Yorotaani.

⁷ Wakathi ye awooniyeeyo mafwarizeewu na masatukhi enkeene ataaka aphale aari woosaavo, khuwooza yoori: “Ojama wa evili! Ti paani awu-uziyeeni otthira katapu entaaye? ⁸ Mwithoonyeze khwa khaazi zenu yoori weekhweele mwathupwiya twampi zenu! ⁹ Khahiyo olupa yoori: ‘Eburahiima ti marehemu papeetthu,’ ila miiyo kiniwuzani yoori, khwa liwe ntthi Nluku onwahi owaattala aana a Eburahiima. ¹⁰ Nshokha lanoliwa latthiiwa

nshini wa mitathaari za miitthi. Wakhula muutthi ohiniimaaye mishumo zooshapweya ontta oshijiwa weeseleliwe va moottho.

¹¹ “Miiyo kiniwoosani na maati khwa othoonyeza othupwiya wa twampi zenu. Ila paata ya miiyo onta ntthu ariinaaye owahi zayita miiyo, hatha akinsuhi shitaha yawe wala akina makhaamu oothuula jampali zawe. Ye onttela owoosani na Rooho Ttakatthiifu na moottho. ¹² Ye ontana fosholo mmakhono mwawe onteela ophakula tiriku na maveya. Tiriku atthe va sakafu vawe, maveya akhoze va moottho ohinzimaaye.”

Woosiwa wa Yinsa

¹³ Aphano Yinsa khulankha Kalileya khuta o Muuttho Yorotaani oteela woosiwa ti Yaahaya. ¹⁴ Yaahaya khusala atakha okatthala araka: “Miiyo ti kinhithajiya woosiwa ti weeyo, onikiteela toovi miiyo?” ¹⁵ Ila Yinsa khunjipu yoori: “Olikhe ethiipo, yoori erettikhane shariya yooshi.” Yaahaya khukhupalela. ¹⁶ Yinsa nawoosiwa, khuvuuwa, nasaapiru pinku khufukuwa, khoona Rooho Ttakatthiifu yiishukhaka nkhamma jiwa khum-morela. ¹⁷ Huula ya olankha pinkuuni khuri: “Otu mwanaka wompheta, na wookituvela channu!”

4

Ozayiniwa wa Yinsa

¹ Aphano Yinsa khuthuuliwa ti Rooho Ttakatthiifu khweettaniwa n'yaara, yoori alawe azayiniwe ti sheethwani. ² Paata ya ofuka siikhu arupayiini nthana na osikhu, khunkhola jala ³ Aphano Sheethwani khumwaattama khumuaza yoori: “Nkhamma weeyo o Mwaana wa Nnyizinkhu, orume mawe apo athatuwe eeye phaawu.”

⁴ Ila Yinsa khunjipu araka: “Yaatikhiwa yoori: ‘Khahiyo phaawu paasi enimwinkhaaye ntthu ohaayi, ila ntthu looshi linlankhaaye nkhanyo wa Nluku.’” ⁵ Elottelanaka, sheethwani khumweettana sitati ttakatthiifu, khunweza phantte yawiishela olepa ya Nyuupa Yoosifwiwamo, ⁶ khumuaza yoori: “Nkhamma o mwaana wa Nluku, ojeeselele vathi aphale. Maana yaatikhiwa yoori: ‘Ye ontta oruma malayikha awe awiinanele, atthaapo antta wuukholelela na makhono aya yoori ohikwakwanttuwe va liwe.’”

⁷ Yinsa khunjipu yoori: “Theenya yaatikhiwa yoori: ‘Ohimweeze Mbwana, Nluku awo.’”

⁸ Sheethwani khunthuula khumweettana va mwaako mmote woolepa venkivene khunthoonyeza ofwalume wooshi wa olumwenku na siifwa yaya. ⁹ Khumuaza yoori: “Amana okikokhorela khukaaputu kintta owinkha zooshi.” ¹⁰ Yinsa khumuaza yoori: “Oleevo, Epiliisi! Maana yaatikhiwa yoori: ‘Omwaaputu Mbwana, Nluku awo, na onrumeyele othu-uto paasi.’” ¹¹ Aphano sheethwani khumwaattuwa, khuta malayikha oteela onrumeyela.

Yinsa onaaza khaazi yawe Kalileya

¹² Wakathi Yinsa asiiliyeevo yoori Yaahaya afukiwa, khurutela Kalileya. ¹³ Khulaawo Nazareeti khulawa khwikhala Kafwaranaawu, yaari nshini wa pahari, nti wa Zebulooni na Nafitaali, ¹⁴ yoori erettikhane etile yaalupiweeyo ti napiyu Ezaaya yoori:

¹⁵ “Nti wa Zebulooni, na nti wa Nafitaali,
tarikhi ya pahari, kaapu ya Yorotaani,
Kalileya ya amalapo!

¹⁶ Atthu aari wiikhalaaye n'yiiza oona nuuru khuluyeene;

khwa apale aari wiikhalaaye miti za mwiivuli wa ofwa, amwasikheliwa ti nuuru.”

¹⁷ Waaza attaapho Yinsa khwaaza olaleya hapari zawe alupaka yoori: “Mwithupwiye, maana ofwalume wa pinkuuni ori kharipu.”

Yinsa oniwaakhuwela anakhiyoni a mwanzo

¹⁸ Ettaka weettetta nshini wa Pahari ya Kalileya Yinsa khuwoona attwi awiri: Simawu, aniththiwaaye Pheeturu, na ttwiye Antere. Yo aari weeselela matthavi aya mpahari, maana yo aari anamajiya. ¹⁹ Yinsa khuwooza yoori: “Mwikilotte, miiyo kintta wuurettani o namajiya a atthu.” ²⁰ Nasaapiru yo khulikha matthavi aya khusala anlotta. ²¹ Ettaka olawa etthiipile khuwoona attwi akina awiri: Tiyaaku, mwaana wa Zepeteewu, na Yaahaya, ttwiye. Yo aari mmwaatiya na papaaya Zepeteewu, attalelaka matthavi aya, Yinsa khuwaakhuwela. ²² Nasaapiru yo khunlikha papaaya na mwaatiya, khunlotta.

Yinsa ontafusiri Kalileya yooshi na owaavonisa anamarati enkeene

²³ Yinsa eettettiye Kalileya yooshi asomisaka mmasinakooka, atafusiraka hapari zooshapweya za ofwalume na avonisaka marati ooshi vakatthi wa atthu ²⁴ Hapari monkoni wa ye khumwazeyela Siiriya yooshi, atthu khusala awaatiisa ooshi apale aarina marati, aari olwaaziwaaye na ohoochiwa ti masheethwani, anajilejile, anasupiyaani, ye noowaavonisa. ²⁵ Atthu enkeene khusala anlottelela olankha Kalileya, Tekapooli, Yeruzaleemu, Yudeya na a nti wa phantte kiina ya Yorotaani.

5

Tafusiiri ya vamwaako

¹ Awooniyeovo atthu apale waatta, Yinsa khuwela va mwaako na khwikhala. Anakhiyoni awe khususela aphale aariivo, ² Ye khusala awaasomisa, araka:

³ “Ooparikhiiyiwa pi apale eeyiye asikhini nroho,
maana ofwalume wa pinkuuni pi waaya.

⁴ Ooparikhiiyiwa pi apale anlilaaye,
maana anteela ozurwiwa.

⁵ Ooparikhiiyiwa pi apale oojipushuwisa,
maana yo anteela orithi olumwenku.

⁶ Ooparikhiiyiwa pi apale ariina jala na nnyottha la shariya,
maana anteela orupala.

⁷ Ooparikhiiyiwa pi apale ariina tthakaraka,
maana na-yo anteela wooneliwa tthakaraka.

⁸ Ooparikhiiyiwa pi apale ariina rooho yoopakusiwa,
maana yo anteela omoona Nluku.

⁹ Ooparikhiiyiwa pi apale ooolevelela,
maana anteela wiitthiwa aana a Nluku.

¹⁰ Ooparikhiiyiwa pi apale anlupatthiwaaye mwaasa wa haakhi, maana Ofwalume wa pinkuuni pi waaya.

¹¹ Ooparikhiiyiwa ti mweeyo amana mwittukhaniwaka na olupatthiwa, na wakhula zootakhala empuwaaye khwa mweeyo mwaasa wa miiyo.

¹² Mwifurahi na mwithhape, maana tthuvo yenu pinkuuni khuluyeene, maana khwa nanna ethhiipo awaalupatthiye manapiyu aviriyeeyo khapula ya mweeyo.

Mwiinyu wa voolumwenku na nuuru ya olumwenku

¹³ “Mweeyo mwa mwiinyu wa olumwenku. Ila amana olıkha onyuunya waya, onrutiseleya toovi? Khuniiyana hatha fwayita, woohiiyi wiithiwa khusala oluwattheliwa pi atthu. ¹⁴ Mweeyo mwa nuuru ya olumwenku. Sitati yoojekiya va mwaako khinvitheya. ¹⁵ Khina ankhozaaye khantteya khuttha nyuku. Entthiiwa vahali wawooneyavo yoori ewaamwasikhele atthu apale aniiyaaye nnyupa ¹⁶ Nakatalikha nuuru yenu mweeyo yaare vakatthi wa atthu, yoori oone khaazi zenu ansifu Papeenu ariiye pinkuuni.

Yinsa onrumeyela kano za Munsa

¹⁷ “Mwihiupuwele yoori kateela wiishisa kano za Munsa ama masomi a manapiyu, akaateeliye wiishisa, ila omarisela. ¹⁸ Kiniwuuzani khweele yoori: Erivo etthiipi pinku na vathi khina nanna entakhaaye waashikha nenkawu alama yiisheliye ya kano ama nttonka, mpakha zooshi erettikhane. ¹⁹ Wooshi otule anttelaaye okhijilela oruma, hatha nkhamma weetta opushuwa, na khuwaanozela akinoko oretta etthiipo, onteela wiitthiwa yoori woopepheya muufwalume wa pinkuuni; ila wakhula otule anshututelaaye na khusomisa oruma waya opu, onteela wiitthiwa yoori nwulweene muufwalume wa pinkuuni. ²⁰ Maana miiyo kiniwuuzani yoori shariya yenu amana ehiziti ya mafwarizeewu na ya anamanozela a kano, hatha vattitthiiru khamwinteela weettamo muufwalume wa pinkuuni.

Wiiphiriwa na osilana

²¹ “Mweeyo mwasiila vitthu ooziweeyo amarehemu apapazenu yoori: ‘Mwihiule; wakhula anuulaaye oneekesela ophukiwa.’ ²² Ila miiyo kiniwuuzani yoori wakhula aninkatipukhelaaye ttwiye oneekesela ophukiwa naye, na wakhula anintukhanaaye ttwiye ona ya olawaniwa wa afwalume ophukiwa. Na otule animuuzaaye ttwiye yoori: ‘nlolo!’ oninsuhi weetta vamootho wa motthooni. ²³ Nakatalikha, amana weettelaka winkha zaakha va alitaari khufikhiri yoori ttwiyo ona ethu varoho na-weyo, ²⁴ olıkhe zaakha yawo va alitaari attaapho, olawe wasilane na ttwiyo, nawiisha ote operekhe saana zaakha yawo. ²⁵ Amana ntthu atakha wuulawana onyupua wa anamaphuka, osiilanane saana ntthu aya oto ntarikhi mweettaka olawa, maana noohijuwi saana weeyo onttela winkleliwa wa namaphuka, namaphuka awinkhelele wa namweekesela kalapooso na ye aweeselele nkalapooso. ²⁶ Miiyo kiniwuza khweele yoori khunlaamo ohiripheeni nzurukhu otthuupo onttelaaye wuuziwa.

Oraruwa

²⁷ “Mweeyo mwasiila elupiwaka yoori: ‘Ohiraruwe.’ ²⁸ Ila miiyo kiniwuuzani khweele yoori wakhula animweekesaaye muukha na ontakha varoho vawe, anrarusha. ²⁹ Nkhama liisho lawo la phantte ya nkhono nlume lintta wuukosisa, olazemo weesele oje. Afwataali wuupwetheya phantte yawo moote ya mwiili awo zayita mwiili awo wooshi weeseleliwa motthooni. ³⁰ Nkhama nkhono awo nlume ontta wuukosisa, oshije weesele. Afwataali wuupwetheya phantte yawo moote ya mwiili awo woohiiyi mwiili awo wooshi weeseleliwa motthooni.

Waasha

³¹ “Yaatikhiwa theenya yoori: ‘Otule animwaashaaye muukhawe ona ya omwinkha talakha.’ ³² Ila miiyo kiniwuuzani yoori wooshi otule animwaashaaye muukhaawe, ehiriwaka etta oraruwa, oniiyana paathuli ya

onruma oraruwa, na otule aninralaaaye muukha aya otule wa waashiwa ontta onrarusha.

Olapha

³³ “Mweeyo mwasiila etthu ooziweeyo amarehemu apapazenu yoori: ‘Mwihilaphe woovonyeyavo, ila mweettettise olapha mwirettiyeeyo omaasho wa Mbwana.’ ³⁴ Ila miiyo kiniuuuzani yoori: mwihilaphe hatha vattithiiru wala khwa vitthu za pinkuuni maana khukulu ya Nluku; ³⁵ wala khwa vitthu za vathi maana phi anvumulisaavo moolu awe, wala khwa Yeruzaleemu maana sitati ya Mfwalume nwulu. ³⁶ Wala ohilaphele khwa eeshwa yawo maana weeyo khunwahi olakaza wala oripisa hatha nyuuli yawo moote. ³⁷ Entosheleza olupa yoori ‘ayo’ amana yiya ‘ayo’, na ‘wala’ amana yiya ‘wala’; noozitisa apho enlankha wa Sheethwani.

Ojiriphia

³⁸ “Mweeyo mwasiila etile elupiwe yoori: ‘Liisho khwa liisho na liino khwa liino.’ ³⁹ Ila miiyo kiniuuuzani yoori: mwiikhanyarele ojiriphia khwa atthu apale anuurettelaanini zootakhala. Amana ntthu oopwakula nlaku limote onzukulisele ntthi likina. ⁴⁰ Amana ntthu atakha wuulawana wa anamaphuka na wuuwula kameza yawo, omwinkhe theenya ajapi yawo. ⁴¹ Amana ntthu ookhanyarela othuula lipwattha khwa kiyasi ya phiima alufu moote, othuule phiima alufu piiri.

Owaapheta maatuwi

⁴² “Amana ntthu oovekela etthu, omwinkhe; ohinnoze enyokonyoko otule anuuvekelaaye omwiipaasha. ⁴³ Mweeyo mwasiila olupiwa yoori: ‘Omphete namwaattamanani awo, omwiine atuwi awo.’ ⁴⁴ Ila miiyo kiniuuuzani yoori, mwiwaaphete maatuwi enu na mwiwaalompele apale anuulupatthanini, ⁴⁵ yoori mweeyo mwiretteye wiiya aana a Papeenu ariiyepinkuuni. Maana ye oniwaatthamushela njuwa apale anrettaaye zooshapweya na apale anrettaaye zootakhala. Na oniwenkha vuula anashariya na apale ohitakhi shariya. ⁴⁶ Amana mwiwaaphetaka apale anuuphetaanini paasi, tthuovo-ni mwiineekeselaaye wiiyana? Anamariphisa lumpuru nayo khanretta ethiipo? ⁴⁷ Na amana mwiiwaachelisaka maswaahipu paasi, mwinrettani yooziti? Hatha na amalapo anretta ethiipo. ⁴⁸ Nakataalikha mwiiye atthu khaamili, nkhamma ethiipo eyiyeyo khaamili Papeenu wa pinkuuni.

6

Owaawuni anamathowiwa

¹ “Mwiyyane phoole na oretta khaazi zenu za shariya vahali aniiyavo atthu akina yoori mwisifwiwe pi yo. Amana mwiretta toowo, khamwiniyyana hatha tthuovo ya Papeenu wa pinkuuni.

² “Nakataalikha, amana mwinkha zimola mwihihuule nlope khusala mwilaleya, nkhamma anrettaazo manaafikhi mmasinakooka na mmaliinya, atakhaka yoori asifwiwe pi akina aya. Miiyo kiniuuza khweele yoori yo apokhera tthuovo yaya. ³ Ila amana weeyo winkha zimola, nkhone awo nkha ohijuwe etthu orettiyeewo nkhone nlume awo, ⁴ yoori zimola yawo yiye siiri. Toowo, Papaawo otule anoonaaye epile enrettiwaaye sirini, ontta wuutthuva.

Nanna ya olompa

⁵ “Na amana mwilompaka, mwihiyi nkhamma manaafikhi. Yo owaatuvela weemela khusala alompa nsinakooka, mmatarikhi, atakhaka yoori ooniwe

pi akinoko aya. Miiyo kiniuuuzani khweele yoori yo apokhera tthuvo yaya. ⁶ Ila amana weeyo olompaka, weette okatthi wawo ofuke nlako awo, onvekele Papaawo ahinooneyaaye. Aphano, othuuto onta wuutthuva. ⁷ Na amana olompaka, khahiyorutela mattakhuzi mamoteru ooheleyi swaafu zawaatta, nkhamanrettaazo amalapo. Yo anaakhipwela yoori mwaasa wa waattisa ottakhula Nluku ti aniwaasiilaavo. ⁸ Mwihiye nkhamatthaapo, maana khabula mweeyo mwhinaveke Papeenu onretta ajuwe etthu mwini-hithajyaaye. ⁹ Nakataalikha, mweeyo amana mwilompaka mwisala mwiri toono:

‘Papeetthu oriye pinkuuni,
littithimisiwe nzina lawo loottakatthifu,
¹⁰ wiishushe ofwalume awo,
mattakhelo awo arettikhane
vathi apha nkhamanethiipo enrettikhanaazo otulu!
¹¹ Oninkhe wakhula siikhu ethu-yoojiwa ninihithajyaaye.
¹² Oniswaamihi koosa zeethu nkhamanethiipi na-fweyo nininswaamihaaye
wakhula otule annikosaaye,
¹³ na ohinilikhelele nizayiniwaka,
ila nuusuru khwa ntakhali,
[maana ofwalume, owahi,
na siifwa zooshi pi zaho, mileele. Amiina.]’

¹⁴ Maana amana mwiwaaswaamihi anaatamu koosa zaya, Papeenu wa pinkuuni naye ontta wuuswaamihini, ¹⁵ ila amana mwhiswaamihanaka, Papeenu wa pinkuuni naye khanuuswaamihini koosa zenu.

Ofuka

¹⁶ “Amana ofuka, ohithoonyeze wuuso wa huzuni nkhamanrettaazo manaaafikhi, yo antta ozukulisa wuuso aya yoori akina aya apatthe ojuwa yoori afuka. Miiyo kiniuuuzani khweele yoori nooretta toowo apokhera tthuvo yaya. ¹⁷ Ila weeyo amana ofuka, osala woosa wuuso awo, na khushamula nyuuli zaho, ¹⁸ yoori akinoko ahijuwe yoori wafuka, ila Papeenu, anoonaaye vitthu za siiri, ye ontta ojuwa yoori wafuka na othuuto ontta wuutthuva.

Maali pinkuuni

¹⁹ “Ohikusanye maali vathi apha, oriivo oshuwa, na kuuthu enwahaaye oharipu, na ariivo manantarawu oophenya khwiya. ²⁰ Ila okusanye maali pinkuuni, ottuukho oshuwa na kuuthu ehinwahaawo oharipu wala nantarawu ahimpheyelaawo khwiya. ²¹ Maana attaapho eniiyaavo maali zaho, rooho yaho nayo eniiya attaapho.

²² “Maasho khantteya ya mwiili. Amana maasho awo eeya ooshwapweya, mwiili awo oniiyana nuuru; ²³ ila amana maasho awo eeya oohishapweyi, mwiili awo wooshi oniiya n'yiiza. Nakataalikha, amana nuuru oriinaaye ezukuluwa yiiza yiiza yaya eto eniiya khuluyeeene!

²⁴ “Khaavo ntthu anwahaaye owaarumeyela a mbwana awiri, mwaasa yoori ontta omwiiphirisa mmote, antovelise otu nkina; ama oniiya wa waamineya khwa otu mmote, antarawu otu nkina. Khinwaheya onrumeyela Nluku na nzurukhu.

Tafwawuthi za ohaayi

²⁵ “Tiito, kiniuuuzanini yoori: Mwihiye woovelavelela ohaayi enu, khwa etthu-yoojiwa ama yoonywiwa; wala mwiili enu monkoni wa etthu ya

owala. Ohaayi enu waziti etthu-yoojiwa. Na mwiili enu waziti kuwo. ²⁶ Mwiwoone anyannyi otulu: Khanzala, khanuurula wala khana sakafu; ila Papeenu wa pinkuuni oniwaajisa. Nakataalikha mweeyo mwinaaye fwayita zayita anyannyi. ²⁷ Paani wa mweeyo anwahaaye weekezelaa mansha awe hatha nkhamma eetta oshukulikhela?

²⁸ Khi mwinvelavelane kuwo? Moone nanna enwulaazo miitthi za ntthuttu na maluwa aya: yo khazinkhola khaazi, wala khazinsona. ²⁹ Ila wekhweele miiyo kiniwuuzani yoori, Seleyimaana na oshapweya wawe khawaleeni kuwo zooshapweya nkhamma maluwa apa. ³⁰ Moone, Nluku onwalisa nyaani za ntthuttu leelo ziniyaavo meesho khulukuziwa, onuwalisani mweeyo channu atthu oopushuwa amini! ³¹ Nakataalikha mwhishukulikh, mwiraka: ‘Ninja niini?’ Ama ‘ninnuya niini?’ Ama ‘ninala niini?’ ³² Maana amalapo pi anshukulikhelaaye vitthu nkhamma epo; ila Papeenu ariye pinkuuni onjuwa yoori enuuhithajiyani epo zaya. ³³ Apho, mweekese khapula Ofwalume wa Nluku na shariya yaya, zooshi epo mwintta winkhiwa. ³⁴ Nakataalikha mwhishukulikheli siikhu ya meesho, maana meesho entana tafwawuthi zaya. Wakhula siikhu eniiyana otakhala waya.

7

Omphuka Nzaawo

¹ “Mwihimphuke nzeenu yoori mwihiphukiwe. ² Maana khwa khiima ethiito omphukanaaye, na-weyo omphukiwa khwa khiima ethiito; mphimo otthuupo onrumeyelaaye owaaphimelanaka azaawo, na-yo anuuphimelana otthuupo.

³ “Mwaasa aya niini woonaka etutu eriiye mmaasho wa ttwiyo, ila khuhooni lipikhi liriye mmaasho mwawo? ⁴ Nanna-ni onimuzaaye ttwiyo yoori: ‘Kintakha kuulaze etutu eriiye mmaasho mwawo,’ khupe weeyo orina lipikhi mmaasho mwawo? ⁵ Naafikhi! Olazemo khapula lipikhi liriye mmaasho mwawo, aphano ontta woona saaneene khuwahi olazamo etutu eriiye mmaasho wa ttwiyo.

⁶ “Mwihiwenkhe vitthu ttakatthiifu anapwa, antta wuuzukuluwelani na oolumeni, wala mwiheeselele kuluwe mawe ootafikhana mwirettaru toowo entta oluwatthela.

Nthiti khwa lompa

⁷ “Mwiveke, mwintta winkhiwa; mweekese, mwintta opattha; mwipiye nlako, mwintta ofukuleliwa. ⁸ Maana wakhula anvekaaye oninkhiwa, aneekesaaye ompattha, ampiyaaye nlako ontta ofukuleliwa.

⁹ “Paapa-ni mmote wa mweeyo, anraaye mwanawee anvekeliye phaawu khumwinkha liwe? ¹⁰ Ama anvekeliye swi khumwinkha nyookha?

¹¹ Mweeyo mwa atthu ootakhala rooho, mwinjuwa Owenkha vitthu zooshapweya aaneenu. Papeenu ariye pinkuuni, atepa Owenkha vitthu zooshapweya apale aninvekelaaye. ¹² Wakhula etile enuutuvelaanini oretteliliwa, na-mweyo mwiwaarettele etthiipo azeenu, maana kano na manapiyu anlupa etthiipo.

Milako Zoophunyeya na Milako Zootaphuwa

¹³ “Mwivire nlako woophunyeya, maana nlako nwulweene na tarikhi yoomwazeya eninlokoza ntthu motthooni, enkeene anvira nlako otthuupo.

¹⁴ Tarikhi na nlako oninkhaaye ohaayi wa mileele ntthiiru, na atthu vattithiiru ti anttelaaye oviravo.

Muutthi na mishumo zaya

¹⁵ “Phoole na manapiyu oojipanka, yo anuuteelani mweeyo awaliye shapala ya pwittipwithi, ila nkattti ari miiji zoluma. ¹⁶ Khwa mishumo zaya mwintela owaajuwa. Khunshumeya wuuva mmiwa, wala mmuyu khinshumiwamo ekhuwa. ¹⁷ Khwa ethiipo wakhula muutthi wooshapweya oniima mishumo zooshapweya, na muutthi wootakhala oniima mishumo zootakhala. ¹⁸ Khinretteya muutthi wooshapweya wiima mishumo zootakhala, wala muutthi wootakhala wiima mishumo zooshapweya. ¹⁹ Wakhula muutthi ohiniimaaye mishumo zooshapweya ontta oshijiwa khweeseliwa va moottho. ²⁰ Khwa ethiipo mwintela owaajuwa khwa mishumo zaya!

²¹ “Khahiyo ooshi apale anikiitthaaye yoori: ‘Mbwana, Mbwana,’ anttelaaaye weettamo muufwalume wa pinkuuni, ila otule anrettaaye matakhelo a Paapa ariiye pinkuuni. ²² Amana efiya siikhu yaya eto enkeene, anlawa akuuze yoori: ‘Mbwana, Mbwana! Fweeyo nahupiri khwa nzina lawo, neekara masheethwani khwa nzina lawo, na khwa nzina lawo narettta minjuza.’ ²³ Aphano miiyo kilupe saaneene yoori: ‘Akuujuweenini. Mwikisuse, anamarettta zootakhala.’

Njuwi na nlolo

²⁴ “Wakhula otule ansiilaaye ntakhuzi laka na khushututela onlattisaniwa ntthu wa akhili ajekiye nyuupa yawe khuthipa khuttha vanchina la mawe; ²⁵ khunya vuula, khwiitaaza nyuuttho khuvuma pheevu khusakhinya nyuupa etile, khuhikwi, maana nchina laya laari va mawe. ²⁶ Wakhula otule ansiilaaye ntakhuzi laka khuhishututeli onlattisaniwa ntthu woololo ajekiye nyuupa yawe va nshaka; ²⁷ khunya vuula, khwiitaaza nyuuttho, khuvuma pheevu khupiyya nyuupa etile, khupwaluwa, khupwecheya”.

²⁸ Wakathi Yinsa eeshiyeevo ottakhula, khuntti epile khwiya zootikiniwa khwa masomi awe, ²⁹ maana aari osomisa nkhamma ntthu ariinaaye ofwalume, woohiiyi nkhamma anamanozela a kano.

8

Ovoniwi wa namaaharaja

¹ Wakathi eeshukhiyeevo va mwaako, khuntti khuluyeene yeetta onlotta.

² Nasaapiru khuta namaaharaja mmote khumwaattama, khumwaaputu akokhoriye khulupa yoori: “Mbwana, onwahi okitwaharesha!”

³ Yinsa khookola nkono awe, khunsapa khuri: “Katakha, ti otwahareshey!” Nasaapiru ye khwiya wootwaharesheya khwa maaharaja. ⁴ Aphano Yinsa khumuuzu yoori: “Vitthu epi ohinhatalele hatha ntthu. Ila olawe, wajithoonyeze wa namalokozela a tiini na olaze zaakha etile Munsa alupiyeeyo yoori yiiye oshaahiti.”

Najanka wa Rooma onthonyeza amini yawe

⁵ Wakathi Yinsa afiyeevo sitati ya Kafwaranaawu, eetta oteeliwa ti nt-tunkhulu wa anajanka, anvekelaka yoori amwaawuni. ⁶ Khumuuzu yoori: “Mbwana, karumeya aka ori onti, onaaye supiyaani, ontta ohoocheya venkivene.”

⁷ Yinsa khumuuzu yoori: “Miiyo kinlawa kanvonise.”

⁸ Nttunkhulu wa anajanka otule khunjipu yoori: “Mbwana, miiyo akin-suhi wuupokherela vaje vaka. Ila olupe ntakhuzi limote paasi, karumeya aka ontta ovona. ⁹ Maana na-miyo ki ntthu kiriiye vathi wa ofwalume na ki nlokozi wa anajanka. Kinimuuzu mmote yoori: ‘Olawe,’ khulawa;

khumuza nkina yoori: ‘Ote,’ ye khuta. Kinimuza karumeya aka yoori: ‘Orette khata,’ ye khuretta.”

¹⁰ Yinsa noosiila epo zaya, khushanka, khuwooza apale aari onlottaaye yoori: “Kiniwuuzani khweele: Akinsikaneeni Ezirayiilu ntthu ariina amini nkhamma eti. ¹¹ Miiyo kiniwuuzani, atthu enkeene a khipula na malawa-juwa, anttela wiikhala va meeza na Eburahiima, Esiyaakha, Yaakhumpa muufwalume wa pinkuuni. ¹² Ila apale aari weettelaaye orithi ofwalume wa Nluku anttela weeseleliwa oje, n’yiiza nhali ontelaaye wiiyamo olila na oluma meeno.”

¹³ Yinsa khumuza nttunkhulu wa anajanka otule yoori: “Olawe owawo, entta orettikhana nkhamma etthiipo okhupaliyeozo.” Wakathi otthuupule karumeya awe khwiia woovona.

Owahi wa Yinsa monkoni wa masheethwani na marati

¹⁴ Yinsa khweetta owawe Pheeturu ottuukho khumoona nkhewewe Pheeturu arapaleliye ari nlwele hooma. ¹⁵ Yinsa khunsapa nkono awe, hooma etile khumwiisha. Khulankha khusala anrumeyela.

¹⁶ Paata ya otupweela njuwa, khutiiseliwa anamasheethwani awaatta, ye khusala eekara masheethwani khwa nttakhuzi lawe khuwaavonisa alwele ooshi. ¹⁷ Khwa etthiipo khurettikhana epile zaalupiweeyo ti napiyu Ezaaya yoori:

“Ye athuula marati etthu
na apwechera moolwele etthu.”

Onlotta Yinsa, etthu yoolipa!

¹⁸ Yinsa noowoona atthu awaatta anzukuleliye, khuwaaruma anakhiyonи awe olkhela kaapu ya ntthatta. ¹⁹ Aphano namanozela wa kano mmote khumwaattama khumuza yoori: “Mwaaliimu, kintta wuulotta wakhula vahali oneettaavo.”

²⁰ Yinsa khunjipu araka: “Ananthala anaaye maphotto aya anyannyi anaaye vijaaro zaya, ila Mwaana wa Pinaatamu khana vahali woovumulisavo eeshwa yawe.”

²¹ Nakhiyonи awe mmote khuri: “Mbiana, waaze okilikha kilawe kanzikhe paapa.”

²² Yinsa khujipu araka: “Okilotte, owaalikhe ananfwa awaaazikhe ananfwa aya eenyewe.”

Yinsa onnyamaza pheevoo yawaatta.

²³ Yinsa apakhiriyeovo mmwaatiya anakhiyonи awe khunlotta.

²⁴ Nasaapiru, pheevoo yawoopisa khusala evuma mpahari, mwaatiya khusala ozamisiwa ti mawipi, Yinsa ettaka olala. ²⁵ Anakhiyonи awe khunsusela khusala anlansa, ankhuwelaka araka: “Mbiana, onuusuru nasaleela ofwa!”

²⁶ Ye khuwoozela yoori: “Mwinoovani? Atthu oopushuwa amini!” Ye khulankha khushowera pheevoo etile na pahari, zooshi khunyamala. ²⁷ Ooshi khusala ashankiye na khulupa yoori: “Otu aya paani hatha anrumaaye pheevoo na pahari khunshututela?”

Yinsa oniwaavonisa atthu awiri aashinttiweeyo ti masheethwani

²⁸ Wakathi afiyyeovo phantte kiina, ya Jerazeenu, khunteela anamasheethwani awiri, alankhiyeovo ovilalo. Yo aari oowali, khina aari oviraaye tarikhi ya etile. ²⁹ Aphano, yo khusala anyakula araka: “Onnitakhelani fweeyo,

Mwaana wa Nluku? Wata okhuno oteela onoopopisa, ohinafiye wakathi aya?”

³⁰ Kharipu ya aphale vaya laarivo liphanko la kuluwe. ³¹ Aphano masheethwani apale khunvekela Yinsa yoori: “Nkhama onniikara, oniikarile nliphanko la kuluwe.”

³² Yinsa khulupa yoori: “Apho mwilawe!” Masheethwani apale khulawa khweetta nkuluwe, liphanko looshi khwiishukela va ntthatta khut-tuluwa khufwa. ³³ Atthu apale aari oshukaaye kuluwe epile khutthira khulawa mmuti, khulupa zooshi mpakha epile zaarettikhaniyeeyo khwa anamasheethwani apale awiri. ³⁴ Atthu ooshi a mmuti mphule khusala alawa okutthanana Yinsa, nonsikana, khunvekela amuuzaka yoori aleemo mmuti mwaya.

9

Yinsa oninvonisa nasupiyaani

¹ Yinsa noopakhira mmwaatiya, khulokha ntthatta khweetta sitati ya owawe. ² Khutiisiwa nasupiyaani attattikheliwe va nrepa. Wakathi ooniy-eovo amini ya atthu apale antiisiyeeyo, khumuza nasupiyaani otule yoori: “Ominyale, mwanaka! Twampi zaho zaswaamihwa.”

³ Noolupa toowo anamanozela a kano khwaaza waapa araka: “Ntthu otu ontta okufuru!”

⁴ Yinsa noojuba etthu aari wuupuwelaaye yo, khuwooza yoori: “Mwaasa wa niini mweeyo muupuwelaka nroho mwenu vitthu zootakhala? ⁵ Apho yookhwuya ti tiivi? Olupa yoori: ‘Waswaamihwa twampi zaho,’ ama olupa yoori: ‘Olankhe weettette?’ ⁶ Mwijuwe yoori Mwaana wa Pinaatamu onaaye ruhusa ya oswaamihwa twampi vathi apha” khumuza nasupiyaani otule yoori: “Olankhe, othuule nrepa lawo olawe owawo.” ⁷ Khulankha khusala alawa owawe. ⁸ Paata ya atthu woona vitthu epile khuwaapattha woova, khunsifu Nluku, awenkhiyeeyo anaatamu ofwalume nkhamo opo.

Okhuweliwa wa Matewuzhu

⁹ Elottelanaka Yinsa khulaawo okhule waya, khumoona mwinyi mmote aniitthiwaaye Matewuzhu eekhaliye ariphisaka lumpuru, khumuza yoori: “Okilotte!” Ye khulankha khunlotta.

¹⁰ Yinsa eekhaliyevo va meeza owawe Matewuzhu, anamariphisa lumpuru enkeene na anatwampi aatiye khwiikhala attaapho vamote na anakhiyoni awe. ¹¹ Mafwarizeewu nawoona toole khuwoozela anakhiyoni awe araka: “Mwaasa wa niini mwaaliimu enu ajaka na anamariphisa lumpuru na anatwampi?”

¹² Yinsa noosiila, khulupa yoori: “Akumi khaninhithajiya tothoro, ila alwele. ¹³ Mwilawe mwanzeliwe maana a nttakhuzi linlupaaye yoori: ‘Kintakha tthakaraka, khahiyo twaha.’ Maana miiyo akawaateeliye anashariya, kawaateeliye anatwampi.

Yinsa ontta wuuzeliwa monkoni wa ofuka

¹⁴ Aphano khuta anakhiyoni a Yaahaya omuuzela yoori: “Fweeyo na mafwarizeewu ninfuka, khi anakhiyoni awo ahisala afuka mwaasa wa niini?”

¹⁵ Yinsa khujipu yoori: “Enretteya toovi ofuka anamalaleyiwa harus, namaposa ari attaapho? Zinlawa zafiye siikhu anttelaaaye othuuliwa mposi, na siikhu zaya ethiipo anlawa afuke.

¹⁶ “Khina antthaaye yaapa ya tarapu pheeya kuwo ya raku, maana entta ofutthela kuwo etile evaruve. ¹⁷ Wala khinthuliwa viinyu pheeya khutthiiwa ntompwiyo ya shapala ya raku, nooretta toowo entta ophutuwa, viinyu yiittikhe, ttompwiyo yaya eharipweye. Ila viinyu pheeya entthiwa ntompwiyo pheeya, na toowo zoopiiri zintta opweheya.”

Owahi wa Yinsa monkoni wa olwele na ofwa

¹⁸ Ettaka ottakhula ethhiipile, khutavo ntunkhulu wa tiini, khunkokhorela na khumuza yoori: "Mwanaka wankha afwa nasaapi ethiiti; nlawe want-theele nkhono ontta osisimuwa." ¹⁹ Yinsa khulankha khusala anlotta na anakhivoni awe.

²⁰ Attaaphale, aarivo muukha mmote aarina nyaakha khumi na miwiri emwiittikhaka taamu, khuta onyoko wa Yinsa khusapa ajapi yawe. ²¹ Maana ye eettiye ojilakelela yoori: "Kisaparu ajapi yawe paasi, kintta ovona."

22 Azukuluwiyeovo Yinsa khumoona khumuuya yoori: “Ofurahi, mwanaka wankha; amini yawo yoovonisa. Wakathi otthuupule muukha otule khwiiya woovona”.

²³ Afiiyevo owawe ntunkhulu wa tiini khuwaasiila atthu eepaka liipo la miifwa na enkeene ari ootapanyeya, ²⁴ Yinsa khuwooga yoori: "Mwisaruwe! Otu khafweeni, ontta olala." Ooshi khusala antheya. ²⁵ Paata ya atthu apale osusa, ye khuvira khunkholela nkhono, khunlansa. ²⁶ Hapari epile khumwazeyela nti opule wooshi.

Ovonisiwa wa ananhooni awiri na mmote woohittakhuli

²⁷ Noolaavo aphale vaya, ananhooni awiri khusala anlotta akhuwaka araka: "Mwaana wa Daawuuda, noonele huruma!"

²⁸ Yinsa noofiya owawe, ananhooni apale khumwaattama, ye khuwoozela yoori: "Mweeyo mwinkhupali yoori miiyo kinaaye owahi wa oretta epo zaya?" Yo khujipu yoori: "Ayo, Mbwana!" ²⁹ Yinsa khuwaasapa maasho aya araka: "Erettikhane khwa matakhelo amini yenu!" ³⁰ Maasho aya khwiyya oovona. Aphano Yinsa khuwooza na kuvu yoori: "Phoole ahiiyeko anttelaaaye ojuwa epi." ³¹ Yo khulawa, khumwaza hapari zawe epile nti opule wooshi.

³² Paata ya olaavo aphale, namasheethwani ahaari ottakhulaaye khutiseliwa Yinsa. ³³ Noomwiikara sheethwani otule, ye khwaaza ottakhula. Khuntti etile khwiiya yooshanka na khuri: "Khinarettikhane vithu nkhamma epi Ezirayiilu.

³⁴ Ila mafwarizeewu aari olupa yoori: “Oniikara masheethwani khwa owahi wa mfwalume wa masheethwani.”

Anakhaazi vattithiiru

³⁵ Yinsa aari weettetta sitati zooshi na mmwanttiwa. Ye aari osomisa mmasinakooka, na olaleya hapari monkoni wa ofwalume wa Nluku, na ovonisa wakhula nanna ya marati na moolwele mawulweene a atthu.

³⁶ Paata ya woona khun̄ti zawaatta, khoonela huruma, maana zaari zoovelavela na zawanswiwa, nkhama pwittipwitthi zoohiina nshuki.

³⁷ Aphano khuwooza anakhiyoni awe yoori: "Wuurula nwulweene, ila anakhaazi vattithiiru. ³⁸ Apho, mwinvekele Mweenyewe w提醒你。" awaaperekhe anakhaazi a w提醒你。

10

Yinsa oniwaaruma anakhiyoni awe khumi na awiri

¹ Khuwaakkhuwela anakhiyoni awe apale khumi na awiri, khuwenkha owahi wa wiikara masheethwani, na ovonisa moolwele na marati ooshi.

² Apa mazina a anakhiyoni khumi na awiri: Wamwanzo, Simawu, anjuwaniwaaye nzina la Pheeturu, na ttwiye Antere; Tiyaaku, mwaana wa Zepeteewu, na Yaahaya ttwiye; ³ Filipe na Paturumeewu; Tome na Matewuzhu, namariphisa lumpuru; Tiyaaku mwaana wa Alufeeyu, na Tadeewu; ⁴ Simawu Želooti, na Yuuda Eshikariyoote, othuuto anzinkuliyeyo.

⁵ Yinsa khuwaaruma apale khumi na awiri na khuwooza yoori: “Mwiheette wa amalapo, wala mwiheette hatha sitati moote ya a Samariiya. ⁶ Ila khapula mweettele pwittipwitthi zawaashikha za Ezirayi-ilu. ⁷ Wakhula vahali mwineettaavo, mwitafusiri hapari epi mwiraka: ‘Ofwalume wa pinkuuni ori kharipu!’ ⁸ Mwiwaavonisaka anamarati, mwiwaasisimulaka ananfwa, mwiwaatwahareshaka anamaharaja, mwiikare masheethwani. Mweeyo mwapokhera mahala na mwina yawinkha mahala. ⁹ Mwihihule hatha thahapu, wala feeta, wala khoopiri mmwizako mwenu; ¹⁰ Mwihihule hatha kuwo kiina, wala jampali, wala pakhora, maana nakhaazi eninsuhi wiyyana etthu yoojiwa yawe.

¹¹ Na wakhula sitati ama mmwanttiwa, mwimweekese ntthu woojishitahi, mwiikhale owawe othuuto mpakha malawelo enu. ¹² Amana mwivira nnyupa, mwichelise. ¹³ Nkhama attu a nyuupa etile eeya oosuhi, heeri yenu mweeyo yiye vamote na-yo; amana ahisuhi, heeri yenu ti yuuruteleni. ¹⁴ Amana ntthu ahuupokherelini na khuhitakhi osiila mattakhuzi enu, mwitathe lifufu la mmoolu mwenu mwileemo nnyupa mwaya mphule ama nsitati mwaya mphule. ¹⁵ Miiyo kiniuuuzani khweele yoori, siikhu ya ophukiwa enttela wiyyavo tthakaraka khwa Sotooma na Komoora zayita sitati ya eto.

Olupathiwa na ohoowa

¹⁶ “Miiyo kinuurumi mweeyo nkhamma pwittipwitthi vakatthi wa miji; nakataalikha mwiye alavilavi nkhamma nyookha na oohiina zootakhala nkhamma jiwa. ¹⁷ Mwiiyane phoole, maana attu anlawa oottheni nnyupa woophukaniwamo na wuujaphani mmasinakooka mwaya. ¹⁸ Mwaasa wa miiyo, mwinlawa mwalawaniwe vakatthi wa misatoro na afwalume, yoori wiyye oshaahiti anttelaaye orumeyela, yo na amalapo monkoni wa hapari zaka. ¹⁹ Ila amana oofukelani, mwihihanke etthu yoolupa, ama yooretta. Wakathi aya opo, Nluku ontela owinkhani mattakhuzi olupa, ²⁰ maana khahiyo mweeyo mwintelaaye ottakhula, ila Rooho ya Papeenu ti enttelaaye ottakhula khwa mweeyo.

²¹ “Twii mmote onlawa anleve ttwiye yoori ooliwe, na paapa onleva mwanawe; aana anlawa awaazukuluwele apapa zaya na awoole. ²² Atthu ooshi anttela owiinani mwaasa wa miiyo, ila otule anttelaaye ovilela mpakha mwiisho ontta wuusurukha. ²³ Amana mwifiya nsitati khulupatthiwa, mwitthirele sitati kiina. Weekhweele miiyo kiniuuuzani yoori khamwintela wiisha ozukulela Ezirayiilu yooshi Mwaana wa Pinaatamu ahiteeni.

²⁴ “Nakhiyoni khaninziti mwaaliimu awe, wala karumeya khaninziti mbwana awe. ²⁵ Nakhiyoni ona yoofurahi amana anfiyela mwaaliimu awe, na karumeya amana anfiyela mbwana awe. Moone, amana mweenyewe nyuupa attukhaniwa khutthajiwa Belezibuuli, khi ajamaaze khatepeeni!

²⁶ “Nakataalikha mwihiwoove apo aya. Khayiivo yoottiyeleliwa ehintee-laaye othoonyeziwa wala yoovithiwa ehinteelaaye ojuwiwa. ²⁷ Eti kiniuuzaani n'yiiza mwilupe nthana. Na etile mwisiiliyeeyo sirini mwaamuuze vatulu wa nyuupa. ²⁸ Mwihiimoove otule anuulaaye mwiili, ahina owahi

wa wuula nafusi. Khapula mwimoove otule anwahaaye otapanya mwiili na nafusi khweeselela motthooni. ²⁹ Anyannyi awiri anuuuzanyiwa nzurukhu mmote, ila khina mmote ankwelaaye vathi Papeenu ahitakheeni. ³⁰ Hatha nyuuli za mmwishwa mwenu zooshi pi za waalakiwa. ³¹ Nakataalikha mwihoove! Mweeyo mwinaaye fwayita zayita anyannyi.

³² "Wakhula otule antukhurwaaye yoori ti waka vakatthi wa atthu, na miiyo kintukhuru khwa ye, vakatthi wa Paapa ariiye pinkuuni. ³³ Ila otule anikikatthalaaye vakatthi wa atthu, na miiyo kinttela onkatthala vakatthi wa Paapa ariiye pinkuuni.

34 "Mwihaakanyere yoori miiyo katiisa heeri voolumwenku; akitiseeni heeri, katiisa phanka. 35 Miiyo kata yoori oomane mwaana na papaawe, mwaana wankha na mamaawe, namaraliwa na nkhwewe. 36 Maatuwi khaamili a ntthu anlankha vakatthi wa ajamaaze. 37 Otule animphetaaye mamaawe ama papaawe zayita miiyo khansuhi wiiya namalottela aka; otule animphetaaye mwanawe zayita miiyo, khansuhi wiiya namalottela aka. 38 Otule ahinvikelaaye nsalapa awe akilotta, khansuhi wiiya namalottela aka. 39 Otule aneekesaaye ohaayi awe ontta omwaashikha, na otule on-imwaashikhaaye ohaayi awe mwaasa wa miiyo ontta opattha.

Tthuvo

⁴⁰ "Wakhula otule anuupwekherelaanini akipwekherela miiyo, na otule anikipwekherelaaye ampwekherela otule akirumiyeeyo. ⁴¹ Otule animpwekherelaaye napiyu mwaasa wa ye wiiya napiyu, ompwekhera tthuvo ya napiyu; otule animpwekherelaaye nashariya mwaasa wa ye wiiya nashariya, ompwekhera tthuvo ya nashariya. ⁴² Na wakhula otule animwinkhaaye nsimaana hatha nkhamakoopho ya maati oozizima, mwaasa wa ye wiiya nakhiyoni aka, kiniwuza khweele yoori oto aya onlawa apwekhere tthuvo yawe."

11

Yinsa na Yaahaya namoosa

¹ Paata ya wiisha owaanozela anakhiyoni awe khumi na awiri, Yinsa khusala alawa osomisa na otafusiri sitati za Kalileya.

² Yaahaya, paata ya osiila ari nkalapooso vitthu aari orettaazo Al-Masiihu, khuwaaruma anakhiyoni awe olawa omuuzela yoori: ³ “Ti weeyo otule aari weettelaaye ota, ama nimweekesele nkina?”

⁴ Yinsa khuwaajipu araka: "Mwiruti mwamuuze Yaahaya epi mwin-siilaaye na mwinoonaaye: ⁵ Ananhooni anoona, anamarakala aneettetta, anamaharaja antta otwahareshiwa, ananhisiili ansila, anafwa an-sisimuwa, na hapari zooshapweya antafusireliwa asikhini. ⁶ Ooparikhiiyiwa pi apale ahinikoonanaaye hatha etthu ya owaakwakwanttula."

⁷ Aphano noolaavo anakhiyoni apale a Yaahaya, Yinsa khusala oozela khuntti etile monkoni wa Yaahaya yoori: "Mweetteliye woona-ni n'yaara? Ttekethe yiinisiwaka ti pheeve? ⁸ Ama, mweetteliye omoona ntthu awaliye kuwo zooshapweya? Moone, apale anwaalaaye kuwo zooshapweya ani-ikhala mmanyupa wa afwalume! ⁹ Nka khuuzeni, mweetteliye woona niini? Napiyu? Wekhweele, miiyo kiniuuuzani yoori anziti napiyu. ¹⁰ Otu ti otule yaatikhiweeyo monkoni wa ye yoori:

‘Moone, kinlawa kamperekhe karumeya aka omaasho wawo;
yoori atthenkeze tarikhi yawo.’

¹¹ Kiniuuuzani khweele yoori: Khwa aana ooshi avokoliweeyo ti aakha, khanpuweenivo hatha mmote wonziti Yaahaya Namoosa. Ila woopushuwa

muufwalume wa pinkuuni nwulweene zayita ye. ¹² Waaza siikhu za Yaahaya Namoosa mpakha leelo, Ofwalume wa pinkuuni ontta woojopholiwa, apo aya anjopholaaye anthuula. ¹³ Maana Manapiyu ooshi na Kano za Munsa za ahupiri mpakha yenzi ya Yaahaya. ¹⁴ Na amana mwitakha okhupalela, ye ti Aliyaasi otule aari weettelaaye ota. ¹⁵ Otule ariina mashiilo ti asiile!

¹⁶ “Khapila eti kilattanisane niini? Enlattanana asimaana eekhaliye va parasa eettaka osheza na onyakula na ashirikha aya:

¹⁷ ‘Fweeyo noovumiselani kuruneetha,
 ila mweeyo khuhiiini;
khwiipa liipo la huzuni,
 ila mweeyo khuhilili.’

¹⁸ Khuta Yaahaya woofuka na ahinnywaaye viinyu, mweeyo mwinri: ‘Ye on-aaye masheethwani!’ ¹⁹ Ata Mwaana wa Pinaatamu anjaaye na annywaaye, mwinri: ‘Otu nsokho na nnywachi, nshirikha wa anamariphisa lumpuru na anatwampi.’ Ila ojuwa onthoonyezeya khwa khaazi onikholeliwaaye.”

Phoole khwa sitati zihinthupwiyaaye

²⁰ Aphano Yinsa khwaaza omaruwela sitati epile aviriyeemo khurettamo minjuza zawe zawaatta, maana atthu aari wiikhalaamo khathupwiyiye. ²¹ “Phoole weeyo, Korazini! Phoole, weeyo Betezaiita! Maana eriwaka Tiiru na Sitooni zeettiye orettiawo minjuza epi mwiretteliweeyo mweeyo, apale aniikhalaaye ottuukho nka athupwiye raku, khuwala saakhu na khujivaaza fuutha! ²² Ila miiyo kiniwuuzani yoori siikhu ya ophukiwa enteela wiiyavo tthakaraka khwa Tiiru na Sitooni zayita mweeyo. ²³ Khi weeyo Kafwaranaawu, ontela oweziwa mpakha pinkuuni? Wala, weeyo ontela weeseleliwa motthooni! Eriwaka minjuza zirettiweeyo vakatthi vavo zeettiye orettiwa Sotooma, zaari weettela opharelela mpakha leelo. ²⁴ Ila miiyo kiniwuza yoori siikhu ya ophukiwa enteela wiiyavo tthakaraka khwa Sotooma zayita weeyo.”

Ovumula wa apale ooshokhera

²⁵ Wakathi otthuupule Yinsa khulupa yoori: “Miiyo kinuusifu Paapa, Mbwana wa pinkuuni na vathi, maana weeyo wawaavithela vitthu epi ajuwi na asomi, na khuwaathoonyeza apa attiitthi. ²⁶ Khweele, Paapa, ti nanna waatakhiyeezo. ²⁷ Vitthu zooshi kenkhiwa ti Paapa. Khina aninjuwaaye Mwaana woohiiyi Paapa, na khina aninjuwaawe Paapa woohiiyi Mwaana na otule mwaana anintakhelaaye yoori anthoonyeze. ²⁸ Mwikiteele miiyo mooshi mweeyo mwiiyiye ooshokhera na oolemeliwa, miiyo kintta wuvumulisani. ²⁹ Mwithuule tthentte yaka na mwikeezele, maana miiyo kiwoonyamala na woojipushuwisa nroho, mweeyo mwintta opattha ovumula wa nafusi zenu. ³⁰ Maana tthentte yaka ti yookhwuya na mapwattha aka pi ooveya.”

12

¹ Wakathi otthuupule Yinsa khusala avira mmashapa wa tiriku, siikhu ya saapatu. Anakhiyonи awe khuwaakhola jala, yo khwaaza okathula misasi za tiriku arafunaka phunje zaya. ² Mafwarizeewu nawoona epile zaya, khuuuza Yinsa yoori: “Owoone anakhiyonи awo anretta etthu ekhattaziweeyo orettiwa saapatu.”

³ Ye khujipu araka: “Mweeyo khamwisomeeni etthu arettiyeeyo Daawuada wakathi ye na ashirikha awe aakholiweeyo jala? ⁴ Ye eettiye Nnyupa ya Nluku, khurafuna phaawu na ashirikha awe enkhiweeyo Nluku, etthu yahaari otakhisiwaaye orettiwa, ila aariina ruhusa yooretta aari mahaakhimu a tiini paasi. ⁵ Ama mweeyo khamwisomeeni nkano za Munsa yoori saapatu, anamalokozela a tiini aavonyiye kano Nnyupa Woosifwiwamo, siikhu yaya eto, ila khuhiiна hatha paathuli? ⁶ Miiyo kiniwuza yoori apha ata otu aziyyeeyo Nyuupa Yoosifwiwamo. ⁷ Ila eriwaka mweeyo mwaari ojuwa maana a mattakhuzi anraaye: ‘Kintakha huruma akintakha twaha,’ khamwaari onhukhumu ntthu ahina paathuli. ⁸ Maana Mwaana wa Pinaatamu Mbwana wa saapatu.”

⁹ Khulaavo aphale vaya khweetta nsinakooka yaaya atthaapale. ¹⁰ Nttumphule aarimo mwinyi mmote woorakala nkhono. Aphano attu akina aari otakhaaye onlokoveza Yinsa yoori: “Ti ya halaali monkoni wa kano ovonisa saapatu?”

¹¹ Ye khuwaajipu yoori: “Paani wa mweeyo, amana eeyana pwittipwitthi yawe ekwela valiphotto saapatu, ahinlawaaye okhola alazavo? ¹² Ntthu ona fwayita khuluyeene zayita pwittipwitthi! Nakhataalikha ewaapho ruhusa yooretta etthu yooshapweya saapatu.”

¹³ Aphano khumuza mwinyi otule yoori: “Wookole nkhono awo.” Ye khookola, khuvonisiwa, khwiya sawasawa na opu nkina. ¹⁴ Ila mafwarizeewu apale khusaruwa khusala awaza shawuri za omuula Yinsa.

Karumeya woothawuliwa ti Nluku

¹⁵ Yinsa noojuwa shawuri zaya epile, khulaawo okhule waya. Atthu enkeene khusala anlotta, ye khuwaavonisa alwele ooshi aariivo vakatthi wa atthu aya apale, ¹⁶ na khuwoza yoori ahilupe hatha etthu monkoni wa ye. ¹⁷ Eto yaarettikhaniye yoori eretteye etile yaalupiweeyo ti napiyu Ezaaya yoori:

¹⁸ “Otu ari apha karumeya aka, kinthawuliyeeyo,
 mphetani aka, anfurahisaaye rooho yaka,
kanttheela nafusi yaka,
 ye onteela olaleya ophukiwa wa atthu ooshi.

¹⁹ Khanteela okeetisana wala onyakula,
 khina anttelaaye osiila huula yawe mmatarikhi.

²⁰ Khanteela ovuja ttekettthe yoomanyeya,
 wala khanteela ozimisa mweeke wootthuwela,
mpakha athuule oshintta khwa shariya.

²¹ Amalapo ooshi anttela wiiyana nrromelo khwa nzina lawe.”

Owahi wa Yinsa khwa wiikara masheethwani

²² Paata ya toowo, khutiiseliwa namasheethwani woohooni na khaari ottakhula, Yinsa khunvonisa, khwaaza woona na ottakhula. ²³ Atthu ooshi khwiya ooshanka channu khusala oozelana yoori: “Khahi mwaana wa Daawiuda otu?”

²⁴ Mafwarizeewu akina noosiila toowo khuri: “Otu onikara masheethwani paasi khwa owahi wa Belezibuuli, mfwalume wa masheethwani.”

²⁵ Aphano Yinsa noojuwa etthu aari wuupuwelaaye yo, khuwoza yoori: “Wakhula ofwalume wa waawanyeya khusala wuumana otthuuporu oniyya wootapanyeya, na wakhula sitati ama nyuupa yawaawanyeya ethiitoru khiniiyavo. ²⁶ Nkhama Epiliisi onimwiikara Epiliisi, eetta ojaawanya ot-thweru. Toowo ofwalume awe onteela wiiyavo toovi? ²⁷ Nkhama miiyo

kiniikara masheethwani khwa owahi wa Belezibuuli, khi aaneenu aniikara toovi? Tiito aaneenu atthaapo ti anttelaaye wuuphukani mweeyo. ²⁸ Ila nkhamma kiniikara masheethwani khwa Rooho ya Nluku, eto enthoonyeza yoori Ofwalume wa Nluku woofiyelani.

²⁹ “Ama ntthu onvira toovi nnyupa wa nwali khuthuulamo maali zaweahaazeeni khapula onfuka? Toowo phi oniwahaavo wiiya vitthu za nnyupa mwawe.

³⁰ “Otule ahi vamote na miiyo ontta okumanana, na otule ahinkusanyaaye khwa miiyo ontta omwaza. ³¹ Etthiipo miiyo kiniuuuzani yoori: Twampi na kufuru zooshi za anaatamu zinswamihwi, ila okufurwela Rooho Ttakatthiifu khunswamihwi. ³² Wakhula otule anlupaaye ntakhuzi la omumanana Mwaana wa Pinaatamu onswamihwi, ila otule anttakhulaaye wawumananavo Rooho Ttakatthiifu khanswamihwi, waaza nasaapi eti mpakha okhu ninttaawo.

³³ “Muutthi wooshapweya oniima mishumo zooshapweya, muutthi wootakhala oniima mishumo zootakhala, maana wakhula muutthi onjuwiwa khwa mishumo zaya. ³⁴ Ojama wa nyookha, enretteya mweeyo ootakhala rooho, ottakhula vitthu zooshapweya? Maana milomo enttakhula etile eniyyaaye varoho. ³⁵ Ntthu wooshapweya rooho, mmujuju mwawe ensarulamo vitthu zooshapweya, wootakhala rooho mmujuju mwawe ensarulamo vitthu zootakhala. ³⁶ Ila miiyo kiniuuuzani yoori, siikhu ya ophukiwa, atthu anlawa arettiwe hisapu mwaasa wa mattakhuzi ooshi ohiina fwayita aari olupakaaye. ³⁷ Maana khwa mattakhuzi enu mwinteela wonkokha na khwa atthaapo mwinteela ohukhumwiwa.”

Alama ya Yuunusa

³⁸ Aphano mafwarizeewu akina na anamanozela a kano khulupa yoori: “Mwaaliimu, nintakha woona alama ya minjuza yoorettiwa ti weeyo.”

³⁹ Ye khujipu araka: “Khapila yootakhala na yooraruwa enveka alama ya minjuza, ila khinteela winkhiwa hatha moote ya ohiiyi alama ya napiyu Yuunusa. ⁴⁰ Maana nkhamma etthiipo Yuunusa ekhaliyeeyo siikhu ttatthu nthana na osikhu mmatthupo wa swi, khwa ethiipo Mwaana wa Pinaatamu onttela wiikhala siikhu ttatthu nkhapuri. ⁴¹ Atthu a Neniive anlawa alankhe siikhu ya ophukiwa, ookwiseleni paathuli mweeyo, maana yo athupwiya twampi zaya paata ya osiila tafusiiri ya Yuunusa, na aphano ori apha otule eeyiyeeyo nwulweene zayita Yuunusa. ⁴² N'hano wa Kusini onlawa alankhe siikhu ya ophukiwa ookwiseleni paathuli mweeyo, maana ye alankha peetiwene oteela osiila ojuwa wa Seleyimaana, ila nasaapi otu ariiye apha anziti Seleyimaana.

⁴³ “Amana sheethwani anlawa ntthu, onvira nhali woohiimo maati eeke-saka vhali woovumulavo, ila amana ahipathivo. ⁴⁴ Aphano onri: ‘Kinrutela nyuupa ethiitile kilankhiyeeyo.’ Noofiya khusikana nyuupa eheettiweenimo, ori wooseeliwamo wawaattaleliwamo saana. ⁴⁵ Ontta oruti khulawa khuwaatana masheethwani sapa ootepa otakhala, khweettamo khusala eekhala ntumpho, ntthu otule khweetta wootepa khuziti kхиима etile aariyeeyo raku. Na enttela orekkhana etthiipo khwa khapila eti.”

Maama wa Yinsa na attwiize

⁴⁶ Yinsa nalelo eettaka ottakhula na khuntti etile, mamaawe na attwiize aarettiye ari vaje, antakhaka yoori anttakhulane. ⁴⁷ Ntthu mmote khumuuzi yoori: “Mamaawo na attwiizo ari vaje antakha ottakhulana weeyo.” ⁴⁸ Ye khujipu yoori: “Maama ti paani? Wala attwiizaku ti paani”? ⁴⁹ Khookolela

nkhono awe phantte ya anakhiyoni awe khulupa araka: “Maama na attwizaku pi apa ariiye apha. ⁵⁰ Maana otule anrettaaye matakhero a Paapa ariiye pinkuuni, oto ti ttwiyyaku, nlupwaaka na ti maama.”

13

Nlikaniso wa namazala

¹ Siikhu ethiitile Yinsa khulankha owawe khulawa nshini wa ntthatta. ² Khuzukuleliwa pi atthu awaatta, aphano ye khupakhira mmwaatiya khwiikhala. Atthu apale khweemela vapatari. ³ Ye khusala awaasomisa khwa milikaniso, araka: “Namalima aalawiiye ozala. ⁴ Amwazaka peewu yawe, phantte kiina khukwela nshini wa tarikhi, anyannyi khuta khuja. ⁵ Kiina khukwela vahali aariivo mawe, vahali laarivo nttophe vattithiiru; nasaapiru khoottha, ila wiiya nttophe ntthile khaleechiye. ⁶ Aphano noopuwa njuwa khulukula na khuuma; maana khazaarina mitathaari. ⁷ Peewu kinoko khukwela vanyiwa, khuwula vamote na nyiwa, khurapeliwa pi nyiwa. ⁸ Kiina khukwela vanshaka wooshapweya, khwiima mishumo zooshapweya, miiya, mikina siithiini na talaathiini wakhula mmote! ⁹ Otule ariina mashiilo ti asiile.”

¹⁰ Anakhiyoni awe khunsusela khumuuzela yoori: “Mwaasa aya niini atthu apa owaattakhulelaka khwa milikaniso?”

¹¹ Ye khuwaajipu: “Mweeyo mwenkhiwa ojuwa siiri za Ofwalume wa pinkuuni, ila yo wala. ¹² Maana, otule ariina, ontela winkhiwa, oniiyana zawaatta. Ila otule ahina,hatha etile ariinaaye ontta onyakanyiwa. ¹³ Tiito miiyo kiniwoozaaye khwa milikaniso:

maana yo ana maasho ila khanoona,
ana mashiilo ila khansiila, na wala khiniweeleya.

¹⁴ Khwa yo wamariseleya ohupiri wa Ezaaya onlupaaye yoori:

‘Hatha nkhamma mwasiila
khiniweeleyani;
hatha nkhamma moona
khamwinjuwa.

¹⁵ Maana rooho za atthu apa pi zookhijili,
attiyela mashiilo aya
na khuphunya maasho aya,
eriwaka khayaari ethiito,
aari owahi woona na maasho aya,
na osiila na mashiilo aya na oweenleya va rooho vaya
khurutela mmakhono mwaka,
keetta owaavonisa.’

¹⁶ Ila ooparikhiiyiwa maasho enu mweeyo, maana anoona; na mashiilo enu, maana ansiila. ¹⁷ Miiyo kiniuuuzani khweele yoori: manapiyu enkeene na anashariya aatakhiiye woona epi mwinoonaazo, ila khuhooni, na osiila epi mwinsiilaazo ila khuhisiili.

¹⁸ “Nakataalikha mwisiile na mwijuwe maana a nlikaniso wa namazala:

¹⁹ Amana ntthu asiila ntakhuzi la Ofwalume khuhimweeleyi, Ntakhali ti antaaye khulazavo etile yaazaliweeyo nroho mwawe. Eto peewu etile yaakweliyeeyo nshini wa tarikhi. ²⁰ Etile yaakweliyeeyo vahali aariivo mawe pi apale ansiilaaye ntakhuzi nasaapiru khupokherela na furaha.

²¹ Ila mwaasa wa ohiina mitathaari eenyeweru, anlipalipa khwa wakathi vattithiiru. Amana epuwelela miswipa ama lupattha mwaasa wa ntakhuzi

la Ofwalume anlikha NASAAPIRU amini yaya. ²² Etile yaakweliyeeyo va nyiwa, pi apale ansilaaye ntakhuzi, ila mwaasa wa tafwawuthi za ohaayi, na ottettekha wa maali entta owaakhupa, ahifiyelelaka wiima mishumo. ²³ Ila etile yaakweliyeeyo vahali wooshapweyavo pi apale ansilaaye ntakhuzi khuweeleya, khwiima mishumo miiya, khwiima siithiini, talaathiini khwa muutthi mmote.”

Nlikaniso la ntakhatakha

²⁴ Yinsa khuwooza nlikaniso nkina araka: “Ofwalume wa pinkuuni ori nkhamma ntthu mmote azaliyeeyo peewu yooshapweya mmashapa mwawe. ²⁵ Osikhu mmote, atthu ooshi eettaka olala, khuta atuwi vakatthi wa tiriku khuzalavo ntakhatakha, khulawa. ²⁶ Wakathi tiriku ewuliyeevo khupuwa misaasi zaya, naye ntakhatakha khupuwa misaasi zaya.

²⁷ “Akarumeya a mweenyewe nshapa khulawa wa mweenyewe khumuza yoori: ‘Mbwana, mweeyo mwaazaliye peewu yooshapweya mmashapa mwenu. Khi aphano ntakhatakha lapuwa vayi?’ ²⁸ Ye khujipu yoori: ‘Atuwi ti arettiye epo zaya.’ Akarumeya apale khumuuzela yoori: ‘Mbwana mwintakha fweeyo nalazemo?’ ²⁹ Ye khujipu yoori: ‘Wala, maana, amana mwikhulakamo ntakhatakha nttho, mwintta okhula vamote na tiriku. ³⁰ Mwilikhe ziwulele vamote mpakha wakathi wa wuurula. Kintta owooza anamuurula yoori: “Mwikusanye khpula ntakhatakha mwifuke mashittha likhoziwe; mwikusanye tiriku mwitthe va sakafu vaka.””

Nlikaniso wa phunje ya Samuli na Fwaramento

³¹ Na khuwooza nlikaniso nkina araka: “Ofwalume wa pinkuuni ori nkhamma phunje ya samuli, ntthu anthulaaye khuzala mmashapa mwawe.

³² Eto ttiitthiiru zayita peewu zooshi, amana owula onziti miitthi zooshi za mmashapa, anta anyannyi ojeka vijaaro n'virapi mwaya.” ³³ Khuwooza nlikaniso nkina araka: “Ofwalume wa pinkuuni ori nkhamma fwaramento muukha anthuulaaye khuphakanya na ofu wa tiriku wa waatta, wooshi khu-jakuwa. ³⁴ Yinsa aari wuuza khuntti etile, khwa nlikaniso. Weekhweele, khina ethu moote aari owoozaaye woohiiyi khwa nlikaniso. ³⁵ Eto yaari orettikhana yoori eretteye etile yaalupiweeyo ti napiyu yoori:

“Kinteela ofunula milomo zaka khwa nlikaniso,

na olaleya vitthu zoovitheya waaza wumpiwa wa olumwenku.”

Otaphuleliwa wa nlikaniso wa ntakhatakha

³⁶ Aphano ye khuwaalika atthu apale khulawa owawe. Anakhiyonu awe khumwaattama khunvekela yoori: “Oneeleze nlikaniso wa ntakhatakha.”

³⁷ Ye khujipu yoori: “Otule aazaliyeeyo peewu wooshapweya ti Mwaana wa Pinaatamu. ³⁸ Nshapa olumwenku, peewu yooshapweya aana a Muufwalume. Ntakhatakha aana a sheethwani. ³⁹ Atuwi aazaliyeemo ti sheethwani. Wuurula, mwiisho wa wakathi, akarumeya a wuurrula malayikha. ⁴⁰ Nkhama ethiipo ntakhatakha linuuruliwaazo khukhoziwa va moottho, enttela wiiya ethiipo mwiisho wa olumwenku. ⁴¹ Mwaana wa Pinaatamu ontela oruma malayikha awe, alazemo muufwalume mwawe zooshi epile zookwakwanttula, na apale anrettaaye vitthu zootakhala.

⁴² Aweeselele va njocho la moottho, attaapho ontela wiiyavo olila na oluma meeno. ⁴³ Aphano anashariya anttela waara nkhamma njuwa muufwalume wa Papaaya. Ariina mashiilo, ti asiile.”

Nlikaniso wa maali zoovithiwa na liwe la fwayita

⁴⁴ Ofwalume wa pinkuuni ori nkhamma njuju loovithiwa mmashapa. Ntthu mmote, khulawa khusikana, na ye khuvitha opheya. Mwaasa woofurahi

khulawa khuuzanyisa vitthu zawe zooshi aarinaazo khuuzanya nshapa ntthile.⁴⁵ Theenya Ofwalume wa pinkuuni ori nkhamma nakusiyanti aneeke-saaye mawe ootafikhana.⁴⁶ Noosikana liwe la fwayita khuluyeene, khuuzanyisa vitthu zooshi aariinaazo khuuzanya.”

Nlikaniso wa ntthavi

⁴⁷ “Ofwalume wa pinkuuni ori nkhamma ntthavi laweesiwa mpahari khuula wakhula jaati ya swi.⁴⁸ Amana liitaala, anamajiya anfutthela vathi. Aphano yo khukusanya swi epile zooshapweya khuttha mmakapaja, ila epile zoohishapweyi khweesela.⁴⁹ Enttela orettikhana etthiipo mwiisho wa olumwenku. Malayikha anteela owaaphakula ootakhala rooho na anashariya,⁵⁰ aweeselele va njocho la moottho apale ootakhala rooho, attaapho onttela wiyavo olila na oluma meeno.”

Njuju li pheeya na la raku

⁵¹ Aphano Yinsa khuwoozela yoori: “Zaweeleyani vitthu zooshi kilupiyeyo?” Yo khujipu yoori: “Aaa!”⁵² Ye khuwooza yoori: “Tiito wakhula namanozela a kano anozeliweeyo monkoni wa Ofwalume wa pinkuuni onlattanana mweenyewe nyuupa anlazaavo va njuju vawe vitthu pheeya na vitthu zaraku.”

Yinsa onkatthaliwa nti wa Nazareeti

⁵³ Paata ya Yinsa wiisha olupa milikaniso epile, khulaawo okhule waya. ⁵⁴ Khufiya sitati yawe, ohali aari wiikhalaawo. Ye khwaaza owaasomisa atthu nsinakooka. Atthu ooshi khwiya ooshankisiwa, khusala oozela yoori: “Ojuwa opu apattha vayi na owahi wa oretta minjuza?⁵⁵ Khahi mwaana wa kalapinteero? Nzina la mamaawe khahi Mariyamu? Attwiize khayi Tiyaaku, Yuusufu, Simawu na Yuuda?⁵⁶ Alupuwe ooshi khaniikhala nttumphu? Khi vitthu epi apattha vayi?”⁵⁷ Atthu ooshi khuhinkhupali. Ila ye khulupa yoori: “Napiyu ti wooshitahiwa phantte zooshi, ila mmuti mwawe na owawe khanshitahiwa.”⁵⁸ Yinsa khaarettiye minjuza zawaatta mmuti mphule, maana yo khaarina amini.

14

Ofwa wa Yaahaya Namoosa

¹ Wakathi aya opule Herooti* Antiipa, nsatoro wa Kalileya, khusiila olupiwa monkoni wa Yinsa. ² Ye khuwooza akarumeya awe yoori: “Oto ti Yaahaya Namoosa; eetta osisimuwa muufwa! Tiito ariinaaye owahi wa oretta minjuza.”

³ Maana aarettiye Herooti antthiiye Yaahaya nkalapooso, mwaasa wa Herotiiya, muukha wa Filiipe, ttwiye,⁴ mwaasa wa Yaahaya omuuza yoori: “Khahi halaali weeyo onrala ye.”⁵ Herooti aari otakha omuula, ila khusala awoova atthu, maana yo aari ojuwa yoori Yaahaya napiyu.

⁶ Va njampo la oretta mwaakha Herooti, mwaana wa Herotiiya khwiina vakatthi wa atthu ooshi, khuntuvvelisa Herooti,⁷ ye khumwaahiti khwa olapha omwinkha wakhula etile aari weettelaaye onvekela.⁸ Khwa shawuri za winkhiwa ti mamaawe, mwaana otule khulupa yoori: “Mwikitiisele mparathu eeshwa ya Yaahaya Namoosa.”⁹ Mfwalume khwiya wooshukulikha, ila mwaasa wa olapha na mwaasa wa anamalaleyiwa, ye khuruma yoori enkhiwe etile mwaana otule avekiyeeyo.¹⁰ Khuruma olawa oshijiwa eeshwa ya Yaahaya Namoosa nkalapooso.¹¹ Eeshwa yawe khuthuuliwa mparathu khulawa khwinkhiwa mwaana otule, ye khuthuula khulawa

* **14:1** Herooti Antiipa, aari mwaana wa Herooti Nwulu.

khumwinkha mamaawe ¹² Anakhiyoni a Yaahaya khuta, khuthuula mwiili awe khulawa khuzikha. Nawiisha khulawa onthatelela Yinsa.

Waattisiwa wa phaawu na swi

¹³ Noosiila vitthu zaarettikhaniyezo, Yinsa khupakhira mmwaatiya khu-laawo okhule waya, khweetta ohali yaariwo yaara otthwe. Ila atthu noojuwa, khulankha nsitati mphule khusala anlottelela mwentto. ¹⁴ Yinsa noopakuwa khuwoona atthu awaatta, khuwoonela huruma, khuwaavon-isa alwele aariivo. ¹⁵ Njuwa-looveva, anakhiyoni awe khunsusela khu-muza yoori: “Mphu n'yaara na ontta oripa. Owaamwaze atthu apa eette mmamuti mpho oozanye ethu yoojiwa.” ¹⁶ Yinsa khuwaajipu araka: “Khinihithajiya yo olawa. Mweeyo ena mwiwenkhe etthu yoojiwa.” ¹⁷ Yo khulupa yoori: “Fweeyo ninaaye phaawu thaanu na swi piiri.” ¹⁸ Aphano ye khulupa yoori: “Mwikitiisele.” ¹⁹ Khuruma yoori atthu apale eekhale va nyaani, khuthuula phaawu epile thaanu na swi epile piiri, khweekesa otulu, khuparikhiya. Khumeya phaawu epile. Khuwenkha anakhiyoni awe, yo khusala awenkha atthu. ²⁰ Ooshi khuja khurupala, anakhiyoni khulokotthela khelenke khumi na piiri nyeenye zoosala. ²¹ Atthu aajiyeyo aari alume alufu thaanu, ohiwaatthiimo aakha na asimaana.

Yinsa oneettetta vatulu a maati

²² Nasaapiru Yinsa khuwaaruma anakhiyoni awe yoori apakhire mmwaatiya alokoze eette phantte kiina, ye aasaliye awaaleezaka atthu apale. ²³ Paata ya owaaleeza atthu, khuwela va mwaako olawa olompa. Khuripa ye ari attaaphale otthwe, ²⁴ ila wakathi aya opule mwaatiya waari peetiwene na vathi, weettaka opiiwa ti mawipi venkivena maana pheevu eetta wiinyula. ²⁵ Lifwajiri, Yinsa khusala eetta attaaphale aarivo anakhiyoni awe eettettaka vatulu a maati. ²⁶ Noomoona eettaka weettetta vatulu a maati yo khwiiya oosuthuwa khulupa yoori: “Opu nshitapehe!” Yo khusala anyakula na woova. ²⁷ Ila Yinsa khuwooza yoori: “Mwiminyale! Ti miiyo. Mwihoove!”

²⁸ Khujipu Pheeturu yoori: “Nkhama ti weeyo khweele Mbwana, okirume kite attaapho oriivo, keettettaka vatulu a maati.” ²⁹ Yinsa khunjipu, araka: “Ote.” Aphano Pheeturu khulaamo mmwaatiya, khusala eettetta vatulu a maati eettaka phantte etile aariwo Yinsa. ³⁰ Paata ya woona kхиima pheevu etile yaari ovumaazo, khoova khusala azama vattiitthi-vattiitthi, ettaka onyakula araka: “Mbwana, okuusuru!” ³¹ Nasaapiru Yinsa khookola nkhono awe khunkholelala. Khumuza yoori: “Ntthu woopushuwa amini, ohaaminaka mwaasa aya niini?” ³² Paata ya owela mmwaatiya, pheevu etile khwiisha. ³³ Apale aari mmwaatiya khumwaaputu alupaka yoori: “Khweele weeyo o Mwaana wa Nluku.”

Yinsa oniwaavonisa atthu nti wa Jenezare

³⁴ Paata ya olokha pahari, khufiya Jenezare. ³⁵ Wakathi atthu a mmuti mphule anjuwiyeovo yoori ti Yinsa, khumwazela hapari mmuti mphule wooshimo, atthu akina khusala awaatana alwele. ³⁶ Anvekelaka yoori nenkawu asape nshaka la ajapi yawe; ooshi asapiyeyo aavoniye.

15

Yinsa khwa zowera za mayahuuti

¹ Aphano khulankha Yeruzaleemu, Mafwarizeewu akina na anamanozela a kano khuta omuuzela Yinsa yoori: ² “Mwaasa aya niini anakhiyoni awo akhijilelaka zowera za attunkhulu a tiini, oja ahinaweeni?” ³ Yinsa

khuwaajipu araka: “Mwaasa aya niini mweeyo mwikhijilelaka kano za Nluku, mwaasa wa zowera zenu? ⁴ Maana Nluku alupa yoori: ‘Onshitahi papaawo na mamaawo’ na ‘antakhaaye onlaani papaawe na mamaawe ona ya ohukhumweliwa ofwa.’ ⁵ Ila mweeyo mwinkhupalela yoori amana ntthu amuuza papaawe ama mamaawe yoori: ‘Wakhula etthu kiniwinkhaanini miiyo zaakha ya omwinkha Nluku; ⁶ ye khankhanyareliwa theenya onshitahi papaawe khwa nanna nkhamma eto.’ Khwa etthiipo, mwaasa wa zowera zenu, mweeyo mwimpeepheyisa nttakhuzi la Nluku. ⁷ Manaafikhi! Ezaaya ahupiri saaneene monkoni wa mweeyo araka:

- ⁸ ‘Atthu apa anikaaputu na milomo,
ila rooho zaya ziri peetiwene khwa miiyo.
⁹ Mweeyo mwinikaaputu mahala,
mwisomisaka zowera za anaatamu.’ ”

Yinsa onttakhula monkoni wa Otwahareshiwa

¹⁰ Yinsa khuwaakhuwela atthu apale khuwooza yoori: “Mwisiile na eweeleyeni. ¹¹ Khahiyio etile entthiwaaye nkhanyo eninharamushaaye ntthu; ila etile enlankhaaye nkhanyo ti eninharamushaaye.” ¹² Aphano anakhiyonи awe khulawa khumwaattama khumuuzela yoori: “Wajuwa yoori mafwarizeewu noosiila hapari epile eephiriwa?” ¹³ Yinsa khuwaajipu yoori: “Miitthi zooshi zihizaliweeni ti Paapa wa pinkuuni zinttela okhuliwa na mitathaari zaya. ¹⁴ Mwiwaalikhe, maana yo khanoona na aniweettettisa ananhooni. Amana ntthu woohooni amweettettisa nahooni nzaawe ooshi antta okwela nliphotto.” ¹⁵ Aphano Pheeturu khunvekela Yinsa yoori: “Onuze maana a nlikaniso opo.” ¹⁶ Yinsa khuwaajipu yoori: “Kiri na mweeyo nalelo khiniweeleyani? ¹⁷ Yoori zooshi zintthiwaaye nkhanyo zineetta mwijijohojo na khunyiwa? ¹⁸ Ila vitthu zinlankhaaye nkhanyo zinlankha va rooho na piitthiipo eninharamushaaye pinaatamu. ¹⁹ Maana nroho ti zinlankhaamo shawuri zootakhala nkhamma epi: wuula, oraruwa, oshawi akhapa, wiiya, olokova na ohankawaani. ²⁰ Epo pi eninharamushaaye ntthu. Ila oja ohinaweeni khininharamusha ntthu.”

Muukha wa Kanaani onthonyeza amini yawe

²¹ Paata ya Yinsa olaavo aphale vaya, khusala alawa nti wa Tiiro na Sitooni. ²² Muukha wa Kanaani aari wiikhalaaye nti otthuupule, khuta okutthanana Yinsa eettaka okhuwa yoori: “Mbwana, Mwaana wa Daawiuda, koonele huruma! Mwanaka etta wiiyana masheethwani na ontta ohoowa channu.” ²³ Ila Ye khuhinjipu hatha nttakhuzi, anakhiyonи awe khulupa yoori: “Omuuze alawe, ontta onyakula nyuma wetthu.” ²⁴ Yinsa khujipu yoori: “Miiyo kaperekhiwa paasi khwa pwittipwitthi epile zawaashikha za Ezirayiilu.” ²⁵ Muukha otule khuta khukokhora na khuri: “Mbwana, okaawuni!” ²⁶ Aphano Yinsa ajipwaka khuri: “Khahiyio yooshapweya othuula phaawu ya aana khuwenkha aana aanapwa.” ²⁷ Muukha otule khujipu yoori: “Khweele Mbwana, ila na aana aanapwa anja tathela zinkwaaye vameeza wa mweenywewe.” ²⁸ Aphano Yinsa khumuuzza yoori: “Oo muukha, amini yawo khuluyeene! Ti erettikhane etile ontakhaaye.” Na wakathi otthuupule mwanawe khwiya woovona.

Yinsa onrutela pahari ya Kalileya na oniwaavonisa alwele.

²⁹ Yinsa khulaawo okhule waya khulawa mpakha nshini wa pahari ya Kalileya. Khuwela va mwaako khwiikhala attaapho. ³⁰ Khusala ata atthu awaatta, awaatanaka anamarakala, ananhooni, anamakhumuwa, ananhittakhuli na akinoko aya, khuwaalikha nshini wa Yinsa, ye khuwaavonisa.

³¹ Atthu khwiya ooshanka wakathi awooniyeovo ananhittakhuli eettaka ottakhula, anamarakala ari oovona, anamakhumuwa eettaka weettetta na ananhooni eettaka woona. Yo khunsifu Nluku wa Ezirayiilu.

Yinsa onjisa khuntti kiina

³² Yinsa khuwaakhuwela anakhiyoni awe na khuwooza yoori: “Kinaaye tthakaraka na atthu apa; zavira siikhu ttatthu ari vamote na miiyo na khana hatha etthu-yoojiwa. Akintakha owaalikha olawa na jala zaya, maana kinoona yoori antta ozileya ntarikhi.” ³³ Anakhiyoni awe khujipu yoori: “Ninttela opattha vayi phaawu zoofiyela, atthu apa waatta na mphu n'yaara?” ³⁴ Ye khuwoozela yoori: “Mwina phaawu kavi?” Yo khujipu yoori: “Sapa, na mattaatta vattitthiiru.” ³⁵ Yinsa khuruma yoori atthu apale eekhale. ³⁶ Khuthuula phaawu epile sapa na swi khushukhurwela khumeya khuwenkha anakhiyoni awe, khusala awaawanyeza atthu. ³⁷ Ooshi khuja khurupala. Anakhiyoni apale khukusanya khelenke sapa za pattaasu za-saliyeeyo. ³⁸ Atthu aajiyeyo aari alufu nne, ohiwaalaki aakha na asimaana. ³⁹ Paata ya oleezanana atthu apale, Yinsa khupakhira mmwaatiya khu-lokhela nti wa Makata.

16

Mafwarizeewu na Masatukhi anveka alama moote ya pinkuuni

¹ Mafwarizeewu na masatukhi khumwaattama Yinsa khusala amweeza anvekelaka alama moote yoolankha pinkuuni. ² Ye khuwaajipu araka: “Amana njuwa liveva, mweeyo mwinraka, ‘Onttela wiiya wakathi wooshap-weya, maana pinku ti yookhuttuwa.’ ³ Na leelo supu, ‘Enttela opuwa pheeyo, maana pinku ti yookhuttuwa na eetaalawo mawiku.’ Mweeyo mwinjuwa otaphulela nanna ya pinku, ila khamwinjuwa otaphulela alama za wakathi! ⁴ Khapila yootakhala na yooraruwa anveka alama ya minjuza, ila hatha alama khanlawa winkhiwa yoohiiyi alama ya Yuunusa.” Aphano Yinsa khuwaalikha khulaavo aphale vaya.

Fwaramento ya Mafwarizeewu na Masatukhi

⁵ Paata ya olakhela phantte kiina ya pahari, anakhiyoni khusophela yoori asahawu othuula phaawu. ⁶ Yinsa khuwooza yoori: “Mwiiye wa woona na mwiiyane phoole na fwaramento za mafwarizeewu na za masatukhi.” ⁷ Anakhiyoni apale khwaaza onyakulisana atthaaporu, araka “mwaasa aya ohithuuli phaawu.” ⁸ Asiiliyeovo onyakulisana opule, Yinsa khuwooza yoori: “Atthu oopushuwa amini, mwaasa aya niini mwinnyakulisana mweeyena-ru? Mwaasa woohiina phaawu? ⁹ Nalelo khina weeleyeni? Khamwimfikhirela phaawu epile thaanu miiyo kawaawanyeziyeeyo atthu alufu thaanu? Khelenke kavi mweetaaziyeeyo? ¹⁰ Wala khwa phaawu sapa aarafuniyeeyo atthu alufu nne, na zaari khelenke kavi mwilokotthe-liyeeyo? ¹¹ Nanna-ni ehiniweeleyaanini yoori akaari owuuzani monkoni wa phaawu? Mwiiyane phoole na fwaramento ya mafwarizeewu na za masatukhi.” ¹² Aphano khuweeleya yoori khaari owooza wiiyana phoole na fwaramento ya phaawu, ila khwa masomi a Mafwarizeewu na masatukhi.

Otukhuru wa Pheeturu

¹³ Yinsa afiyeovo nti wa Sezareeya ya Filipe, khuwoozela anakhiyoni awe yoori: “Atthu aninlupeza niini Mwaana wa Pinaatamu?” ¹⁴ Yo khujipu yoori: “Akina anri o Yaahaya namoosa; akina, anri o Aliyaasi, akina anri o Jeremiiya ama mmote wa manapiyu.” ¹⁵ Khurutela owoozela theenya yoori: “Khi mweeyo mwinri ki paani?” ¹⁶ Simawu Pheeturu khujipu yoori:

“Weeyo o Al-Masiihu, Mwaana wa Nluku haayi.” ¹⁷ Yinsa khujipu yoori: “Wooshapweyiwa ti weeyo, Simawu mwaana wa Yoona! Maana vitthu zaya epi khuthoonyeziweeni ti pinaatamu, ila khwa Paapa ariye pinkuuni. ¹⁸ Miyo kiniwuza yoori weeyo o Pheeturu, khwa liwe nttintthi kinjekana ojama wa Nluku na milako za mothooni khazinlawa oshintta. ¹⁹ Miyo kiniwinkha efukulo ya Ofwalume wa Pinkuuni; etile onfukaaye vathi apha na pinkuuni entta ofukiwa, na etile weeyo onfukulaaye vathi apha na pinkuuni entta ofukuliwa.” ²⁰ Aphano khuwooza anakhiyoni awe yoori ahiwooze akinoko yoori ye aari Al-Masiihu.

Yinsa onlupa ofwa wawe na osisimuwa wawe

²¹ Waaza wakathi otthuupule, Yinsa khwaaza oweeleza anakhiyoni awe araka: Yaari ohithajiya olawa Yeruzaleemu ahoochaniwe vitthu zawaatta mmakhono wa attunkhulu a tiini, mahaakhimu a tiini na anamanozela a kano, ooliwe, siikhu ya ttaathu asisimuwe nkhapuri. ²² Aphano Pheeturu, khunkhuwelela othetekel khusala amuuza yoori: “Wala Mbwanaaka aka! Khinteela wuurettikhanel!” ²³ Yinsa khuzukuluwa khumuza Pheeturu yoori: “Weette nyuma waka Sheethwani! Weeyo ori nkhamma liwe liri-iyie ntarikhi mwaka yoori likikwakwattule, maana onuupuwela nkhamma pinaatamu woohiiyi nkhamma anuupuwelaazo Nluku.”

Anakhiyoni a Al-Masiihu ana yoothuula nsalapa aya

²⁴ Aphano Yinsa khuwooza anakhiyoni awe yoori: “Nkhamma ntthu ontakha okilotta, ajikatthale mweenyewe, athuule nsalapa awe akilotte. ²⁵ Maana otule antakhaaye wuusuru ohaayi awe ontta ompwetheya, ila otule onimpwetheyaaye ohaayi awe mwaasa wa miiyo ontta wuusurukha. ²⁶ Ena fwayita-ni ntthu opattha fwayita olumwenku wooshi na khumwaashikha ohaayi awe? Ama niini pinaatamu antakhaaye opatilana ohaayi awe? ²⁷ Apho Mwaana wa Pinaatamu onlawa ate nnuuru wa Papaawe na malayikha awe, amwinkhe phakari wakhula ntthu khwa etile arettiyeeyo. ²⁸ Miyo kiniwuuzani khweele yoori, awaapho apha atthu akina ahintte-laaye ofwa ahimooneni khapula Mwaana wa Pinaatamu ataka nkhamma mfwalume.”

17

Ozukulisiwa wa Yinsa

¹ Ziviriyeevo siikhu sitha, Yinsa khunthuula Pheeturu, Tiyaaku na Yaahaya twiye Tiyaaku, khuwaalawana othetekel va mwaako woolepa. ² Attaaphale Yinsa khuzukulisiwa vakatthi vaya. Wuuso awe khwaara nkhamma njuwa kuwo zawe khwiya zoolakala nkhamma nuuru. ³ Wakathi otthuupule khupuwelela omaasho waya Munsa na Aliyaasi apiyaka mwaasa na Yinsa. ⁴ Aphano Pheeturu khumuza Yinsa yoori: “Mbwna, ti yooshapweya wiiya attaapha. Amana otakha, kintta ojeka heema ttathu; moote yawo, moote ya Munsa, kiina ya Aliyaasi.” ⁵ Pheeturu eettaka ottakhula nalelo, khupuwa liwiku lawaara khuwaafnikha, nttumpho khupuwamu huula yaari oraaye: “Otu mwanaka wompheta na wookituvela channu. Mwinsiileze!” ⁶ Asiiliyeevo mattakhuzi apale anakhiyoni awe khukokhora khufisa ajihi zaya vathi na khuwaapattha woova. ⁷ Ila Yinsa khuwaattama, khuwaasapa na khuwooza yoori: “Mwilankhe, mwihoove!” ⁸ Afunuliyeevo maasho khuhimooni hatha ntthu, khusala amoona Yinsa paasi.

⁹ Eettaka wiishukha vamwaako aphale, Yinsa khuwooza yoori: “Mwihimuuze hatha ntthu epile mooniyeeeyo, mpakha Mwaana wa Pinaatamu asisimuwe muufwa.” ¹⁰ Anakhiyoni apale khumuuzela yoori: “Aphano

mwaasa aya niini anamanozela a kano anlupaaye yoori enhithajiya Aliyaasi ota khapula?”¹¹ Yinsa khujipu yoori: “Wekhwheelee Aliyaasi onta arutisele vitthu zooshi.¹² Ila miiyo kiniuwuzani yoori Aliyaasi ata, yo khuhinjuwi, ila khunrettela zooshi epile atakhaziyeeyo. Khwa nanna ethiipo Mwaana wa Pinaatamu onttela ohoochiwa pi atthaapo.”¹³ Aphano anakhiyoni apale khuweeleya yoori Yinsa aari olupa monkoni wa Yaahaya namoosa.

Ovonisiwa wa Nsimaana aariina Masheethwani

¹⁴ Wakathi afiyeevo aphale yaariivo khuntti etile ya atthu, mwinyi mmote khulawa aphale aariivo Yinsa khunkokhorela,¹⁵ khumuaza yoori: “Mb-wana, omoonele huruma mwanaka! Eetta wiiyana jilejile entta onhoocha. Swaafu zinki onkwela vamoottho ama mmaati.¹⁶ Miiyo kawaatiseliye anakhiyoni awo, ila khuhiwahi onvonisa.”¹⁷ Yinsa khuwaajipu yoori: “Oo khapila yootakhala na yoohiina amini! Mpakha lini kinttelaaye wiiya vamote na mweeyo? Mpakha lini kuuvilelakani? Mwikitisele mwanenu apha!”¹⁸ Aphano Yinsa khuruma yoori masheethwani ansaruwe, wakathi otthuupule mwaana otule khwiya woovona.¹⁹ Paata ya toole, anakhiyoni awe khunsusela Yinsa othetekele, khumuuzela yoori: “Mwaasa aya niini na-haakhitireliyeeyo wiikara?”²⁰ Ye khuwaajipu yoori: “Maana mweeyo amini mwiriina ttiitthiiru. Miiyo kiniuwuzani khweele yoori eriwaka mweettiye wiiyana amini nkhamma phunje ya samuli, mweetta owahi wuuza mwaako opu yoori: ‘Oleovo apha weette aphale’ weetta olawa, na khina etthu moote ya haari weettelaaye owaheya khwa mweeyo.”²¹ Ila vitthu epo zinta nkatthi wa lompa na ofuka paasi.

²² Siikhu moote Yinsa na anakhiyoni awe aakusanyeyiye Kalileya, ye khuwoza yoori: “Mwaana wa Pinaatamu onlawa enkheleliwe mmakhono wa atthu.²³ Yo anttela omuula, siikhu ya ttaatthu asisimuwe.” Anakhiyoni awe khuwaapattha huzuni.

Yinsa onripha lumpuru

²⁴ Wakathi Yinsa na anakhiyoni awe afiyeeyo Kafwaranaawu, anamaphisa lumpuru khulawa omuuzela Pheeturu yoori: “Mwaaliimu enu khanripha lumpuru la Nnyupa Woosifwiwamo?”²⁵ Pheeturu khuwaajipu yoori: “Onripha!” Nawiisha Pheeturu khuvira nnyupa, ahinattakhule hatha ethu, Yinsa khuri: “Simawu, onoona toovi? Paani anriphaaye lumpuru na tthuvo ya mfwalume wa olumwenku opu? Atthu a mmuti nttumphu ama aletto?”²⁶ Pheeturu khujipu yoori: “Aniyya aletto,” Yinsa khumuaza yoori: “Eto enthoonyeza yoori aana a mmuti ana yoohiriph. ²⁷ Ila yoori nihiweephirise, olawe mpahari wamweese nanjolo awo. Swi ethiito ya mwanzo ontelaaye olowa, ofunule milomo zaya, ontta osikanamo nzurukhu mmote. Aphano olawe wariphe lumpuru laka na lawo.”

18

Nttunkhulu muufwalume wa pinkuuni

¹ Wakathi otthuupule anakhiyoni khuta aphale aariivo Yinsa khumuuzela yoori: “Nwulweene zayita akina aya, ti paani muufwalume wa pinkuuni?”² Ye khunkhuwela nsimaana khunththa vakathi vaya,³ khuwoza yoori: “Miiyo kiniuwuzani khweele yoori, mweeyo noohithupwiyi na khuhijiretti wiiya nkhamma nsimaana otu, khamwintela weettamo muufwalume wa pinkuuni.⁴ Wekhweele anjipushuwisaaye nkhamma nsimaana otu, oto ti nwulweene aya muufwalume wa pinkuuni.

⁵ “Animpwekherelaaye nsimaana nkhama otu khwa nzina laka, onikip-wekherela miiyo. ⁶ Wakhula otule aninkosisaaye mmote wa asimaana apa akikhupaliyeeyo, afwataali ofukeleliwa liwe loovalaza mmwisiko khutup-weeziwa nkhilintti ya pahari.

⁷ Phoole olumwenku, mwaasa wa vitthu za okosisa. Maana khinivonyela ohirettikhani vitthu zaya epo, ila atakhaliwa ntthu otule anttelaaye wiiyana paathuli. ⁸ Nakataalikha nkhama nkono awo ama muulu awo onuukosissa, oshije weesele! Maana afwataali weeyo weetta muuhaayi wa mileele ori woorakala ama woovujeya ehiiyeeni wiiyana makhono mawiri na moolu mawiri weeyo aya khweeseleliwa va moottho wa mileele. ⁹ Nkhama liisho lawo limote linuukosisa, olazemo weeselele peetiwene! Maana afwataali weeyo weetta muufwalume wa pinkuuni na liisho limote ehiiyeeni weese-leliwa motthooni na maasho mawiri.

Nlikaniso wa Pwittipwitthiya Waashikha

¹⁰ “Phoole, mwihintarawu hatha mmote wa asimaana apa! Miiyo kiniwuzani khweele yoori malayikha aya anoona wuuso wa Paapa wa pinkuuni wakhula wakathi. ¹¹ Wekhweele Mwaana wa Pinaatamu ateela wuusuru etile yaashikhiyeeyo. ¹² Niini onuupuwelaaye weeyo? Amana ntthu eeyana pwittipwitthi zawe miiya khumwaashikhavo moote, khanlikha epile tiisiya wa tiisiini omwaako alawa weekesa etile yaashikhiyeeyo? ¹³ Miiyo kiniwuzani khweele yoori, amana asikana oniiya woofurahi mwaasa wa pwit-tipwitthi yawe etile, zayita epile tiisiya wa tiisiini zoohaashikhi. ¹⁴ Etthiipo theenya Paapeenu ariye pinkuuni khanintakhela hatha nsimaana mmote waashikha.

Nanna yawettettisa koosa ya ttwiyetthu

¹⁵ “Amana ttwiyo ookosa, olawe wanthroonyeze etile avonyiyeyo, ila orette epo zaya weeyo na ye paasi. Amana ye asiila shawuri zawo, wamwaawuni ttwiyo. ¹⁶ Ila amana ahuusili, onthuule ntthu mmote ama awiri, ‘yoori khwa oshaahiti wa atthu awiri ama attatthu yoori ntakhuzi lihakikheye.’* ¹⁷ Amana ye akatthala wuusiila, walupe vakatthi wa ojama wa Nluku. Amana ye akatthala osiileza theenya ojama wa Nluku, ontthantte nkhama kaafiri ama namariphisa lumpuru. ¹⁸ Kiniwuzani khweele yoori, zooshi epile mweeyo mwinfukaaye vathi apha, ziniiya zoofukiwa pinkuuni, na zooshi mwinfukulaaye vathi apha ziniiya zoofukuliwa pinkuuni. ¹⁹ kiniwuzani theenya yoori awiri a mweeyo amana mwikhupalelana vathi apha khwa wakhula ethu etile mwintakhaaye oveka, eniiya yoorettiwa ti Paapa ariye pinkuuni. ²⁰ Maana vahali ankusanyeyaavo atthu awiri ama attatthu khwa nzina laka, na miiyo kiniiyaattaapho.”

Swaafu kavi nininswamihaaye ttwiyetthu

²¹ Aphano Pheeturu khumwaattama Yinsa khumuuzela yoori: “Mbwana, amana ttwiyyaku akikosakinswamihi swafu kavi? Swaafu sapa?” ²² Yinsa khunjipu araka: “Miiyo kiniwuza yoori, khahiyo swaafu sapa, ila swaafu saapiini orutela swaafu sapa.

²³ “Khwa toowo, Ofwalume wa pinkuuni ori nkhama mfwalume aari otakhaaye waattalela vitthu zawe na karumeya awe. ²⁴ Wakathi aaziyeeyo waattalela, khutiiseliwa mwinyi aari omwiilaaye milikhi za nzu-rukhu wa feeta. ²⁵ Mwaasa wa ohiina nanna yonripha mbwana awe otule aari omwiilaaye, khuruma yoori; ye na muukhaawe, aanaawe na vitthu zawe zooshi, zuuzanyisiwe ariphe teeni. ²⁶ Karumeya khukokhora

* ^{18:16} veja Deuteronomio 19:15.

omaasho wa mbwana awe khunvekela yoori: ‘Okivilele, kintta wuuripha.’²⁷ Mbwana awe khunhurumiya, khufuja teeni etile na khunlikha olawa.²⁸ Ila karumeya otule noosaruwa khukutthanana nshirikhaawe wa vakhaazi aari omwiilaaye nzurukhu miiya paasi. Ye khunzola nshirikhaawe mmwisiko khusala anvinya araka: ‘Okiriphe!’²⁹ Aphano nshirikhaawe otule khukokhora khusala anvekela yoori: ‘Okivilele, kintta wuuripha.’³⁰ Ila ye khuhikhupaleli, khurumisa olawa otthiiwa nkalapooso mpakha ariphe teeni yawe.³¹ Wakathi ooniyeovo akarumeya apale akinoko vitthu epile zaarettikhaniyeeyo, khukatipukha channu na khulawa khumuaza zooshi mbwana aya.³² Mbwana khunkhwela karumeya otule khumuaza yoori: ‘Karumeya woohifwayi, weeyo wakivekela miiyo khuuswaamihi teeni yawo.’³³ Weeyo khawaarina ya omoonela huruma nshirikhaawo nkhamma miiyo kiwooneliyeezo?³⁴ Mbwana awe khwiiphiriwa khunttha nkalapooso yoori ahukhumwiwe mpakha ariphe teeni yawe.³⁵ Paapa wa pinkuuni ontela oretta ethiipo, amana mweeyo mwihinswaamihi ttwi-yenu na rooho yenu yooshi.”

19

Monkoni wa Waashana

¹ Yinsa eeshiyeevo olupa mattakhuzi apale, khulaawo Kalileya khweetta Yudeya kaapu kiina ya Yorotaani.² Khuntti khuluyeene khusala enlotta, atthaapale ye khuwaavonisa alwele.

³ Mafwarizeewu akina khuta aphale aariivo Yinsa yoori amweeze khumuuzela yoori: “Halaali nlume omwaasha muukhawe khwa wakhula kiiswa?”⁴ Yinsa khuwaajipu araka: “Mweeyo khamwisomeeni yoori omwanzo, Nluku amumpa nlume na muukha,⁵ na khulupa yoori: ‘Tii-to, nlume onlikha papaaawe na mamaawe khujikusanya na muukhaawe, oowiiri khuretteya wiya mwiili mmote?’⁶ Khwa ethiipo khaniya awiri ila aniiya mwiili mmote. Aphano, etile Nluku akusanyiyeeyo ahiiyevo antakhaaye ophakula.”

⁷ Mafwarizeewu apale khumuuzela theenya yoori: “Aphano mwaasa aya niini Munsa enkhaka ruhusa ya nlume omwinkha talakha muukha awe na khumwaasha?”

⁸ Yinsa khuwaajipu yoori: “Munsa aruma yoori mweeyo mwimwaashe muukha enu mwaasa wa wuuma wa rooho zenu. Ila khazaari toowo omwanzweene.⁹ Miiyo kiniuuuzani yoori: wakhula otule animwaashaaye muukha awe, woohiiyi mwaasa wa oraruwa, khunrala muukha nkina onta oraruwa.”

¹⁰ Anakhiyon i Yinsa khuri: “Nkhama pi ethiipo muukha na nlume, afwataali ohilooli.”¹¹ Yinsa khujipu yoori: “Khiriweeni atthu ooshi eetta wiiyana matakhele ookhupalela mattakhuzi aya apa, ila otule enkhiweeyo paasi.¹² Alume akinoko afwa nkuwo, maana avokoliwa ethiipo; akinoko arettisiwa pi atthu azaaya; akina eetta ojirettisa mwaasa wa Ofwalume wa pinkuuni. Otule anwahaaye okhupalela vitthu epi, ti akhupalele.”

Yinsa na Asimaana

¹³ Paata ya vitthu epile, atthu akina khusala awaathuula asimaana non-tanelia Yinsa yoori awaattheele makhono na awaalompel. Ila anakhiyon i awe khusala awaamaruwela.¹⁴ Aphano Yinsa khuri: “Mwiwaalikhe akiteele miiyo asimaana wala mwihiwaakkhattaze; maana Ofwalume wa pinkuuni pi wa apale eeyiye nkhama atthaapo.”¹⁵ Paata ya owaattheela makhono khulaavo aphale vaya khulawa.

Shapu woothaajiri

¹⁶ Ntthu nkina khumwaattama Yinsa khumuuzela yoori: “Mwaaliimu, kirette niini yooshapweya yoori kipatthe ohaayi wa mileele?” ¹⁷ Yinsa khunjipu yoori: “Mwaasa aya niini weeyo okuuzelaka etthu yiyyiye yooshapweya? Owaapho ntthu mmote paasi eeyiyeyo wooshapweya. Nkhama weeyo ontakha weetta muuhaayi wa mileele, oshututele mirumo.” ¹⁸ Ntthu otule khumuuzela Yinsa yoori: “Piivi?” Yinsa khunjipu araka: “Ohuule, ohiraruwe, ohiiye, ohilaze oshaahiti woovonyeya, ¹⁹ onshitahi papaawo na mamaawo, na omphete namwaattamanana awo nkhama ethiipo on-jiphetaazo omweenyewe.” ²⁰ Shapu otule khujipu yoori: “Miiyo kinshutute-laka mirumo zooshi. Khi niini enikisaleelaaye nalelo?” ²¹ Yinsa khunjipu yoori: “Nkhama weeyo ontakha wiiya khaamili, olawe woozanyise zooshi oriinaaye, nzurukhu aya owenkhe asikhini, orettaru toowo ontta wiiyana njuju pinkuuni. Nawiisha, ote okilotte.” ²² Noosiila mattakhuzi apale shapu otule khwiya woohuzunikha, maana aarina maali zawaatta.

Ajali ya Maali

²³ Aphano Yinsa khuwooza anakhiyoni awe araka: “Kiniwuuzani khweele yoori, ti yoolipa thaajiri weetta muufwalume wa pinkuuni. ²⁴ Ila ti yookhwewya enkamiiya ovira valiphotto wa sikano zayita thajiri weetta muufwalume wa Nluku.” ²⁵ Anakhiyoni a Yinsa asiiliyeevo mattakhuzi apale, khwiya ooshanka na khumuuzela yoori: “Khwa nanna nkhama eto paani anttelaaye wuusurukha?” ²⁶ Yinsa khuweekesa na khuwaajipu yoori: “Khwa pinaatamu khinwaheya, ila wa Nluku vitthu zooshi zinwaheya.”

²⁷ Aphano Pheeturu khujipu yoori: “Fweeyo nalikha zooshi yoori nuulotte. Ninttela wiiya niini fweeyo?” ²⁸ Yinsa khuwooza araka: “Miiyo kiniwuuzani khweele yoori, amana ofiya wakathi Nluku anttelaaye waattala zooshi opheeya na Mwaana wa Pinaatamu eekhala va khukulu ya siifwa zawe, mweeyo mwinkilottaaye mwinttela wiikhalela khukulu khumi na piiri yoori mwiphuke mahimo khumi na mawiri a Eziraiilu. ²⁹ Ooshi apale alikhieeyo vaje vaya, attwi zaya, alupu aya, apapazaya, aanaaya ama mashapa aya, mwaasa wa miiyo, anlawa apwekhhere swaafu miiya na orithi ohaayi wa mileele. ³⁰ Khwa ethiipo, apale amwanzo anttela wiishela, na apale awiishela anttela wiiya amwanzo.

20

Nlikaniso wa anakhaazi a nshapa la wuuva

¹ “Maana Ofwalume wa pinkuuni ori nkhama mweenyewe nshapa alankhiyeyo supuyeeene olawa oweekesa atthu yoori akhole khaazi mmashapa mwawe. ² Ye khusiilanana yoori awaariphe nzurukhu mmote wa feeta wakhula siikhu, khuwaaruma olawa omashapa wawe.

³ Wakathi opule wa sattaatthu, ye khulankha khusala alawa khuwoona atthu akina ari ohina khaazi eekhaliye vaparasa. ⁴ Aphano khuwooza yoori: ‘Mwilawe mweeyo theenya mwakhole khaazi mmashapa mwaka la wuuva, miiyo kintta wuurihani etile enttelaaye wiiya ya shariya.’ ⁵ Apale khulawa, khulankha theenya wakathi opule wa atuhuri na wakathi opule wa saakhentta, khuretta nanna nkhama ethiipile. ⁶ Ethiipo wakathi wa sakhumi na monsi, ye khurutelawo khuwaasikana theenya akina ahaariina khaazi na khuwoozela yoori: ‘Mwaasa aya niini mweeyo mwiiyaka apha mwiikhola khaazi siikhu yooshi?’ ⁷ Khunjipu yoori: ‘Maana khina mmote aninkhiyeyo khaazi’. Aphano khuwooza apale aya yoori: ‘Ettani na mweeyo mwakhole khaazi mmashapa mwaka.’

⁸ Weettelaka oripa, mweenyewe nshapa khumuza waziri awe yoori: ‘Owaakhuwele anakhaazi na owaariphe phakari yaya, owaazaka apale awiishela mpakha apale a mwanzo.’ ⁹ Khuta anakhaazi apale aattakhulaniweeyo wakathi wa saakhumi na monsi na wakhula ntthu khupwekhera nzurukhu mmote wa feeta. ¹⁰ Wakathi atiiyeevo apale aattakhulaniweeyo mwanzo, aari weekesela opwekhera wawaatta, ila wakhula mmote aari opwekhera nzurukhu moote. ¹¹ Apwekheriyeevo khwaaza omwaapa mweenyewe nshapa, ¹² amuuzaka yoori: ‘Mamwinyi apa wawaattakhulana yoori akhole khaazi ya wakathi mmote, weeyo mbwana onnilikanisana fweeyo nivileliyeeyo olemela wa khaazi na haari ya nthana wooshi.’ ¹³ Ila ye khujipu yoori: ‘Swaahipu, akinwiimana shariya. Khawaakhupaleliye okhola khaazi ya opwekhera nzurukhu moote? ¹⁴ Opwekhore etile yiyyiye yawo olawe. Miiyo kintakha omwinkha otule kaattakhulaniyeeyo wawiishela nkama etthiipo kiwinkhiyeeyo. ¹⁵ Akina ruhusa ya orettela etile kintakhaaye nzurukhu aka? Ama weeyo ona nrima mwaasa wa miiyo wiyya nkemaani?’ ¹⁶ Aphano Yinsa khumarisa araka: Apale amwanzo anttela wiishela na apale awiishela anttela wiyya amwanzo.”

Yinsa onrutela olupa theenya ofwa na osisimuwa wawe

¹⁷ Awelelaka Yeruzaleemu, Yinsa khuwaakhuwela othetekele anakhiyon i awe apale khumi na awiri, khuwooza yoori: ¹⁸ “Mwisiile! Ninwelela Yeruzaleemu, Mwaana wa Pinaatamu ontela winkheleliwa mmakhono wa mahaakhimu a tiini na anamanozela a kano, yo anhukhumwele wuuliiwa, ¹⁹ enkheleliwe mmakhono wa amalapo anveyise, anjaphe na akhomeliwe. Ila siikhu ya ttaatthu asisimuwe.”

Oveka wa mamaawe Tiyaaku na Yaahaya

²⁰ Aphano maama wa aana a Zepeteewu khumwaattama Yinsa na khukokhora khusala anvekela. ²¹ Yinsa khumuuzela yoori: “Weeyo ontakhani?” Maama otule khujipu yoori: “Kintakha yoori muufwalume mwawo aanaaka apa awiri mmote eekhale nkono nlume nkina nkono nkha.” ²² Yinsa khunjipu yoori: “Mweeyo khamwinjuwa ethhu mwinvekaaye. Mwinwahi onywela koopho ethiiti kinttelaaye onywela?” Yo khujipu, “ninwahi.” ²³ Aphano Yinsa khuri: “Weekhwelle mweeyo mwinteeela onywela koopho yaka, ila wiikhala nkono nlume aka ama nkono nkha khahiiyo miiyo kinlupaaye. Maana puuro eto ti yawe otule aattaleliweeyo ti Paapa.” ²⁴ Wakathi apale akina khumi asiiliyeovo mattakhuzi apale, khwiyya ookasirikha khwa attwi apale awiri. ²⁵ Aphano Yinsa khuwaakhuwela khulupa yoori: “Mwijuwe yoori anamalokozela a khapila anshintta, na attunkhulu aya anthoonyeza ofwalume khwa yo. ²⁶ Mweeyo mwihiyye toowo, ila otule antakhaaye wiyya wa fwayita awaarumeyele azaawe; ²⁷ na otule antakhaaye wiyya wa mwanzo eeye mwiitthwaana enu mweeyo. ²⁸ Nkama etthiipo, Mwaana wa Pinaatamu khateleeni orumeyeliwa, ila orumeya na winkha ohaayi awe khwa owaakaphula atthu awaatta.”

Ovonisiwa wa ananhooni awiri a Yeriko

²⁹ Yo alankhaka Yeriko, atthu awaatta khusala awaalotta. ³⁰ Atthu awiri oochooni eekhaliye nshini wa tarikhi, wakathi asiiliyeovo yoori Yinsa ontta ovira, khwaaza onyakula araka: “Mbwana, Mwaana wa Daawuuda, noonele huruma!” ³¹ Atthu apale awaatta khusala awaakkhattaza, awaatakhelaka yoori anyamale, ila khusala atepa onyakula araka: “Mbwana, Mwaana wa Daawuuda, noonele huruma!” ³² Yinsa khweemela khuwaakhuwela khuwoozela yoori: “Mweeyo mwintakha yoori miiyo kuuretteleni niini?”

³³ Yo khujipu yoori: “Mbwana, nintakha noone.” ³⁴ Yinsa khuwoonela huruma na khuwaasapa maasho aya, nasaapiru khwaaza woona khusala anlotta.

21

Ovira wa Yinsa Yeruzaleemu

¹ Ari kharipu ya Yeruzaleemu, khufiya Betifwaaje, va mwaako Oluveera, Yinsa khuwaaruma anakhiyoni awe awiri khuwooza yoori: ² “Mwilawe nti opo mwinoonaaye omaasho wenu okho, mwinlawwa mwansikane mwaana wa puuru weekha afukiwe vamote na weelume. Mwinfukule mwikitisele. ³ Amana apuwa ntthu awuuzelani, mwimuuze yoori Mbwana ontta owaatakha, ontta wuulikhani nasaapiru mwishaathuule. ⁴ Vitthu epo zaret-tikhana yoori emarisele etile alupiyeyo napiyu yoori: ⁵ “Muuze sitati ya Siyooni yoori: ‘Omoone, mfwalume awo ontta wuuteela, woojipushuwisa, aweliye va mwaana wa puuru, nyama yoopakhira.’”

⁶ Anakhiyoni khuretta etile aarumiweeyo ti Yinsa. ⁷ Khuntiisa puuru yekha na mwaana aya ntitthiiru, aphano khutthiiwavo kuwo zawe, ye khuwelavo. ⁸ Atthu apale awaatta aari onlottaaye khusala attattikha ajapi zaya ntarikhi, akina khusala ashija virapi za miitthi na ottattikha ntarikhi. ⁹ Apale aalokoziyeeyo na apale aari onlottaaye eetta onyakula araka: “Ozaana khwa mwaana wa Daawuuda! Wooparikhiiya ti otule antaaye khwa nzina la Mbwana! Ozaana wa pinkuuni. ¹⁰ Wakathi Yinsa aviriyeovo Yeruzaleemu, sitati yooshi khutapanyeya, atthu khusala oozeliwa yoori: “Paani otu aya?” ¹¹ Yo khusala ajipu yoori: “Otu ti Yinsa, napiyu wa Nazareeti ya Kalileya.”

Otwahareshiwa wa Nyuupa Yoosifwiwamo

¹² Yinsa khuvira Nnyupa Woosifwiwamo, khuwiikaramo ooshi apale aari wuuzanyisaye na apale aari wuuzanyaaye. Khukurumula meeza a anamapatilisa nzurukhu na khateera za apale aari wuuzanyisaaye jiwa.”

¹³ Khuwooza araka: “Yaatikhwa yoori; ‘Nyuupa yaka enttela wiitthiwa nyuupa yoosifwiwamo, ila mweeyo mwaretta wiiya puuro ya anamwiiya.

Yinsa ontta ovonisa Nnyupa Woosifwiwamo

¹⁴ Ananhooni na anamarakala khumwaattama Yinsa Nnyupa Woosifwiwamo, ye khuwaavonisa. ¹⁵ Mahaakhimu a tiini na anamanozela a kano ooniyeovo vitthu zootkinisa Yinsa aari orettaazo na aasimana aari okhuwaaye araka: “Ozaana mwaana wa Daawuuda!” khushanka khusala oozela yoori: ¹⁶ “Onsiila epi anlupaazo apa?” Yinsa khuwaajipu yoori: “Aaa; mweeyo khamwina some yoori: ‘Khwa nlimi la asimaana na apale anamwaaye antthenkeza siifwa khaamili?’” ¹⁷ Yinsa khuwaalikha, khlalaamo nsitati mphule khulawa Betaaniya ottuukho aalaliyeewo.

Nfikeera woohiina mishumo

¹⁸ Mmeesho mwaya supuyeene, arutelaka ositati, khunkhola jala.

¹⁹ Khoona nfikeera nshini wa tarikhi, khwaattama ila khuhisikanani hatha mishumo, khusikanamo mathaparu paasi, aphano khuri: “Weeyo khunteela wiima theenya mishumo!” Nfikeera opule khuuma nasaapiru.

²⁰ Anakhiyoni awe ooniyeovo epile zaarettikhaniyeeyo, khwiiya ooshanka na ootikinisiwa alupaka yoori: “Wooma toovi nasaapiru nfikeera opu?”

²¹ Yinsa khuwaajipu yoori: “Kiniwuzani khweele yoori, amana mwiiyana amini na woohiina nshikili, mwinttela oretta woohiiyi epi zirettikhaniyeeyo khwa nfikeera opu paasi, ila hatha wuuza mwaako opu yoori okhuleye

ojeeselele mpahari, zintta orettikhana. ²² Amana mwiiyana amini mwinpwekhera zooshi mwinttelaaye oveka khwa lompa.

Ofwalume wa Yinsa ontikinisa

²³ Paata ya Yinsa ofiya Nnyupa woosifwiwamo, eettaka osomisa, ma-haakhimu a tiini na attunkhulu a tiini khumwaattama khumuuzela yoori: “Vitthu epi onrettana ofwalume-ni? Wala ti paani awinkhiyeeyo ofwalume aya opu?” ²⁴ Yinsa khuwaajipu yoori: “Miiyo kintta owuuzelani theenya; amana mwikijipu, kintta owuuzani ofwalume kinrettanaaye vitthu epi. ²⁵ Woosa wa Yaahaya waari wa vayi? Wa pinkuuni ama wa anaatamu?” Yo khusala akheetisana atthaapo-ru araka: “Amana niri waari wa pinkuuni, ye ontta onuuzela yoori ‘khi mwaasa aya niini mwihikhupalelaka?’ ²⁶ Ila amana nilupa yoori pi wa anaatamu, niniwoova atthu, maana ankhupalela yoori Yaahayanapiyu.” ²⁷ Yo khujipu Yinsa yoori: “Khanijuweeni.” Ye khuwooza theenya yoori: “Hatha vattithiiru akiniwuuzani owahi kinret-tanaaye vitthu epi.”

Nlikaniso wa aana awiri

²⁸ Mwinoona toovi? Aarivo mwinyi mmote aariina aana awe awiri. Khumweettela otule wa mwanzo khumuza yoori: ‘Mwanaka, etta wakhole khaazi leelo omashapa.’ ²⁹ Khujipu yoori: ‘Akeepu!’ Ila khuupuwela khu-lawa okhola khaazi etile ooziweeyo. ³⁰ Paapa otule khumwettela mwanawе otule nkina khumuza nkhamma ethiipo amuziyeeyo otule nkina. Mwaana otule khujipu yoori: ‘Kintta olawa mbwana aka!’ Ila khuhilawi. ³¹ Khwa aana apale awiri ti tuuvi arettiyeeyo matakhele a papaawe?’ Khujipu yoori: ‘Otule wa mwanzo.’ Yinsa khuwooza yoori: “Kiniwuuzani khweele yoori, anamariphisa lumpuru na amalempe antta weetta muufwalume wa Nluku mweeyo mwihineettemu. ³² Maana Yaahaya ata yoori oothonyezeni tarikhi ya shariya, mweeyo khuhinkhupaleli, ila anamariphisa lumpuru na amalempe ankhupalela. Mweeyo moona vitthu epile khuhithupwiyi na wala khuhinkhupaleli.

Nlikaniso wa anamalima ootakhala rooho

³³ “Mwisiile nlikaniso nkina: Aarivo thaajiri mmote wa mmuti ntum-phule aalimiyeeyo nshapa lawe la wuuva. Khujekelala looshi, khwaat-tala kulaathayini ya onluwatthelamo wuuva na khujeka korofwa ya namweekesela. Khuwaalikhela anamalima apale akina, khulaamo mmuti mphule, khusala alawa safwari yawe. ³⁴ Ofiyeevo wakathi wa wuu-rula, khuwaaperekha akarumeya awe khwa anamalima apale, yoori ap-kekherele mishumo zawe. ³⁵ Anamalima khuwaakhola akarumeya a mweenyewe nshapa apale; mmote khunvulalisa, nkina khumuula, wat-taatthu khunvonya na mawe. ³⁶ Aphano khuwaaperekha akarumeya awe akina awaatta, anamalima apale khuwaatthantta nkhamma ethiipo awaatthanttiyeeko apale akina. ³⁷ Omwiisho khumperekha mwanawе alu-paka yoori: ‘Mwanaka otu antta onshitahi.’ ³⁸ Ila anamalima amoniyeovo mwaana otule, khulupa yoori: ‘Otu namarithi. Mwite, nimuule nithuule eritho yawe.’ ³⁹ Attaaphale yo khunkhola khumweeselela othetekelwa nshapa khumuula. ⁴⁰ Amana ata mweenyewe nshapa, ontela owaarettela niini anamalima apale?” ⁴¹ Yo khujipu yoori: “Wekhwheele ontta owoola anamalima apale ootakhala rooho na awenkhe anamalima akina nshapa laya. Apa nka amwinkhaka phantte ya mishumo wakathi wa wuurrula.”

⁴² Yinsa khuwoozela yoori: “Khamwinasome zawaatikhwa Ttakatthi-ifu yoori: ‘Liwe anamajeka akatthaliyeeyo, nttho tthi liyyiyeeyo liwe

linkhomaazaaye; eto enta wa Mbwana, na etthu yooshapweya khwa fweeyo.’⁴³ Paata ya toowo kiniwuuzani yoori Ofwalume wa Nluku mwint-tela onyakanyiwa enkhiwe apale animaaye mishumo za Ofwalume.⁴⁴ Otule anttelaaye okwela liwe laya ntthi ontta othapateya, na otule linttelaaye onkhwela ontta othatuwa lifufu.⁴⁵ Mahaakhimu a tiini na mafwarizeewu, asiiliyeovo milikaniso za Yinsa, khuweeleya yoori aari ottakhula monkoni wa yo.⁴⁶ Khusala eekesa nanna ya onkhola ila khusala awoova atthu, maana aari onjali nkhamma napiyu.

22

Nlikaniso la Njampo la harusi

¹ Yinsa khurutela owooza milikaniso araka: ² “Ofwalume wa Pinkuuni on-lattanana mfwalume mmote atthekeziyeeyo njampo la harusi ya mwanawewe. ³ Aphano khuwaaruma akarumeya awe olawa owaakhuwela anamalaleyiwa yoori ate onjampo; ila yo khuhitakhi ota. ⁴ Khuwaaruma theenya akarumeya akina araka: ‘Mwawooze anamalaleyiwa yoori: Njampo lalikana; mompe zaka na aana aya ooneneva kashija na zooshi za-likana. Mwite onjampo la harusi.’ ⁵ Ila yo khuhijali khusala alawa, mmote omashapa wawe, mmote nzanshara mwawe,⁶ apale asaliyeeyo khuwaakhola akarumeya khuwaahukhumu na khuwoola.⁷ Ila mfwalume khwiya wawiiphiriwa, khuwaaruma anajanka awe olawa owaatapanya anamahusuti apale na khulukuza sitati yaya etile.⁸ Aphano khuwoza akarumeya awe yoori: ‘Njampo lalikana, ila anamalaleyiwa khaari osuhi.⁹ Mwilawe mmizukulowo za tarikhi mwawaalaleye ooshi apale mwint-telaaye owaasikana.’¹⁰ Aphano akarumeya apale khulawa mmatarikhi na khuwaakusanya atthu ooshi apale awasikaniyeeyo, atthu ooshapweya rooho na atthu ootakhala rooho, nsana waari ojiwaavo njampo khwiya wawiitaala pi anamalaleyiwa.

¹¹ “Wakathi mfwalume aviriyeovo yoori awoone anamalaleyiwa apale, khumoona mwinyi mmote ahaawaliyeeyo kuwo za njampo.¹² Khumuuzela yoori: ‘Swaahipu, wavira toovi ohiwaleeni kuwo za njampo?’ Mwinyi otule khwiya woonyamala.¹³ Aphano mfwalume otule khuwaaruma akarumeyaawe yoori: ‘Mwinfuke moolu awe na makhono awe mwimweeselele vaje, n'yiiza; nttumpho oniiyamo olila na oluma meeno’.¹⁴ Maana awaatta pi ookhuwelawa, ila vattithiiru pi oothawuliwa”.

Monkoni wa lumpuru

¹⁵ Mafwarizeewu khulaavo aphale vaya, khusala awaza shawuri zon-vithaalela khwa mmattakhuzi awe. ¹⁶ Khuwaaruma anakhiyonu aya na atthu akina a khuntti ya Herooti khusala amuuza Yinsa yoori: “Mwaali-imu, fweeyo najuwa yoori weeyo onlupa khweele na onsomisa na khweele tarikhi ya Nluku, khunjilikha othowelelisuwa ti ntthu, wala khuniwaa-phuka atthu khwa nanna ariizo.¹⁷ Nkanuuze, ona shawuri ni? Ti ya shariya onripha lumpuru Seezari ama wala?”¹⁸ Yinsa khujuwa thwapiya zaya zootakhala khuwaajipu yoori: “Manaafikhi, mwaasa aya niini mwikeezaka?”¹⁹ Mwikithoonyeze nzurukhu onriphawaaye lumpuru.” Khutiiseliwa nzurukhu mmote wa feeta.²⁰ Ye khuwoozela yoori: “Ratarato eti na nzina ntthi laatikheweeyo apha tthi laani?”²¹ Khujipu yoori: “Seezari”. Aphano khuwoza yoori: “Mwimwinkhe Seezari etile yiyyiye ya Seezari na mwimwinkhe Nluku etile yiyyiye ya Nluku.”²² Asiiliyeovo mattakhuzi apale, khwiya ootikinisiwa na khulikha wuuzela khusala alawa.

Masatukhi na Osisimuwa

²³ Siikhu ethiitile, khunteela masatukhi akina anlupaaye yoori khawiivo osisimuwa, khusala amuuzela yoori: ²⁴ “Mwaaliimu, Munsa alupa yoori: ‘Amana ntthu afwa, muukha awe ahinvokoleleeni mwaana, ttwiye ona ya onrala namafweliwa ti mannawe yoori amwinkhe aana ttwiye otule afwiyyeeyo. ²⁵ Fweeyo naari attwi sapa. Wamwanzo khuloola na khufwa. Muukha awe khanvokoleliye mwaana, khuraliwa ti ttwiye. ²⁶ Khurettikhana nkhamma zanrettikhaneliyeeyo otule wa mwanzo na wa ttaatthu mpakha otule wa saapa. ²⁷ Omwiisho waya paata ya ooshi ofwa, na muukha khufwa. ²⁸ Aphano, wakathi woosisimuwa, khwa alumbe apale sapa ti tuuvi anttelaaye wiiya mannawe? Maana ooshi anraliye.” ²⁹ Yinsa khuwaajipu yoori: “Mweeyo mwathowelela, maana khamwinjuwa Zawaatikhiwa Ttakatthiifu wala owahi wa Nluku. ³⁰ Maana wakathi woosisimuwa atthu khanloola wala khanlooziwa; anttela wiiya nkhamma malayikha pinkuuni. ³¹ Khwa osisimuwa wa ananfwa, mweeyo khamwisomeeni etile Nluku alupiyeeyo yoori: ³² ‘Miiyo ki Nluku wa Eburahiiima wa Esiyaakha na wa Yaakhumpa?’ Ye khahiyo Nluku wa ananfwa, ila wa atthu awoona.” ³³ Asiiliyeevo mattakhuzi apale, atthu khwiya ooshanka khwa osomisa wawe.

Oruma nwulu

³⁴ Paata ya mafwarizeewu ojuwa khuwaanyamaza masatukhi, khukusanyeya. ³⁵ Mmote wa yo, namanozela kano khweeza omuuzela yoori: ³⁶ “Mwaaliimu, nrumo nwulu pi puuvi?” ³⁷ Yinsa khunjipu yoori: “Omphete Mbwana Nluku awo khwa rooho yawo yooshi, khwa nafusi yawo yooshi na akhili zawo zooshi. ³⁸ Opu pi wiiyiyeeyo oruma wa mwanzo na wootepa owula. ³⁹ Waphiiri onlattanana otthuupu: omphete nzaawo nkhamma ethhipo onjiphetaazo omweenyewe. ⁴⁰ Kano zooshi za Munsa na masomi ooshi amanapiyu anrumeyela mirumo ethhiipi miwiri.”

Al-Masiihu Mbwana wa Daawiuda

⁴¹ Mafwarizeewu apale nalelo ari okusanyeya, Yinsa khuwoozela yoori: ⁴² “Mwinupuwelani monkoni wa Al-Masiihu? Mwaana waani?” Yo khujipu yoori: “Mwaana wa Daawiuda.” ⁴³ Yinsa khuwoozela theenya yoori: “Aphano, khi toovi Daawiuda khwa Rooho Ttakatthiifu omwiitha yoori Mbwana, alupaka yoori: ⁴⁴ ‘Mbwana amuuza Mbwana aka yoori: ‘Wiikhale nkono nlume aka mpakha maatuwi awo kiwaatthe vathi wa moolu awo?’’ ⁴⁵ Nkhama Daawiuda onimwiittha yoori Mbwana, enrettikhana toovi eeyaka mwanawe?” ⁴⁶ Khuhiivo mmote awahiyeeyo onjipu, na waaza siikhu ethiitile khina nkina awahiyeeyo omuuzela theenya.

23

Yinsa onkhattaza onaafikhi wa Mafwarizeewu na wa anamanozela a kano

¹ Aphano Yinsa khuwooza atthu apale na anakhiyon i awe yoori: ² “Anamanozela a kano na mafwarizeewu eekhalela khukulu ya Munsa. ³ Mwiwaashututele na mwithokorele zooshi epile aniwuuzaanini. Ila mwihiweezele vitthu anrettaazo. Maana khanrumeyela epile anlupaazo. ⁴ Yo anfuka maphuta oolemelaa na ottikha mmaafuzi wa atthu, ila yo khantakha hatha oshashula na yaala. ⁵ Zooshi anrettaazo antakha yoori ooniwe pi anaatamu. Yo anjifukela hirizi mmwishwa mwaya, na olepisa mashaka a ajapi zaya. ⁶ Owaatuvela puuro zooshapweya za vanjampo na wiikhala wiilokozi nsinakooka, ⁷ owaatuvela ochelisiwa vamwanttiwa na wiitthiwa Mwaaliimu. ⁸ Mweeyo khamwinlawaa wiitthiwa Mwaaliimu, maana Mwaaliimu enu mmote paasi, mweeyo mooshi mwa attwi.

⁹ Ahiiyeko vathi apha mwinttelaaye omwinkha khalamu ya ‘opaapa’, maana Papeenu ori mmote paasi, otule ari pinkuuni. ¹⁰ Wala ahiiyeko anttelaaye omwinkha khalamu ya namanozela maana namanozela ori mmote paasi, Al-Masiihu. ¹¹ Ila otule eyiye nwulu vakatthi venu eeye karumeya. ¹² Otule anjiwilisaaye ontta opushuwisiwa; otule anjipushuwisaaye ontta owulisiwa.

¹³ Olaanikha pi weenu mweeyo anamanozela a kano na mafwarizeewu, manaaifikhi, maana mwiniwfukela atthu Ofwalume wa pinkuuni, ila na mweeyo khuheettimo na khamwintakha owaalikha weettamo apale antakhaaye! ¹⁴ Olaanikha pi wenu mweeyo anamanozela a kano na mafwarizeewu, manaaifikhi, maana mwimpala maali za anamfweliwa pi amannazaya na ojitapwatelana oretta lompa zoolepa; khwa ethiipo mwin-teela ohukhumwiwa saaneene. ¹⁵ Olaanikha pi wenu mweeyo anamanozela a kano na mafwarizeewu, manaaifikhi, maana mweeyo mwinlokha pahari na mwineettetta nti wooshi mweekesaka owaathuula atthu mwiwaatthe ntiini mwenu. Na amana mwimpattha ntthu aya oto onretteya swaafu pii ri wiiya mwaana wa motthooni zayita mweeyo.

¹⁶ Olaanikha pi wenu mweeyo, anamalokozela oofoon! Maana mwinlupa yoori: ‘Amana ntthu alapha khwa omwimpari, eto khina maana. Ila amana ntthu alapha khwa thahapu ya omwimpari oto ona sharuthi ya oretta etile alaphiyeyo.’ ¹⁷ Alolo oofoon! Eriina fwayita ti tiivi, thahapu ama mwimpari opule ontakathisaaye thahapu? ¹⁸ Mweeyo mwinlupa theenya yoori: ‘Amana ntthu alapha khwa nzina la alitaari, olapha waya opo khuna maana, ila ntthu amana alapha khwa zaakha etile eriiye vatulu vaya, oto ona yoorumeyela olapha wawe.’ ¹⁹ Atthu oofoon, eriina fwayita ti tiivi, zaakha ama alitaari anttakathisaaye zaakha? ²⁰ Nakataalikha otule anlaphaaye khwa alitaari onlapha khwa alitaari na yooshi etile eriivo. ²¹ Amana ntthu alapha khwa mwimpari, onlapha khwa mwimpari na khwa otule aniikha-laaye nttumpho. ²² Na otule anlaphaaye khwa pinku onlapha khwa khukulu ya Nluku na khwa otule ekhaleliyeeyo.

²³ Olaanikha pi wenu mweeyo anamanozela a kano na mafwarizeewu, manaaifikhi, maana mweeyo mwinimwinkha Nluku lifunku la khuumi mpakha vitthu za nwoorotha na mwinimwinkha nyaani zootuva na samuli, ila mwinkhijilela oruma wa fwayita wa kano, wiiyiye: Shariya, huruma na waamineya, nakataalikha mwaarina ya oretta epo zaya woohiweraweri epile kiina. ²⁴ Anamalokozela oofoon! Mwinshuja kuuku, ila khumiza enkamiiya.

²⁵ Olaanikha pi wenu mweeyo, anamanozela a kano na mafwarizeewu, manaaifikhi, maana mweeyo mwinoosa pilawuri na parathu oje waya, ila nkatthi mwenu weetaalamo wiiya na omaashokopho. ²⁶ Mafwarizeewu oofoon, moose khapula pilawuri nkatthi mwaya, aphano phantte etile ya oje entta wiiya yooshapweya.

²⁷ Olaanikha pi wenu mweeyo, anamanozela a kano na mafwarizeewu, manaaifikhi, maana mweeyo mwiri nkhamma vilalo yoovaaziwa khinampo, oje waya enumpuwaaye nkhamma yooshapweya, ila nkatthi mwaya ee-taaliyemo makhonkolo alupa ofwa na wakhula nanna ya vitthu zoovutta. ²⁸ Oje wenu mwiniupuwa nkhamma anashariya, ila nkatthi mwenu mweet-aala onaafikhi na vitthu zootakhala.

²⁹ Olaanikha pi wenu mweeyo, anamanozela a kano na mafwarizeewu, manaaifikhi, maana mwinkjeka khapuri zooshapweya za manapiyu, khuretta wiiya vilalo za akemaani. ³⁰ Mwinlupa yoori: ‘Eriwaka neettiye wiiyavo wakathi wa amarehemu apapazethu, khanaari wiiyana phantte khwa

yo ya owoola manapiyu? ³¹ Etthiipo, mweeyo mwinjilawela oshaahiti yoori mwa aana a apale awooliyeeyo manapiyu. ³² Mwilikhe wiitaaza mphimo wa twampi za amarehemu apapazenu. ³³ Nyookha! Ojama wa evili! Mwinttela owerawera toovi hukhumu ya mothooni? ³⁴ Tiito miiyo kooperekhezani manapiyu, ajuwi na anamanozela a kano. Akina mwiwoole, mwiwaakhemele, mwiwaajaphe nsinakooka mwenu na mwiwaalupatthe sitati khwa sitati. ³⁵ Khwa etthiipo eniwiittikhelani taamu yooshi ya anashariya yiittikheliyeeyo vathi, waaza taamu ya nashariya Apeele, mpakha taamu ya Zakariiya mwaana wa Barakiiya, mwimuuliyeeyo vakatthi wa omwimpali na alitaari. ³⁶ Miiyo kiniwuuzani khweele yoori, zooshi epo ziniwateela atthu aleelo.

Ojiliza monkoni wa Yeruzaleemu

³⁷ Yeruzaleemu, Yeruzaleemu, weeyo oniwuala manapiyu na owaavonya apale aperekhiweeyo! Swaafu kavi miiyo kitakhaka owaakusanya aana awo nkhamu mwanakhu aniwaakusanyaazo aana awe mmapaphelo, ila mweeyo khuhitakhi. ³⁸ Moone, yoori nyuupa yenu enttela wiiya yoothamiwa. ³⁹ Maana miiyo kiniwuuzani yoori, mweeyo khamwinteeela okoona theenya, mpakha mwilupe yoori: ‘Wooparikhiiwa ti otule antaaye khwa nzina la Mbwana.’ ”

24

Opwechiwa wa Nyuupa Woosifwiwamo

¹ Yinsa khusaruwa Nnyupa Woosifwiwamo, khusala alawa, anakhiyonu awe khumwaattama yoori anthoonyeze manyupa apale ooshapweya. ² Yinsa khuwooza yoori: “Mweeyo mwinoona ooshi apa? Weekhweele miiyo kiniwuuzani yoori khalinsalavo apha liwe vatulu wa liwe lihinttelaaye opwechiwa.”

Alama za mwiisho wa wakathi

³ Wakathi Yinsa eekhaliyeevo va mwaako Oluveera, anakhiyonu khulawa khwiitthaalana otetekete na khunvekela yoori: “Nkanuuze, zinttela orettikhana lini vitthu zaya epo, wala amana otaaka, alama-ni enttelaaye wiiyavo na alama-ni ya mwiisho wa olumwenku?” ⁴ Ye khuwaajipu yoori: “Phoole, ti ahiiyeye hatha ntthu anttelaaye wuuttettekhani! ⁵ Maana atthu awaatta anlawa ate khwa nzina laka, alupaka yoori: ‘Miiyo ki Al-Masihu’ na owaattettekha atthu awaatta. ⁶ Amana mwisiila hapari za viitha ama nzuuzu la viitha, mwihoove. ⁷ Khapila enttela wuumanana khapila kiina, ofwalume na ofwalume nkina, enttela opuwa esikinyaatthi na jala phantte zawaatta. ⁸ Zooshi epo yaazo ya vitthu za olwaaza.

⁹ Aphano yo anteela owinkhelelani yoori mwilupatthiwe na muuliwe, mwinlawu mweeniwe ti khapila zooshi mwaasa wa nzina laka. ¹⁰ Wakathi aya opo, atthu awaatta anteela wanswi amini anttela wiiya anamazinkula, na wiinana mmote na nzaawe. ¹¹ Anlawa apuwe manapiyu awaatta ooijipanka na awaattettekhe atthu awaatta. ¹² Vitthu zootakhala zinttela weekezeleya, na pheta ya atthu awaatta enttela ovukuwa. ¹³ Ila otule anttelaaye ovilela mpakha mwiisho ontta wuusurukha. ¹⁴ Enttela olaleyiwa hapari epi za Ofwalume wa Nluku olumwenku wooshi, nkhamu oshaahiti khwa khapila zooshi aphano osala ota mwiisho.

Ohoowa nwuulweene

¹⁵ “Mwinttela woona okufuru wa woopisa wa pala ontelaaye opuwa Puuro Ttakathiiifu, etile alupiyeeyo napiyu Daniyeele - osome na eweeleye.

¹⁶ Aphano apale anttelaaye wiiya Yudeya atthirele omwaako. ¹⁷ Otule anttelaaye wiiya vatulu wa nyuupa ahishukhe yoori alazemo etthu nnyupa mwawe, ¹⁸ na otule anttelaaye wiiya omashapa ahirutele onti weettela ajapi yawe. ¹⁹ Siikhu etile ti ya woopisa khwa apale awiimittha na anaamwisaaye. ²⁰ Mwilompe yoori miswipa epo ehirettikhane mwiita ama jumwa-monsi. ²¹ Maana wakathi aya opo onlawa wapuwe ohoowa nwulweene, thanku mwanzo wa olumwenku, na khunteela opuwa nkina nkhamma otthuupo. ²² Eriwaka wakathi aya opo wa ohoowa khawaavukuliwe, khina aari weettelaaye wuusurukha, ila mwaasa wa apale oothawuliwa, siikhu zaya epo enttela wiiya zoovukuliwa. ²³ Aphano amana ntthu awuuzani yoori: ‘Otu ari apha Al-Masiihu!’ ama: ‘Otule ari okhule!’ mwihinkhupalele. ²⁴ Maana anlawa apuwe a al-Masiihu oojipanka na manapiyu oojipanka anttelaaye oretta alama khulukhulu na vitthu zootikinisa yoori awaahate hatha apale oothawuliwa. ²⁵ Miiyo kawuuzani khapula zihinarettikhane epo zaya. ²⁶ Nakataalikha, amana muuza yoori: ‘Ori n’yaara,’ mwihilawe, ama oriwa: ‘Ori nnyupa,’ mwihikhupali. ²⁷ Maana, nkhamma ethiipo taari enlankhaaye malawa-juwa, na ojithoonyeza okhu lintupweelaawo njuwa, ethiipo onttela wiiya ota wa Mwaana wa Pinaatamu. ²⁸ Vahali aniiyaavo muufwi, akhwaazi ankusanyeya attaapho.

Ota wa mwaana wa Pinaatamu

²⁹ Paata ya mashakha a siikhu epo, njuwa linnella ozima na mweezi ontela olikha waara, matthottowa anttela okwa otulu na owahi wa pinkuuni onttela osakhinyeya. ³⁰ Aphano epuwe pinkuuni alama za Mwaana wa Pinaatamu; khapila zooshi za vatuniya enttela ojikhupanyisa na enttela omoona Mwaana wa Pinaatamu ataaka mmawiku a pinkuuni khwa owahi na siifwa yawaatta. ³¹ Ye onttela operekha malayikha awe na ovuma nwulweene wa malope, yo anttela owaakusanya ananthawuliwa aya ooshi khwa phantte nne zinlankhaawo pheevu, phantte khwa phantte kiina ya pinku.

Nlikaniso wa nfikeera. Ohirimiziwa monkoni wa ojeekesela

³² Mwijinozele osomisa wa nfikeera: Amana virapi zaya zootthelaka mathapa mwinjuwa yoori onsaleela ofiya mwiita. ³³ Etthiipo na mweeyo, amana moona vitthu epo zooshi, mwijuwe yoori wakathi wafiya, ensaleela waaza. ³⁴ Weekhweele kiniwuzani yoori, khanteela ovira atthu apa aleelo zihirettikhaneenee vitthu zaya epo. ³⁵ Pinku na vathi zooshi zinteela ovira, ila mattakhuzi aka khanviraru.

Siikhu na wakathi khijuweyeeni

³⁶ Ila monkoni wa siikhu na wakathi khina anjuwaaye, wala malayikha a pinkuuni, wala Mwaana, ila Paapa paasi. ³⁷ Nkhama ethiipo zaaret-tikhaniyeyo wakathi wa Nuuhi, enttela wiiya ethiipo etelo ya Mwaana wa Pinaatamu. ³⁸ Nkhama ethiipo siikhu ziviriyezo za nnyeri, atthu aari oja na aari onywa, aari oralana na aari oloozana, mpakha ofiya siikhu Nuuhi eettiyeemo mmwaaraka. ³⁹ Yo kaajuwivevo hatha etthu mpakha wakathi otiiyeevo nnyeri na khuwaathuula ooshi. Enttela wiiya ethiipo ota wa Mwaana wa Pinaatamu. ⁴⁰ Aphano awiri anttela wiiya omashapa; mmote athuuliwe, alikhiwe mmote. ⁴¹ Aakha awiri achilaka tiriku; mmote athuuliwe, mmote alikhiwe. ⁴² Mwaasa wa ethiito, mwijeekesele, maana khamwinjuwa siikhu anttelaaye ota Mbwana enu. ⁴³ Ila eweeleyeni vitthu zaya epo; maana, mweenyewe nyuupa eriwaka eetta ojuwa wakathi anttaavo anamwiiya, eetta ojeekesela na khaari olikhelela opwechiwa nyuupa

yawe. ⁴⁴ Tiito, mweeyo theenya mwiiye woojilikanisa, maana wakathi antaavo Mwaana wa Pinaatamu pi opule mwihinaakhipwelaaye.

Karumeya wawaamineya na karumeya woohaaminey়ি

⁴⁵ “Ti tuuvi karumeya wawaamineya na waakhili, otule Mbwana awe amwinkhiyeeyo osala vaje vawe yoori asala awenkha atthu etthu-yoojiwa wakathi khaamili? ⁴⁶ Wooparikhiyiwa karumeya otule mbwana awe ataaka anttelaaye onsikana arettaka ethiipo. ⁴⁷ Weekhweele kiniwuuzani yoori onttela olkheliwa weettettisa maali zooshi za mbwana awe. ⁴⁸ Ila karumeya otule amana eeya wootakhala rooho, ajilupezaka mweenyewe yoori: ‘Mb-wana aka ontta orupaza,’ ⁴⁹ na khusala awaapiya ashirikhaawe na oja na onywa na ananhapaliwa, ⁵⁰ onttela ota mbwana wa karumeya otule khwa siikhu ahaari waakhipwelaaye na wakathi ahinjuwaaye. ⁵¹ Ye onta onhukhumu saaneene antthe puuro ya manaafikhi, ottuukho onttelaaye wiiyawo olila na oluma meeno.

25

Nlikaniso wa aamwari khumi

¹ “Siikhu yaya eto, Ofwalume wa pinkuuni onttela wiiya nkhamma aamwari khumi athuuliye makhompe aya, khulawa okutthanana mposi. ² Athaanu khwa apale khumi aari alolo, athaanu aari akhili. ³ Apale oololo khuthuula makhompe aya, khuhinthuuli patarooya, ⁴ ila apale a akhili olkhia othuula makhompe-ru khunthuula theenya patarooya nttopwiyo. ⁵ Mposi khurupaza ofiya, na ooshi khuwaakhola osikizi khulala. ⁶ Ila osikhu layili, khusileya nkhuwo waari oraaye: ‘Mposi afiya! Mwisaruwe mwampwekhherele.’ ⁷ Aamwari apale ooshi khulankha khusala atthenkeza makhompe aya. ⁸ Apale oololo khusala awooza apale awiyyana akhili yoori: ‘Mwinimeele patarooya enu vattitthiiru, maana makhompe eethu antta osizila.’ ⁹ Yo khujipu yoori: ‘Wala, khanfiyela onrumeyela mweeyo na fweeyo. Mwilawe mwamuuzanye patarooya. ¹⁰ Wakathi alawiyeevo omuuzanya patarooya, mposi khufiya, aamwari apale ajithekiyeeyo khuvira vamote na mposi olawa oja njampo la harusi na nlako khufukiwa. ¹¹ Wakathi vattitthiiru, khusala ata aamwari apale oololo khusala akhuwa araka: ‘Mbwana, mbwana, mwinifukulele nlako!’ ¹² Ila ye khuwaajipu yoori: ‘Weekhweele kiniwuuzani yoori akinuujuwani.’ ¹³ Tiito kiniwuuzanini yoori mwijeesele, maana mweeyo khamwinjuwa siikhu wala wakathi aya.

Nlikaniso wa nzurukhu

¹⁴ “Theenya Ofwalume wa pinkuuni onttela wiiya nkhamma mwinyi mmote atakhaka oretta safwari, khuwaakhuwela akarumeya awe khuwaalikhela maali zawe. ¹⁵ Mmote khumwinkha milikhi thaanu za nzurukhu wa feeta, nkina khumwinkha milikhi piiri, nkina theenya khumwinkha milikhi moote, wakhula ntthu amwinkhiye khwa makhaamu awe. Elottelanaka khulankha khusala alawa safwari yawe. ¹⁶ Otule enkhiweeyo milikhi thaanu za nzurukhu wa feeta, khulankha nasaapiru olawa oretta zanshara khupattha milikhi thaanu kiina. ¹⁷ Otule aariina mizurukhu milikhi piiri khupattha milikhi piiri teenya. ¹⁸ Ila otule enkhiweeyo nzurukhu milikhi moote khulankha khulawa khuthipa liphotto vathi khutthaavo khuvitha nzurukhu wa mbwana awe. ¹⁹ Paata ya ovira wakathi mwinkeene, mbwana wa akarumeya apale khuruti khuretta thamani na apale aya. ²⁰ Otule aapwekheriyeyo nzurukhu milikhi thaanu wa feeta, khutiisa theenya

nzurukhu milikhi thaanu wa feeta na khuri: ‘Mbwana, waakinkhiye nzurukhu milikhi thaanu wa feeta, woona kapattha theenya fwayita ya milikhi thaanu.’²¹ Mbwana khunjipu yoori: ‘Kemaani, karumeya wooshapweya na wawaamineya! Weeyo waamineya khwa ttiitthiiru, apha kintta owinkha yawaatta. Ote ofurahi vamote na mbwana awo.’²² Khuta theenya otule apwekheriyeyo nzurukhu milikhi piiri wa feeta khuri: ‘Mbwana aka waakinkhiye nzurukhu milikhi piiri wa feeta, kapattha theenya milikhi piiri.’²³ Mbwana awe khunjipu yoori: ‘Kemaani, karumeya wooshapweya na wawaamineya, weeyo waamineya khwa ttiitthiiru, miiyo kiniwinkha zawaatta. Ote ofurahi na Mbwana awo.’²⁴ Mwiisho khuta otule apwekheriyeyo nzurukhu milikhi moote khuri: ‘Miiyo kaajuwiye yoori mbwana o nt-thu woozivala, onuurulaaye na epile ohikheyenee na okusanya epile ohizaleeni.’²⁵ Tiito keetta woova, khulawa khuvitha nzurukhu awo milikhi moote wa feeta khuthipela vathi. Woone, apha opu nzurukhu awo.’²⁶ Mbwana khunjipu yoori: ‘Karumeya wootakhala na wooviliwa! Weeyo waajuwiye yoori kinuurula na epile kihikheyenee na kinkusanya epile kihizaleeni.’²⁷ Aphano weeyo waarina ya olawana nzurukhu aka opanko yoori amana kiruti kinkhiwe nzurukhu aka wa wiiyana fwayita.²⁸ Mwinnyakanye nzurukhu opo milikhi moote wa feeta, mwimwinkhe otule ariina milikhi khumi.²⁹ Maana otule ariina, onttela winkhiwa theenya na oniiyana zawaatta. Ila otule ahina, hatha etile ariina ontta onyakanyiwa.³⁰ Karumeya woohiina fwayita, mwimweeselele othetekele n’yiiza ntumpho oriimo olila na oluma meeno.’

Ophukiwa wa khapila

³¹ Amana Mwaana wa Pinaatamu ata nsiifwa mwawe na malayikha ooshi, onttela wiikhala vakhukulu vawe ya nuuru ya pinkuuni.³² Khapila zooshi zinttela okusanyiwa aphale ariivo, avalule khapila khwa khapila kiina nkhamma nshuki avalulaka pwittipwitthi zawe vakatthi wa puuzi.³³ Atthe pwittipwitthi nkhono nlume na puuzi nkhono nkha.³⁴ Aphano Mfwalume onttela owooza apale anttelaaye wiiya nkhono nlume yoori: ‘Mwite mweeyo ooparikhiiyiwa ti Paapa! Mwipwekherele Ofwalume nkhamma eritho mwitthenkezelieeyo thanku wumpiwa wa olumwenku.’³⁵ Maana miiyo yaakikholiye jala, mweeyo khukinkha ethu-yoojiwa; lakikholiye nnyottha, mweeyo khukimeela maati oonywa; kaari nletto mweeyo khukinkha puuro ya omaka.³⁶ Kathaaleliwe, mweeyo khukinkha kuwo; keetta olwaaziwa, mweeyo khukiinanelu; kaari nkalapooso, mweeyo khukithotola.’³⁷ Aphano makhaamili anteela onjipu yoori: ‘Mbwana, lini naawoniyeovo na jala khuwinkha ethu-yoojiwa, ama lookholiye nnyottha khuumeela maati?’³⁸ Wakathi-ni nawooniyeovo ori nletto khuwinkha puuro ya omaka? Ama othaaleliwe, khuwinkha kuwo?³⁹ Wakathi-ni nawooniyeovo ori nlwele ama nkalapooso khuta khuuthotola?’⁴⁰ Mfwalume khujipu yoori: ‘Kiniuuuzani khweele yoori, etile mweeyo mwiwaaretteliyeeyo mmote wa attwiizaku apa attiithi, mwakirettela miiyo.’

⁴¹ Aphano ye onttela owooza apale a nkhono nkha awe yoori: ‘Anamalaanikha mwikaattuwe! Mweette omoottuwa mileele, waattaleleliweeyo Sheethwani na masheethwani awe.’⁴² Maana miiyo yaakikholiye jala, mweeyo khuhikinkhi hatha ethu-yoojiwa, laakikholiye nnyottha mweeyo khuhikinkhi hatha etthu yoonywa.⁴³ Kaari nletto mweeyo khuhikinkhi hatha puuro yoomakavo, kathaaleliwe mweeyo khuhikinkhi kuwo, keetta olwaaziwa na ofukeliwa nkalapooso, mweeyo wala okithotola.’⁴⁴ Yo anjipu yoori: ‘Mbwana, nawoona lini yuukholiye jala wala luukholiye nnyottha

ama ori nletto ama ohina kuwo ama olwaaziwaka na ofukeliwe, fweeyo kuhawaawuni?’⁴⁵ Ye ajipu yoori: ‘Kiniuuuzani khweele yoori, etile mwihinretteleeni mmote wa apale attiitthi, khamwikirettleeni na miiyo.’⁴⁶ Apa aneetta ohukhumu khwa mileele, ila makhaamili anttela wiyana ohaayi wa mileele.”

26

Shawuri za otakha wuuliwa Yinsa

¹ Paata ya olupa vitthu epile, Yinsa khuwooza anakhiyoni awe yoori:
² “Nkhama mwinjuwaazo, ensaleela siikhu piiri ofiya siikhu ya njampo la Paashikowa, na Mwaana wa Pinaatamu onttela winkheleliwa yoori akhomeliwe.”³ Aphano mahaakhimu a tiini na attunkhulu a tiini khukusanyeya onyuupa wa haakhimu nwulu aari wiitthiwaaye Kayifwa;
⁴ khuwaza shawuri yoori ankhole Yinsa sirini na amuule.⁵ Ila khusala alupa yoori: “Nihirette wakathi wa njampo yoori atthu ahipuwise nzuzu.”

Yinsa onvaaziwa mafuttha oonukhela nti wa Betaaniya

⁶ Yinsa eettiye Betaaniya, owawe Simawu otule raku aariinaaye makut-tula.⁷ Aphano muukha mmote khuta aphale aariivo Yinsa athuuliye su-upha ya mafuttha oonukhela awaatta nzurukhu, khwiithela eeshwa ya Yinsa wakathi ansikaniyeevo eekhaliye vameeza.⁸ Anakhiyoni ooniyeevo vitthu epile khushanka na khuri: “Mwaasa aya niini oharipwaka mafuttha apa?”⁹ Mafuttha apa ahoozanyisiwe, nzurukhu aya enkhiwa asikhini!”¹⁰ Ila Yinsa ajuwiyeevo etthu aari olupaaye, khuri: “Mwinimwantipwelani muukha otu? Ye aretta etthu yooshapweya khwa miiyo.¹¹ Maana asikhini aniiya vamote na mweeyo wakhula siikhu, ila miiyo wala.¹² Mafuttha apa eettheliyeyo mwiili aka, ye aretta khwa ontthenkeza ozikhiwa waka.¹³ Kiniuuuzani khweele yoori: Wakhula vahali entafusiriwaavo hapari zooshapweya khwa olumwenku wooshi, epi arettiyeeyo muukha otu, zeettaka olupiwa noofikhiriwa ye.”

Yuuda oninzinkula Yinsa

¹⁴ Aphano mmote wa apale khumi na awiri, aariwitthiwaaye Yuuda Eshikariyoote, khulawa okutthanana mahaakhimu a tiini.¹⁵ Khuwoozela yoori: “Mwinikiripha kavi amana miiyo kiwinkhelelani?” Yo khusilana onripha nzurukhu talaathiini wa feeta.¹⁶ Waaza wakathi otthuupule Yuuda khusala eekesaka nanna ya omwinkhelela Yinsa mmakhono wa maatuwi awe.

Anakhiyoni antthenkeza njampo la paashikowa

¹⁷ Siikhu ya mwanzo ya Njampo la Phaawu Yoohiina Fwaramento, anakhiyoni khumwaattama Yinsa khumuuzela yoori: “Ontakha yoori nitthenkeze vayi etthu-yoojiwa ya Paashikowa?”¹⁸ Yinsa khujipu yoori: “Mwilawe nsitati mwakutthanane mwinyi mmote mwimuuze yoori: ‘Mwaaliimu alupa yoori: Wakathi aka onsaleela ofiya. Kinttela onja Paashikowa na anakhiyoni aka vaje vawo.’”¹⁹ Anakhiyoni khuretta etthiipile ooziweezo ti Yinsa na khuntthekeza Paashikowa.

²⁰ Weettelaka oripa, Yinsa khulawa khwiikhala vameeza na anakhiyoni awe apale khumi na awiri.²¹ Eettaka oja, khulupa yoori: “Kiniuuuzani khweele, mmote wa mweeyo onlawa akizinkule.”²² Yo khwiya oohuzunika channu na khwaaza wuuzelana yoori: “Weekhweele khahiyo miiyo Mbwana?”²³ Yinsa khujipu yoori: “Nlupa anttelaaaye okizinkula kinjana sahani moote.”²⁴ Mwaana wa Pinaatamu onlawa afwe, nkhamma ethhipo yaatikhiweeyo monkoni wa ye. Ila wootakhaliwa ti otule anttelaaaye

onzinkula Mwaana wa Pinaatamu! Afwataali ahivokoliweeni.” ²⁵ Aphano Yuuda, namazinkula, khuri: “Talili ti miiyo Mwaaliimu? Yinsa khujipwela araka: “Ayo, ti weeyo.”

Njampo la Mbwana

²⁶ Eettaka oja, Yinsa khuthuula phaawu, khuparikhiya, khumeya na khuwenkha anakhiyonи awe araka: “Mwifthuule na mwirafune; opu mwili aka”. ²⁷ Elottelanaka khuthuula jiikira, khushukhurwela na khuwenkha araka: “Mwinywe mooshi mweeyo. ²⁸ Eti taamu yaka ya wahati yiithiweeyo khwa zwaamu ya atthu awaatta yoori eswaamiheliwe twampi. ²⁹ Miiyo kini-wuuzani yoori, waaza nasaapi mpakha okho ninttaawo, akinlawa onywa nshumo wa nrayi wa wuuva mpakha siikh kinttelaaye onywa theenya nshumo wa nrayi wa wuuva na mweeyo muufwalume wa Paapa. ³⁰ Paata ya yo wiipa liipo limote, khusala alawa omwaako Oluveera.

Yinsa onlupa yoori Pheeturu onteela onkhana

³¹ Aphano Yinsa khulupa yoori: “Osikhu opu, mooshi mweeyo mwinteela okitthira. Maana yaatikhiwa yoori: ‘Kininvulalisa nshuki, pwittipwitthi za liphanko lawe zimwazeye.’ ³² Ila paata ya osisimuwa waka, kinttela olokoza Kalileya.” ³³ Pheeturu khujipu yoori: “Hatha nkhamma ooshi eetta wuutthira, miiyo akintela wuutthira.” ³⁴ Yinsa khumuza araka: “Weekhweele kiniwuuzza yoori osikhu otthuupu, likukhuwi lihineekhe, weeyo onlawa wakikhane swaafu ttatthu.” ³⁵ Pheeturu khujipu theenya yoori: “Hatha nkhamma ofwa vamote na weeyo, akintela wuukhana!” Anakhiyonи ooshi khulupa ethiipo.

Yinsa nwoorotha wa Yetemaani

³⁶ Aphano Yinsa khulawa na anakhiyonи awe puuro eniitthiwaaye Yetemaani khuwooza yoori: “Mwiikhale apha, miiyo kinttela olompa aphale.” ³⁷ Khunthuula Pheeturu na aana awiri a Zepeteewu, Yinsa khwaaza ohuzunikha na othunkuwikha. ³⁸ Yinsa khuwooza yoori: “Nafusi yaka ti ya ohuzunikha venkivenе, woosaleela ofwa. Apho mwisale apha na njeekesele fooshi.” ³⁹ Khususa vattitthiiru, khukokhora khufiisa ajihi yawe vathi, khusala olompa araka: “Paapa, nkhamma enwaheya, okaattuwaniye jiikira eti ya ohoowa; ila ehirettikhane nkhamma kintakhaazo, ila nkhamma ontakhaazo. ⁴⁰ Paata ya toole, khurutela aphale aariivo anakhiyonи awe khuwaasikana eettaka olala. Yinsa khumuuzela Pheeturu yoori: “Mweeyo khamwiwa-heeni nenkawu ojeekesela fooshi wakathi mmote paasi? ⁴¹ Mwijeekesele na mwilompe yoori mwihikwele muuzayiniwa. Rooho ti yookhomaala ila mwili pi woottettheya.” ⁴² Khurutela olawa olompa theenya khuri: “Paapa, nkhamma khinwaheya okattuwananisa jiikira eti khapula kihinyweeni, ti arettikhane matakhelawo.” ⁴³ Wakathi arutiyeovo theenya khuwaasikana eettaka olala, maana maasho aya eetta owaalemela. ⁴⁴ Aphano khuwaalikha theenya, khulawa olompa swaafu ya ttaatthu, alupaka mattakhuzi atthaapale. ⁴⁵ Nawiisha khurutela attaphale aariivo anakhiyonи awe na khuwoozela yoori: “Mweeyo nalelo mwintta olala na wiithuuwa? Wafiya wakathi! Moone yoori Mwaana wa Pinaatamu onttela winkheleliwa mmakhono wa anatwampi. ⁴⁶ Mwilankhe, nilawe; oto antaaye apho namazinkula!

Okholiwa wa Yinsa

⁴⁷ Eettaka ottakhula ethiipile, khuta Yuuda, mmote wa apale khumi na awiri, vamote na khuntti khuluyeene athuuliye phanka na puutta, zaperekhiweeyo ti mahaakhimu a tiini na attunkhulu a tiini. ⁴⁸ Namazinkula

aawenkhiye alama apale aasiilananiyeeyo araka: “Otule kinttelaaye omnipatikha ti othuuto, mwinkhole.” ⁴⁹ Wakathi Yuuda aari omwaattamaavo Yinsa khuri: “Salaama, Mwaaliimu!” Na khumpatikha. ⁵⁰ Yinsa khumuaza yoori: “Swaahipu, etile oteeliyeeyo oretta, waakuve orette”. Attaaphale khususeliwa, khukholiwa Yinsa khufukiwa. ⁵¹ Mmote wa apale aarina Yinsa khookola nkhono khuthuula phanka khushija nshiilo la karumeya wa haakhimu nwulu wa tiini. ⁵² Aphano Yinsa khuwoza anakhiyoni awe yoori: “Mwipwehe phanka! Maana wooshi otule anlipanaaye phanka, ofwa khwa phanka ethiito. ⁵³ Mweeyo mwinoona yoori miyo akinwahi onvekela Paapa khukiperekheza nasaapi khuntti khumi na piiri za malayikha? ⁵⁴ Nkhama etthiipo enlupaaye Zawaatikhwa Ttakatthiifu yoori vitthu zaarina ya oretikhana nkhama etthiipi?”

⁵⁵ Wakathi otthuupule Yinsa khuwoozela atthu apale yoori: “Mwateela okikhola na phanka na puutta, nkhama nlokozi wa anazompere? Siikhu zooshi miyo kaari osomisa Nnyupa Woosifwiwamo, khi mweeyo ohikikholi! ⁵⁶ Ila zooshi epi zarettikhana yoori emarisele zawaatikhwa za manapiyu. Aphano anakhiyoni ooshi khumwanswi na khuntthira.

Yinsa vakatthi wa mashawuriya

⁵⁷ Apale ankholiyeeyo Yinsa khunthuula khunlawana wa Kayifwa, haakhimu nwulu wa tiini ottuukho aakusanyeyiyeeyo anamanozela a kano na attunkhulu a tiini. ⁵⁸ Pheeturu eetta owaalotta peetiwene mpakha vaje wa haakhimu nwulu wa tiini, khuvira khwiikhala na anamweekesela yoori oone zooshi nanna zaari weettelaaye wiishela. ⁵⁹ Mahaakhimu a tiini na mashawuriya ooshi aari weekesa oshaahiti woovonyeya khwa Yinsa yoori anhukhumwele ofwa. ⁶⁰ Ila khuhinsikanani, aapuwiye-ru atthu awaatta oolaza oshaahiti woovonyeya. Omwiisho khujithoonyeza atthu awiri, ⁶¹ khulupa yoori: “Mwinyi otu alupa yoori: ‘Miiyo kinwahi opwecha Mwimpari Nluku na khujeka khwa siikhu ttatthu.’” ⁶² Aphano haakhimu nwulu wa tiini khulankha khumuaza Yinsa yoori: “Khunjipu epo onlupeziwaaye?” ⁶³ Ila Yinsa nalelo khwiiya woonyamala. Haakhimu nwulu wa tiini khumuaza yoori: “Kinuuvekela yoori weeyo olaphe khwa Nluku woohaayi, nkhama weeyo o Al-Masiihu, mwaana wa Nluku, onuuze.” ⁶⁴ Yinsa khujipu yoori: “Weeyo walupa. Ila miiyo kiniwuuzani mooshi mweeyo yoori: enttelu ofiya siikhu mwinttelaaye omoona Mwaana wa Pinaatamu eekhaliye nkhono nlume wa nwahi zooshi, ataaka khwa mawiku a pinkuuni. ⁶⁵ Aphano wakathi haakhimu nwulu wa tiini avaruliyeeyo kuwo zawe na khulupa yoori: “Akufuru! Mwaasa wa niini nihithajiyaka oshaahiti nkina theenya? Mweeyo mwasiila nasaapi okufuru wawe! ⁶⁶ Mwinuupuwela toovi?” Khujipu yoori: “Oninsuhi ofwa!” ⁶⁷ Akina khusala antthemela omaasho na ompiya, akina khusala ampwakula araka: ⁶⁸ “Onlupe, Oo Al-Masiihu, ti paani oopiyeeyo?

Pheeturu oninkatthala Yinsa

⁶⁹ Pheeturu eettiye wiikhala vaje. Njaazi mmote khumwaattama khumuaza yoori: “Na-weyo waari na Yinsa nkalileya.” ⁷⁰ Ila ye khukhana vakatthi wa atthu ooshi araka: “Akinjuwa etthu ontakhulaaye.” ⁷¹ Paata ya toole khuthoonya phantte ya omilako, njaazi nkina khumoona khwooza apale aari attaaphale yoori: “Mwinyi otu aari na Yinsa wa Nazareeti.” ⁷² Ye khukhana theenya khwa olapha araka: “Akininjuwa mwinyi aya otu!” ⁷³ Elottelanaka, apale aari attaaphale khumwaattama Pheeturu khumuaza yoori: “Weekhweele weeyo o wawe! Ottakhula wawo

onthoonyeza.” ⁷⁴ Attaaphale ye khwaaza ojilaani na olapha araka: “Akin-injuwa!” Nasaapiru likukhuwi khwiikha. ⁷⁵ Aphano Pheeturu khufikhiri nt-takhuzi ooziweeyo ti Yinsa yoori: “Likukhuwi lihineekhe onteela okikhana swaafu ttatthu.” Noolaavo aphale vaya khulila wakatapuvo.

27

Ojiheya wa Yuuda

¹ Supuyeene, attunkhulu a mahaakhimu na anamalokozela a tiini khuji-lakelela onhukhumwela Yinsa ofwa. ² Khunfuka khunthuula khunlawana wa nsatoro Pilaatu.

³ Wakathi Yuuda, otule anzinkuliyeeyo, ooniyeovo yoori Yinsa onttela ohukhumwiwa, khuthupwiya na khulawa owaarutisela attunkhulu a mahaakhimu na anamalokozela a tiini nzurukhu opule talaathiini wa feeta aathuuliyeeyo. ⁴ Khuri: “Kakosa, khwa ozinkula taamu yoohikosi.” Yo khujipu yoori: “Fweeyo ennijali niini? Epo ti weeyo onjuwaaye.” ⁵ Aphano Yuuda khweeselela nzurukhu omwimpari. Khusaruwa nawiisha khulawa khujiheya. ⁶ Mahaakhimu a tiini khukusanya nzurukhu opule, khuri: “Khahi halaali othuula khuttha mmwifukho wa zaakha, maana hisapu ya taamu.” ⁷ Aphano khusilana orumeyela nzurukhu aya opule khwa wuuzanyela nshapa la namuupa yoori lirettiwe vilalo la ozikhiwamo aletto. ⁸ Tiito nshapa laya nttho liniithiwaaye Nshapa la Taamu mpakha siikhu epi za leelo. ⁹ Aphano khurettikhana epile zaalupiweeyo ti napiyu Jeremiiya yoori: “Athuula nzurukhu talaathiini wa feeta, hisapu yootthiiwa pi atthu a Ezirayiilu, ¹⁰ khuuzanyela nshapa la namuupa, nkama etthiipo Mbwana aakirumiyeeko.”

Yinsa wa Pilaatu

¹¹ Yinsa khutthiiwa omaasho wa nsatoro ye khumuuzela yoori: “Weeyo onfwalume wa mayaahuuti?” Yinsa khujipu yoori: “Pi ethiipo olupiyeezo.” ¹² Ila eettaka olokoveziwa ethiipile pi attunkhulu a mahaakhimu na anamalokozela a tiini, ye khuhijipu. ¹³ Aphano Pilaatu khumuuzela yoori: “Weeyo khunsiila vitthu epo onlokoveziwaaye pi atthu apo?” ¹⁴ Ila Yinsa khuhijipu hatha ntakhuzi, khwa ethiito nsatoro khwiiya wooshanka.

Yinsa onhukhumweliwa ofwa

¹⁵ Amana efiya siikhu ya njampo nsatoro aazowereliye onfukulela ntthu woorthawuliwa pi atthu. ¹⁶ Yo wakathi aya otthuupule aarina napherezu woojuwanikha aari wiitthiwaaye Baraapa. ¹⁷ Pilaatu khuwoozela atthu apale athukumanieeyo attaaphale yoori: “Ti tuuvi khwa apa awiri mwintakhaaye yoori kinfukulele: Baraapa ama Yinsa anitthiwaaye Al-Masihu?” ¹⁸ Maana aajuwiye yoori anlawaniye okhule mwaasa nrima. ¹⁹ Pilaatu eekhaliye onyuupa woophukiwamo, muukha awe khumperekha hapari araka: “Ohijiphakanyane apo, maana leelo muulotha kahowa venkivene monkoni wa ye.” ²⁰ Ila mahaakhimu a tiini na anamalokozela a tiini khuwaakhitiri atthu apale yoori aveke Ofukuliwa Baraapa na ooliwe Yinsa. ²¹ Aphano Nsatoro khuuzela yoori: “Khwa atthu apa awiri mwintakhe-laaye yoori miiyo kinfukulele ti tuuvi?” Yo khujipu yoori “Baraapa!” ²² Pilaatu khuuzela yoori: “Khi kinrettele niini Yinsa, anitthiwaaye Al-Masihu?” Ooshi khujipu yoori: “Akhomeliwe!” ²³ Pilaatu khuuzela yoori: “Niini arettiyeeyo yootakhala?” Ila atthu apale khusala avira atepaka onyakula araka: “Akhomeliwe!” ²⁴ Wakathi Pilaatu asopheliyeovo yoori khaari opattha hatha swamiima, ila olika toowo khusala oona weekezeleya nzuzu, khurumisa otiiseliwa maati, khunawa omaasho wa atthu apale na

khulupa yoori: “Akina paathuli khwa taamu ya ntthu otu; eto zwaamu yenu.”²⁵ Atthu ooshi apale khujipu yoori: “Taamu yawe ti eniittikhele fweeyo na aana etthu!”²⁶ Aphano Pilaatu khunfukulela Baraapa, khurumaojaphiwa Yinsa na khumwinkhelela olawa okhomeliwa.

Anajanka aninveyisa Yinsa

²⁷ Elottelanaka, anajanka a nsatoro khunthuula Yinsa khunlawana nyuupa khuulu ya nsatoro khukusanyeya anajanka ooshi khunzukulela.²⁸ Khunvula kuwo zawe khunwalisa ajapi yookhuttuwa;²⁹ khuvaasha khaara ya miiwa, khunwalisa mmewishwa mwawe na khunttheela puutta nkhono awe nlume, khunkokhorela khusala anveyisa, araka: “Ojuusuru, mfwalume wa mayaahuuti!”³⁰ Khusala antthemela na khunnyakanya puutta etile, khumpiyana veeshwa.³¹ Paata ya onveyisa, khunvula ajapi etile khunwalisa ajapi yawe. elottelanaka khusala alawa onkhomela.

Okhomeliwa wa Yinsa

³² Alawaka, khukutthanana nsireene aari wiitthiwaaye Simawu, khukhanyareliwa othuula nsalapa wa Yinsa.

³³ Yo khufiya puuro eniitthiwaaye Kolokoota, eriina maana a puuro ya likurakuza la eeshwa,³⁴ khumwinkha onywa viinyu yoophakanyaniwa wamwe; ila ye wakathi ootiyeevo, khukatthala onywawa.³⁵ Paata ya onkhomela, khwawanyana kuwo zawe khwa weekesa nasipu.³⁶ Khwiikhala attaaphale khusala amweekesela.³⁷ Vatulu wa eeswa yawe khutthiiwavo lipawu laatikheweeyo khwa olokoveziwa wawe yoori: “OTU TI YINSA, MFWALUME WA MAYAAHUTI.”³⁸ Na aakhomelaniwe anamwiyya awiri, mmote nkhono nlume nkina nkhono nkha.³⁹ Apale aari oviraaye eetta onttukhana na wiinisa viishwa zaya,⁴⁰ araka: “Oo weeyo waari weettelaaye opwecha Nyuupa Yoosifwiwamo na khujeka khwa siikhu ttatthu, ojuusuru! Wiishukhe vansalapa apha nkhama omwaana wa Nluku!”⁴¹ Khwa nanna etthiipo mahaakhimu a tiini, anamanozela a kano na attunkhulu a tiini eetta onveyisa,⁴² araka: “Wawoosuru akina, ila khunwahi ojuusuru! Mfwalume wa Ezirayiilu! Eeshukhe nasaapi vansalapa apha, nintta onkhupali.⁴³ Ye amwaamini Nluku. Nluku ti amuusuru nasaapi ethiiti, nkhama ona huruma na ye, maana alupa yoori: ‘Ki mwaana wa Nluku!’”⁴⁴ Theenya anamwiyya apale aakhomelaniweeyo khusala anttukhana.

Ofwa wa Yinsa

⁴⁵ Yaapuwiye yiiza nti wooshi, payina ya saasiitha mpakha saakhentta.⁴⁶ Paata ya ofiya saakhentta, Yinsa khukhuwa woonyakulavo, araka: “Eloohi, Eloohi, lama sabatani?” Eriina maana a “Nluku aka! Nluku aka! Mwaasa wa niini okanswaka?”⁴⁷ Akina aarivo noosiila epile, khulupa yoori: “Ye oninkhwela Aliyaasi.”⁴⁸ Woohirupazi, mmote wa yo khutthirela shiponja, khunaanisa na viinyu yoonyuunya, khuttha pontha wa ttekethe na khumwinkha Yinsa yoori anywe.⁴⁹ Akina khusala alupa yoori: “Mwinlikhe, nimoone nkhama Aliyaasi onteela omuuusuru.”⁵⁰ Aphano Yinsa khukhuwa woonyakulavo saaneene khufwa.

⁵¹ Wakathi otthuupule phazira ya omwimpari khwaawanyeya vakatthi, waaza vatulu mpakha vathi. Nti khusakhinyeya na mawe khupwecheya.

⁵² Khapuri epile khufunuwa na mwiili wa attakatthifu awaatta afwiyeeyo khusisimuwa.⁵³ Noolaamo nkhapuri mphule, paata ya Yinsa osisimuwa, atthu apale akina asisimuwyeyo khweetta sitati Ttakatthiifu na khooniwa pi atthu awaatta.⁵⁴ Nttunkhulu wa anajanka na apale aari omweekese-laaye Yinsa, nawoona esikinyaatthi na zooshi zaarettikhaniyeeyo, khwiyya

awoova channu khulupa yoori: "Khweele-khweele, ntthu otu aari mwaana wa Nluku!"

⁵⁵ Aakha awaatta aari attaphale khusala oona ari peetiwene. Apale amperekhiyeeyo Yinsa waaza Kalileya yoori anrumeyele. ⁵⁶ Vakatthi vaya aarivo Mariyamu Mataleena, Mariyamu mamaawe Yaakhumpa na Yuusufu na Maama wa aana a Zepeteewu.

Ozikhiwa wa Yinsa

⁵⁷ Njuwa leettelaka oveva, khuta mwinyi mmote wa thajiri wa Arimateeya anithiwaaye Yuusufu aari namalottela wa Yinsa. ⁵⁸ Khulawa wa Pilaatu, khuveka mwiili wa Yinsa. Pilaatu khuruma winkhiwa. ⁵⁹ Yuusufu khuthula mwiili wa Yinsa khuputaputela va joora, ⁶⁰ khunttha nkhapuri pheeya, aarumiyeeyo othipiwa vamawe. Vanlako wa khapuri yaya khutthaavo liwe liwululene, khulankha khusala alawa. ⁶¹ Mariyamu Mataleena na Mariyamu nkina, eekhaliye attaphale omaasho wa khapuri.

Namweekesela wa Khapuri

⁶² Mmeesho mwaya, siikhu ya saapatu, mahaakhimu a tiini na amafwarizeewu khulawa wa Pilaatu. ⁶³ Yo khumuza yoori: "Mbwana, ninfikhiri yoori wakathi aariye haayi, namattettekha otule aalupiye yoori siikhu ya ttaatthu ontta osisimuwa. ⁶⁴ Apho orume yoori khapuri etile yeekeseliwe saaneene mpakha siikhu ya ttaatthu, yoori ehirettikhane ota anamalottela awe khupwecha khapuri na awooze atthu yoori: 'Asisimuwa muufwa,' lintela wiya nzuuzu lootepa zayita la mwanzo." ⁶⁵ Pilaatu khulupa yoori: "Apho mwawaathuule anajanka. Mwilawe mweekesele khapuri khwa nanna mwinoonaaye yoori mwinwahi." ⁶⁶ Yo khulawa khusoromezavo liwe ntthile lafuukaniweeyo khapuri na khuwaalikha attaphale anajanka eekeselaka.

28

Osisimuwa wa Yinsa

¹ Paata ya ovira lifwajiri, yeettelaka waaziwa siikhu ya mwanzo ya sumana, Mariyamu Mataleena na Mariyamu nkina khulawa woona ovilalo. ² Aphano khupuwa esikinyaatthi khuluyeene, maana nlayikha la Mbwana leetta wiishukha pinkuuni khuta mpakha vakhapuri khususisa liwe ntthile laafukaniweeyo khwiikhalela. ³ Ozerima wawe waari nkhamataari na kuwo zawe zaari zoolakala nkhamma maphovu. ⁴ Anamweekesela khusala athukumela mwaasa wa woova khumpuwa nkhamma afwikiye. ⁵ Nlayikha ntthile khuwooza aakha apale yoori: "Mwihoove, kajuwa yoori mweeyo mwinimweekesa Yinsa otule aakhomeliweeyo. ⁶ Ye khaamo mphu, asisimuwa, nkhamma ethiipo aalupiyeego. Mwite moonevo apha aattattikhe-liweeyo. ⁷ Mwilawe mwawooze anakhiyonи awe yoori Yinsa asisimuwa muufwa na alokoza kalileya. Mwinttela omoona ottuukho. Mattakhuzi aya pi atthaapa kiwuuziyeenini." ⁸ Aakha apale khusaruwa nvilalo mphule na waakuva eettaka woova na arina furaha, na khusala atthira olawa owooza anakhiyonи awe. ⁹ Nasaapiru, Yinsa khuwaapuweela na khuwooza yoori: "Salaama!" Yo khumwaattama na khupatikha moolu awe khumwaapu. ¹⁰ Aphano Yinsa khuwooza yoori: "Mwihoove, mwilawe mwawooze attwizaku apale eette Kalileya; anttela okoona ottuukhu."

Hapari za anamweekesela

¹¹ Aakha apale nalelo ari ntarikhi, anajanka akina aari weekeselaaye vilalo etile khurutela ositati khuwooza mahaakhimu a tiini zooshi zaaretikhaniyeeyo. ¹² Wakathi attunkhulu a mahaakhimu aakusanyeyiyeovo na

anamalokozela a tiini, khuwaza shawuri. Khuwenkha anajanka nzurukhu wawaatta,¹³ awoozaka yoori: “Alupe yoori: ‘Aatiye anakhiyonи awe osikhu khumwiiya fweeyo neettaka olala.’”¹⁴ Yoori amana zifiya omashiilo wa nsatoro, fweeyo nintta omweeleza na nintta owaakisani khwa wakhula nlattu.”¹⁵ Etthiipile, anajanka khupwekhera nzurukhu opule na khuretta etthiipo anozeliweeyo. Mattakhuzi aya apo khumwazeyela vakathi wa mayaahuuti mpakha leelo eti.

Khaazi khuluyeene

¹⁶ Maswihaapa apale khumi na mmote khulawa Kalileya, omwaako okhule Yinsa awoziyeewo.¹⁷ Wakathi amoniyeovo khumwaaputu; akina khumwakanyera.¹⁸ Aphano Yinsa khuwaattama khuwooza yoori: “Kenkhiwa miiyo ofwalume, pinkuuni na vathi.¹⁹ Nakataalikha, mwilawe mwawaarette anakhiyonи khwa khapila zooshi, mwiwoosaka khwa nzina la Paapa, la Mwaana, na Rooho Ttakathiifu,²⁰ mwiwaasomisaka oshututela zooshi epile kirumiyeexo. Na miiyo kinttela wiiya vamote na mweeyo mpakha mwiisho wa wakathi.

Maaruku

Yaahaya Namoosa ontthenkeza Tarikhi

¹ Omwanzo wa hapari zooshapweya za Yinsa Al-Masihu, Mwaana wa Nluku. ² Yaatikhiwa khwa ohupiri wa napiyu Ezaaya yoori: “Moone, kinlawa kamperekhe omaasho wawo karumeya aka, yoori atthenkeze tarikhi yawo; ³ huula enkhuwa enyakulaka n'yaara yoori: ‘Mwitthenkeze tarikhi ya Mbwana na mookolele miphiiitelo zawe. ⁴ Aapuwiye Yaahaya namoosa n'yaara, khusala atafusiri monkoni wa woosiwa na othupwiya khwa nswammaha wa twampi. ⁵ Atthu ooshi a nti wa Yudeya na apale a Yeruzaleemu aari ovira ataaka na otukhuru twampi zaya na yo aari wiiya a woosiwa khwa ye mmuttho Yorotaani. ⁶ Kuwo aari owalaazo Yaahaya zaari za shapala za enkamiiya. Ye aarina nzako awe wa shapala na aari ojaka mapalaka na asali ya ntthuttu.

Yaahaya onlawela oshaahiti wa Yinsa

⁷ Atafusiraka aari ori: “Paata ya miiyo onta otule ariina oowahi zayita miiyo, oto akinsuhi ofukula mikhoyi za jampali zawe. ⁸ Miiyo kiniwoosani na maati, ila ye onttela owoosani na Rooho Ttakatthiifu.

Woosiwa na ozayiniwa wa Yinsa

⁹ Wakathi otthuupule, khuta Yinsa wa Nazareti ya Kalileya khoosiwa ti Yaahaya mmuttho wa Yorotaani. ¹⁰ Nasaapiru, eettaka ovuuwa mmaati, khoona pinku efukuwiye na Rooho Ttakatthiifu yeettaka omwiishukhela nkhama jiwa. ¹¹ Aphano khuta huula pinkuuni elupaka yoori: “Weeyo o mwanaka wa wuupheta, na wookituvela channu.” ¹² Nasaapiru, Rooho Ttakatthiifu khunthuula khunlawana n'yaara. ¹³ Nttumpho eekhaliyeemo siikhu arupayiini, eettaka ozayiniwa ti Epiliisi. Ye aari vakatthi wa nyama za ntthuttu, ila malayikha aari ovira anrumeyelaka Yinsa.

Yinsa onrutela Kalileya

¹⁴ Paata ya Yaahaya ofukeliwa, Yinsa khulankha khusala alawa Kalileya, alaleyaka hapari zooshapweya za Nluku, ¹⁵ alupaka yoori: “Wakathi wafiya, na ofwalume wa Nluku ori kharipu; mwitupwiye na mwikhupali hapari zooshapweya.”

Othawuliwa wa Maaswihaapa

¹⁶ Eettaka olawa alottaka shiini ya ntthatta la Kalileya, khuwoona attwi awiri Simawu na Antere, eeselelaka matthavi aya mpahari, mwaasa yoori aari anamajiya. ¹⁷ Yinsa khuwooza yoori: “Mwikilotte, kintta wuurettani wiyya anamajiya a atthu.” ¹⁸ Aphano nasaapiru khulikha matthavi aya khusala anlotta. ¹⁹ Eettaka olawa ethiipile, khumooda Yaakhumpa, mwaana wa Zepeteewu na ttwiye Yaahaya ari mmwaatiya alazelaka matthavi aya. ²⁰ Khuwaakhuwela, nasaapiru khulikha papaaya mmwaatiya vamote na anakhaazi awe khusala anlotta Yinsa.

Yinsa onimwiikara sheethwani

²¹ Paata ya toole, khulawa Kafwaranaawu. Noofiya saapatu khulawa osomisa nsinakooka. ²² Khusala awaatuvela masomi awe, maana aari owaasomisa nkhama ntthu wawiiyana ofwalume na woohiiyi nkhama anamanozela a kano. ²³ Aphano khuta nsinakooka mphule nlume aash-inttiweeyo ti sheethwani. Ye khusala akhuwa araka: ²⁴ “Onnitakhelani

fweeyo, Yinsa wa Nazareeti? Wata yoori onitapanye? Kajuwa yoori weeyo o Ttakatthiifu wa Nluku!” ²⁵ Ila Yinsa khunmaruwela araka: “Onyamale, oleemo mmwiili wa mwinyi otu!” ²⁶ Aphano sheethwani khuntatha ntthu otule woohusutivo khusaruwa mmwiili mwawe eettaka onyakula. ²⁷ Atthu ooshi khwiya ooshanka mpakha khufiyelela wuuzelana atthaaporu yoori: “Niini epi zaya? Masomi mapheya antanaaye ofwalume! Mpakha onruma masheethwani yo khunshututela!” ²⁸ Hapari epile monkoni wa ye khumwazeyela nasaapiru nti wooshi wa Kalileya.

Owahi wa Yinsa vakatthi wa masheethwani na marati

²⁹ Wakathi aliiyeemo nsinakooka, khulawa na Yaakhumpa na Yaahaya owawe Simawu na Antere. ³⁰ Nkhewewe Simawu eettiye orapalela voolili, yaari onlwaza hooma, nasaapiru khuuziwa Yinsa. ³¹ Aphano ye khumwaattama, khunkhola nkhono khunlansa, nasaapiru hooma khumwisha, khwaaza owaarumeyela. ³² Weettelaka oripa, paata ya otupweela njuwa, atthu khuwaathuula alwele ooshi na anamasheethwani khumweettisela Yinsa. ³³ Atthu ooshi a nsitati mphule khukusanyeya vanlako wa nyuupa ethiitile, ³⁴ ye khuwaavonisa awaatta aari ohoochiwaaye pi marati a wakhula nanna. Theenya khwiikara masheethwani awaatta. Ye khaari olilha masheethwani apale ottakhula, maana yo aari onjuwa paani Yinsa.

Yinsa onlompa puuro yawiitthaaleyavo

³⁵ Supuyeene, nalelo ohinache saana, Yinsa khulankha khusaruwa khulawa puuro yawiitthaaleyavo ohali aari olompaawo. ³⁶ Simawu na ashirikhaawe khulawa omweekesa. ³⁷ Nonsikana, khumuza yoori: “Atthu ooshi antta oweekesa weeyo!” ³⁸ Yinsa khuwaajipu yoori: “Nlaweni ohali okinoko, miti naattamananiyeeyo, yoori kilawe kalaleye, maana tithiito miiyo kiteeliyeeyo.” ³⁹ Aphano ye khweettetta Kalileya yooshi eettaka otafusiri nsinakooka na wiikara masheethwani. ⁴⁰ Namaharaja mmote khumwaattama na khunkokhorela khunvekela yoori: “Amana otakha onwahi okitwaharesha!” ⁴¹ Yinsa ari wawiitaala huruma, khookola nkhono awe khunsapa na khulupa yoori: “Kintakha. Wiiye wootwahareshiwa!” ⁴² Nasaapiru maaharaja apale khwiya omwiisha na ye khwiya wootwahareshiwa. ⁴³ Elottelanaka Yinsa khuwaaleeza na awaaleezaka woomaruwavo, ⁴⁴ aphano Yinsa khumuza yoori: “Ohimuze hatha ntthu, ila olawe, wanvekele haakhimu yoori awoone nkhamma wavona, arette twaha etile Munsa arumiyeeyo yoori wiiye oshaahiti. ⁴⁵ Ila mwinyi otule khusala alawa na khwaaza olaleya vitthu epile na omwaza hapari. Mwaasa wa vitthu epile, Yinsa khuhisala awahi theenya weetta nsitati, ila khwiikhala othetekele puuro yawiitthaaleyavo. Khusala ata atthu wakhula phantte oteela okutthanana Yinsa.

2

Ovonisiwa wa namarakala nti wa Kafwaranaawu

¹ Paata ya siikhu vattitthiiru, wakathi Yinsa aaruteliyeeyo theenya Kafwaranaawu, atthu khusiila elupiwaka yoori ye aari owawe. ² Aphano atthu awaatta khweetta ottuukhule, khwa nanna ya haariivo puuro hatha vamilako, na khusala awaatafusirela ntthakhuzi la Nluku. ³ Khutavo atthu akina antiisiyeeyo ntthu aarinna supiyaani, athuliwe pi alumme wane. ⁴ Khuhisala awahi onfiisa aphale aariivo Yinsa mwaasa wa atthu waatta. Elottelanaka khulawa khutamula phantte ya liphala la nyuupa, khuphenyisavo nrepa opule arapaleliyeovo nasupiyaani. ⁵ Ooniyeeveo amini etile aariina, Yinsa khumuza nasupiyaani otule yoori: “Mwanaka, twampi

zawo zaswaamihiwa.” ⁶ Eekhaliye attaaphale anamanozela a kano akina na khwaaza wuupuwela: ⁷ “Mwinyi otu ontakhula toowo mwaasa wa niini? Ontta okufuru! Anwahaaye oswaamihi twampi ti paani, woohiiyi Nluku paasi?” ⁸ Yinsa nasaapiru khumweeleya nroho mwawe yoori zaari etthiipo epile yo aari wuupuwelaaye na khuwooza yoori: “Mwaasa aya niini mweeyo muupuwelaka vitthu epo nroho mwenu? ⁹ Etthu yookhweya omuuza nasupiyaani titiivi, omuuza yoori: ‘Twampi zawo zaswaamihiwa’ ama ‘Olankhe othuule nrepa lawo weettette?’ ¹⁰ Ila yoori mwijuwe yoori Mwaana wa Pinaatamu onaaye owahi wa oswaamihi twampi” khumuuzza nasupiyaani ¹¹ “Miiyo kiniwuza: Olankhe, othuule nrepa lawo olawe owawo.” ¹² Wakathi otthuupule mwinyi otule khulankha ooniwaka pi atthu ooshi, khuthuula nrepa lawe khusaruwa. Yo khwiya ooshanka na khuntitthimisa Nluku, alupaka yoori: “Khaninoone vitthu nkhamma epi!”

Okhuweliwa wa Matewuzhu Leevi

¹³ Yinsa khulawa theenya kharipu ya ntthatta. Atthu awaatta khumwaattama na khwaaza owaasomisa. ¹⁴ Eettaka ovira etthiipile, khumoona Matewuzhu mwaana wa Alufeyyu eekhaliye ariphisaka lumpuru, khumuuzza yoori: “Okilotte.” Ye khulankha khunlotta.

¹⁵ Wakathi wa ethu yoojiwa, Yinsa eekhaliye va meeza owawe Leevi. Vamote na anakhiyoni awe, na aarivo anamariphisa lumpuru awaatta na “anatwampi” maana atthu aari onlottaaye aari enkeene. ¹⁶ Anamanozela a kano apale amafwarizeewu amooniyeevo ajaka na “anatwampi” na anamariphisa lumpuru, khuwoozela anakhiyoni a Yinsa yoori: “Mwaasa aya niini ye ajaka na anamariphisa lumpuru na anatwampi?” ¹⁷ Asiiliyeevo vitthu epile, Yinsa khuwooza yoori: “Akumi khaninhithajiya tothoro, ila apale anlwaziwaaye. Miiyo akateeliye owaakhuwela anashariya, ila anatwampi.”

Yinsa onuuzeliwa monkoni wa ofuka

¹⁸ Aphano anakhiyoni a Yaahaya na mafwarizeewu eetta ofuka. Atthu akina khunteela Yinsa khusala amuuzelaa yoori: “Mwaasa aya niini anakhiyoni a Yaahaya na amafwarizeewu ofuka, khi awo ahifukaka?” ¹⁹ Yinsa khujipu yoori: “Enretteya toovi ofuka anamalaleyiwa harusi, namaposa ari attaapho? Khinwaheya, ari vamote na yo.” ²⁰ Ila onteela ofiya siikhu mposi anteelaaye olaziwavo, siikhu zaya epo, anlawa afuke. ²¹ Khina antthaaye yaapa pheeya kuwo yoovutta, maana yaapa etile pheeya enttela ofutthela kuwo yoovutta etepe othaala. ²² Khina antthaaye viinyu nttompwiyo ya shapala ya raku, amana arettu, viinyu enttu ophutula ttompwiyo, waaza viinyu mpakha ttompwiyo zintta oharipweya. Ila mwitthe viinyu pheeya nttompwiyo ya shapala pheeya.

Mbwana wa saapatu

²³ Saapatu moote, Yinsa eetta ovira nshini wa nshapa la tiriku. Eettaka olawa, anakhiyoni awe khwaaza ovulula phunje zaya. ²⁴ Mafwarizeewu khumuuzela Yinsa yoori: “Oniwoona, mwaasa aya niini yo arettaka etthu enkhattaziwaaye orettiwa saapatu?” ²⁵ Ye khuwaajipu yoori: “Mweeyo khamwinasome etile arettiyeeyo Daawuuda wakathi ye na ashirikha awe aakholiweeyo ti jala? ²⁶ Wakathi wa haakhimu nwulu wa tiini Apiyataari, Daawuuda aaviriye Nnyupa wa Nluku khurafuna phaawu enkhiweeyo Nluku na khuwenkha ashirikhaawe, aariina ruhusa ya orafuna paasi aari anamalokozela a tiini.” ²⁷ Aphano khuwooza yoori: “Saapatu yatiisiwa mwaasa wa anaatamu, ama anaatamu mwaasa wa saapatu. ²⁸ Etthiipo, Mwaana wa Pinaatamu ti Mbwana hatha na Saapatu.”

3

Mwinyi woorakala nkhono

¹ Yinsa khurutela theenya nsinakooka, ntumphule aarimo mwinyi waarakaliyeeyo nkhono awe. ² Atthu akina aari weekesa nanna ya on-lokoveza Yinsa, yoori amoone nkhama aari weettela ovonisa siikhu ya saapatu. ³ Yinsa khumuza mwinyi otule woorakala nkhono yoori: “Olankhe ote vakatthi apha.” ⁴ Aphano Yinsa khuuzela yoori: “Niini entakheliwaaye orettiwa saapatu, oretta yooshapweya ama yootakhala, wuusuru ama wula?” Ila atthu apale nalelo khwiya oonyamala. ⁵ Yinsa khusala aweekesa ari wookatipukha na khuhitueliwi mwaasa wa wuuma rooho zaya na khumuza mwinyi otule yoori: “Wookole nkhono awo.” Ye khookola nkhono awe na khwiya woovonisiwa. ⁶ Aphano mafwarizeewu apale khulankha na khwaaza owaza shawuri vamote na khuntti ya Herooti eekesaka nanna ya omuula Yinsa.

Yinsa oneekesiwa pi atthu awaatta

⁷ Yinsa na anakhiyoni awe, khulawa mpakha ontthatta la Kalileya na nyumani wawe yaari ota khuntti khuluyeene ya nti wa Kalileya. ⁸ Wakathi asiiliyeovo vitthu zooshi aari orettaazo, atthu awaatta aari olankhaaye Yudeya, Yeruzaleemu, Itumeeya, akina akaapu wa muuttho Yorotaani na apale a Tiiro na Sitooni khuta okutthanana ye. ⁹ Mwaasa wa khuntti khuluyeene etile, Yinsa khuwooza anakhiyoni awe yoori antthekezele mwaatiya yoori awerawere ophunyiwa. ¹⁰ Maana ye awaavonisiye atthu awaatta, khwa nanna ya apale aari olwaaziwaaye aari ofiyelelaaye osukhumana yoori apatthe onsapa. ¹¹ Theenya masheethwani, amana amoona eetta onkokhorela omaasho wawe na onyakula araka: “Weeyo o Mwaana wa Nluku.” ¹² Ila ye aari owenkha oruma wookhomaala yoori ahinlupe paani yaya.

Othawuliwa wa maaswihaapa khumi na awiri

¹³ Yinsa khuwela vakulu na khuwaakhuwela apale aari owaatakhaaye, apo aya khuta aphale aariivo. ¹⁴ Khuwaathawula khumi na awiri na khuwenkha nzina la maaswihaapa yoori eeye vamote na-ye na yoori ye awaarume olaleya, ¹⁵ na eeyane owahi wa wiikara masheethwani. ¹⁶ Apa pi apale khumi na awiri awathawuliyeeyo aari withthiwaaye yoori: Simawu, otule amwinkhiyeeyo nzina la Pheeturu; ¹⁷ Tiyaaku, mwaana wa Zepeteewu, na Yaahaya ttwiye, atthaapoaatthajiweeyo nzina la Buneerije, liriina maana a “Aana a Ottithima”; ¹⁸ Antere, Filiipe, Barutulumeewu, Matewuzhu, Tome, Tiyaaku, mwaana wa Alufeyu, Tadeewu, Simawu Zelooti; ¹⁹ na Yuuda Eshikariyoote, otule ankholsiyeeyo Yinsa.

Okufuru wa anamanozela a kano

²⁰ Aphano, ye khulawa owawe, khukusanyeya opheya khuntti khuluyene, khwa nanna ye na anakhiyoni awe aari woojelaavo oja. ²¹ Wakathi ajamaaze asiiliyeovo vitthu epile, khulankha khusala alawa onthuulawo, maana aari olupa yoori: “Ye eetta ovevereya.” ²² Anamanozela a kano aalankhiyeeyo Yeruzaleemu aari olupa yoori: “Ye ti wooshinttiwa ti Epiliisi! Mfwalume wa masheethwani ti othuuto aniweekaranaaye masheethwani.” ²³ Aphano Yinsa khuwaakhuwela khusala awaanozela nkatthi wa milikaniso yoori: “Nanna-ni Epiliisi antakhaaye omwikara Epiliisi? ²⁴ Amana ofwalume mmote ojaawanya, khunwahi ojishintta otthuuporu. ²⁵ Ama nyuupa amana ejaaawanya, theenya khinwahi wiikhala ethiitoru. ²⁶ Na Sheethwani nkhama ontta ojuumanana, na amana aawanyeya, khanlawwa

owahi wiiyavo na wafiya mwiisho wawe. ²⁷ Weekhwhee khina anwahaaye ovira nnyupa wa ntthu wookhomaala na khuthuula maali zawe aheetteeni onfuka khpula. Toowo ti anwahaaye omwiiyela nnyupa mwawe.

²⁸ “Miiyo kiniuuuzani khweele yoori: Twampi zooshi na okufuru wooshi wa anaatamu onlawa waswaamihwi, ²⁹ ila otule ankufurwelaaye Rooho Ttakatthiifu, khana nswammaha mileele, maana ona twampi ya mileele.”

³⁰ Yinsa aalupiye mattakhuzi apa mwaasa wa yo aari olupa yoori: “Ona sheethwani.” ³¹ Elottelanaka, mamaawe na attwiize Yinsa khuta. Khwiyya vaje na khuruma okhuweliwa Yinsa. ³² Aarivo atthu awaatta eekhaliyeeyo aphale aariivo, na khuuziwa yoori: “Mamaawo na attwiizo ari vaje apho antta oweekesa.” ³³ Yinsa khuuzela yoori: “Maama ti tuuvi, wala ttwiyyaku ti tuuvi?” ³⁴ Aphano khuweekesa apale eekhaliyeeyo aphale aariivo na khuwooga yoori: “Apha owaapho maama na attwiizaku! ³⁵ Otule anrettaaye matakhelo a Nluku, ti eeyiye ttwiyyaku, nlupwaaka na maama.”

4

Nlikaniso wa Namazala

¹ Yinsa khurutela osomisa kharipu ya nthatta. Khutavo atthu awaatta aphale aariivo, khusala ahithajiya weetta nkalawa na eekhale nttumpho. Kalawa yaari mpahari, atthu ooshi khwiikhala nshini wa pahari. ² Ye aari owaasomisa vitthu zawaatta nkatthi wa nlikaniso, asomisaka khuri:

³ “Mwisiile! Namalima khulawa ozala. ⁴ Wakathi aari ozalaavo peewu, phantte kiina khukwela nshini wa tarikhi anyannyi khuta khuja. ⁵ Kiina khukwela vhali aariivo mawe, vhali laarivo nttophe vattitthiiru; nasaapiru khoottha, maana nttophe ntthile khaleechiye. ⁶ Aphano noopuwa njuwa khulukuza; maana khazaarina mitathaari, khooma. ⁷ Peewu kinoko khukwela vanyiwa, khuwula vamote na nyiwa, khurapeliwa pi nyiwa, khwa nanna zahawahiyeyo wiima mishumo. ⁸ Kiina khukwela vanshaka wooshapweya, khoottha, khuwula na khwiima mishumo zooshwapweya, talaathiini, siithiini na mpakha miiya wakhula mmote. ⁹ Yinsa khwiishela alupaka yoori: “Otule ariina mashiilo, ti asiile!”

Otaphuleliwa wa nlikaniso

¹⁰ Wakathi ye aari otthwe, anakhiyonu apale khumi na awiri na akinoko aari kharipu ya attaaphale khumuuzela monkoni wa nlikaniso. ¹¹ Ye khuwooga yoori: “Mweeyo mwenkhiwa ojuwa kano za ofwalume wa Nluku, ila apale ari oje, zooshi anuuzaniwa nlikaniso, ¹² yoori ‘hatha nkhamma oona ahijuwe, hatha nkhamma asiila ehiweeleye yoori ahizukulise rooho zaya aswaamihwi!’” ¹³ Aphano Yinsa khuwoozela yoori: “Mweeyo khuniweeleyani nlikaniso opu, nanna-ni onteela oweeneyani epi mikina?

¹⁴ Namazala onzala ntakhuze. ¹⁵ Atthu akina ari nkhamma peewu eriye nshini wa tarikhi, nhali lizaliweemo ntakhuze. Paata ya osiila, Epiliisi onta, khulazavo ntakhuze ntthile nroho mwawe. ¹⁶ Akina, ari nkhamma peewu ezaliweeyo vhali wawiiyavo mawe, ansiilaaye ntakhuze nasaapiru khupwekherela na furaha. ¹⁷ Ila paata ya wakathi vattitthiiru, atthu aya apo anlawa akathale hapari maana kharetteeni wiya nchina laya, amana ziwaapattha tafwawuthi ama lupattha mwaasa wa mattakhuzi apale antta wanswi. ¹⁸ Theenya akina anlattanana na peewu ezaliweeyo vakatthi wa mwiiwa. Apo ansiila hapari, ¹⁹ ila, amana ziwaapuwelelaka tafwawuthi za olumwenku opu, tuvela za maali na otakha nkina, vitthu zaya epo enshawa ntakhuze na epo zaya khaziniimisa mishumo. ²⁰ Awaapho theenya atthu akina, anlikananaaye peewu ezaliweeyo nti wooshapweya. Apo aya ansiila

nttakhuzi khukhupalela na khuttheerisa talaathiini, siithiini na mpakha miiya khwa etile aazaliyeeyo.”

Nlikaniso wa likhompe

²¹ Ye khuwooza yoori: “Paani ankhoaaye khantteya yawe khuttha n'yuuku ama nlivuku? Olikha toowo khampweha vhahli wawooneyavo?

²² Maana khayiivo hatha etthu moote ya siiri, ehinttelaaye wiiya payana na khayiivo moote yoovithiwa ehinttelaaye ovitthuliwa. ²³ Nkhama ntthu onaaye mashilo oosiila, asile!” ²⁴ Aphano, khuwooza yoori: “Phoole na epile mwinsiilaaye. Na mphimo otthuupo mwinttelaaye owaaphimela azeenu, mwinttela ophimeliwa otthuupo, na theenya mwinkeene mwin-lawa mweekezeliwe. ²⁵ Otule ariina, onlawa eekezeliwe; ila otule ahina hatha etile vattitthiiru ariinaaye ontta onyakanyiwa.”

Nlikaniso wa Peewu

²⁶ Ye khurutela olupa yoori: “Ofwalume wa Nluku ori nkhamma ntthu anza-laaye peewu yawe vathi. ²⁷ Hatha nkhamma eetta olankha, ama hatha nkhamma eetta olala, yo zinoottha na zwilula, ye woohijuwi nanna erttikhaniyeeyo.

²⁸ Otthuupo oniima mishumo zaya: yamwanzo nyaani, elottelanaka ntathi, mwiisho, phunje zawiitaala va ntathi. ²⁹ Amana peewu ekhomaala, ntthu onttela othuula eesu, maana wafiya wakathi wa wuurula.”

Nlikaniso wa phunje ya samuli

³⁰ Yinsa khurutela olupa theenya yoori: “Ofwalume wa Nluku onlat-tanana niini? Nlikaniso-ni ninttelaaye orumeyela yoori nthoonyeze? ³¹ Ori nkhamma phunje ya samuli, etile yiyyiye phunje yootepa opushuwa vathi apha. ³² Ila, paata ya ozala, zintta owula channu, zayita mathapa ooshi.”

³³ Khwa milikaniso zooshi zoolattana, Yinsa aari owooza monkoni wa nttakhuzi, nanna aari owahaaye oweenleya. ³⁴ Khaari owooza hatha etthu ahirumeyeleeni nlikaniso, ila amana eeya na anakhiyoni awe paasi, eetta owoozaka zooshi.

Yinsa onnyamaza pheevu

³⁵ Siikhu etile, weettelaka oripa, Yinsa khuwooza anakhiyoni awe yoori: “Nlaweni kaapu kiina.” ³⁶ Paata ya osusa khuntti etile, yo khupakhira nkalawa mphule aariimo Yinsa. Na kalawa kiina zeetta owaaperekha.

³⁷ Khwaaza ovuma pheevu yookhomaala, na mawipi khusala apiya kalawa yaya khwa nanna aari wiitaalaamo maati. ³⁸ Yinsa aarettiye eettaka olala sheezi aphiteeziye nsaawu. Aphano anakhiyoni awe khunlansa na khumuuba yoori: “Mwaaliimu, khinujali fweeyo nifwaka?” ³⁹ Yinsa khulankha khunyamaza pheevu na khuza pahari yoori: “Otthe nreke! Onyamale!” Pheevu khunyamala na zooshi khwiya zawiitthaala. ⁴⁰ Aphano khuwoozela anakhiyoni awe yoori: “Mwaasa aya niini moovaka toowo? Nalelo khamwina amini?” ⁴¹ Anakhiyoni apale ari awoova channu, khusala oozana yoori: “Ti paani otu aya, anshututeliwaaye ti pheevu na pahari?”

5

Ovonisiwa wa namasheethwani

¹ Yo khulokha pahari, khufiya Jerazeenu. ² Wakathi Yinsa apakuwiye-eevo nkalawa, mwinyi mmote aariina sheethwani khusaruwa nvilalo khuta attaphale. ³ Mwinyi aya oto aari wiikhala nvilalo, khina mmote aari owahaaye onkhola, hatha ari ntthentte. ⁴ Maana swaafu zawaatta aari wiiya ntthentte moolu awe na makhono awe, ila ye eetta opwechaka tthentte yaya na ovuja zuuma zaari otthiwaaye mmoolu mwawe. Khaarivo

ntthu wookhomaala aari owahaaye onshintta. ⁵ Osikhu na nthana ye aari weettettaka nvilalo na nnyaako na ojishija na mawe. ⁶ Wakathi amooniyeevo Yinsa ari peetiwene, khutthira khulawa khukokhora omaasho wawe. ⁷ Khukhuwa na huula yawe yooshi araka: “Onikitakhelani miyo, Yinsa mwaana wa Nluku Nwulu? Kinuuvekela khwa Nluku yoori ohikoopopise!” ⁸ Maana Yinsa aamuuziye yoori: “Oleemo mmwiili wa mwinyi otu, sheethwani.” ⁹ Aphano Yinsa khumuuzela yoori: “Nzina lawo enriwa paani?” Khujipu yoori: “Nzina laka enriwa khuntti, maana niri awaatta.” ¹⁰ Khusala anvekela wonkhanyarelavo yoori ahiwaarume olaamo mmuti mwaya mphule. ¹¹ Liphanko liwululene la kuluwe laari oshukisi-waaye kharipu ya mwaako. ¹² Masheethwani apale khusala anvekela Yinsa yoori: “Onirume yoori neette nkuluwe mphule.” ¹³ Yinsa khwinkha ruhusa masheethwani apale, khusaruwa khweetta nkuluwe. Liphanko laarina thamani ya alufu piiri za kuluwe, khwaaza otthira zilankhaka omwaako ziishukhelaka mpahari, zooshi khuzama khufwa. ¹⁴ Apale aari oshukaaye kuluwe zaya epile, khutthira khulawa olupa vitthu epile zaarettikhaniyeeyo waaza nsitati mpakha mmashapa, atthu khulankha olawa woona epile zaarettikhaniyeeyo. ¹⁵ Wakathi amwaattamiyeeyo Yinsa, khumoona mwinyi otule aamwitaliyeyo masheethwani awaatta, eekhaliye awaliye saana na athiiyemu akhili zawe, atthu apale khwiya awoova. ¹⁶ Apale aari attaaphale, khuwooza atthu zooshi epile zanrettikhaneliyeyo mwinyi otule aariina masheethwani, na theenya khulupa monkoni wa kuluwe. ¹⁷ Aphano atthu apale khusala anvekela Yinsa yoori aleemo mmuti mwaya mphule. ¹⁸ Wakathi Yinsa aari owelaaye nkalawa, mwinyi otule aariina masheethwani khunvekela Yinsa yoori anlikhe alawe na ye. ¹⁹ Yinsa khuhinkhupaleli, ila khumuza yoori: “Olawe owawo wawuuze ajamaazo zooshi epile Mbwana ooretteliyeeyo na tthakaraka awooneliyeeyo.” ²⁰ Aphano, mwinyi otule khulawa na khwaaza olupa nti wa Tekapoliishi etile Yinsa anretteliyeeyo. Atthu ooshi khwiya ooshanka.

Owahi wa Yinsa monkoni wa marati na ofwa

²¹ Yinsa khupakhira theenya nkalawa alokhelaka kaapu kiina, khuntti khuluyeene khuta khwiitaala aphale aariivo Yinsa nshini wa nttima. ²² Aphano khuta attaaphale namalokozela mmote wa nsinakooka aari wi-itthiwaaye Yaayiru, amooniyeevo Yinsa, khukokhora nshini wa moolu awe. ²³ Khunvekela wookhanyarelavo yoori: “Mwanaka wankha onsaleela ofwa! Safwatali ote, wanttheele makhono yoori eeye woovona na eeye haayi. ²⁴ Yinsa khusala alawa vamote na-ye, khuntti khuluyeene khusala enlotta na omphunya.

²⁵ Attaaphale, aarivo muukha aariina nyaakha khumi na miwiri eet-taka ohoowa mwaasa wa omwiittikha taamu. ²⁶ Ye ahoowiye channu khwa oweekesa anamavonisa na khuharipu nzurukhu awe wooshi aariina, oligha ovona khusala eetta wootepa. ²⁷ Asiiliyeeyo ovuwa wa Yinsa, khuta nyuma wawe vahali wawaattiwavo na khusapa ajapi yawe. ²⁸ Maana aari wuupuwela yoori: “Miiyo kisaparu paasi ajapi yawe, kintta ovona.” ²⁹ Nasaapiru yeetta oligha wiittikha taamu etile na muukha otule khoona yoori mmwiili mwawe aari wootaphuliwa ohoowa opule. ³⁰ Wakathi ot-thuupule, Yinsa khoona yoori wansaruwa owahi, khuzukuluwa khweekesa khuntti etile khuuzela yoori: “Paani asapiyeeyo ajapi yaka?” ³¹ AnakhiyonI awe khujipu yoori: “Woonaka khuntti khuluyeene eti ekusanyeyiyeeyo, khusala wuuzela yoori: ‘Paani akisapiyeeyo?’ ” ³² Ila Yinsa nalelo khusala eekesaka vakatthi wa khuntti etile yoori amoone otule aarettiyeeyo etthu

yaya etile. ³³ Aphano muukha otule, ajuwiyeovo ethu yaarettikhaniyeeyo, khumwaattama khukokhora nshini wa moolu awe eettaka othukumela mwaasa wa woova, khulupa haakhi yooshi. ³⁴ Yinsa khumuaza yoori: “Mwanaka, amini yawo yoovonisa. Olawe na heeri, na wiiye wootaphuliwa ohoowa wawo.”

³⁵ Nalelo Yinsa eettaka ottakhula, khutavo atthu a owawe Yaayiru, namalokozela wa nsinakooka khumuaza yoori: “Mwanawo afwa. Khini-hithajiya onwuti theenya Mwaaliimu!” ³⁶ Yinsa khumuaza namalokozela wa nsinakooka mphule yoori: “Ohoove; okhupali paasi.” ³⁷ Na khuhinlikhi hatha ntthu onlotta, woohiiyi Pheeturu, Tiyaaku na Yaahaya ttwiye Tiyaaku. ³⁸ Wakathi afiiyeevo owawe namalokozela wa nsinakooka, Yinsa khoona tafwawuthi na atthu eettaka olila na ojiliza na huula ya onyakula. ³⁹ Yinsa khuvira nnyupa na khuuzela yoori: “Tafwawuthi yaya eti ti-ya niini na mwinjilizelani? Mwaana khafweeni, ontta olala.” ⁴⁰ Ila ooshi khwaaza ontheya Yinsa. Ye khurumisa yoori aleemo ooshi, khunthuula papaawe na mamaawe mwaana na anakhiyon i awe apale aariina na khulawa aphale aariivo mwaana. ⁴¹ Khunkhola nkhono awe khuri: “Talitha cumi!” liriina maana a “Mwanankha, miiyo kinuuruma yoori olankhe!” ⁴² Nasaapiru mwanankha otule, aariina hirimu ya nyaakha khumi na miwiri, khulankha na khwaaza weettetta. Ooshi aariivo khwiya ooshanka. ⁴³ Ila Yinsa khuwoza woosileyavo yoori: Ahiiyeye hatha ntthu anttelaaye ojuwa, na khuruma winkhiwa etthu-yoojiwa.

6

Napiyu mmote wootarawiwa

¹ Yinsa khulaawo okhule waya, khweetta sitati ya owawe, anakhiyon i awe khusala amperekha. ² Noofiya saapatu, khwaaza osomisa nsinakooka, awaatta aari onsiilaaye khwiya ooshanka, alupaka yoori: “Zininlankha vayi vitthu zaya epi?” ‘Ojuwani opu enkhiweeyo? Na onretta toovi minjuza?

³ Khahiyo kalapinteero otu, mwaana wa Mariyamu, ttwiye Tiyaaku, Yusufu, Yuuda na Simawu! Alupuwe khari ntturnphu!” Khwiya awiiphiriwa ti Yinsa. ⁴ Yinsa khuwoza yoori: “Mmuti mwawe, vakatthi wa ajamaaze na vaje vawe pi attaapho napiyu ahinshitahiwaavo.” ⁵ Ye khawahiye oretta minjuza Nazareeti, woohiiyi owaavonisa alwele akina khwa owaattheela makhono. ⁶ Khwiya wooshanka mwaasa wa othowawo amini okhule waya. Yinsa khuvira asomisaka miti zaattameliyeeyo ottuukhule.

Yinsa oniwaaruma anakhiyon i awe khumi na awiri

⁷ Khuwaakhuwela anakhiyon i awe apale khumi na awiri, khuwaaruma awiri khwa awiri na khuwenkha owahi wa wiikara masheethwani. ⁸ Khuwaaruma yoori: “Mwihithuule hatha ethu, yohiiyi pakhora, khamwaarina ya othuula etthu-yoojiwa wala kaapiyaka wa safwari na nzurukhu. ⁹ Mwiwale jampali, ila mwihithuule nkhumi wa phiiri. ¹⁰ Amana mwifiya nyuupa moote, mwiiye attaapho mpakha siikhu mwinttelaaye olaavo. ¹¹ Na miti mikinoko amana zihuupwekhereleni na khuhuusiilini, mwitathe lifufu la mmoolu mwenu mwilaakamo, nkhama oshaahiti vakatthi vaya.” ¹² Yo khulawa na khulaleya atthu yoori athupwiye. ¹³ Yo aari wiikara masheethwani awaatta na owaavaaza mafuttha mmwishwa mwaya na owaavonisa alwele awaatta.

Ofwa wa Yaahaya Namoosa

¹⁴ Mfwalume Herooti khusiila elupiwaka hapari epile, maana nzina la Yinsa laajuwiwe saaneene. Atthu akina khwaaza olupa yoori: “Yaahaya Namoosa eetta osisimuwa muufwa! Tiito zinrettikhanaaye minjuza zootikinisa khwa ye.” ¹⁵ Akina aari olupa yoori: “Ye ti Aliyaasi.” Akinoko khusala olupa araka: “Ye napiyu, nkhamma manapiyu apale a raku.” ¹⁶ Ila Herooti wakathi asiiliyeevo vitthu epile, khuri: “Yaahaya, mwinyi kinshijiyeeyo, asisimuwa muufwa!” ¹⁷ Maana Herooti aarumiye yoori akholiwe Yaahaya, afukeliwe nkalapooso, mwaasa wa Herootiyya, muukha wa Filiipe ttwiye, othuuto anraliyeeyo. ¹⁸ Mwaasa wa Yaahaya aari omuuza Herooti yoori: “Khahi halaali weeyo onrala muukha wa ttwiyo.” ¹⁹ Herootiyya aarina katapu khwa Yaahaya, khusala atakha omuula, ila khuhisala awahi oretta, ²⁰ mwaasa Herooti aari omoova Yaahaya na aari omwiinanelaa, maana aari ojuwa yoori ye mwinyi wa shariya na ttakatthiifu. Amana ansiilaka, eetta oshanka; khwa ethiipo waari ontuvela onsiila. ²¹ Omwiisho Herootiyya khupattha kiphenyo siikhu ya oretta mwaakha Herooti. Khuretta njampo Herooti na anamalokozela awe awulu, attunkhulu a anajanka na ooshi apale eeyiye afwalume a nti wa Kalileya. ²² Wakathi mwaana wa Herootiyya aviriyeeyo khwiina, khuntuvela Herooti na apale awaakharipushiyeeyo. Mfwalume khumuuzaa mwanankha otule yoori: “Okivekele wakhula etile ontakhaaye kintta owinkha”. ²³ Khumwaahiti khwa olapha yoori: “Wakhula onikivekelaaye, kintta owinkha, mpakha phantte ya ofwalume aka.” ²⁴ Mwaana otule khusaruwa khumuuzaa mamaawe yoori: “Kiveke niini?” Mamaawe khunjipu yoori: “Oveke eeshwa ya Yaahaya Namoosa.” ²⁵ Nasaapiru mwanankha otule khwaakuva khulawa wa mfwalume khuveka yoori: “Kintakha mwikinkhe nasaapi eeshwa ya Yaahaya Namoosa mparathu.” ²⁶ Mfwalume khwiyya woohuzunikha channu, ila mwaasa wa olapha opule aalaphiyeeyo na wa apale awaakharipushiyeeyo, khuhiwahi okatthala etile avekeliweeyo ti mwanankha otule. ²⁷ Nasaapiru khunruma najanka khumuuzaa ontisela eeshwa ya Yaahaya Namoosa. Ye khulawa okalapooso, khushija eeshwa ya Yaahaya Namoosa. ²⁸ Khuttha mparathu khumwinkha mwanankha otule na ye khumwinkha mamaawe. ²⁹ Noosiila hapari epile anakhiyonii a Yaahaya namoosa, khuta khuthuula mwiili awe khulawa khuzikha.

Yinsa oniwaajisa alume alufu thaanu

³⁰ Maaswihaapa khurutela aphale aariivo Yinsa khumuuzaa zooshi aretiyeezo na asomisiyeeyo. ³¹ Aarivo atthu awaatta aari otaaye na olaavo, paata ya Yinsa na anakhiyonii awe woona yoori khaarina kiphenyo ya oja. Ye khuwooza yoori: “Mwite nilawe puuro yawiithaleya navumule vattitthiiru.” ³² Aphano yo khulawa nkalawa mpakha puuro yawiithaliye. ³³ Atthu awaatta khuwoona alawaka paata ya owaajuwa. Atthu a miti zooshi za ottuukhule, khutthira khufiyawo yo ahinafiye. ³⁴ Eeshukhaka nkalawa Yinsa, khoona khuntti khuluyeene ya atthu, khuwoonela huruma, maana aari nkhamma pwittipwitthi zoohiina makhampuzi. Aphano khwaaza owaasomisa vitthu zawaatta. ³⁵ Weettelaka oripa, anakhiyonii awe khunsusela khumuuzaa yoori: “Puuro eti ti yawithaaleya, na waripa.” ³⁶ Owaamwaze atthu apa yoori alawe mmashapa na miti epile naattamiyeeyo yoori oozanye etthu yoojiwa aje.” ³⁷ Ila ye khuwaajipu yoori: “Mwiwenkhe mweeyo ena etthu yoojiwa.” Yo khumuuzaa yoori: “Atthu apa yoori aje, nihithajiya miiya piiri za nzurukhu wa feeta!” ³⁸ Yinsa khuuzela yoori: “Mwina phaawu kavi? Mwilawee moone.” Anakhiyonii apale khulawa khoona khujipu yoori: “Ninaaye phaawu thaanu na swi piiri.” ³⁹ Aphano, Yinsa khuwaaruma

yoori ooshi eekhale, khuntti khwa khuntti va nyaani piishi ⁴⁰ Khuretta ethiipo khwaawanyeya khwa khuntti ya miiya na khuntti ya hamusiini. ⁴¹ Athuuliyeovo phaawu epile thaanu na swi piiri khweekesa pinkuuni khuparikhya. Nawiisha khumeya phaawu epile khuwenkha anakhiyoni awe yoori awaawanyeze atthu apale. Theenya khuwaawanyeza swi epile piiri ooshi aya. ⁴² Ooshi khuja khurupala, ⁴³ na anakhiyoni khulokotthela khwiitaala khelenke khumi na piiri za nyeenye za phaawu na za swi. ⁴⁴ Atthu aajiyeyo aari alufu thaanu alume ene.

Yinsa oneettetta vatulu wa maati

⁴⁵ Elottelanaka, Yinsa khuwaaruma anakhiyoni awe yoori awele nkalawa alokoze Betezaiita phantte ya kaapu ya ntthatta, wakathi ye asaliyeeyo aleezananaka atthu. ⁴⁶ Paata ya oleezanana, khuwela vakulu yoori alompe. ⁴⁷ Weettelaka oripa, kalawa yaari vakatthi wa pahari na Yinsa aari otthwe vathi. ⁴⁸ Ye khuwoona anakhiyoni awe afutthaka kaafi woovelavelavo, maana eetta wiinyula pheevu. Lifwajiri, Yinsa khulawa aphale aariivo eettettaka vatulu wa pahari, khusala asaleela owaavikana. ⁴⁹ Wakathi amooniyeevo eettettaka vatulu wa pahari, khusala amoona nkhamma nshitapehe, aphano khusala anyakula. ⁵⁰ Maana ooshi aamoniyeeyo aari oosuthuwa. Ila Yinsa nasaapiru khuwooza yoori: “Mwiminyale! Ti miyo! Mwihoove!” ⁵¹ Aphano Yinsa khuwela nkalawa khwiya vamote na anakhiyoni awe, na pheevu khunyamala, na yo khwiya ooshanka, ⁵² maana khazaaweleyiye minjuza za phaawu. Rooho zaya zaari zookhomaala.

Yinsa oniwaavonisa alwele a Jenezare

⁵³ Paata ya olakha pahari, khufiya Jenezare, ottuukho khufukelela kalawa yaya. ⁵⁴ Wakathi apakhuwiyeovo atthu khunjuwa Yinsa. ⁵⁵ Yo aari ovira azukulelaka nti wooshi opule, na owaathuula alwele aya va nrepa awaalawanaka ohali aari osiilaawo yoori Yinsa ori ottuukho. ⁵⁶ Wakhula vahali aari weettaawo, mmamuti, nsitati ama mmashapa, aari othuuliwaka alwele na olawaniwa mparasa. Noovekeliwa yoori nenkawu awahi osapa nshaka la ajapi yawe; maana ooshi apale aari osapaaye aari wiiya oovona.

7

Yinsa vakatthi wa zowera za Eyahuuti

¹ Mafwarizeewu na akina anamanozela a kano alankhiye Yeruzaleemu khukusanyeya na Yinsa. ² Khusala awoona anakhiyoni awe akina eettaka oja na makhono aharaamu, enlupaaye yoori khanaweeni. ³ Mafwarizeewu na mayaahuuti ooshi khanja ahinaweeni wotwahareshiwavo, alottelaka zowera za attunkhulu a tiini. ⁴ Amana aruti oparasa, khannja ahaazeeni woosa makhono aya khapula. Anthokorela masomi makina a waatta, nkhamma woosa pilawuri, mirinki, zoopo za malaatha na moolili. ⁵ Aphano mafwarizeewu na anamanozela a kano khumuuzela Yinsa yoori: “Mwaasa aya niini anakhiyoni awo ahilottelaka zowera za attunkhulu a tiini, khusala aja ahinaweeni?” ⁶ Ye khuwaajipu yoori: “Manaafikhi! Ezaaya ahupiri saaneene monkoni weenu mweeyo nkhamma ethiipo yaatikhiweeyo yoori: ‘Atthu apa anikishitahi na malimi, ila rooho zaya ziri peetiwene na miiyo. ⁷ Anikaaputu mahala na ansomisa mwentto wa oruma wa eenaatamu. ⁸ Mweeyo mwintarawu mirumo za Nluku na khusala mwilottela zowera za enaatamu. ⁹ Yinsa khwiishelana awoozaka yoori: “Mweeyo mwineekesa yoori mwitthe othetekele mirumo za Nluku mwaasa wa oshututela masomi enu! ¹⁰ Maana Munsa alupa yoori: ‘Onshitahi papawo na mamaawo,’ na

‘antakhaaye onlaani papaawe na mamaawe ona ya ohukhumweliwa ofwa.’
11 Ila mweeyo mwinkhupalela yoori amana ntthu amuuza papaawe ama mamaawe yoori: Wakhula ethu kiniwinkhaanini miiyo zaakha ya omwinkha Nluku,’ **12** khwa nanna eto mwiwerawere ojikhanyarela omwaawuni pa-peenu na mameenu. **13** Toowo mweeyo khamwinttha fwayita nttakhuzi la Nluku, khwa opatilana zowera zinlankhaaye wa paapa khwa aana aya. Na mwinretta vitthu zawaatta nkama ethiipi.

14 Yinsa khuwaakharipusha theenya atthu apale khuwooza yoori: “Mwikisiileze mooshi na eweeleyeni epi saana yoori: **15** khina ethu moote ya oje wa pinaatamu enraaye nonvira khuntha oharaamu, ila epile zinin-lankhaaye nroho mwawe ti eninharamushaaye. **16** Nkhama ntthu onaaye mashiilo oosiila ti asiile! **17** Paata ya owaalikha atthu apale olawa owaya, anakhiyoni khunvekela yoori awooze maana a nlikaniso aya opule. **18** Yinsa khuwoozela yoori: ‘Kiri na mweeyo khiniweeleyani? Yoori khina ethu moote eninviraaye pinaatamu eninharamushaaye? **19** Maana khineetta nroho mwawe, ila mwijohojoho mwawe, nawiisha khwiitthiwamo.’ Khwa etthiipo mattakhuzi apale, Yinsa khutukhuru ottha wiiya halaali vitthu zoojiwa zooshi. **20** Khurutela olupa yoori: “Etile eninsaruwaaye pinaatamu ti eninharamushaaye. **21** Maana nrooho ti, enlakhaamo zauupuweliwa zootakhala, oshawi akhapa, wiiya, wuula, **22** oraruwa, okhwiririwa, vitthu zootakhala, ohata, oralana woohiiyi wa halaali, nrima, waapa, ojoona na ololo. **23** Zootakhala zooshi zinlankha nroho wa ntthu na piitthiipo zininharamushaaye pinaatamu.”

Waamini wa muukha mmote weeletto

24 Yinsa khulaawo okhule waya khulawa phantte ya Tiiro na Sitooni, khweetta nyuupa yaya eto na khaataktiye ojuwiwa ti ntthu, ila khuhiwahi ojittha sirini. **25** Ila nasaapiru muukha mmote, aarina mwanawewe wa nnatti ariina sheethwani, asiliyeevo monkoni wa ye, khuta khukokhora nshini wa moolu a Yinsa. **26** Muukha otule aari nkereeka ya siiro-fineesiya aavokoli-weewo, khusala anvekela Yinsa yoori amwikare sheethwani otule aari mmwiili wa mwanawewe. **27** Ila Yinsa khumuaza yoori: “Owaalikhe khapula aana aje arupale. Khahi yoolotteya othuula phaawu ya aana khuwenkha anapwa.” **28** Muukha otule khujipu yoori: “Khweele, Mbwana aka, ila hatha anapwa, annja tathela vathi wa meeza eniwaakwaayo asimaana. **29** Aphano ye khumuaza yoori: “Mwaasa wa nanna ojipwiyeego, weeyo, etta; sheethwani ansaruwa mwanawo.” **30** Muukha otule khurutela owawe na khunsikana mwanawewe arapaleliye voolili, sheethwani otule anlikhiye.

Yinsa oninvonisa ntthu woohittakhuli na woohisiili

31 Elottelanaka, Yinsa khulankha mmuti mphule wa Tiiro na khulokha Sitooni mpakha ntthatta la Kalileya nti wa Tekapoliishi. **32** Aphano khutiiseliwa mwinyi mmote woohisiili na wookukuma, khunvekela yoori anttheele makhono ye. **33** Yinsa khunlazavo vakatthi wa atthu apale awaatta na khuntha zaala omashiilo wawe. Elottelanaka khutthema na khusapa nlimi la mwinyi aya otule. **34** Aphano khweekesa otulu, khwiittha phuumu na khumuaza mwinyi otule yoori: “Efata” enlupaaye yoori: “Ofunule.” **35** Wakathi otthuupule mashiilo a mwinyi otule khufunuwa na nlimi lawe khuveya, ye khwaaza ottakhula woohiina tafwawuthi. **36** Yinsa khuwooza yoori ahimuuze hatha ntthu. Ila olikha toowo, khwa nanna aari owaakhat-tazaavo, yo aari otepa olaleya. **37** Atthu ooshi aari osiilaaye aari wiiya ootikinisiwa channu na khusala alupa yoori: “Ye onretta vitthu zooshi saana, mpakha oniwaattakhulisa apale ohittakhuli na owaasiilisa ananhisiili.”

8

Yinsa oniwaajisa alume alufu nne

¹ Ziviriyeovo siikhu vattithiiru, atthu akina awaatta khukusanyeya vamote na Yinsa. Mwaasa wa atthu apale khaarina ethu yoojiwa, khuwaakhuwela anakhiyoni awe khuwooza yoori: ² “Kiniwoonela huruma atthu apa, maana ana siikhu ttatthu ari vamote na miiyo na khana hatha etthu yoojiwa. ³ Amana miiyo kiwooza olawa owaya najala zaya, yo antta okwa ntarikhi maana akina alankha peetiwene. ⁴ Anakhiyoni awe khu-jipu yoori: “Vayi khwa puuro eti niriiyo ya wiithaleya ntthu anwahaaye opattha phaawu zoofiyela oja atthu apa?” ⁵ Yinsa khuuzela yoori: “Mweeyo mwina phaawu kavi?” Yo khujipu yoori: “Sapa.” ⁶ Ye khuwaaruma atthu apale yoori eekhale vathi. Elottelanaka khuthuula phaawu epile sapa, khunshukhurwela Nluku, khumeya khuwenkha anakhiyoni awe yoori awawanyeple atthu apale. Yo khuretta etthiipile, ⁷ Aarina theenya swi kiina ttiitthittiitthi, khuthuula, khuparikhya na khuwooza anakhiyoni awe yoori awawanyeple atthu apale. ⁸ Atthu apale khuja mpakha orupala. Na khukusanya nyeenye zaasaliyyeeyo khwiitaala khelenke sapa. ⁹ Aarivo thamani ya atthu alufu nne, khuleezanana. ¹⁰ Nasaapiru khweetta mmwaatiya na anakhiyoni awe khusala alawa nti wa Talimanuuta.

Mafwarizeewu anveka alama moote

¹¹ Mafwarizeewu khuta na khwaaza omuuzela Yinsa yoori amoone, na khunvekela alama ya pinkuuni. ¹² Ye khusisimira nkathhi-nkatthi na khuri: “Mwaasa aya niini khapila eti evekaka alama moote ya minjuza? Miiyo kinhakikhi yoori hatha alama moote khanlawa winkhiwa.” ¹³ Aphano khuwaalikha apale aya, khurutela nkalawa khusala alawa phantte kiina.

Othowelelisana wa mafwarizeewu

¹⁴ Anakhiyoni apale eettiye osahawu othuula phaawu, aarina phaawu moote paasi nkalawa. ¹⁵ Yinsa khuwooza yoori: “Mwijeekeesele na mwiiyane phoole na fwaramento za mafwarizeewu na ya Herooti.” ¹⁶ Yo khusala akheetisana araka: “Mwaasa aya woohiina phaawu.” ¹⁷ Yinsa ajuwiyeovo yoori antta okheetisana, khuwoozela yoori: “Mwaasa aya niini mwinkhetisanaka monkoni wa ohiina phaawu? Nalelo khiniweeleyani wala khamwinsiila? Rooho zenu mweetta wuumisa? ¹⁸ Mweeyo mwinaaye maasho ila Khamwinoona, mwinaaye mashiilo ila khamwinskiila, hatha khamwin-fikhiri? ¹⁹ Wakathi opule kaameyiyeeyo phaawu khuwenkha atthu apale alufu thaanu, khelenke kavi za nyeenye zasaliyeeyo?” Anakhiyoni apale khujipu yoori: “Khumi na piiri.” ²⁰ Khi wakathi opule kaameyiyeeyo phaawu sapa yoori kiwenkhe atthu apale alufu nne, zaasaliye khelenke kavi za nyeenye mwaakhupeliyeeyo? Anakhiyoni khujipu yoori sapa. ²¹ Ye khuwooza yoori: “Mweeyo nalelo khiniweeleyani?”

Ovoniwa wa ntthu woohooni nti wa Betezayiita.

²² Aphano yo khufiya Betezayiita, atthu akina ottuukhule khuntanelia Yinsa ntthu woohooni, khusala anvekela yoori ansape. ²³ Ye khunthuula ntthu otule khunlawana othetekete wa mmuti mphule, khulawa khutthemela mmaasho na khunttheela makhono. Yinsa khumuuzela yoori: “Weeyo onwahi woona ethu?” ²⁴ Ntthu otule khweekesa otulu khuri: “Kiniwoona atthu anumpuwa nkama miitthi enttaaye weettetta. ²⁵ Theenya, Yinsa khunttheela makhono ntthu otule na khufinikha maasho awe. Aphano maasho awe khufunuwa na khurutela woona zooshi saaneene. ²⁶ Yinsa khunruma olawa owawe amuuzaka yoori: “Ohivire mmuti.”

Otukhuru wa Pheeturu

²⁷Yinsa na anakhiyoni awe khulawa nti waattamananiyeyo Sezareeya ya Filiipe. Ntarikhi eettaka olawa, khusala awoozela yoori: “Athu anri miiyo ki paani?” ²⁸Yo khunjipu yoori: “Akina anri weeyo o Yaahaya Namoosa, akina anri o Aliyaasi, akinoko aya anri weeyo ommote wa manapiyu.” ²⁹Yinsa khuwoozela yoori: “Khi mweeyo? Mwinri miiyo ki paani?” Pheeturu khujipu yoori: “Weeyo o Al-Masihu!” ³⁰Yinsa khuwaaruma yoori ahimuuze hatha ntthu monkoni wawe ye.

Yinsa onlupa ofwa na osisimuwa wawe

³¹Aphano ye khusala owaasomisa araka: Mwaana wa Pinaatamu aarina ya ohoochiwa pi vitthu zawaatta na okatthaliwa pi mahaakhimu a tiini na attunkhulu a tiini, anamanozela a kano na ooliwe, ila siikhu ya ttaatthu asisimuwe. ³²Ye khulupa woosileyavo monkoni aya opo. Aphano Pheeturu khunkhuwelela othetekele khusala anshowera. ³³Yinsa khurutela aphale aariivo anakhiyoni awe khusala aweekesa na khunshowera Pheeturu yoori: “Osale nyuma waka, Sheethwani! Weeyo khunuupuwela vitthu za Nluku, ila vitthu za eenaatamu. ³⁴Aphano khuwaakhuwela athu na anakhiyoni awe khuwoza yoori: “Nkhama ntthu ontakha okilotta, ajikatthale mweenyewe, athuule nsalapa awe akilotte. ³⁵Maana otule antakhaaye wuusuru ohaayi awe ontta omwaashikha, ila otule onimwaashikhaaye ohaayi awe, mwaasa wa miiyo na mwaasa wa hapari zooshapweya ontta wuusurukha. ³⁶Ena fwayita-ni ntthu oshintta olumwenku wooshi, mwiisho waya khumwaashikha nafusi yawe? ³⁷Ama niini ntthu anwahaaye opatili na nafusi yawe? ³⁸Amara ntthu apathowihaaaya khwa miiyo na mattakhuzi aka khwa khalila epi zoovonya na za twampi, Mwaana wa Pinaatamu onteela opatthiwa haaya khwa otu aya wakathi anttelaaye ota nsifwa wa Papaawe na malayikha ttakatthiifu.”

9

¹ Khusala alupa theenya yoori: “Kiniwuuzani khweele yoori: Khwa apa ariye apha, akina khanfwa ahooneeni ofwalume wa Nluku otakha na owahi.”

Yinsa, Munsa na Eliyaasi

²Ziviriyeovo siikhu sitha, Yinsa khunthuula Pheeturu, Tiyaaku na Yaahaya paasi, khuwaalawana vamwaako woolepa woohiivo hatha ntthu nkina. Attaaphale Yinsa khwiya woozukulisiwa ettaka omoona. ³Kuwo zawe khwiya zoottakattha nkhama etthu yawaara ameenaatho ahinwahaaye ofula khuttakatthisa nkhama toowo. ⁴Khuwaapuwelela Aliyaasi na Munsa, khusala attakhulana Yinsa. ⁵Aphano Pheeturu khumuaza Yinsa yoori: “Mwaaliimu ti yooshapweya wiikhala attaapha. Nintta ojeka heema ttatthu, moote yawo, moote ya Munsa na kiina ya Aliyaasi.” ⁶Pheeturu khaari ojuwa etthu yoolupa, maana yo aari wa woova. ⁷Elottelanaka khupuwa liwiku khuwaakhetela, na khusiileya huula yaari oraaye: “Otu Mwanaka wompheta waka; mwinsiileze”. ⁸Nasaapiru, wakathi eekesiyeoyo nkerekhere, khuhimooni hatha ntthu nkina theenya woohiyyi Yinsa. ⁹Eettaka wiishukha vamwaako aphale, Yinsa khuwoza yoori ahimuuze hatha ntthu etile oniyeyeo, mpakha Mwaana wa Pinaatamu asisimuwe muufwa. ¹⁰Mwaasa opule khuthokorela atthaaporu paasi, khusalana okeetisana maana a “osisimuwa muufwa”. ¹¹Khumuuzela yoori: “Mwaasa wa niini, anamanozela a kano alupaka wiiya yoohithajiya Aliyaasi ota khapula?” ¹²Yinsa khuwaajipu yoori: “Khweele Aliyaasi ona ya ota khapula, amara ata onrutisela opheeyaa

vitthu zooshi. Khi mwaasa aya niini yaatikhawaka yoori Mwaana wa Pinaatamu ona ya ohoowa channu, okatthaliwa na otarawiwa? ¹³ Ila, miiyo kiniuuuzani yoori Aliyaasi ata, yo khunrettela zooshi aatakhiyeeyo nkhamma zaatikheweego monkoni wa ye”.

Ovonisiwa wa shapu aariina sheethwani

¹⁴ Wakathi afiyeevo aphale aariivo anakhiyoni apale akina, khoona khuntti khuluyeene ewaazukuleliye apale na anamanozela a kano eettaka okheetisana na anakhiyoni. ¹⁵ Atthu apale paata ya omoona Yinsa, khwiya ooshanka khutthirela khunchelisa. ¹⁶ Yinsa khuwoozela yoori: “Mwinkhetisana niini?” ¹⁷ Mwinyi mmote aari vakatthi wa khuntti etile khujipu yoori: “Mwaaliimu, miiyo kootisela mwanaka ariina sheethwani aninkhattazaaye ottakhula. ¹⁸ Wakhula vahali aninsikanaavo, onta onkwisela vathi. Khusala alaza maphovu na owina meeno, na wookowa. Kawaavekela anakhiyoni awo yoori amwiikare sheethwani aya oto, ila yo khuhinkhitiri. ¹⁹ Aphano Yinsa khujipu yoori: “Oo, atthu oohaamini, mpakha lini kiiyaka vamote na mweeyo? Mpakha lini kuuvilelakan? Mwikitiisele shapu oto.” ²⁰ Aphano yo khuntiisa. Wakathi sheethwani amooniyeevo Yinsa, nasaapiru khuntothela mwaana otule ozoromowa woohusutivo khukwela vathi, khwaaza ojuupurusha alazaka maphovu. ²¹ Yinsa khumuuzela paapa wa mwaana otule yoori: “Zamwaaza lini epi?” Papaawe mwaana khujipu yoori: “Thanku avokoliwe. ²² Swaafu zawaatta, sheethwani oto, onta onkwisela vamoottho na mmaati yoori amuule. Ila nkhamma onwahi oretta etthu, noonele huruma onaawuni.” ²³ “Onwahi?” Alupaka Yinsa. “Zooshi zinwaheya khwa otule ankhupalaaye.” ²⁴ Nasaapiru paapa wa mwaana otule khunyakula araka: “Kinkhupali; okaawuni muuhikhupali mwaka!” ²⁵ Wakathi Yinsa ooniyeovo yoori khuntti khuluyeene yeettaka okusanyeya, khunsukisa sheethwani araka: “Sheethwani woohittakhuli na ohisiili, miiyo kinuuruma yoori onlikhe na ohinrutele theenya.” ²⁶ Sheethwani khunyakula, khunsakhinya woohusutivo khusaruwa, shapu khwiya nkhamma ntthu woofwa, khufiyelela atthu akina olupa yoori: “Afwa.” ²⁷ Ila Yinsa khunkhola nkhone awe khunlansa, na khwiya wa weemela. ²⁸ Paata ya Yinsa orutela owawe, anakhiyoni awe khumuuzela othetekele yoori: “Mwaasa aya niini nahaakhitirelyeeyo omwiikara?” ²⁹ Ye khuwaajipu yoori: “Eto oniikareya khwa lompa na ofuka paasi.”

Yinsa onlupa theenya ofwa wawe na osisimuwa wawe

³⁰ Yo khulaawo okhule aariwo na khulokhela Kalileya. Yinsa khaatakhiye atthu ojuwa ohali aariwo, ³¹ maana eetta owaasomisa anakhiyoni awe na awoozaka yoori: “Mwaana wa Pinaatamu onsaleela winkheleliwa mmakhono wa anaatamu. Yo anlawa amuule, ila siiku ya ttaatthu onlawa asisimuwe.” ³² Ila yo khayaaweleyiye etthu aari otakhaaye olupa na eetta woova omuuzela.

Nwulu muufwalume wa pinkuuni

³³ Khufiya Kafwaranaawu. Ari owawe, ye khuwoozela anakhiyoni awe yoori: “Ntarikhi mwaari okheetisana niini?” ³⁴ Ila yo khuhilipi hatha etthu, maana aari onyakulisana yoori anjuwe paani eeyiyeyo nwulweene channu vakathi vaya. ³⁵ Eekhaliyeovo, Yinsa khuwaakhuwela apale khumi na awiri khuwooza yoori: “Nkhama ntthu ontakha wiiya wa mwanzo, ona ya wiiya wawiishela na eeye karumeya wa ooshi.” ³⁶ Khunthuula mwaana mmote khunttha vakatthi vaya, khunkholela nkhone awe na khuwooza yoori: ³⁷ “Wakhula otule animpwekherelaaye nsimaana nkhamma otu, khwa

nzina laka, onikipwekherela miiyo, na otule anikipwekherelaaye khanikipwekherela miiyo, ila onimpwekherela otule akiperekhiyeeyo.

Otule ahiniiphiriwaaye ti fweeyo ori khwa fweeyo

³⁸ Yaahaya khunkhuwela Yinsa khumuza yoori: “Mwaaliimu, namoona mwinyi mmote eekaraka masheethwani khwa nzina lawo, fweeyo khunlikhisa mwaasa woohiiyi wa khuntti yeetthu.” ³⁹ Yinsa khumuza yoori: “Mwiinhkhattaze, maana khina anrettaaye minjuza khwa nzina laka, elot-telanaka khukittakhula wootakhalavo. ⁴⁰ Maana otule ahiniiphiriwaaye ti fweeyo, ori khwa fweeyo. ⁴¹ Nakatalikha, kiniuuuzani khweele yoori: Otule aniwinkhaanini maati oonywa, koopho moote khwa nzina laka, mwaasa wa mweeyo wiiya atthu a Al-Masihu, weekhweele khintela omwaashikha phakari yawe.

Okwiselana ntwampi

⁴² “Amana ntthu ankwsa mmote wa apa attiithi akikhupaliyeeyo miiyo, awfataali weeseleliwa mpahari afukeliwe liwe liwululene mmwisiko. ⁴³ Na nkhono awo amana wuukosisa, oshije. Afwataali weetta muuhaayi ori woorakala, ehiyeeeni wiiyana makhono awo mawiri khweetta motthooni, ohali oriwo moottho ohinzimaaye. ⁴⁴ [Ottuukho nyunku yaya ehinfwaaye wala moottho aya ohinzimaaye.] ⁴⁵ Na muulu awo amana wuuthow-elelisa, oshije. Afwataali weetta muuhaayi ori woorakala, ehiyeeeni wiiyana moolu mawiri khweetta motthooni, ⁴⁶ [ottuukho nyunku yaya ehinfwaaye na moottho aya ohinzimaaye.] ⁴⁷ Na amana liisho lawo limote luuthow-elelisa, olazemo. Afwataali weetta muufwalume wa Nluku na liisho limote paasi ehiyeeeni wiiyana oomawiri ila khweeseleliwa motthooni, ⁴⁸ ottuukho nyunku yaya ehinfwaaye na moottho aya ohinzimaaye. ⁴⁹ Maana wakhula mmote onlawa alukanewe moottho. ⁵⁰ Mwiinyu pi wooshapweya; ila mwiinyu aya amana olikha onyuunya, wala khunrutiseleya! Mwiye mwiinyu mweeyo ena, na mwiikhale na heeri mmote na nzeenu.”

10

Monkoni wa waashana

¹ Aphano Yinsa khulaavo aphale vaya khusala alawa nti wa Yudeya na phantte kiina ya Yorotaani. Theenya khuntti moote khuta aphale aariivo. Nkhama ethiipo aazowereliyeelo khusala awaasomisa. ² Mafwarizeewu akina khunsusela yoori amweeze amuuzelaka yoori: “Halaali nlume omwaasha muukha awe?” ³ Ye khuwaajipu yoori: “Munsa aruma niini?” ⁴ Yo khulupa yoori: “Munsa aninkha ruhusa ya waatikha talakha khumwikara.” ⁵ Yinsa awaajipwaka khuri: Mwaasa wa wuuma rooho, tiito ye oolikheliyeeni oruma opo aatikhiyeeyo. ⁶ Ila Nluku omwanzo amumpa nlume na muukha. ⁷ Mwaasa wa ethiito, nlume oninlikha papaawe na mamaawe khujikusanya na muukhaawe, ⁸ na oowiiri anretteya wiiya mwiili mmote paasi. Toowo, yo khaniyya awiri, ila oniyya mwiili mmote. ⁹ Nakatalikha, etile Nluku akusanyiyeeyo, ahiiyevo anvalulaaye.” ¹⁰ Wakathi Yinsa ari owawe, anakhiyoni awe khumuuzela theenya monkoni wa mattakhuzi atthaapale. ¹¹ Ye khuwaajipu yoori: “Wakhula otule animwaashaaye muukhaawe na khunrala muukha nkina, ontta oraruwa. ¹² Muukha naye amana antthira mannawe khuraliwa ti nlume nkina, ontta oraruwa”.

Yinsa na asimaana

¹³ Atthu akina aari owaatana asimaana yoori asapiwe ti Yinsa, ila anakhiyoni awe eetta owaashoweraka. ¹⁴ Yinsa paata ya woona vitthu epile,

khuhintuveli na khuwooza yoori: "Mwiwaalikhe asimaana akiteele miiyo, mwihiwaakhattaze; maana ofwalume wa Nluku pi waya. ¹⁵ Kiniuuuzani khweele yoori: Otule ahimpwekherelaaye ofwalume wa Nluku nkhama nsimaana, khanteela weettamo. ¹⁶ Elottelanaka, khuwaathuula asimaana, khuwaattheela makhono na khuwaaparikhya.

Shapu thajiri

¹⁷ Wakathi Yinsa aari weettelaaye osaruwa, mwinyi mmote khutthira amweettelaka khulawa khunkokhorela na khumuuzela yoori: "Mwaaliimu woosaana, kiretteniini yoori kipatthe ohaayi wa mileele?" ¹⁸ Yinsa khunjipu yoori: "Mwaasa aya niini okiithaka woosaana? Khaavo woosaana, woohiiyi mmote paasi Nluku. ¹⁹ Weeyo onjuwa oruma onraaye: 'Ohuule, ohiraruwe, ohiiye, Ohilupe oshaahiti woovonyeya, ohinhate ntthu na onshitahi papaawo na mamaawo.' ²⁰ Mwinyi otule khulupa yoori: "Mwaaliimu, zooshi epo kinshututela thanku oshaapu aka." ²¹ Yinsa khumweekesa na khumpheta. Khumuza yoori: "Enuusaleela etthu moote. Olawe woozanyise vitthu zawo zooshi, nzurukhu aya owenkhe asikhini na weeyo ontta wiiyana njuju pinkuuni; nawiisha ote okilotte." ²² Paata ya mattakhuzi apale, shapu otule khwiiya woottettheya khulaavo ari woohuzunika, maana aarina maali zawaatta.

²³ Yinsa khweekesa nkerekhere khuwooza anakhiyoni awe yoori: "Nanna enlipaazo thaajiri weetta muufwalume wa Nluku." ²⁴ Anakhiyoni awe khwiiya ooshanka khwa mattakhuzi apale. Ila Yinsa khurutela olupa theenya yoori: "Aanaaka, nanna enlipaazo weetta muufwalume wa Nluku! ²⁵ Eniiya yookhwuya Enkamiiya ovira valiphotto la sikano, zayita thajiri weetta muufwalume wa Nluku." ²⁶ Anakhiyoni awe khwiiya ooshanka, khusala oozelana mmote na nzaawe yoori: "Nkhama pi toowo, paani anttelaaaye wuusurukha?" ²⁷ Yinsa khuweekesa khuwooza yoori: "Khwa pinaatamu khinwaheya, ila Nluku wala; khwa Nluku vitthu zooshi zinwaheya." ²⁸ Aphano Pheeturu khwaaza omuuza yoori: "Fweeyo nalikha zooshi yoori nuulotte." ²⁹ Yinsa khujipu araka: "Kiniuuuzani khweele yoori: khaavo anlikhaaye vaje vawe, ttwiye, nlupuwe, mamaawe, papaawe, aana awe ama mashapa awe, mwaasa wa miiyo na hapari zooshapweya, ³⁰ ahipwekheraaye venkivene ohaayi otthuupu, swaafu miiya theenya ya manyupa, attwi, alupu, maama, paapa, aana ama mashapa na olupatthiwa. Mwiisho waya ohaayi wa mileele. ³¹ Awaatta eeyiye amwanzo, anttela wiishela; na awiishela anttela wiiya amwanzo."

Yinsa onrutela olupa ofwa wawe na osisimuwa wawe

³² Yo eetta owelela Yeruzaleemu, Yinsa khuwaalokoza. Anakhiyoni khwiiya onshanka, na apale aari onlottaaye khwiiya awoova. Theenya Yinsa khuwaakhuwela apale khumi na awiri na khuwooza vitthu zaari weettelaaye onrettikhanelu araka: ³³ "Moone, fweeyo ninwelela Yeruzaleemu, mwaana wa pinaatamu onlawa enkheleliwe mahaakhimu a tiini na anamanozela a kano. Yo anttela onhukhumwela ofwa na omwinkhelela mmakhono wa amalapo, ³⁴ anttela onveyisa, ontthemela, onjapha na amuule. Paata ya siikhu ya ttatthu asisimuwe."

Oveka wa Tiyaaku na Yaahaya

³⁵ Aphano Tiyaaku na Yaahaya, aana a Zepeteewu, khumwaattama Yinsa khumuza yoori: "Mwaaliimu, nintakha yoori oninkhe etthu ninttelaaye wuuvekela." ³⁶ Yinsa khuwoozela yoori: "Mwintakha yoori kuuretteleni niini?" ³⁷ Khujipu yoori: "Oninkhe ruhusa yoori khwa nsiifwa mwawo,

fweeyo neekhale mmote nkhono nlume mmote nkhono nkha.” ³⁸ Ila Yinsa khuwooza yoori: “Khamwinjuwa ethu mwinvekaaye. Mwinwahi mweeyo onywela koopho etile kinyweliyeeyo ama opwekherela woosiwa opu khoosiweeyo miiyo?” ³⁹ Yo Khujipu yoori: “Ninwahi.” Yinsa khuwooza yoori: “Mweeyo mwinlawa mwanywele koopho kinyweliyeeyo na mwinlawa moosiwe nkhama khoosiweeyo miiyo; ⁴⁰ ila phantte eto ya wiikhala nkhono nlume aka ama nkhono nkha khahi miiyo kininkhaaye. Maana puuro yaya eto ti ya apale oothokoreliwa.” ⁴¹ Noosiila vitthu epile, apale khumi khwiya ookasirikha khwa Yaahaya na Tiyaaku. ⁴² Ila Yinsa khuwaakhuwela khwiya vamote naye, khuwooza yoori: “Mweeyo mwinjuwa yoori apale aninkhiwaaye ofwalume wa olokozela khapila anshintta na owahi ariainaaye. ⁴³ Ila vakatthi venu mweeyo ehiye toowo. Otule antakhaaye wiiya ntunkhulu vakatthi venu mweeyo ona ya wiiya othuuto anrumeyaaye; ⁴⁴ otule antakhaaye wiiya wa mwanzo vakatthi venu eeye namarumeya enu mooshi mweeyo. ⁴⁵ Maana Mwaana wa pinaatamu khateleeni orumeyeliwa, ila orumeya na winkha ohaayi awe khwa owaakaphula atthu awaatta.

Ovoni siwa wa ntthu woohooni wa Yeriko

⁴⁶ Khweetta Yeriko. Wakathi Yinsa na anakhiyoni awe vamote na khuntti khuluyeene yaari olankhaaye Yeriko Baritimeewu woohooni mwaana wa Timeewu nazimola eettiye wiikhala kharipu ya tarikhi. ⁴⁷ Noosiila yoori Yinsa wa Nazareeti ontta ovira, khwaaza okhuwa araka: “Yinsa, mwaana wa Daawiuda, koonele huruma!” ⁴⁸ Atthu awaatta khusala anshowera yoori eeye woonyamala, ila ye khusala akhanyarela araka: “Mwaana wa Daawiuda, koonele huruma!” ⁴⁹ Yinsa khweemela khuri: “Mwinkhuwele.” Khukhuweliwa otule woohooni khumuaza yoori: “Ofurahi, olankhe, Ye ontta wuukhuwela!” ⁵⁰ Khweesela ajapi yawe toole, khwiirukha khweemela khulawa aphale aariivo Yinsa. ⁵¹ Yinsa khumuuzela yoori: “Ontakha yoori miiyo kuurettete niini?” Mwinyi otule woohooni khujipu yoori: “Mwaaliimu, miiyo kintakha woona!” ⁵² Yinsa khumuaza yoori: “Olawe! Amini yawo yauusuru.” Nasaapiru khwaaza woona na khusala anlotta Yinsa ntarikhi mphule.

11

Yinsa onvira na oshintta Yeruzaleemu

¹ Wakathi aattameliyeovo Yeruzaleemu, khufiya Betifwaaje na Betaaniya, kharipu ya mwaako wa oluveera, Yinsa khuwaaruma anakhiyoni awe awiri, ² khuwooza yoori: “Mwilawe mmuti mpho mwaattameliyeemo, mwifyaka mwininsikana mwaana wa puuru afukiwe ahinaweliweke ti hatha ntthu. Mwinfukule mwintiise. ³ Amana apuwa ntthu awuuzelani yoori: ‘Mwaasa niini mwirettaka vitthu epo?’ Mwinjipu yoori: ‘Mbiana ontta onhithajiyi na oninrutisa nasaapi.’” ⁴ Yo khulawa khunsikana mwaana wa puuru afukeleliwe, vanlako nwulu wa ntarikhi ya vaje, anfukulaka. ⁵ Atthu aari attaaphale khuwoozela araka: “Eto mwinrettaaye niini ya onfukula mwaana wa puuru oto?” ⁶ Anakhiyoni apale khujipu ethiipile Yinsa awooziyeyo, na ye khuwaalikha olawana. ⁷ Khunttiisela mwaana wa puuru otule Yinsa, khutthaavo kuwo zawe na khuwela. ⁸ Atthu awaatta khusala attattikha kuwo zaya ntarikhi na akina khusala atthaamo virapi aashijiyeeyo ntthuttu. ⁹ Apale aalokoziyeeyo na apale aari onlottaaye khusala anyakula araka: “Hosaana!” Wooparikhiiyiwa ti otule antaaye khwa nzina la Mbiana!” ¹⁰ Wooparikhiiyiwa saana ofwalume ontaaye wa papeettu Daawiuda!” Hosaana pinkuuni!” ¹¹ Yinsa khufiya Yeruzaleemu na khulawa mpakha

nnypa woosifwiwamo. Khoona zooshi na wiiya waarikiye, khulawa Betaaniya na anakhiyoni awe apale khumi na awiri.

Yinsa ontwaharesha nyupayooisifwiwamo

¹² Mmeesho mwaya, wakathi aari olankhaaye Betaaniya, Yinsa khunkhola jala. ¹³ Ari peetiwene, khoona muutthi wa mfikeera wooripelela mathapa, khulawa woona nkhama aari osikanamo nshumo. Wakathi aattameliyeeyo, khuhisikanimo hatha etthu, woohiiyi mathapa, maana khawaari wakathi wa wiima fiiku. ¹⁴ Aphano khuza mfikeera opule yoori: “Khina anttelaaye oja theenya mishumo khwa weeyo.” Anakhiyoni awe khusiila alupaka mattakhuzi apale. ¹⁵ Yinsa khufiya Yeruzaleemu, khuvira nnyupa woosifwiwamo na khwaaza oweekara apale aari wuuzanyisaaye na apale aari wuuzanyaaye. Khupwalula khukulu za anamapatilisa nzurukhu na za apale aari wuuzanyisaaye jiwa. ¹⁶ Khaari ontakhela ntthu oviranamo etthu yawuuzanyisa nnyupa woosifwiwamo. ¹⁷ Khusala asomisa araka: “Khayaatikhiweeni yoori: ‘Nyuppa yaka enttela wiiya nyuppa yoolompiwamo khwa atthu ooshi ila mweeyo mwarettisa wiiya likurakuza la manantarawu.’” ¹⁸ Mahaakhimu a tiini na anamanozela a kano khusiila mattakhuzi apale na khwaaza weekesa nanna ya omuula, maana eetta omoova, mwaasa wa khuntti khuluyeene yaari oshankisiwa pi masomi awe. ¹⁹ Weettelaka oripa, yo khulaamo nsitati mphule.

Mfikeera wa wuuma

²⁰ Mmeesho mwaya supuyeene, khoona mfikeera opule ori wawuuma mpakha na mitathaari zaya. ²¹ Pheeturu khuupuwela na khumuuzu Yinsa yoori: “Mwaaliimu! Woone mfikeera opule waalaaniyeeyo wooma.” ²² Yinsa khunjipu yoori: “Wiiyane amini khwa Nluku. ²³ Miiyo kiniwuuzani khweele yoori, wakhula otule anttelaaye wuuza mwaako opu yoori: ‘Okhuleyevo apha waajeeselele mpahari,’ na khuhina hatha nshikili nroho mwawo, ila khukhupalela yoori enrettikhana etile olupiyeeyo, entta oretteya. ²⁴ Apho, miiyo kiniwuza yoori, zooshi weeyo onvekaazo khwa lompa, khukhupalela yoori apwekherela, onteela opattha. ²⁵ Na amana olompaka, khwiiyana nzaawo okosiyeeyo, onswaamihi, yoori naye Paapa wa pinkuuni oswaamihi twampi zawo. ²⁶ Ila mweeyo amana mwhiswaamihi, na mweeyo Paapa wa pinkuuni khanswaamihi twampi zenu.

Ofwalume wa Yinsa na woosa wa Yaahaya

²⁷ Khufiya theenya Yeruzaleemu, wakathi Yinsa aari oviraaye nnyupa woosifwiwamo, khususeliwa ti mahaakhimu a tiini, anamanozela a kano na attunkhulu a tiini, ²⁸ khusala amuuzela yoori: “Vithu epi, onrettana ofwalume waani? Paani awinkhiyeeyo ofwalume wa orettana?” ²⁹ Yinsa khunjipu yoori: “Miiyo kintakha kiwuzele, amana okijipu, kintta owuuza ofwalume kinrettanaaye vitthu epi. ³⁰ Nkakuuze, woosa wa Yaahaya waari wa pinkuuni ama waari wa anaatamu?” ³¹ Yo khusala anyakulisana araka: “Amana niri ‘ti-ya pinkuuni,’ ontta onuuzela yoori: ‘Aphano mwaasa aya niini mwihinkhupalelaka?’ ³² Ila nihijilipisane olupa yoori waari wa atthu!” Maana yo aari owoova atthu, weekhweele atthu aari ookhupali yoori Yaahaya aari napiyu. ³³ Aphano khunjipu Yinsa araka: “Khanijuweeni.” Yinsa zwaamu yawe khunjipu yoori: “Hatha vattithiiru, miiyo akiniwuuzani owahi kinrettanaaye vitthu epi.”

¹ Aphano Yinsa khwaaza ottakhula na milikaniso yoori: “Mwinyi mmote khuzala miitthi za wuuva, khujekelela khwiya nkatthi, khuthipa kulaathayini yoori asala atthaamo wuuva na khujeka korofwa. Paata ya toole khurentteriwa anamalima ye khusaafiri. ² Wakathi wa wuurula, khunruma karumeya awe khwa anamalima yoori enkhiwe phantte ya mishumo za wuuva. ³ Ila yo khunkhola khumperekha na khumwiikara woohimwinkhi ethu. ⁴ Aphano khumperekha karumeya awe nkina yo khunvonya khunwozola veeshwa, na khunttukhana. ⁵ Khumperekha theenya nkina khumuula. Khuwaaperekha theenya awaatta akina; khupiiwa na akina khuuliwa. ⁶ Aari osala mmote yoori amperekhe, mwanawewe wompheta wawe. Mwiisho waya khumperekha na khuri: ‘Otu mwanaka antta onshitahi.’ ⁷ Ila anamalima apale khuuzana yoori: ‘Otu ti namarithi. Nlaweni nimuule, nirithi fweeyo.’ ⁸ Aphano khunkhola mwaana otule, khumuula khumweeselela oje wa nshapa. ⁹ Yinsa khuuzela yoori: “Mweenyewe nshapa onttela owaaret-tela niini? Ye ontta ota awoole anamalima apale nshapa laya awenkhe anamalima akina. ¹⁰ Khamwinasome etthu enlupaaye zawaatikiwa ttakatthiifu? ‘Liwe anamajeka akatthaliyeeyo, nttho laya laretteya wiiya liwe linkhomaazaaye! ¹¹ Eto enlankha wa Mbwana na ti yootikinisa khwa fweeyo.’” ¹² Aphano khwaaza weekesa nanna ya onkhola, maana eettiye ojuwa yoori nlikaniso opule aalupiyeeyo waari owaalupa yo. Ila eetta owoova atthu, attaphale khunlikha khusala alawa safwari yaya.

Oriphia lumpuru

¹³ Paata ya toole, khurumiwa mafwarizeewu akina na attunkhulu akina a khuntti ya Herooti olawa ottakhulana Yinsa eekesaka yoori an-sikanane ntakhuzi loovonyeya. ¹⁴ Wakathi afiyeevo aphale aariivo Yinsa khulupa yoori: “Mwaaliimu, ninjuwa yoori o weekhweele na khunjilikha oshawurisiwa ti ntthu. Maana khuniwaaphuka attu khwa nanna ariizo, ila onsomisa wawaamineyavo tarikhi ya Nluku. Nkanuuze: Halaali onripha lumpuru Seezari ama wala? ¹⁵ Ila Yinsa khumweeleya onaafikhi waya khuwoozela yoori: “Mwaasa aya niini mweeyo mwikoototaka? Mwikitiisele nzurukhu yoori moone.” ¹⁶ Yo khutana nzurukhu opule, ye khuwoozela yoori: “Ratarato eti na waatikha opu pi waani?” Khujipuza yoori: “Seezari.” ¹⁷ Aphano Yinsa khuri: “Mwimwinkhe Seezari etile yiyyiye ya Seezari, na ya Nluku etile yiyyiye ya Nluku.” Khwiya onshankela.

Osisimuwa khweele

¹⁸ Masatukhi akina, apale anlupaaye yoori khawiivo osisimuwa, khuta aphale aariivo Yinsa khulupa yoori: ¹⁹ “Mwaaliimu, Munsa anilikhela zawaatikiwa yoori, amana afwa ttwi na khunlikha muukhaawe ahin-vokoleeni aana, alooziwe ttwiye yoori epuwe peewu khwa zwaamu ya ttwiye. ²⁰ Moone, aarivo attwi sapa, otu wa mwanzo khuloola na khufwa ahiwaalikheeni hatha aana. ²¹ Waphiiri khulooziwa muukha otule aafweliweeyo ti mannawe na ye khufwa, woohinlikhi mwaana; na wattaatthu khwiya etthiipo. ²² Etthiipile oosaapa khuhijaalikhi hatha aana. Mwiisho waya muukha otule na ye khufwa. ²³ Wakathi woosismuwa, khwa ooshi apa sapa anttelaaaye wiiya muukhawe tuuvi? Maana ooshi anrala!” ²⁴ Yinsa khuwaajipu yoori: “Mweeyo mwattettekhiwa, maana khamwinjuwa zawaatikiwa ttakatthiifu wala owahi wa Nluku! ²⁵ Pi toono, wakathi woosismuwa muufwa, khamwinlawa ooola, wala olooziwa, ila mwinttela wiiya nkama malayikha a pinkuuni. ²⁶ Mweeyo khamwina some nkithaapu ya Munsa etthu yaatikiweeyo monkoni wa osisimuwa?

Wakathi aari ottakhulaaye va muutthi opule waari okholelaaye, yaatikhiwa yoori Nluku aamuuziye Munsa yoori: "Miiyo ki Nluku wa Eburahiima, wa Esiyaakha na wa Yaakhumpa." ²⁷ Moone, Nluku khahiyo wa ananfwa, ila Nluku wa atthu haayi. Mwattettekheyen venkivene.

Oruma nwulu

²⁸ Namanozela wa kano mmote noowasiila akheetisanaka khunsusela, ajuwiyeovo yoori ajipu saana, khumuuzela yoori: "Khi oruma wamwanzo khwa zooshi pi puuvi?" ²⁹ Yinsa khujipu yoori: "Oruma wamwanzo khwa zooshi pi opu: Osileze, Ezirayiilu, Mbwana Nluku eetthu ti eeyiye Mbwana otthwe paasi. ³⁰ Omphete paasi Mbwana Nluku awo khwa rooho yawo yooshi na nafusi yawo yooshi na akhili zaho zooshi na kuvu zaho zooshi. ³¹ Waphiiri pi opu: 'Omphete nzaawo nkama etthiipo onjiphetaazo omweenyewe. "Khawiivo nrumo nkina nwulu nkama opu.' ³² Namanozela wa kano otule khuri: "Kemaani, Mwaaliimu, walupa na haakhi yoori ye mmote paasi, na khaavo nkina woohiiyi ye, ³³ na omphete na rooho yawo yooshi na akhili zaho na kuvu zaho zooshi na omphete nzaawo nkama etthiipo onjiphetaazo ti yooziti zaakha yoolukuziwa na twaha. ³⁴ Yinsa amooniyeevo yoori ajipu waakhilivo, khumuuziwa yoori: "Weeyo khuri peeti-wene na ofwalume wa Nluku." Elottelanaka, khuhiiivo hatha mmote aari omuuzelaaye.

Al-Masiihu Mbwana wa Daawiuda

³⁵ Yinsa eettaka osomisa nnyupa ya Nluku, khuwoozela yoori: "Anlupa toovi anamanozela kano yoori Al-Masiihu mwaana wa Daawiuda? ³⁶ Daawiuda aya alupa khwa Rooho Ttakaththiifu yoori: 'Mbwananamuza Mbwana aka yoori wiikhale nkhono nlume aka, mpakha miiyo kiwaatthe maatuwi awo vathi wa moolu awo.' ³⁷ Daawiuda aya onimwiitha yoori 'Mbwananamuza'. Toovi anttelaaye wiiya mwaanawee?" Khuntti khuluyeene yaari osileza wootuveliwavo. ³⁸ Yinsa eettaka owaasomisa, aari owooza yoori: "Phoole na anamanozela kano. Yo oniwaatuvela weettetta awaliye ajapi zoolepa na opwekherela mwacheliwa vaparasa, ³⁹ owaatuvela wiikhala wiilokozi nsinakooka na puuro zooshitahiwa mmajampo, ⁴⁰ atthaapo antapanya mmanyupa ananfweliwa pi amannazaya na ojihakikhi khwa oreeta lompa zoolepa; apa aya anttela ohoowa khwa ophukiwa woolwaazavo!"

⁴¹ Yinsa eekhaliye waattamela puuro etile eninkhiwaavo zaakha, aari woona nanna khuntti etile yaari otthaamo nzurukhu n'yoopo ya zaakha. Mathaajiri awaatta aari otthaamo wawaatta. ⁴² Khumoona muukha namafweliwa ti mannawe mmote wa masikhini, atthaakamo ttoosu piiri. ⁴³ Yinsa khuwaakhuwela anakhiyonie awe khusala awooza yoori: "Kiniwuzani khweele yoori namafweliwa otu ti mannawe atthaamo n'yoopo wa zaakha zayita akina aya. ⁴⁴ Maana ooshi enkha tathela, ila otu na osikhini awe enkha wooshi aari ororomelaaye.

13

Yinsa onlupa opwechiwa wa Nyuupa Yoosifwiwamo

¹ Wakathi Yinsa aari osaruwaavo nnyupa yoosifwiwamo, nakhiyonie awe mmote khumuuziwa yoori: "Mwaaliimu nkoon! Maweni mawulweene toono na manyupa ooshapweyisana toono!" ² Yinsa khunjipu yoori: "Woona manyupa mawulumawulu apa? Khalinlawaa liwe wiiya vatulu wa liwe nzaaya lihinttelaaye opwechiwa."

Alama ya mwiisho wa wakathi

³ Yinsa aarettiye eekhaliye vamwaako Oluveera omaasho wa nyuupa yoosifwiwamo, Pheeturu, Yaakhumpa, Yaahaya na Antere khumuuzela othetekele yoori: ⁴ “Onuuze, wakathi-ni enttelaaye orettikhana vitthu zaya epo, na enttela wiiyavo alama-ni yoothoonyeza yoori zooshi zasaleela orettikhana?” ⁵ Yinsa khuwooza yoori: “Phoole yoori mwihihatiwe ti hatha ntthu. ⁶ Maana awaatta anta khwa nzina laka alupaka yoori: ‘Mi-iyio ki Al-Masiihu!’ na aniwaaahata atthu awaatta. ⁷ Amana mwisiila viittha ama hapari za viitha, mwihoove maana epo ena zoorettikhana, ila nalelo kinttela wiiya mwiisho. ⁸ Khapila moote enlawa yoomanane khapila kiina, na ofwalume onlawa woomanane ofwalume nkina. Zinlawaa zeeyeve visikinyaatthi khwa phantte zoofwarikhana na jala. Epo zaya yaazo ya vitthu za olwaaza. ⁹ Mweeyo mwiiyane phoole, maana mwin-lawa mwenkheleliwe wa anamaphuka na mwinlawa mwajaphiwe mmasi-nakooka, na mwilawaniwe wa misatoro na wa afwalume, mwaasa wa miiyo, yoori mwiye mashaahiti. ¹⁰ Ila enihithajiya olaleyiwa hapari zooshapweya khapula khwa khapila zooshi. ¹¹ Amana mwithuuliwa olawa ofukiwa na ophukiwa, mwiishukulikhe etthu yoolupa, ila ethiito mwinttelaaye winkhiwa wakathi aya otthuupo mwilupe ethiito, maana khahiyo mweeyo mwinttakhulaaye, ila Rooho Ttakatthiifu. ¹² Twi mmote onlawa an leve ttwi-iyie yoori ooliwe, na paapa onleva mwanawee. Aana anlawa awaazukuluwele apapa zaya awoole. ¹³ Atthu ooshi anttela owiinani mwaasa wa miiyo. Ila otule anttelaaye ovilela mpakha mwiisho, ontta wuusurukha.

Ohoowa nwulweene

¹⁴ Amana moona okufuru wa woopisa wa pala nhali woohifwayi wiiyamo (ansomaaye ti emweeleye), aphano apale anttelaaye wiiya Yudeya atthirele omwaako. ¹⁵ Otule anttelaaye wiiya vatulu wa nyuupa ahiishukhevo yoori alawe owawe, wala ahivire othuula etthu ya nnyupa mwawee. ¹⁶ Otule aniiyaaye ntthuttu ahirutele onti yoori athuule juupa yawe. ¹⁷ Ootakhaliwa aakha apale anttelaaye osikanika ari awiimittha ama eettaka waamwisa! ¹⁸ Mwinvekele Nluku yoori vitthu zaya epo ehirettikhane mwiita. ¹⁹ Maana, siikhu zaya epo onttela wiiyavo ohoowa ohineeyekevo thanku Nluku ompe olumwenku, na khunteela opuwa nkina nkhama opo. ²⁰ Eriwaka Nluku khaafupheyisiye siikhu zaya epo, khaavo aari weettelaaye wiiya haayi, ila mwaasa wa apale awathawuliyeeyo, afupheyisa siikhu zaya epo. ²¹ Aphano, amana ntthu awuuzani yoori: ‘Al-Masiihu otu ariiye apha!’ ama ‘Moone, otule ari okhule!’ mwiikhupali. ²² Maana anlawa apuwe Al-Masiihu oojipanka na manapiyu oojipanka anttelaaye othoonyeza alama na vitthu zootikinisa yoori kusapi awahi owaattettekha ananthawuliwa. ²³ Mweeyo mwiiyane phoole! Miiyo kiniwuuzani zooshi epo zihinarettikhane.

Ota wa mwaana wa pinaatamu

²⁴ Ila siikhu zaya epo, paata ya pala eto ya ohoowa, njuwa linttela oripa na mweezi onttela olıkha waara. ²⁵ Matthottowa akhwe pinkuuni na kuvi ziriyye pinkuuni zinttela osakhinyeya. ²⁶ Aphano, mwinttela omoona Mwaana wa Pinaatamu mmawiku na owahi nwulweene na siifwa. ²⁷ Ye onttela oruma malayikha awe khwa phantte nne zooshi za nkerekhere wa olumwenku mpakha nkerekhere ya pinkuuni yoori awaakusanye ananthawuliwa awe.

Nsomo wa mfikeera

²⁸ “Mwijinozele nlikaniso wa nfikeera. Amana virapi zaya zinyoowela na mathapa khwaaza ophutuwela enthoonyeza yoori mwiita ontta waat-tamela. ²⁹ Etthiipo theenya mweeyo, amana moona vitthu epo zeettaka orettikhana, mwijuwe yoori ye ori kharipu ya va milako. ³⁰ Miiyo kini-wuuzani khweele yoori khapila eti kinvira vitthu epi zihirettikhaneeni. ³¹ Pinku na vathi zooshi zinteele ovira, ila mattakhuzi aka khanviraru. ³² Ila monkoni wa siikhu ama wakathi khina anjuwaaye; wala malayikha pinku-uni wala Mwaana, woohiiyi Paapa. ³³ Phoole, mwiye woojeekesela, maana khamwinjuwa ofiya wa wakathi aya opo. ³⁴ Eri nkama ntthu anlikhaaye nyuupa yawe khuretta safwari ya peetiwene; ila ahinalawe, khuwaalikhela ofwalume, akarumeya awe wakhula mmote sharuthi yawe, khunruma namweekesela yoori asale aweekeselaka. ³⁵ Tiito, mwijeekesela, maana mweeyo khamwinjuwa wakathi mweenyewe nyuupa anttelaaye oruti; ent-tela wiya njuwa looveva, osikhu layili, lifwajiri ama supu. ³⁶ Amana ye ata woohileezi, ti ahiwaasikane eettaka olala. ³⁷ Epile kiniwuuzanini, kiniwuuzani mooshi: ‘Mwijeekesela!’ ”

14

Shawuri za omuula Yinsa

¹ Zaari osaleela siikhu piiri paasi yoori efiye siikhu ya Paashikowa na siikhu ya Njampo la Phaawu Zoohiina Fwaramento. Mahaakhimu a tiini na anamanozela a kano aari weekesa nanna ya onkhola Yinsa sirini yoori amuule. ² Yo aari olupa yoori: “Khanininkhola vanjampo yoori nihipuwise nzuuzu vakatthi wa atthu.”

Yinsa onvaaziwa mafutta Betaaniya

³ Yinsa ari Betaaniya, eekhaliye vameeza owawe mwinyi mmote anithiwaaye Simawu namaharaja, khutawo muukha aataniyeeyo suupha ya mafutta oonukhela awaatta nzurukhu. Khupwecha suupha etile khumwitthela Yinsa veeswa vawe. ⁴ Apale aari attaphale khwiya ookatipukha khusala oozana atthaaporu yoori: “Aharipwela-ni mafutta apale. ⁵ Maana aari owahi wuuzanyisa miiya ttatthu za nzurukhu wa paratha, aari weet-telaaye winkhiwa asikhini.” Yo khunshowera muukha otule. ⁶ Ila Yinsa khuwaalikhisa araka: “Mwinlikhe muukha otu khwa heeri, Mwan-velaveliselani? Ye akirettela miiyo etthu yooshapweya. ⁷ Maana asikhini mwina mweeyo mileele, na mwinwahi owaawuni mwitakharu. Ila miiyo akinteela wiya vamote na mweeyo mileele. ⁸ Ye aretta etile awahiyeeyo. Avaaza mafutta oonukhela mwiili aka raku zeene, atthenkezaka ozikhawa waka. ⁹ Kiniwuuzani khweele yoori: wakhula vahali lintafusiriwaavo nttakhuzi la Nluku khwa olumwenku wooshi, epi arettiyeeyo muukha otu, zeettaka olupiwa noofikhiriwa ye.”

Yuuda oninzinkula Yinsa

¹⁰ Aphano Yuuda Eshikariyooote, mmote wa apale khumi na awiri, khulawa wa mahaakhimu a tiini khwa shawuri za onzinkula Yinsa. ¹¹ Yo wakathi ansiliyeeyo khwiya oofurahi na khumwaahiti Yuuda omwinkha nzurukhu. Khwa wakathi aya opo Yuuda aari weekesa kiphenyo saana yoori anzinkule.

Yinsa onja njampo la paashikowa

¹² Siikhu ya mwanzo ya Njampo la Phaawu Yoohiina Fwaramento, wakathi waazoweriweeyo orettiwa twaha pwittipwitthi yoojeliwa paashikowa, anakhiyoni a Yinsa khumuuzela yoori: “Ontakha yoori neette vayi nootthenkesele etthu yoojiwa ya paashikowa?” ¹³ Yinsa khuwaaruma anakhiyoni awe awiri khuwooza yoori: “Mwilawe mpakha

ositati, ottuukho mwinlawa mwansikane mwinyi athuuliye yuuku ya maati. Mwinlotte othuuto,¹⁴ mwimuuze mweenyewe nyuupa ethiito anttelaaye oviramo yoori ‘Mwaalii mu onta wuuzela: Orivayi nsana aka wa omaka-vo, kinttelaaaye onja-vo paashikowa na anakhiyonaka?’¹⁵ Aphano ye onta wuunozani mweeyo khwa nyuupa ya vatulu nsana nwulweene na zooshi mwinihithajiyaaye. Mwitthenkeze attaapho njampo lethu.”¹⁶ Anakhiyonaka apale awiri khulawa mpakha ositati, khusikana zooshi nkhamma etthiipile Yinsa aalupiyeego na khuntthekeza paashikowa.¹⁷ Wakathi oripiyeovo, Yinsa khuta na anakhiyonaka awe apale khumi na awiri.¹⁸ Ari vameeza eettaka oja Yinsa khuri: “Weekhweele kiniwuuzani yoori mmote wa mweeyo anjaaye na miyo onkizinkula.”¹⁹ Ooshi khwiya oohuzunikha na khwaaza wuuzela wakhula mmote khwa zwaamu yawe yoori: “Talili khahiyi miyo?”²⁰ Yinsa khujipu yoori: “Mmote wa khumi na awiri anjanaaye miyo parathu moote.”²¹ Mwaana wa Pinaatamu onlawa afwe, nkhamma etthiipo yaatikhiweeyo monkoni wa ye. Ila wootakhaliwa ti otule anttelaaye onzinkula Mwaana wa Pinaatamu! Afwataali ahivokoliweeni!”

Njampo la mwiili na taamu ya Mbwana

²² Ettaka oja, Yinsa khuthuula phaawu, khuparikhya, khumeya, khuwenkha anakhiyonaka awe na khuwooza yoori: “Mwithuule; opu mwiili aka.”²³ Elottelanaka, khuthuula jiikira, khushukhurwela, khuwenkha anakhiyonaka awe na ooshi khunywa.²⁴ Khuwooza yoori: “Eti ti taamu yaka ya wahati yiitthiweeyo khwa zwaamu ya atthu ooshi.”²⁵ Miyo kiniwuuzani khweele yoori akinteela onywa theenya nshumo wa nrayi wa wuuva, mpakha siikhu kinttelaaaye onywa theenya na mweeyo muufwalume wa Nluku.”²⁶ Paata ya yo wiipa liipo, khulankha khusala alawa omwaako Oluveera.

Yinsa oninchimulela Pheeturu

²⁷ Aphano Yinsa khuwooza yoori: “Mooshi mweeyo mwinlawa mwakan-swi. Maana yaatikhiwa yoori: ‘Kininvulalisa nshuki aya, na pwittipwitthi zaya zinttela omwazeya.’²⁸ Ila paata ya osisimuwa waka, kinttela olokoza Kalileya.”²⁹ Aphano Pheeturu khutukhuru araka: “Hatha nkhamma ooshi eetta wuutthira, miyo akinuutthira.”³⁰ Yinsa khunjipu yoori: “Weekhweele kiniwuza yoori leelo osikhu otthuupu, likukhuwi lihineekhe swaafu piiri, onteela okikhana swaafu ttatthu.”³¹ Ila Pheeturu khusala akhanyarela channu araka: “Hatha nkhamma kintakha wuuliwa vamote na weeyo, akin-teela wuukhana.” Ooshi khulupa ethiipo.

Yinsa nwoorotha wa Yetemaani

³² Aphano khulankha khulawa puuro eniitthiwaaye Yetemaani, khuwooza anakhiyonaka awe yoori: “Mwiikhale apha, miyo kinttela olompa.”³³ Khunthuula Pheeturu, Tiyaaku na Yaahaya khwaaza oshukulikha, othunkuwikha na ohuzunikha.³⁴ Yinsa khuwooza yoori: “Nafusi yaka ti ya ohuzunikha venkivene woosaleela ofwa; mwisale apha na mwijeesesel.”³⁵ Yinsa khuwaasusa vattitthiiru khukokhora na khusala alompa yoori nkhamma enwaheya aattuwananisiwe wakathi opu wa ohoowa.³⁶ Aari olupa toono: Oo Paapa zooshi khwa weeyo zinwaheya. Okaattuwananise miyo jiikira eti ya ohoowa. Ila ehirettikhane khwa matakhele aka, ila khwa matakhele awo.³⁷ Apho khurutela aphale aariivo anakhiyonaka awe, khuwaasikana eettaka olala. Khumuza Pheeturu yoori: “Simawu, onta olala? Khuwaheeni ojeekesela nenkawu wakathi mmote?”³⁸ Mwijeesesel na mwilompe, yoori mwihihikwele muuzayiniwa; rooho ti yookhomaala, ila

mwiili pi woottettheaya.” ³⁹ Yinsa khuwaasusa opheya khusala alompa, arutelaka mattakhuzi mamoteru. ⁴⁰ Wakathi arutiyeovo khuwaasikana eettaka olala theenya, mwaasa maasho aya eetta owaalemela; khaari ojuwa etthu yoojipu. ⁴¹ Khuta swaafu ya ttaathu khuwooza yoori: “Nalelo mwintta olala na ovumula? Zafiyela! Wafiya wakathi wa Mwaana wa Pinaatamu winkheleliwa mmakhono wa anatwampi. ⁴² Mwilankhe, nilawe! Mwimoone namazinkula ori kharipu.

Ofukeliwa wa Yinsa

⁴³ Yinsa nalelo eettaka ottakhula, khusala ata Yuuda mmote wa anakhiyoni apale khumi na awiri. Aari ota na atthu awaatta athuuliye phanka na kolomontto, aarumiweeyo ti mahaakhimu a tiini, anamanozela a kano na attunkhulu a tiini. ⁴⁴ Namazinkula aawooziye alama araka: “Otule kinttelaaye ompatikha, ti oihuuto; mwinkhole mwinthuule saana.” ⁴⁵ Wakathi afiyeevo, ye khumwaattama khumuuzu yoori: “Mwaaliimu!” na khumpatikha. ⁴⁶ Atthu apale khunkhola Yinsa na khunkholelela. ⁴⁷ Aphano mmote wa anakhiyoni awe aariina kharipu, khufuttha phanka khunvavela khushija nshiilo la karumeya wa haakhimu nwulu wa tiini. ⁴⁸ Yinsa khuwooza yoori: “Mwakiteela na phanka na mikokontto yoori mwikikhole nkhamma nantarawu? ⁴⁹ Siikhu zooshi kaari vamote na mweeyo kisomisaka Nnyupa Woosifwiwamo, khuhikikholi; ila zooshi epi zaariye yoori emarisele zawaatikhwa ti manapiyu. ⁵⁰ Anakhiyoni awe ooshi khumwanswi na khuthira. ⁵¹ Ila shapu mmote, aajifinikhiyeeyo nkhami woolakala paasi aari onlottaaye Yinsa. Yo khunkhola, ⁵² ila khuvula nkhami opule, khutthira waazu.

Yinsa vakatthi wa Mashawuriiya

⁵³ Khunthuula Yinsa khunlawana wa haakhimu nwulu wa tiini na khuthukumana mahaakhimu a tiini ooshi, attunkhulu a tiini na anamanozela a kano. ⁵⁴ Pheeturu khusala awaalotta ari peetiwene mpakha nlikokoro wa haakhimu nwulu wa tiini, na khulawa khwiikhala na anamarumeyela, ootthaka moottho. ⁵⁵ Mahaakhimu a tiini na Mashawuriiya ooshi aari weekesa onsikanana Yinsa paathuli moote yoori anhukhumwele ofwa, ila khuhinsikanani hatha moote. ⁵⁶ Maana awaatta aari olawela oshaahiti woovonyeya khwa Yinsa, ila tukhuru zaya khazaari sawawsawa. ⁵⁷ Aphano khulankha atthu akina na onlupeza vithu zoovonyeya. ⁵⁸ “Fweeyo nansiila alupaka yoori: ‘Kimpwecha Nyuupa eti Yoosifwiwamo yoojekiu pi makhono a anaatamu, na siikhu ttatthu kijeke kiina, yoohijekiu pi makhono eenaatamu.’” ⁵⁹ Ila hatha nkhami piitthiipo, mattakhuzi aya khaari wiiya sawasawa. ⁶⁰ Khulankha haakhimu nwulu wa tiini khumuuzela Yinsa yoori: “Khunjipu mattakhuzi apa onlokoveziwaaye?” ⁶¹ Ila Yinsa khwiiya woonyamala, khuhijipu hatha etthu. Haakhimu nwulu wa tiini khurutela omuuzela theenya yoori: “Weeyo o Al-Masiihu, mwaana wa Nluku Wooparikhiiya?” ⁶² Yinsa khujipu yoori: “Miiyo ki oihuuto, na mwinlawa mwamoone Mwaana wa Pinaatamu eekhaliye nkono nlume wa Nluku wa owahi zooshi, na ataaka mmawiku a pinkuuni.” ⁶³ Aphano haakhimu nwulu wa tiini khuvarula kuwo zawe na khuri: “Khi ninrettanna oshaahiti nkina! ⁶⁴ Mweeyo mwasiila okufuru wawe. Mwinuuupuwela niini?” Atthu ooshi anri onsuhi wuuliwa. ⁶⁵ Aphano akina khwaaza ontthemela khunfinikha omaasho wawe khusala ampwakula na amuuzela yoori: “Ti paani oopiyeeyo? Onlupe!” Anamweekesela khunkhola na khumpwakula.

Pheeturu oninkhana Yinsa

⁶⁶ Pheeturu aarettiye ari vathi nlikokoro wa nyuupa etile wakathi atiyeyo njaazi wa haakhimu nwulu wa tiini. ⁶⁷ Amooniyeovo Pheeturu eettaka woottha moottho khuri: “Weeyo waari na Yinsa wa Nazareeti.” ⁶⁸ Ila Pheeturu khukhana araka: “Akininjuwa, na wala akinsiila etthu onlupaaye.” Khusaruwela nlako wa nlikokoro. ⁶⁹ Wakathi njaazi otule amooniyeovo theenya, khuwooga apale aariina attaaphale yoori: “Otu mmote wa atthaapo.” ⁷⁰ Ila khukhana theenya. Oviriyeovo wakathi vattitthiiru, apale aariina atthaapale theenya khumuuzha Pheeturu yoori: “Weekhweele, weeyo o mmoteru na atthaapo, maana onkalileya. ⁷¹ Ye khwaaza onlaani na olapha yoori: “Akininjuwa pinaatamu aya oto oninlupaaye.” ⁷² Nasaapiru likukhuwi khwiikha swaafu ya phiiri. Pheeturu khuupuwela mattakhuzi Yinsa amuuziyeoyo yoori: “Likukhuwi lihineekhe swaafu piiri, onikikhana swaafu ttatthu.” Khulaavo aphale vaya khusala alila.

15

Yinsa ari wa Pilaatu

¹ Supuyeene, khukusanyeya Mahaakhimu a tiini, attunkhulu a tiini, anamanozela a kano na Mashawuriya ooshi, khunfuka Yinsa khunthuula khumwinkha Pilaatu. ² Pilaatu khumuuzela yoori: “Weeyo o mfwalume wa mayaahuuti?” Ye khujipu yoori: “Weeyo ti onlupaaye.” ³ Mahaakhimu a tiini khunlokoveza vitthu zawaatta Yinsa. ⁴ Pilaatu khurutela omuuzela theenya yoori: “Weeyo khunjipu? Nkoona vitthu kavi anuulokovezaaye.” ⁵ Ila Yinsa khujipu hatha etthu Pilaatu khwiiya wooshanka.

Yinsa ahukhumweliwa ofwa

⁶ Yaari zowera yaya, wakathi wa Njampo la Paashikowa, Pilaatu onfukulela napherezu mmote, otule aari ovekiwaaye ti atthu. ⁷ Mwinyi mmote anitthiwaaye Baraba aafukeliwe vamote na anamakhijili mwaasa wa omuula ntthu wakathi wa nzuzu. ⁸ Khuntti ya atthu etile khuta na khunvekela Pilaatu yoori arette etile awaaazoweziyeoyo owaarettela. ⁹ Aphano Pilaatu khuwoozela yoori “Mweeyo mwintakha yoori kinfukulele mfwalume wa mayaahuuti?” ¹⁰ Maana ye aari ojuwa saaneene, yoori mahaakhimu a tiini anleviye Yinsa mwaasa wa nrima. ¹¹ Ila mahaakhimu a tiini awaakkhan-yareliye atthu apale yoori anvekele Pilaatu aaze onfukulela Baraba khwa otakha waya. ¹² Pilaatu khuwoozela theenya yoori: “Kinrettele niini mwinyi otu mweeyo mwinimwiithaaye mfwalume wa mayaahuuti?” ¹³ Yo khunyakula araka: “Akhomeliwe!” ¹⁴ Ila Pilaatu khuwoozela yoori: “Niini arettiyeoyo yootakhala?” Ila yo khusala atepa onyakula araka: “Akhomeliwe!” ¹⁵ Pilaatu eekesaka otuvelisa khuntti etile ya atthu, khunfukulela Baraba na khuruma ojaphiwa Yinsa na olawa okhomeliwa.

Anajanka aninveyisa Yinsa

¹⁶ Anajanka khunthuula Yinsa, khunlawana nlikokoro wa nyuupa khuulu ya nsatoro khukusanya khuntti khuluyeene ya anajanka. ¹⁷ Khunwalisa juupa yookhuttuwa, khuvaasha khaara ya miiwa khunwalisa mmwishwa. ¹⁸ Khusala anchelisa araka: “Wiiye haayi, mfwalume wa mayaahuuti!” ¹⁹ Khusala ampiya veeshwa vawe na nthala na ontthemela, akokhoraka na omwaaputu.

Okhomeliwa wa Yinsa

²⁰ Paata ya onttukhana, anajanka apale khunvula kuwo yookhuttuwa khunwalisa kuwo za wiiya zawe. Aphano khunsarulela vaje yoori alawe

ankhomele. ²¹ Khukutthanana mwinyi mmote wa Sireene aari wiitthiwaaye Simawu, papaawe Alishantere na Ruufu, aari olankhaaye omashapa. Khunkhanyarela othuula nsalapa wa Yinsa. ²² Yo khunthuula Yinsa khunlawana puuro eniitthiwaaye Kolokoota, eriina maana a puuro ya likurakuza la eeshwa. ²³ Khusala atakha omwinkha viinyu yoophakanyaniwa mafuttha oonukhela, ila ye khuhinywi. ²⁴ Aphano khunkhomela na khwaawanyana kuwo zawe khwa weekesa nasipu yoori ajuwe wakhula ntthu phantte ari weettelaaye osalana. ²⁵ Aakhomelaniwe wakathi wa saa-ttaatthu, supu. ²⁶ Pi ethiipo yaatikhieeyo khwa olokoveziwa wawe yoori: MFWALUME WA MAYAAHUTI. ²⁷ Vamote na ye aakhomeliwe manantarawu awiri, mmote nkhono nlume, nkina nkhono nkha, ²⁸ [na khurettikhana epile za-waatikhwa zaalupiyeeyo yoori: "Ye aatthanttiwe nkama namatapanya."]

²⁹ Apale aari oviraaye attaaphale, eetta ontukhana na osakhinya viishwa zaya araka: "Haya, weeyo ompwechaaye Nyuppa Yoosifwiwamo, khwa siikhu ttatthu khujeka. ³⁰ Wiishukhe vansalapa apho na ojuusuru omweenyewe!" ³¹ Khwa nanna ethiipile, mahaakhimu a tiini na ana-manozela a kano khusala alupa atthaaporu anveyisa yoori: "Awoosuru akina, ila khanwahi ojuusuru mweenyewe. ³² Wiishukhe vansalapa apho O Al-Masiihu, mfwalume wa Ezirayilu, wiishukhe yoori niwoone na nuukhupali." Apale aakhomeliweeyo, na yo eetta ontukhana theenya.

Ofwa wa Yinsa

³³ Yaapuwiye yiiza olumwenku wooshi, waaza atuhuri mpakha alaasiri. ³⁴ Payina ya alaasiri, Yinsa khukhuwa na huula ya onyakula, araka: "Elooyi, Elooyi, Lama sabatani?" Eto ena maana ya "Nluku aka, Nluku aka, mwaasa aya niini okanswaka? ³⁵ Wakathi atthu apale aari attaaphale asiiliyeovo mat-takhuzi apale, khulupa yoori: "Mwisiile, oninkhuwela Aliyaasi!" ³⁶ Mmote aari attaaphale khutthira khulawa khunaanisa shiponja na vinaakiri, khup-weha va muutthi na khumwinkha Yinsa yoori anywe na khuri: "Mwinlikhe, nimoone nkama Aliyaasi onta anlazevo aphale vaya. ³⁷ Ila Yinsa khun-yakula channu khwiitha phuumu. ³⁸ Phazira ya Nnyuppa Woosifwiwamo khuvaruwa khwaawanyeya phantte piiri, waaza vatulu mpakha vathi. ³⁹ Wakathi namalokozela wa anajanka aariye omaasho wa Yinsa, ooniyeovo nanna afwiyeeyo, khuri: "Wekhweele mwinyi otu aari Mwaana wa Nluku!"

⁴⁰ Aakha akina aari oretta eettaka woona vitthu epile zaari orettikhanaaye ari peetiwene. Khwa atthaapo aarivo Mariyamu Mataleena, Mariyamu mamaawe Tiyaaku, nsimaana wa Yuusufu, na Salome. ⁴¹ Aakha aya apo amperekhiye Yinsa na omwaawuni wakathi ariyo Kalileya. Owaalikha apo aya, aarivo aakha akina awaatta aalawaniyeeyo Yeruzaleemu.

Ozikhiwa wa Yinsa

⁴² Njuwa leettelaka otupweela, mwaasa wa wiiya siikhu ya otthenkeza Saapatu, ⁴³ Yuusufu wa Arimateeya, mwinyi wa fwayita na aari oretta phantte ya Mashawuriya, oto naye aari oweja ota wa ofwalume wa Nluku, khulawa woominalavo wa Pilaatu na khuveka mwiili wa Yinsa. ⁴⁴ Pilaatu khwiya wooshanka noosiila yoori Yinsa afwa. Khunkhuwela namalokozela wa anajanka khumuuzela nkama Yinsa afwa. ⁴⁵ Wakathi ooziweeve ti namalokozela wa anajanka, khumwinkha mwiili wa Yinsa Yuusufu. ⁴⁶ Aphano Yuusufu khuuzanya kuwo yoolakala yoopeephuya, khwiishusha mwiili wa Yinsa vansalapa aphale, khumputaputela va kuwo etile yoolakala na khunttha nkhapuri yaathipiweeyo va mwaako. Nawiisha, khutthaavo liwe

vanlako vaya. ⁴⁷ Mariyamu Mataleena na Mariyamu mamaawe Yuusufu, aarettiye eettaka woona na khoona mwiili wa Yinsa vahali waatthiiweevo.

16

Osisimuwa wa Yinsa

¹ Paata ya ovirisa Saapatu, Mariyamu Mataleena, Salome na Mariyamu mamaawe Tiyaaku, khuuzanya mafuttha oonukhela yoori eetthele mwiili wa Yinsa. ² Siikhu ya mwanzo ya sumana supuyeene, njuwa leette-laka opuwa, aakha apale khulawa okhapuri. ³ Ntarikhi khusala oozelana yoori: “Paani anttelaaaye onilazelavo liwe lifukaniweeyo nlako wa khapuri?” ⁴ Maana liwe laya laari liwululene. Ila noofiya okhule, khoona liri loolaziwavo. ⁵ Aviriyeovo nkhapuri mphule, khumoona shaapu awaliye kuwo zoolakala eekhaliye nkhone nlume, na khwiiya awooova. ⁶ Khuwooza yoori: “Mwihoove, mweeyo mwinimweekesa Yinsa wa Nazareeti, aakhomeliweeyo. Ye asisimuwa! Khaamo mphu, moone puuro aattattikheliwevo. ⁷ Mwilawe na mwawooze anakhiyon i awe na Pheeturu yoori: ‘Ye alokoza eettaka Kalileya.’ Ottuukho mweeyo mwinlawwa mwamoone, nkhamma ethiipo awuuziyeenini.” ⁸ Eettaka othukumela na osuthuwa, aakha apale khulaawo na khutthiram u nkhapuri mphule. Na khuhimuuzi hatha ntthu, maana aari awooova.

Yinsa onimpeweleta Mariyamu Mataleena

⁹ Wakathi Yinsa asisimuwiyeovo lifwajiri la siikhu ya mwanzo ya sumana, khumpuwelela omwanzo ene Mariyamu Mataleena, otule eekariweeyo mmwiili mwawe masheethwani sapa. ¹⁰ Ye khulawa owoza ashirikha awe Yinsa, maana yo aari oohuzunikha na olila. ¹¹ Wakathi asiiliyeovo yoori Yinsa ori haayi na ampuweleliye Mariyamu Mataleena yo khuhikhupali.

Yinsa oniwaapuweleta anakhiyon i awiri

¹² Paata ya vitthu epile, Yinsa khujithoonyeza khwa wuuso nkina vakatthi wa anakhiyon i awe awiri alottaka tarikhi ya omashapa. ¹³ Yo khuruti khuta khuwooza mattakhuzi apale azaaya; ila theenya apale khuhikhupali. ¹⁴ Omwiisho waya Yinsa khuwaapuwelela apale khumi na mmote, wakathi aariiyo vameeza, na khuwaashowera mwaasa woohikhupali na wuuma rooho zaya, maana khawaasileziye apale aamoniyeeyo wakathi asisimuviyeovo. ¹⁵ Khuwooza yoori: “Mwilawe olumwenku wooshi mwawalaleyele atthu ooshi hapari zooshapweya. ¹⁶ Otule ankhupalelaaye na khoosiwa ontta wuusurukha, ila otule ahinkhupalelaaye oniiyana paathuli. ¹⁷ Alama epi enttela owaalokoza apale anikikhupalaaye miiyo: khwa nzina laka anikara masheethwani, anlawa attakhule luuka pheeya, ¹⁸ ankhola nyookha na onywa amali ya wuula, ila khuhiwaaaretti hatha etthu na owaattheela atthu makhono khuvona.”

Yinsa oneetta pinkuuni

¹⁹ Paata ya owoza mattakhuzi apale, Mbwana Yinsa khuweziwa pinkuuni khwiikhala nkhone nlume wa Nluku. ²⁰ Aphano anakhiyon i apale khulankha khulawa olaleya phantte zooshi, Mbwana aari owaawuni ahakikhaka mattakhuzi aya na alama zaari owaalottaaye.

Luuuka

Yaazo

¹ Weeyo Tiyoofilu woohishimiwa, atthu a waatta aajilipisiye waatikha hatiithi ya vitthu ziviriyeeyo vakatthi vettu. ² Apale aari mashaahiti ooniyeeyo omwanzweene zirettikhanka, khwiya anamalaleya a hapari zooshapweya za ntakhuzi la Nnyizinku, atthaapo pi anifiseliyeeyo fweeyo. ³ Na miyo zaamu yaka khusala kitholathola woohilazeli varanka epile zirettikhaniyeego zaazaka, khulakela owaatikhela zooshi woolotteyavo, ⁴ yoori wiiyane nroromelo khwa mattakhuzi apa a haakhi osiiliyeeyo.

Onlaleyiwa ovokoliwa wa Yaahaya Namoosa

⁵ Wakathi Herooti ari nsatoro wa Yudeya, aarivo haakhimu wa tiini mmote wa khuntti ya Abiiya aari wiitthiwaaye Zakariiya. Muukhaawe aari wiitthiwa Elizabeeti aari woojama wa mahaakhimu a tiini. ⁶ Oowiiri aya aari atthu ookhweele nkatthi wa mwentto wa Nnyizinku na ooshututela wa waamineyavo kano na oruma wooshi wa Mbwana. ⁷ Elizabeeti khaarina mwaana mwaasa woohiina mavokozi na oowiiri aya aari awuuluvala.

⁸ Siikhu moote Zakariiya aari okhola khaazi yoohaakhimu wa tiini Nnyupua wa Nnyizinku Yeruzaleemu, mwaasa yoori yaari zwaamu ya khuntti yawe okhola khaazi yaya etile. ⁹ Nkhama ethiipo aazowereliyeeyo attunkhulu a tiini, ye aathawuliwe nkatthi wa nasipu yoori asala akhoza ovupa puuro ttakatthiifu ya Mbwana. ¹⁰ N'oofiya wakathi wookhoza ovupa, atthu ooshi apale aari vaje aari ovira alompaka.

¹¹ Aphano nlayikha la Mbwana khunteela Zakariiya nkhono-nlume vaalitaari onkhoziwaavo ovupa. ¹² Wakathi ye ooniyeovo nlayikha ntthile, khwiya wooshanka na wa woova channu. ¹³ Nlayikha khumuuzu yoori: “Ohoove Zakariiya! Nnyizinku asiila lompa yawo; muukhaawo Elizabeeti onteela ompattha mwaana. Weeyo onteela ontthaja nzina la Yaahaya. ¹⁴ Ye onttela wiiya furaha yootuveliwa wawo, atthu a waatta anteela ofurahela ovokoliwa wawe, ¹⁵ maana ye onteela wiiya ntunkhulu mmakhono wa Mbwana Nnyizinku. Khanteela onywa viinyu wala onywa vitthu zoohapala. Onntela wiiya wa wiitaazaniwa Rooho Ttakatthiifu ari mwiirukulu wa mamaawe. ¹⁶ Onteela owaatana atthu awaatta a Ezirayeele wa Mbwana Nnyizinku aya. ¹⁷ Onteela operekhiwa ti Mbwana na onttela wiiya wookhomaala na woowahi nkhama napiyu Aliyaasi, yoori azukulise rooho za apaapa eeyane osiilana na aanaaya, na yoori awaazukuluse anamakhijili eettettise haakhi, towo phi anttelaaavo ozukulisa rooho zaya yoori ampokherele Mbwana ataaka.”

¹⁸ Aphano Zakariiya khuuzela nlayikha ntthile yoori: “Kinteela ohakikhi toovi etthu yaya eto? Miiyo kooluvala na muukhaaka ooluvala.”

¹⁹ Khujipu nlayikha liraka: “Miiyo ki Jipiriilu, kiniya vamote na Nnyizinku, akiruma yoori kite kiwuze hapari epi zooshapweya. ²⁰ Wiiya khukhupaleeni mattakhuzi apa kiwuzyeego, onttela wiiya woohittakhuli mpakha siikhu zinttelaaye orettikhana vitthu epi. Zinteela orettikhana wakathi aya otthuupo.”

²¹ Nalelo atthu aari onwejaaye Zakariiya khushanka mwaasa woorupaza Nnyupa wa Nnyizinku. ²² N'oosaruwa, khuhisala awahi ottakhulana atthu

apale. Yo khujuwa yoori wanteeliye wahayi* Nnyupa wa Nnyizinku. Khwi-ya woohittakhuli khusala attakhula na makhono.

²³ Wakathi eeshisiyeevo siikhu zookhola khaazi z'oottunkhulu wa Nnyupa wa Nnyizinku, khurutela owawe. ²⁴ Paata ya toole, muukhaawe Elizabeeti khwiimittha, khuhisala asaruwa nnyupa mpakha nyeezi mithaanu. ²⁵ Khuri: "Aphano Mbwana ajipu lompa yaka, eeshisa haaya etile kaariina na atthu."

Onlaleyiwa ovokoliwa wa Yinsa

²⁶ Mweezi wasiitha wa erukulu ya Elizabeeti, Nnyizinku khuruma nlayikha Jipiriilu olawa sitati ya Kalileya nti wa Nazareeti ²⁷ yoori lilawe wa mwaari mmote woohijansiliwi aari wiitthiwaaye Mariyamu, aaposi-weeyo ti shapu mmote aari wiitthiwaaye Yuusufu woojama wa mfwalume Daawuuda. ²⁸ Nlayikha ntthile n'onsikana khumuza yoori: "Heeri yiye vamote na-weyo Mariyamu! O wozziti oshapweyiwa, Mbwana ori vamote na-weyo."

²⁹ Ye khwiya woozinkireya mwaasa wa mattakhuzi apale, khuvira aphelelezaka maana a hapari zaya epile. ³⁰ Nlayikha khurutela omuuza liraka:

"Ohoove Mariyamu,

 wapattha rehema omaasho wa Nnyizinku.

³¹ Onteela wiimittha ompatthe mwaana wanlume
 ontthaje nzina la Yinsa.

³² Ye onteela wiiya nttunkhulu,
 nka eetthiwaka Mwaana wa Nnyizinku Nwulu wa Pinkuuni.
Mbwana Nnyizinku onteela omwinkha
 ofwalume wa papaawe Daawuuda.

³³ Na onteela wiiya mfwalume wa Ezirayeele khwa mileele,
 ofwalume awe khunteela wiisha."

³⁴ Aphano Mariyamu khuuzela nlayikha yoori: "Zinttela orettikhana toovi na miiyo akininjuwa nlume?"

³⁵ Nlayikha khujipu liraka: "Rooho Ttakatthiifu ontta owiishukhela, owahi wa Nnyizinku Nwulu wa Pinkuuni ontela wuufinikha na mwiivuuli awe. Ti eto Mwaana ontelaaye ompattha, onteela wiitthiwa Ttakatthiifu, Mwaana wa Nnyizinku. ³⁶ Omoone jamaayo Elizabeeti, otule yaari oriwakaaye khanvokola, ila apha na wuuluvala wawe NASAAPI eti eemittha opu mweezi wasiitha. ³⁷ Maana, mmakhono wa Nnyizinku khayiivo ethu moote ehin-waheyaaye."

³⁸ Mariyamu khuri: "Kiri raati miiyo karumeya wa Mbwana; mattakhuzi apa onlupaaye phi arettikhane khwa miiyo." Nlayikha ntthile khulaavo khulawa.

Mariyamu oninthotola Elizabeeti

³⁹ Ziviriyevo siikhu, Mariyamu khujilokothela khusala alawa na waakuva sitati moote yaari nti wa nnyaako za Yudeya. ⁴⁰ N'oofiya khuvira nnyupa owawe Zakariiya khunchelisa Elizabeeti. ⁴¹ Ye n'oosiila mwacheliwa etile ya Mariyamu, mwaana aari mwiirukulu mwawe khujisakhinya. Elizabeeti khwiya wa wiitaazaniwa Rooho Ttakatthiifu. ⁴² Khukhuwa na kuvu araka:

* ^{1:22} Maana a wahayi othoonyeziwa wa manapiyu nkathi wa mattakhuzi, ti Nnyizinku.

“Wooparikhiiyiwa ti weyo Mariyamu
vakatthi wa aakha,
na wooparikhiiyiwa mwaana oto
ariye mwiirukulu mwawo!

⁴³ Miiyo ki paani wooteela wooniwa ti maama wa Mbwanaaka? ⁴⁴ N'osisila mwacheliwa yawo, mwaana ariye mwiirukulu mwaka eetta ojisakhinya wafurahavo. ⁴⁵ Wooparikhiiyiwa ti weyo okhupaliyeeyo yoori anteela oret-tikhana mattakhuzi apa wuuziweeyo a phantte ya Mbwana.”

Oshukhuru wa Mariyamu

⁴⁶ Aphano Mariyamu khuri:

“Nafusi yaka enlaleya owula
wa Mbwana,
⁴⁷ Rooho yaka ti yomfurahela
Nnyizinku namuusuru aka,
⁴⁸ mwaasa yoori Ye akuupuwela
miiyo karumeyaawe woohiitaali mmaasho.
Waaza attaapha, peewu za atthu ooshi
zinttela okiitha yoori muukha wooparikhiiyiwa,
⁴⁹ mwaasa yoori Nnyizinku Woowahi
arettu vitthu khuluzeene muuhaayi mwaka;
nzina lawe ttakatthiifu.
⁵⁰ Ye oniwaahurumiya atthu a peewu zooshi apale animoovaaye.
⁵¹ Aretta vitthu khuluzeene na makhono awe,
kuwaamwaza apale oojikhupali khwa shawuri za nroho mwaya.
⁵² Awaalaza afwalume ohaakhimu aya
kuwaalansa atthu apale oojipushuwisa.
⁵³ Aweetaaaza vitthu apale ariina jala, na
kuweekara mathaajiri makhonoru.
⁵⁴ Amwaawuni karumeyaawe Ezirayeele,
oopuwelaka huruma aarinaaye
⁵⁵ na Eburahiima na peewu yawe khwa mileele,
nkhamma ethiipo aawooziyeego amarehemu apapazetthu.”

⁵⁶ Mariyamu eekhaliye nyeezi mittatthu wa Elizabeeti nawiisha khurutela
owawe

Ovokoliwa wa Yaahaya Namoosa

⁵⁷ Khufiya wakathi wa Elizabeeti opattha ekumi, khunvokola mwaana
wanlume. ⁵⁸ Anamwaattamanani awe na ajamaaze khusiila elupiwaka hu-
ruma khuluyeeene Mbwana amooneleyeyo Elizabeeti, khulawa khufurahi
vamote na-ye.

⁵⁹ Efiyeevo siikhu yanaane, mwaana otule khulawa khukhiriysiwa
khusala atakha otthajiwa nzina la papaawe Zakariiya. ⁶⁰ Ila mamaawe
khujipu araka: “Ii wala! Nzina lawe linnitela wiiya Yaahaya.”

⁶¹ Yo khulupa yoori: “Weeyo khuna jamaayo ariina nzina laya nttho!”

⁶² Aphano khwinkhiwa alama papaawe yoori lijuwiwe nzina aari
otakhaaye ontthaja mwaana otule. ⁶³ Zakariiya khuveka lipawu
nttitthiiru, khwaatikhavo yoori: “Nzina lawe ti Yaahaya.” Atthu
ooshi khushanka. ⁶⁴ Nasaapiru Zakariiya milomo zawe khufunuwa
na nlimi lawe khushashuwa, khwaaza ottakhula ansifwaka Nnyizinku.

⁶⁵ Anamwaattamanani awe ooshi khwiya awoova, hapari epile

khumwazeyela nti wooshi wa nnyaako wa Yudeya. ⁶⁶ Atthu ooshi aasiiliyeeyo khusala oopuwela oozelanaka yoori: “Mwaana aya otu onttela wiiya paani?” Nkhono wa Mbwana ori vamote na-ye.

Liipo la Zakariiya

⁶⁷ Zakariiya paapa wa mwaana otule, khumwiitaala Rooho Ttakatthiifu khwaaza olaleya mattakhuzi a Nnyizinku araka:

⁶⁸ “Asifwiwe Mbwana Nnyizinku,
 Nluku wa Ezirayeele,
ateeliyeeyo owaawuni
 na owaataphula atthu awe.

⁶⁹ Nnyizinku aninkha
 nusura yookhomaala
khwa ojama wa karumeyaawe mfwalume Daawuuda,
⁷⁰ nkhamma aalupiyeezo rakuzeene
 khwa manapiyu awe oottakatthiifu.

⁷¹ Ye aanaahitiye onuusuru
 nkatthi wa maatuwi etthu,
anitaphulaka mmakhono wa apale
 aniiphiiriwaaye ti fweyo,
⁷² awaathoonyezaka huruma amarehemu apapazethu,
 na oopuwelaka wahati woottakatthiifu aarettiyeeyo na-yo.

⁷³ Na olapha aalaphisanieeyo
 na marehemu papeetthu Eburahiima,

⁷⁴ alaphaka yoori aari oteela
 onoopola mmakhono wa maatuwi etthu,
yoori ninrumeyele Ye woohoovi,

⁷⁵ woottakathifovo na washariyavo omaasho wawe
 siikhu zooshi zoohaayi etthu.

⁷⁶ Weeyo mwanaka onteela wiithiwa oriwa napiyu wa Nnyizinku Nwulu wa
 Pinkuuni,

onttela wiiya namalokozisiwa wa Mbwana
yoori omwaattalelele tarikhi zawe,

⁷⁷ owaalaleyelaka atthu awe
 nusura entaaye khwa nswammaha
wa twampi zaya,

⁷⁸ maana Nnyizinku etthu ti wa huruma.
 Onteela othoonyeza nuuru yawe vakatthi vetthu,

⁷⁹ ewaamwasikhele apale
 ari n'yiiza na vamwiivuuli woofwa,
yoori eneettettise ntarikhi ya heeri.”

⁸⁰ Mwaana otule khuvira awulaka na rooho yawe khusala ekhomaala, khwiikhala makuluttu mpakha siikhu apuweleliyeeyo vakatthi wa atthu a Ezirayeele.

2

Ovokoliwa wa Yinsa

¹ Wakathi aya opo Seezari Akuushitu mfwalume nwulu, aarumiye yoori atthu ooshi apale a nkatthi woofwalume wa Rooma aarina yoolawa

waatikhwiwa nwarakha ya afwalume. ² Waatikhwiwa opo wamwanzo waaret-tikhaniye Kureeniyo ari mfwalume wa Siiriya. ³ Wakhula ntthu khusala alawa nti aavokoliweewo olawa waatikhwiwa.

⁴ Yuusufu na-ye khulankha Kalileya sitati ya Nazareeti, khusala alawa Yudeya sitati ya Belemu ottuukho aavokoliweewo wa mfwalume Daawuada. Ye eetteliye waatikhwiwa maana aari woojama wa Daawuada.

⁵ Aalawiye na mposaaawe Mariyamu ari wa wiimittha.

⁶ Siikhu zaya epo ari Belemu ottuukhule, Mariyamu khumfiyela siikhu zoopattha ekumi. ⁷ Khumpattha mwaana w'oomwanzo awe wanlume, khumputaputela vakuwo, khunttattikhela nkashothi zaari ojaamo nyama, mwaasa yoori khaarina puuro yoomaka.

Malayikha na Amakhampuzi

⁸ Nti otthuupule aariwo amakhampuzi aari wiikhalaaye ntthuttu ashuk-isaka pwittipwitthi zaya na weekesela osikhu wooshi. ⁹ Nlayikha la Mbwana khwiishukhela attaphale aariivo amakhampuzi apale. Nuuru ya Mbwana khuwaamwasikhela, khwiya awoova channu. ¹⁰ Ila nlayikha ntthile khuwooza yoori: “Mwihoove! Miyo kateela owuuzani hapari zooshapweya za furaha khuluyeene, enttelaaye wiiya ya atthu ooshi. ¹¹ Leelo ethiiti, sitati ya Daawuada mwavokoleliwa Namuusuru eeyiye Al-Masiihu, Mbwana. ¹² Alama yenu ti eto: mwininsikana mwaana aputaputeliwe vakuwo, attattikheliwe nkashothi enjakaamo nyama.”

¹³ Nasaapiru khupuwa malayikha a waatta, khuphakanyeya na ntthile lamwanzo, khusala ansifu Nnyizinku araka:

¹⁴ “Asifwiwe Nnyizinku otulu,
na vathi apha heeri yiiye
vamote na atthu ooshi awaatakheliyeeyo osaana.”

¹⁵ Wakathi malayikha apale aruteliyeovo pinkuuni, amakhampuzi khuuzana yoori: “Nlaweni Belemu noone etthu erettikhaniyeewo, etile Mbwana anuuziyeeyo.”

¹⁶ Yo khuhirupazi, khulawa khunsikana Mariyamu na Yuusufu na mwaana otule attattikheliwe nkashothi zinjakaamo nyama. ¹⁷ N'oomoona mwaana otule, yo khusala alupa epile ooziweezo ti nlayikha monkoni wa Ye. ¹⁸ Ooshi apale aasiiliyeeyo hapari aari olupaaye amakhampuzi apale, khwiya ooshanka. ¹⁹ Ila Mariyamu aatthiiye varoho vawe vitthu epile aari osiilaazo, khusala apheleleza maana aya. ²⁰ Paata ya toole, amakhampuzi apale khurutela ntthuttu anttitthimisaka Nnyizinku na ansifwaka khwa zooshi aasiiliyeezo na ooniiyeezo, ethiipile nlayikha laawooziyeezo.

Okhiriya wa Yinsa

²¹ N'oofiya siikhu naane, mwaana otule khukhiriysiwa, khutthajiwa nzina la Yinsa, ntintthile aalupiyeeyo nlayikha ahineemitthiwe.

Othoonyeziwa wa Yinsa Nnyupa wa Nnyizinku

²² N'ovira siikhu zoot wahareшиwa Mariyamu na Yuusufu, nkhamma ethipo zaari olupaazo kano za napiyu Munsa, khunthuula mwaana otule khunlawana Yeruzaleemu yoori enkheleliwe mmakhono wa Mbwana ²³ maana yaatikhwiwa nkano wa Mbwana yoori: “Mwaana wamwanzo wanlume ona yoophakuliwa khwinkhiwa Mbwana.” ²⁴ Yuusufu na Mariyamu khwinkha twaha nkhamma ethiipo zinrumaazo kano za Mbwana: “makhoko mawiri ama jiwa piiri.”

²⁵ Wakathi aya opo Yeruzaleemu aariwo mwinyi mmote aari wiithiwaaye Simiyooni, aari wa shariya na woomoova Nnyizinku. Ye aari owejela wuusurwiwa wa atthu a Ezirayeele. Rooho Ttakatthiifu yaari vamote na-ye ²⁶ na khunthoonyeza yoori khaari ofwa ahimooneeni Al-Masiihu wa Mbwana. ²⁷ Simiyooni khweetta Nnyupa wa Nnyizinku alokoziwe ti Rooho Ttakatthiifu, wakathi apapaze antaniyeevo Yinsa yoori aretteliwe etile yaalupiweeyo nkano, ²⁸ Simiyooni khunthuula mwaana otule mmakhono mwawe khunshukhurwela Nnyizinku araka:

²⁹ “Mbwanaaka, aphano kimfwa na heeri
maana yarettikhana etile waahitiyeeyo.

³⁰ Konna nusura yawo

³¹ owaattaleleliyeeyo atthu ooshi.

³² Ye nuuru yoomwaasikhela khapila zooshi za amalapo*
na siifwa ya atthu awe a Ezirayeele.”

³³ Papaawe na mamaawe khwiya ooshanka mwaasa wa mattakhuzi apale aari onlupezaaye Simiyooni mwaana otule. ³⁴ Simiyooni khuwaaparikhiya, khumuza Mariyamu maama wa mwaana yoori: “Mwaana otu Nnyizinku anthawula yoori atthu awaatta a Ezirayeele ajikwise ama awoosuru. Ye alama ya Nnyizinku ila atthu a waatta anlawa ankatthale. ³⁵ Mwaasa wa ethiito, wuupuwela wa nroho wa atthu a waatta onteela osaruwa; weeyo Mariyamu enteela wuupattha huzuni khuluyeene nkhama phanka yoonoliwa yoori eshije nafusi yawo.”

³⁶ Attaaphale aarivo sharifwa mmote aari wiithiwaaye Aana. Aari mwaana wa Fwanuweele wa lihimo la Asheeri, aari wa wuuluvala. Eekhalaniye mannawe nyaakha sapa, ³⁷ paata yomfwela mannawe, khuhiraliwi mpakha opattha nyaakha thamaaniini na mine. Khaari olaamo Nnyupa wa Nnyizinku nthana na osikhu, khaazi yawe yaari omwaaputu Nnyizinku ofuka na olompa. ³⁸ Wakathi otthuupo khwaaza onshukhurwela Nnyizinku attakhulaka monkoni wa mwaana otule, awoozaka atthu ooshi apale aari owejelaaye wookhowa wa Yeruzaleemu.

³⁹ Yuusufu na Mariyamu nawiisha oretta zooshi epile zaari orumaazo kano ya Mbwana, khurutela Kalileya sitati ya Nazareeti owaya. ⁴⁰ Mwaana khusala awula saaneene na khwiya njuwi nwulweene, rehema ya Nnyizinku yaari vamote na-ye.

Yinsa Nnyupa wa Nnyizinku

⁴¹ Wakhula mwaakha Mariyamu na Yuusufu aari weettaka Yeruzaleemu onjampo la Paashikowa. ⁴² Wakathi Yinsa apatthiyeeyo nyaakha khumi na miwiri, Mariyamu na Yuusufu khulankha khusala alawa onjampo la Paashikowa nkhama ethiipile aazowereliyeozo, alawaka anthuuliye Yinsa.

⁴³ N'oofiya khuretta njampo ntthile khwiisha, khusala arutela owaya. Yinsa khusala Yeruzaleemu, mamaawe na papaawe woohijuwi. ⁴⁴ Yo aari woona yoori ori khunti etile yaari orutelaaye onti, khuvira siikhu ntero eettaka weettetta, aphano khwaaza omweekesa awoozelaka ajamaaze na ashirkhaawe. ⁴⁵ Khuhisala ampattha, khurutela Yeruzaleemu olawa omweekesa. ⁴⁶ Eviriyeeyo siikhu ttatthu, khunsikana ari Nnyupa wa Nnyizinku eekhaliye na anamasomisa awulu a tiini eettaka onsiila na omuuzela. ⁴⁷ Ooshi apale aari onsiilaaye khunshankela mwaasa woojuwa wawe na

* ^{2:32} Amalapo maana aya atthu ooshi apale oohiiyi mayahuuti.

nanna aari owaajipwaazo. ⁴⁸ Aphano apapaze n'oomoona khushanka, mamaawe khumuuzela araka: "Mwanaka! Niini epi oniretteliyeezo? Miyo na papaawo naari wa wantipweya naaza raku oweekesa."

⁴⁹ Ye khujipu yoori: "Mwaari okeekesela-ni? Khamwaari ojuwa yoori miiyo kaarina ya wiiya Nnyupa wa Paapa?" ⁵⁰ Yo khuhiveeleyi ethu aari olupaaye.

⁵¹ Yinsa khurutela nti wa Nazareeti na papaawe na mamaawe khusala awaashututela. Mamaawe aari oretta athokorelaka vitthu epile zooshi nroho mwawe. ⁵² Yinsa khusala avira awulaka nkathhi wa ojuwa, hirimu na nrehema ya Nnyizinku na atthu.

3

Otafusiri wa Yaahaya Namoosa

¹ Mwaakha wakhumi na thaanu Seezari Tibeeriyu ari mfwalume nwulu wa Rooma, Pontiyu Pilaatu ari liwaali wa Yudeya. Herooti ari nsatoro wa Kalileya na ttwiye Filiipe na-ye ari wa Itureeya na Tarakhoniiti, Lusaaniya ari nsatoro wa Abileeni. ² Anaasi na Khayiifwa aari mahaakhimu awulu a tiini. Mwaakha aya pi otthuupo enkhiweeyo mattakhuzi a Nnyizinku Yaahaya mwaana wa Zakariiya makuluttu. ³ Ye khuzukulela miti zooshi zattameliyeyo muuttho Yorotaani, awoozaka atthu yoori athupwiye twampi zaya aswaamihewe ti Nnyizinku na oosiwe. ⁴ Nkhama etthiipo zaatikhi-weezo nkithaapu ya napiyu Ezayiyya:

"Owaapho ntthu ankuhuaaye n'yaara araka:

'Mwaattalele tarikhi ya Mbwana,
na mwishapweyise miphitelo zaya.'

⁵ Makunte ooshi asireliwe,
nyaako na kulu zooshi zipwejiwe,
tarikhi zoonyokowa zookoleliwe,
epile zoothipeya zishottheliwe.

⁶ Atthu ooshi anteela woona
nusura ya Nnyizinku."

⁷ Yaahaya khusala awooza atthu apale aari otaaye woosiwa araka: "Khapila za nyookha! Paani awuuziyeenini otthira hukhumu ya Nnyizinku entaaye? ⁸ Mwirette vitthu enthoonyezaaye yoori khweele mwathupwiya, khahiyo ojilupeza yoori 'Eburahiima ti papeetthu'. Miyo kiniwuuzani yoori khwa liwe ntthi Nnyizinku onwahi owaattala aana a Eburahiima. ⁹ Nshokha latthiiwa nshini wa mitathaari za miithi, wakhula muutthi ohiniimaaye mishumo zooshapweya ontta oshijiwa weeseleliwe vamoottho."

¹⁰ Atthu khusala amuuzela araka: "Apho nirette niini?"

¹¹ Ye khuwaajipu yoori: "Otule ariina hempe piiri, moote amwinkhe otule ahina. Otule ariina etthu-yoojiwa awaameele apale ahina."

¹² Khulankha anamariphisa lumpuru yoori alawe oosiwe khumuuzela Yaahaya yoori: "Mwanliimu, khi fweeyo nirette niini?"

¹³ Ye khuwaajipu araka: "Mwihirophise mwizitisa hisapu mwirumi-weeyo."

¹⁴ Anajanka na-yo khumuuzela yoori: "Khi fweeyo niri toovi?" Khuwaajipu yoori: "Mwihiwaanyakanye atthu mwiroromelaka kuvu zenu, wala mwihiwaalokoveze vitthu zoohiiyi etthiipo, mwishukhurwele ethiito mwimpatthaaye."

¹⁵ Nroromelo wa atthu khusala ovira weekezeleyaka oonaka yoori Yaahaya ti Al-Masiihu. ¹⁶ Ye khuwooza ooshi apale aariivo yoori: "Weekhweele miiyo kiniwoosanani maati, ila onta nkina ariina owahi wookiziti miiyo, wala akinsuhi ofukula mikhoyi za jampala zawe. Ye onteela owoosani na Rooho Ttakatthiifu na moottho. ¹⁷ Onaaye fosholo mmakhono mwawe anttelaaaye ophakulana tiriku na maveya. Athuule tiriku atthe vantthala vawe, maveya aya eeselele vamoottho ohinzimaaye."

¹⁸ Khwa mattakhuzi makina a waatta, Yaahaya aari owaahirimiza na owaatafusirela atthu hapari zooshapweya. ¹⁹ Na khunshowera nsatoro Herooti mwaasa wonrala Herodiya muukha wa ttwiye na oretta vitthu zootakhala za waatta. ²⁰ Elottelanaka Herooti khweekezela zooshi epile, khuruma ofukeliwa Yaahaya nkalapooso.

Woosiwa wa Yinsa

²¹ Wakathi Yaahaya aari owoosaavo atthu ooshi apale, Yinsa na-ye khuta attaphale oteela woosiwa. Ye alompaka pinku khufukuwa, ²² Rooho Ttakatthiifu khumwiishukhela nkhamma jiwa. Khusiileya huula yoolankha pinkuuni eraka: "Weeyo o mwanaka kinuuphetachaaye na wookituvela channu."

Ntathaari w'oojama wa Yinsa

²³ Yinsa wakathi aaziyeevo olaleya hapari zooshapweya, aarettiye arina nyaakha talaathiini. Ye aari mwaana wa Yuusufu nkhamma ethiipo atthu aari waakanyeraazo,

- Yuusufu aari mwaana wa Heeli,
- ²⁴ Heeli aari mwaana wa Mataati,
Mataati aari mwaana wa Leevi,
Leevi aari mwaana wa Melikhi,
Melikhi aari mwaana wa Yanaayi,
Yanaayi aari mwaana wa Yuusufu.
- ²⁵ Yuusufu aari mwaana wa Matathiiya,
Matathiiya aari mwaana wa Amooshi,
Amooshi aari mwaana wa Nahuumu,
Nahuumu aari mwaana wa Heshiili,
Heshiili aari mwaana wa Nakhaayi,
- ²⁶ Nakhaayi aari mwaana wa Maathi,
Maathi aari mwaana wa Matathiiya,
Matathiiya aari mwaana wa Shemeeni,
Shemeeni aari mwaana wa Yosheekhi,
Yosheekhi aari mwaana wa Yuuda,
- ²⁷ Yuuda aari mwaana wa Yohanaani,
Yohanaani aari mwaana wa Reesa,
Reesa aari mwaana wa Zorobabeeli,
Zorobabeeli aari mwaana wa Sheyalitiyeeli,
Sheyalitiyeeli aari mwaana wa Neeri,
- ²⁸ Neeri aari mwaana wa Meelikhi,
Meelikhi aari mwaana wa Aadi,
Aadi aari mwaana wa Kosaamu,
Kosaamu aari mwaana wa Elimadaamu,
Elimadaamu aari mwaana wa Eeri,
- ²⁹ Eeri aari mwaana wa Yoshuwa,
Yoshuwa aari mwaana wa Eliyezeeri,
Eliyezeeri aari mwaana wa Yoriimu,

- Yoriimu aari mwaana wa Mathaati,
 Mathaati aari mwaana wa Leevi,
³⁰ Leevi aari mwaana wa Simiyooni,
 Simiyooni aari mwaana wa Yuuda,
 Yuuda aari mwaana wa Yuusufu,
 Yuusufu aari mwaana wa Yonaamu,
 Yonaamu aari mwaana wa Eliyakhiimu,
³¹ Eliyakhiimu aari mwaana wa Meleeya,
 Meleeya aari mwaana wa Meena,
 Meena aari mwaana wa Matatha,
 Matatha aari mwaana wa Nathaani,
 Nathaani aari mwaana wa Daawuuda,
³² Daawuuda aari mwaana wa Yeese,
 Yeese aari mwaana wa Obeedi,
 Obeedi aari mwaana wa Bowaazi,
 Bowaazi aari mwaana wa Salimooni,
 Salimooni aari mwaana wa Nashooni,
³³ Nashooni aari mwaana wa Aminadabu,
 Aminadabu aari mwaana wa Adimiini,
 Adimiini aari mwaana wa Ariini,
 Ariini aari mwaana wa Hesherooni,
 Hesherooni aari mwaana wa Pereezi,
 Pereezi aari mwaana wa Yuuda,
³⁴ Yuuda aari mwaana wa Yaakhumpa,
 Yaakhumpa aari mwaana wa Esiyaakha,
 Esiyaakha aari mwaana wa Eburahiima,
 Eburahiima aari mwaana wa Teera,
 Teera aari mwaana wa Nahoori.
³⁵ Nahoori aari mwaana wa Serukhi,
 Serukhi aari mwaana wa Reewu,
 Reewu aari mwaana wa Peleekhi,
 Peleekhi aari mwaana wa Ebeeri,
 Ebeeri aari mwaana wa Saala,
³⁶ Saala aari mwaana wa Kayinaamu,
 Kayinaamu aari mwaana wa Arifwakisaati,
 Arifwakisaati aari mwaana wa Sheemu,
 Sheemu aari mwaana wa Nuuhi,
 Nuuhi aari mwaana wa Lameekhi,
³⁷ Lameekhi aari mwaana wa Methusaleemu,
 Methusaleemu aari mwaana wa Henookhi,
 Henookhi aari mwaana wa Yareeti,
 Yareeti aari mwaana wa Mahalaleeli,
 Mahalaleeli aari mwaana wa Kayinaamu.
³⁸ Kayinaamu aari mwaana wa Enooshi,
 Enooshi aari mwaana wa Seethi,
 Seethi aari mwaana wa Adamu,
 Adamu wa Nnyizinku.

4

Ozayiniwa wa Yinsa ti Sheethwani

¹ Yinsa aarutiye omuttho Yorotaani ari wa wiitaala Rooho Ttakatthiifu, aalokozwi ti Rooho Ttakatthiifu ethiito mpakha makuluttu. ² Nttumpho khuzayiniwa ti Sheethwani siikhu arupayiini. Siikhu zaya epile khaari oja etthu, nawiisha khunkhola jala.

³ Sheethwani khumuza yoori: “Nkhama o mwaana wa Nnyizinku orume liwe ntTho lithatuwe liiye phaawu.”

⁴ Ila Yinsa khunjipu araka: “Yaatikhiwa nkithaapu yoori: ‘Khahiyphaawu paasi enimwinkhaaye ohaayi pinaatamu’.”

⁵ Sheethwani khunweza vatulu, nasaapiru khunnoza ofwalume wooshi w'oolumwenku. ⁶ Khumuuzo yoori: "Kintta owinkha ofwalume na siifwa z'oolumwenku opu wooshi, mwaasa yoori zooshi kenkhiwa miiyo, na mi- iyo kinimwinkha otule kinintakhelaaye. ⁷ Amana okikokhorela miiyo na khukaaputu, zooshi zintta wiya zaawo."

⁸ Yinsa khunjipu yoori: “Nttakhuzi la Nnyizinku lalupa yoori: ‘Omwaaputu Mbwanaawo Nnyizinku na onrumeyele othuuto paasi.’ ”

⁹ Aphano Sheethwani khunlawana Yeruzaleemu khunweza vatulu woolepavo wa Nyuupa ya Nnyizinku khumuaza yoori: "Nkhama o mwaana wa Nnyizinku ojeeselele vathi aphale, ¹⁰ maana yaatikhiwa nkithaapu yoori:

‘Ye ontta oruma malayikha awe awiinanele.

¹¹ Atthaapo antta wuukholelala na makhono aya yoori ohikwakwanttuwe valiwe.’”

¹² Yinsa khunjipu yoori: “Nttakhuzi la Nnyizinku lalupa yoori: ‘Ohimweeze Mbwana Nnyizinku awo.’ ”

¹³ Sheethwani nawiisha onzayini wooshi, khumwaattuwa khusala awe-jela wakathi wonkhweyela.

Yinsa onaaza khaazi yawe nti wa Kalileya

¹⁴ Aphano Yinsa khurutela Kalileya, owahi wa Rooho Ttakathiifu ori vamote na-ye. Hapari zaari olupaaye monkoni wa ye khumwazeyela miti zooshi za nkerekhere. ¹⁵ Aari osomisa mmanyupa woosifwiwamo Nny-izinku, atthu ooshi khusala anttottopela.

¹⁶ Khulawa mpakha sitati ya Nazareeti ohali aleliweewo. Siikhu ya saap-
atu khweetta nnyupa woosifwiwamo Nnyizinku nkhamma ethiipo aazowere-
liyeego. Khulankha yoori asome. ¹⁷ Khwinkhiwa kithaapu ya napiyu Ezaaya.
Khufunula khusala athola khusikana vahali yaatikhiweevo yoori:

18 "Rooho ya Mbwana
 eri vamote na-miyo,
akithawaza yoori kiwaatafusirele
 hapari zooshapweya asikhini
na olaleya otaphuliwa wa anamahuzunikha,
 owoonisa apale oohooni,
owaavumulisa apale oohukhumwiwa,
19 na olaleya yoori wafiya
 mwaakha wa rehema ya Mbwana."

²⁰ Yinsa khufinikha kithaapu etile khumwinkha karumeya wa nnyupa woosifwiwamo Nnyizinku, Ye khwiikhala. Atthu ooshi apale aariimo khusala amweekesa. ²¹ Ye khuwooga yoori: “Leelo zarettikhana epile zaatikhiweeyo, ethiipi mwinttaaye wiisharu osiila.”

22 Atthu ooshi khusala anttottopela, na khwiya ootikiniwa mwaasa wa mattakhuzi a rehema aari olankhaaye nkhanyo mwawe, khusala oozelana yoori: "Khahi mwaana wa Yuusufu otu?"

²³ Yinsa khuwooza yoori: “Khweele khweele mweeyo mwinlawa mwakuuze kittaphi mmote enraaye toono: ‘Tothoro ojivonise omweenyewe! Orette mmuti mwawo mphu minjuza nisiliyeyo epile orettiyeego Kafwaranawu.’”

²⁴ Khulupa theenya yoori: “Wookhweele kiniwuzani yoori khaavo napiyu mmote ankhupaliwaaye mmuti mwawe. ²⁵ Na weekhwele wakathi wa napiyu Aliyaasi, Ezirayeele aariwo aakha oofweliwa pi amanna zaya wakathi yaafukiweeve pinku nyaakha mittatthu na nyeezi sitha, yaapuwiye jala miti zooshi. ²⁶ Ila Nnyizinku khuhinrumi Aliyaasi Ezirayeele, okhule aari wiikhalaawo apale aya, khunruma Sarefathi tuniya ya Sitooni aariwo muukha mmote woofweliwa ti mannawe. ²⁷ Siikhu za napiyu Elizeewu, Ezirayeele aariwo anamakuttula a waatta, khuhiiwo hatha mmote aavonisiweeyo ila Naamani wa nti wa Siiriya ti ye aavonisiweeyo otthwe.”

²⁸ Athu ooshi aari nnyupa woosifwiwamo Nnyizinku, n'osisila mat-takhuzi apale aari olupaaye Yinsa yo khwiiphiiriwa. ²⁹ Khwiikariwamo nsitati mphule khulawaniwa vamwaako yaajekiweeve sitati yaya etile, yoori ansukhumele vathi. ³⁰ Ila Yinsa khuvira vakatthi vaya khusala alawa.

Yinsa onimwiikara sheethwani

³¹ Paata ya toole Yinsa khwiishukhela sitati ya Kafwaranawu, nti wa Kalileya, khusala awaanozela siikhu ya saapatu. ³² Yo aari ooshankisiwa na onozela wawe, mwaasa yoori ntakhuzi lawe laarina ofwalume.

³³ Nnyupa woosifwiwamo Nnyizinku aarimo ntthu mmote aariina sheethwani. Aphano sheethwani khunyakula na kuvu zawe zooshi araka: ³⁴ “Eeee! Onnitakhela-ni weeyo Yinsa wa Nazareeti? Wateela onankameza? Miiyo kinuujuwa weeyo yoori o Ttakathifiwa Nnyizinku!”

³⁵ Yinsa ansukisiye sheethwani araka: “Nyamala, mwaattuwé ntthu oto!” Attaaphale sheethwani khunkwisela vathi ntthu otule atthu eettaka omoona, khuhinvulalisi khumwaattuwa.

³⁶ Atthu ooshi aari ooshankisiwa, khusala oozana atthaaporu: “Nttakhuzini ntthi? Khwa ofwalume na owahi wawe otu onruma masheethwani khusaruwa!” ³⁷ Aphano siifwa ya Yinsa yaamwazeyeliye miti zooshi za nkerekhere.

Yinsa ona owahi vatulu wa masheethwani na marati

³⁸ Yinsa khusaruwamo nnyupa woosifwiwamo Nnyizinku khweetta owawe Simawu. Nkhewewe Simawu aari nlwele hooma, yo khunvekelaza Yinsa yoori anvonise. ³⁹ Ye khwiinama khwiikara hooma etile khunlikha, nasaapiru nunu otule khulankha khusala awaarumeyela.

⁴⁰ Njuwa litupweelaka* atthu ooshi apale aariina marati khusala atiseliwa Yinsa, Ye n'oowaattheela makhono n'oowaavonisa. ⁴¹ Theenya aarivo atthu a waatta aari owaasaruwaaye masheethwani anyakulaka araka: “Weeyo o mwaana wa Nnyizinku!” Yinsa khusala amaruwa alikhisaka masheethwani apale ottakhula, maana yo aari ojuwa yoori ye ti Al-Masiihu.

Yinsa onlaleya hapari zooshapweya

⁴² N'oocha Yinsa khulankha khusala alawa mmakuluttu. Atthu a waatta khusala amweekesa, n'onsikana khuhisala atakha onlikha olawa. ⁴³ Ye khuwooza yoori: “Enhithajiya theenya miiyo olawa sitati kiina olaleya hapari zoofwalume wa Nnyizinku, kaperekheliwa ethiipo.” ⁴⁴ Ye aari otafusiri mmanyupa woosifwiwamo Nnyizinku a Yudeya.

* **4:40** Otupweela wa njuwa siikhu ya saapatu mayaahuuti aariwoona yoori siikhu ttakathifiwa yavira.

5

Yinsa oniwaakhuwela anakhiyoni awe a mwanzo.

¹ Siikhu moote, Yinsa aari nshini wa ntthatta la Kalileya, khuzukuleliwa pi atthu a waatta yoori asiile ntakhuzi la Nnyizinku. ² Ye khoona nyaatiya miwiri ziri vapatari wa ntthatta ntintthile, zaalikhieevo pi anamajiyi aari woosaaye matthavi aya. ³ Yinsa khupakhira mmwaatiya mmote waari wa Simawu khunvekela yoori asusisele mpahari, khwiikhala khusala awaanozela atthu.

⁴ Nawiisha onozela khumuza Simawu yoori: “Othuule mwaatiya awo mwilawe vahali wa wiichavo mwajije.”

⁵ Simawu ajipwaka khuri: “Mbwana, naijiya osikhu na osikhu khuhipatthi etthu, wiiya walupa yoori neese, nintta weesa.”

⁶ Yo khulawa khweesa matthavi aya khuula swi za waatta mpakha khusala avaruwa matthavi aya. ⁷ Khuwaakhuwela ashirikhaaya aari mwaatiya nkina yoori ate arinkaanye, khwiitaaza nyaatiya zaya zoomiwiri mpakha osaleela ozama.

⁸ Simawu Peeturu nawoona etthu etile yaarettikhaniyeeyo, khunkokhorela Yinsa amuuzaka yoori: “Mbwana, okisuse maana miiyo ki natwampi.” ⁹ Simawu na ashirikhaawe khuzinkuwa mwaasa wa swi epile za waatta apatthiyeezo. ¹⁰ Yaakhumpa na Yaahaya, aana a Zebedayo, ashirikha a Simawu aari ojianaaye khwiya ootikinisiwa.

Aphano Yinsa khumuza Simawu yoori: “Ohoove, waaza nasaapi eti ontela wiiya namajiya wa atthu.” ¹¹ Khuwelelisa nyaatiya zaya nkulu, khulikha vitthu zaya zooshi khusala anlotta Yinsa.

Yinsa oninvonisa namakuttula

¹² Yinsa ari sitati moote, khuvira mwinyi mmote aariina makuttula. N'oomoona Yinsa khukokhora khusijiti khumuza araka: “Kinuuvekela yoori nkama watakha Mbwanaaka, kivonise.”

¹³ Ye khookola nkono awe khunsapa khumuza yoori: “Katakha vona!” Wakathi otthuupule khweele khuvona.

¹⁴ Yinsa khumuza yoori: “Vitthu epi ohimuuze hatha ntthu, ila olawe wajithoonyeze wa haakhimu wa tiini, othuuto oorettele twaha yoovonisiwa wawo nkama ethiipile alupiyeozo napiyu Munsa, yoori wiiye oshaahiti vakatthi wa atthu aya apale.”

¹⁵ Aphano hapari zawe zaari ovira zimwazeyaka. Atthu a waatta khusala ata oteela osiila hapari, na oteela ovonisiwa marati aya. ¹⁶ Yinsa aari olaakavo n'oolawa makuluttu olompa.

Ovonisiwa wa mwinyi woorakala

¹⁷ Siikhu moote Yinsa eetta onozela, apho vaya aari onozelaavo aarivo mafwarizeewu na anamanozela a kano aalankhiyeeyo miti mikina za Kalileya na Yudeya mpakha Yeruzaleemu. Owahi wa Mbwana waari vamote na-ye woowaavonisa alwele. ¹⁸ Aphano atthu akina khuntana mwinyi aariina supiyaani anttattikheliye vanrepa, yo aari otakha omphenyisa am-pwehe omaasho wa Yinsa. ¹⁹ Ila nawoona yoori khayiivo kiphenyo mwaasa wa atthu waatta, khuwela vatulu wa nyuupa khutamula liphala khumwi-ishushela vakatthi wa atthu omaasho wa Yinsa.

²⁰ Ye nawoona amini aariina atthu apale, khumuza nasupiyaani otule yoori: “Swaahipu twampi zaho zaswaamihija.”

²¹ Aphano mafwarizeewu na anamanozela a kano khusala attettha araka: “Otu aya paani ankufurwaaye? Ti paani anwahaaye oswaamihi twampi woohiiyi Nnyizinku?”

²² Yinsa khujuwa etthu aari ofikhiraaye, khuwoozela yoori: "Mwashukulikhela-ni nroho mwenu? ²³ Yookhweya ti tiivi omuuza yoori twampi zaho za swaamihia ama yoori olankhe weettette? ²⁴ Apho mwijuwe yoori Mwaana wa Pinaatamu onaaye owahi wooswaamihia twampi vathi apha." Khumuuzaa nasupiyaani otule yoori: "Olankhe othuule nrepa lawo olawe owawo." ²⁵ Nasaapiru ntthu otule khulankha vakatthi wa atthu khuthuula nrepa lawe ntthile aattattikheliweeve khusala alawa owawe ansifwaka Nnyizinku. ²⁶ Atthu ooshi aariivo khwiya ooshanka na woova channu, khusala ansifu Nnyizinku araka: "Leelo noona vitthu zootikinisa."

*Okhuweliwa wa Leevi**

²⁷ Paata yawiisha vitthu epile, Yinsa khulankha khusala alawa, khun-sikana mwinyi mmote aari oriphisaaye lumpuru aari wiithiwaaye Leevi eekhaliye vahali aari oriphisaavo malumpuru awe, khumuuzaa yoori: "Ok-ilotte." ²⁸ Ye khulikha khaazi zawe zooshi khusala anlotta.

²⁹ Leevi khuretta njampo liwululene owawe vamote na Yinsa, aariivo theenya anamariphisa lumpuru akinoko aya na atthu akina eekhaliye vamote na-ye. ³⁰ Mafwarizeewu na anamanozela a kano khusala a waat-takhula anakhiyoni a Yinsa araka: "Mwaasa aya niini mweeyo mwijanaka na mwinywanaka anamariphisa malumpuru na anatwampi?"

³¹ Yinsa khuwaajipu araka: "Akumi khanlawaniwa wa tothoro ila alwele, ³² miiyo akaawaateeliye anashariya kaawaateeliye anatwampi yoori alikhe oretta twampi."

Monkoni woofuka

³³ Atthu akina khumuuzaa Yinsa yoori: "Anakhiyoni a Yaahaya Namoosa na anakhiyoni a mafwarizeewu amfuka na anlompa, ila awo weeyo khamfuka, antta oja na onywa."

³⁴ Yinsa khuwaajipu yoori: "Enrettikhana toovi owooza anamalaleyiwa harusi ofuka namaposa arivo? ³⁵ Ila onteela ofiya wakathi mposi anttelaaaye olaziwavo vakatthi vaya, wakathi aya opo, anteela ofuka."

³⁶ Elottelanaka Yinsa khulupa nlikaniso mmote araka: "Khaavo anshijaaye patakha ya kuwo pheeya yoori arette yaapa ya kuwo yoovutta, n'ooreetta toowo etile pheeya entta oharipwuya, mwaasa wa patakha etile ya kuwo pheeya ethiweeve oheezani na etile yoovutta. ³⁷ Khaavo anthuulaaye viinyu pheeya ottha ntompwiyo ya shapala ya raku. N'ooreetta toowo entta ophutuwa, viinyu ya yiittikhe ttompwiyo zaya ziharipwuya. ³⁸ Viinyu pheeya entthiwa ntompwiyo pheeya. ³⁹ Khaavo anraaye anywiye viinyu ya raku khutakha onywa viinyu pheeya, maana ontta olupa yoori: 'Poora etile ya raku.' "

6

Yinsa ti mwennyewe saapatu

¹ Saapatu moote, Yinsa eetta ovira nshini wa nshapa la tiriku. Anakhiyoni awe khusala avurula asusuraka na makhono arafunaka phunje zaya.

² Mafwarizeewu khusala awoozela yoori: "Mwaasa aya niini mwirettaka vitthu ziyyiye mwiikho orettiwa saapatu?"

³ Ye khuwaajipu araka: "Khamwinasome etthu aarettiyeeyo Daawuuda wakathi yankholiyeve jala na ashirikha awe? ⁴ Ye aaviriye Nnyupa wa Nnyizinku khuthuula phaawu zoohalaalishiwa khurafuna kiina khuwenkha

* ^{5:26} Nzina ntthi la Leevi khwa luuka ya Ekerekul linri Matewuzhu.

ashirikhaawe, ila alupa aarina ruhusa yoorafuna aari mahaakhimu a tiini paasi.”⁵ Yinsa khulupa araka: “Mwaana wa pinaatamu ti Mbwana mwenyewe saapatu.”

Mwinyi woorakala nkhono

⁶ Saapatu kiina, Yinsa khuvira nnyupa woosifwiwamo Nnyizinku khusala awaanozela, aarimo mwinyi mmote waarakaliyeeyo nkhono nlume.

⁷ Anamanozela a kano na mafwarizeewu eetta omweekesela yoori amoone Yinsa nkhama aari onvonisa siikhu ya saapatu, yoori ankwisele paathuli.

⁸ Ila ye aari ojuwa etthu aari wuupuwelaaye atthu apale. Khumuza mwinyi otule woorakala nkhono nlume yoori: “Olankhe ote vakatthi apha.” Mwinyi khulankha khweemela.

⁹ Aphano Yinsa khuwoozela yoori: “Ensuaaye orettiwa saapatu ti tiivi? Yooshapweya ama yootakhala, wuusuru ama wuula?”

¹⁰ Khuweekesa atthu ooshi apale aariivo khumuza mwinyi otule yoori: “Wookole nkhono awo.” Ye khookola, khuvona. ¹¹ Anamanozela a kano na mafwarizeewu khwiiphiiriwa khusala awaza etthu yonrettela Yinsa.

Othawuliwa wa anakhiyoni khumi na awiri

¹² Siikhu zaya epile Yinsa khulankha khusala alawa omwaako olompa, khwiisha osikhu wooshi eettaka olompa. ¹³ N'oocha khuwaakhuwela anakhiyoni awe khuwaathawula khumi na awiri, atthaapo theenya khuwenkha nzina la owaaswihaapa. ¹⁴ Simawu antthajiye nzina la Pheeturu, Antere ttwiye Simawu, Yaakhumpa, Yaahaya, Filiipe, Paturumeewu. ¹⁵ Mateewuzhu, Tome, Yaakhumpa mwaana wa Alufayo na Simawu anitihiwaaye Zelooti, ¹⁶ Yuuda mwaana wa Yaakhumpa, na Yuuda Iskariyooti otule aari weettelaaye onkholisa Yinsa.

Onozela na ovonisa wa Yinsa

¹⁷ Yinsa khwiishukha vamwaako na maaswihaapa awe khweemela nshini wa mwaakho vahali aariivo anakhiyoni awe na khuntti ya atthu a Yudeya yooshi na a Yeruzaleemu, mpakha apale a miti za waattamela pahari, Tiiro na Sitooni. ¹⁸ Apale aateeliyeeyo osiila na ovonisiwa moolwele aya, mpakha na apale aari wantipwiwaaye ti masheethwani aari ovonisiwa. ¹⁹ Atthu ooshi aari otakha onsapa Yinsa mwaasa yoori waari onsaruwa owahi khusala owaavonisa ooshi.

²⁰ Aphano Yinsa khulansa maasho khuweekesa anakhiyoni awe khuwooza yoori:

“Ananshapweyiwa ti mweyo mwiiyiye asikhini,
maana Ofwalume wa Nnyizinku pu weenu.

²¹ Ananshapweyiwa ti mweyo enuukholaanini jala aphano,
maana mwinlawa mwarupale.

Ananshapweyiwa ti mweyo mwinlilaaye aphano,
maana mwintela otheya.

²² Ananshapweyiwa ti mweyo,
mmana atthu eephiiriwaka ti mweyo, awiikarani, oottukhanani
na khuwoonani ohifwayi mwaasa wonlotta Mwaana wa Pinaatamu.

²³ Wakathi aya otthuupo, mwiiye woofurahi na mwitthape, maana tthuovo yenu eniyya khuluyeene pinkuuni. Maana wa nanna etthiipi, apapa zaya na-yo aawaaretteliye manapiyu.

²⁴ Ila olaanikha pu weenu mweeyo mwaamathaajiri,

maana mwapokhera tthuvo yenu vathi attaapha.

²⁵ Olaanikha pu weenu mweeyo ziwiitaaleliyeenini vitthu-zoojiwa,
maana mwintela okholiwa ti jala.

Olaanikha pu weenu mweeyo mwiriina furaha eleelo eti,
maana mwintela ojikhupanyera na olila.

²⁶ Olaanikha pu weenu mweeyo
mmana mwittottopeliwaka pi athu ooshi,
maana apapa zaya aawaaretteliye ethiipo manapiyu oojipanka.

²⁷ Nakataalikha mweeyo mwinikisilaaye, kiniuuuzani yoori
mwiwaaphete maatuwi enu, mwiwaarettele saana apale aniiphiiriwaaye
ti mweyo. ²⁸ Mwiwaaparikhie apale anuulaanaanini na mwiwaalompele
apale anuurettelaanini zootakhala. ²⁹ Nkhama ntthu oopwakula nlaku
limote, na ntthi likina ontheteezele. Nkhama ntthu oovula juupa
yawo, ohinkhattaze othuula hempe yawo. ³⁰ Omwinkhe wakhula otule
anuuvekelaaye, nkhama ntthu athuula etile yiyyiye yaawo, ohinkhanyarele
wuurutisela. ³¹ Epile mweeyo zinuutuvelaanini orettiwa pi azeenu, na-
mweyo mwiwaarettele azeenu ethiipo.

³² Amana mwiwaaphetaka apale anuuphetaanini paasi, fwayita-ni mwineekeselaaye mmakhono wa Nnyizinku? Hatha anatwampi atthaapo aniwaapheta apale na-yo aniwaaphetaayo. ³³ Amana mwiwaarettelaka saana
apale na-yo anuurettelaanini saana paasi, fwayita-ni mwintelaaye wi-
iyana? Hatha anatwampi atthaapo na-yo anretta ethiipo. ³⁴ Amana
mwiweepaashaka paasi apale mwinkhupalaaye wuurstselani, fwayita-ni
mwintelaaye wiyyana? Hatha anatwampi atthaapo aniipaashana arorome-
laka orutiselana. ³⁵ Mwiwaaphete maatuwi enu, mwiwaarettele zooshap-
weya, mwiweepaashe mwiheekeselaka wuurstselani. Toowo tthuvo yenu
enttela wiiya khuluyeene na mwintela wiiya aana a Nnyizinku Wozziti,
maana Nnyizinku oniwaashapweyela rooho hatha na apale ahininhukhur-
waaye na alupa ootakhala rooho. ³⁶ Mwiye woohurumiya nkhama ethiipi
Papeenu wa pinkuuni na-ye eeyiye wa huruma.

³⁷ Mwihimphuke ntthu nzeenu na Nnyizinku khanuuphukani, mwihin-
hukhumu ntthu nzeenu na Nnyizinku khanuhukhumuni. Mwinswaamihi
ntthu nzeenu na Nnyizinku ontta wuuswaamihini. ³⁸ Mwiwenkhe azeenu
na Nnyizinku ontta owinkhani: na mphimo khwaamili, wookhitteleliwa
na wa wiitaala mpakha wiittikha. Maana mphimo otthuupo mwimph-
manaaye na-mweyo mwintela ophimeliwa otthuupo.”

³⁹ Yinsa khulupa nlikaniso mmote araka: “Attu oofoonni khanlokozana,
antta okwiselana nliphotto. ⁴⁰ Nakhiyon ni khaninziti mwanliimu awe, ila
wakhula otule ansomiseyaaye saana oniyya nkhama mwanliimu awe.

⁴¹ Onri je woona etutu eriye mmaasho wa nzaawo ohoonaka muutthi
opule oriye mmaasho mwawo? ⁴² Enrettikhana toovi weeyo omuuzaka
nzaawo yoori: ‘Twiyyaku, nkankaani kuulaze etutu eto eriye mmaasho
mwawo,’ na khupe weeyo ohiwahaka woona muutthi opule oriye mmaasho
mwawo? Naafikhi! Olazemo khapula muutthi oriye mmaasho mwawo,
toowo ontta woona saana, na phi onlazaamo etutu eriye mmaasho wa
nzaawo.”

Muutthi na mishumo zaya

⁴³ “Khawiivo muutthi wooshapweya oniimaaye mishumo zootakhala,
wala muutthi wootakhala oniimaaye mishumo zooshapweya. ⁴⁴ Maana

wakhula muutthi onjuweya mwaasa wa mishumo zaya; nnyiwa khinshumiwamo mishumo za muuyu, mmuthalala khanshumiwamo wuuva. ⁴⁵ Ntthu wookemaani, nroho mwawe onsarulamo vitthu zooshapweya, na ntthu wootakhala rooho, nroho mwawe onsarulamo vitthu zootakhala, maana milomo zawe zinttakhula ethiipile ziitaaliyeeyo nroho mwawe.

⁴⁶ Mwinkikuwelela-ni yoori ‘Mbwana, Mbwana’, mwihirettaka epile kiniwuzaanini? ⁴⁷ Miiyo kinuuthoonyezani ntthu anlikananaaye otule ansiilaaye mattakhuzi aka na khushututela. ⁴⁸ Onlikanana ntthu ajekaka nyuupa yawe khuthipa khwiichisa saaneene khutha vanchina la mawe woozivalavo. Khuta nnyeri khupiya nyuupa etile ila khuhisakhinyeyi mwaasa woozivalisiwa. ⁴⁹ Ila otule ansiilaaye mattakhuzi aka khuhishututeli onlikanana ntthu ajekiye nyuupa yawe vanskaka woohizivalivo. Khuta nnyeri khupiya nyuupa etile nasaapiru khukwa, khupwecheya khuhisali hatha etthu.”

7

Amini ya namalokozela wa anajanka

¹ Eeshiyeevo mattakhuzi apale aari owoozaaye atthu, khweetta sitate ya Kafaranawu. ² Ottuukho aariwo namalokozela mmote wa anajanka w'eerooma, aariina karumeyaawe wompheta aari olwaaziwaaye khusala asaleela ofwa. ³ Wakathi namalokozela wa anajanka otule asiiliyeevo monkoni wa Yinsa, khuwaaperekha attunkhulu akina amayaahuuti yoori anvekele Yinsa ate anvonise. ⁴ Yo n'onsikana khunvekela wookhanyarelavo araka: “Mwinyi oto onsuhi waawuniwa, ⁵ mwaasa yoori oniiya owaapheta atthu etthu na anijekela nyuupa yoosifwiwamo Nnyizinku.”

⁶ Aphano Yinsa khulankha khusala alawa vamote na-yo, asaleelaka ofiya, namalokozela otule khuwaaruma ashirikha awe olawa omuuza yoori: “Mbwana, ohijantipu khinsuhi weeyo ovira nnyupa mwaka. ⁷ Ti eto miiyo kinoona yoori akinsuhi okutthanana weeyo, ila olupe ntthakhuzi limote paasi karumeyaaka ontta ovona. ⁸ Miiyo kinaaye afwalume akizitiyeeyo, ila na miiyo theenya kinaaye anajanka ankishututelaaye. Kinimuza najanka mmote yoori: ‘Olawe’, khulawa; nkina yoori: ‘Aruti’, khuruti. Kinimuza karumeyaaka yoori: ‘Retta eti’, ye khuretta.”

⁹ Yinsa asiiliyeevo mattakhuzi apale khwiiya wooshanka, khuzukuluwa khuwoza atthu apale aari omperekhaaye yoori: “Hatha Ezirayele ottuukho akooneeniwo amini nkhamma eti.” ¹⁰ Ashirikha apale aarumiweeyo khurutela owawe namalokozela otule, khunsikana karumeya otule avoniye.

Yinsa oninsisimula mwaana wa nunu mmote woofweliwa ti mannawe

¹¹ Mmeesho mwaya Yinsa khulankha khusala alawa sitati ya Nayiini, anakhiyoni awe na khuntti ya atthu a waatta khusala enlotta. ¹² Asaleelaka ofiya vanlako wa sitati etile, khusala asaruwa atthu aari weettelaaye ozikha. Otule aari weettelaaye ozikhiwa aari mwaana wa nunu mmote woofweliwa ti mannawe, ye aarinna mwaana mmote othuuto paasi; atthu a waatta aari olawa vamote na-ye. ¹³ Wakathi Mbwana Yinsa amooniyeeyo nunu otule, khumoonela huruma khunkhuvela khumuuzu yoori: “Ohilile!”

¹⁴ Aphano khuwaasusela khusapa janaayiza, apale aathuuliyeeyo khweemela. Yinsa khulupa araka: “Shapu! Kinuuruma yoori olankhe!”

¹⁵ Shapu otule khulankha khwiikhala khusala attakhula; Yinsa khumwinkha mamaawe.

¹⁶ Atthu ooshi khwiiya awoova khusala ansifu Nnyizinku araka: “Napiyu nwulweene aniteela, ninoona yoori Nnyizinku aateeliye owuusuru atthu

awe.” ¹⁷ Hapari epile za Yinsa khumwazeyela Yudeya yooshi mpakha miti epile zaattamananiyeyo.

Yaahaya oniwaaruma anakhiyon i awe wa Yinsa

¹⁸ Yaahaya khuuziwa pi anakhiyon i awe vitthu epile zooshi. Ye khuwaakhuwela awiri, ¹⁹ khuwaaruma yoori alawe amuuzele Mbwana yoori: “Weeyo ti otu naari onwejaaye ama ninweje nkina?”

²⁰ Yo khulawa mpakha ottuukhule aariwo Yinsa khumuza yoori: “Neetta orumiwa ti Yaahaya yoori nite niwuuzele nkama otule naari onwejaaye ti weyo, ama nivire ninwejaka nkina?” ²¹ Wakathi otthuupule Yinsa khuwaavonisa alwele a waatta, anamarakala, apale aariina masheethwani, khuwaafunula maasho apale oochooni. ²² Aphano Yinsa khuwaajipu yoori: “Mwilawe mwamuuze Yaahaya etthiipo mooniyeezo na mwisiiliyeezo; apale oochooni antta woona, apale oorakala antta weetteta, anamakut-tula antta otwahareshiwa, apale oohisiili ansiila, anamfwa asisimuliwa, na hapari zooshapweya antta olaleyeliwa asikhini. ²³ Wooshapweyiwa ti otule ahiniphiiriwaaye ti miiyo.”

²⁴ Anakhiyon i Yaahaya n'oolaavo, Yinsa khusala owoozaka atthu monkoni wa Yaahaya yoori: “Makuluttu mweetteliye woona niini? Tteetthe yiinisiwaka ti pheevu? ²⁵ Ama moona niini? Mwinyi mmote awaliye kuwo zooshapweya? Apale anwalaaye kuwo zootafikhana aniiya nraaha na aniikhala nkorofwa y'oofwalume. ²⁶ Khi moona niini? Napiyu? Pi etthiipo kiniwuuzani yoori, Yaahaya awaaziti manapiyu akinoko aya.

²⁷ Otu ti otule laari onlupaaye Nttakhuzi la Nnyizinku yoori:

‘Kinlawa kamperekhe karumeyaaka omaasho wawo
 yoori aattalele tarikhi yawo.’

²⁸ Miiyo kiniwuuzani yoori vakathi wa apale avokoliweeyo pi aakha, khina mmote anzitiyeeyo Yaahaya; ila otule eeyiye ntitthiiru muufwalume wa Nnyizinku, nwulweene zayita ye.”

²⁹ Atthu ooshi mpakha anamariphisa lumpuru khusila mattakhuzi a Yinsa. Yo khukhupalela shariya ya Nnyizinku, maana aari awoosiwa ti Yaahaya. ³⁰ Ila mafwarizeewu na anamanozela a kano khukhijilela matakheloa Nnyizinku khuhoosiwi ti Yaahaya.

³¹ “Anaatamu apa a leelo eti kiwaalattisane niini? ³² Alattanana khuntti ya asimaana eekhaliye vaparasa akhuwelanaka araka. ‘Fweeyo n'ooovumiselani phivi za vaharusi mweeyo khushiini; khwiipa liipo la huzuni mweeyo khuhilili.’ ³³ Khuta Yaahaya Namooda woofuka na ahinnywaaye viinyu, mweeyo mwinri: ‘Ye onaaye masheethwani.’ ³⁴ Ata Mwaana wa Pinaatamu onja na onnywa, mweeyo mwinri: ‘Mmoone nsokho otu! Nan-hapaliwa, nshirikha wa anamariphisa lumpuru na anatwampi.’ ³⁵ Apale anlottaaye ojuwa wa Nnyizinku, anthoonyeza yoori pi wookhweeli.”

Natwampi aavaaziyeeyo mafuttha moolu a Yinsa

³⁶ Mfwarizeewu mmote anvekeliye Yinsa yoori alawe aje owawe. N'oofiya Yinsa khwiikhala yoori aje. ³⁷ Omuuta otthuupule muukha mmote wa natwampi wa sitati ethiitile, khujuwa yoori Yinsa ontta oja wa mfwarizeewu, khuthuula suupha yawe ya mafuttha oonukhela. ³⁸ Khulawa khweemela onyoko wa Yinsa nshini wa moolu awe khusala alila. Mishozi zawe khusala zittonkela moolu a Yinsa. Khusala akukuttha na nyuuli zawe na opejari moolu a Yinsa avaazaka mafuttha oonukhela.

³⁹ Aphano mfwarizeewu otule nawoona vitthu epile khusala alupa nroho mwawe araka: “Otu eriwaka aari napiyu eetta ojuwa yoori mwanankha otu aninsapaaye natwampi.”

⁴⁰ Yinsa khumuza Simawu yoori: “Kintakha owuuza etthu.”

Simawu khujipu yoori: “Kuuzeni mwanliimu.”

⁴¹ Yinsa khumuza yoori: “Atthu awiri eetta wiiliwa nzurukhu ti mwinyi mmote aari wiipaashisakaaye, otu mmote aari wiiliwa miiya thaanu, otu nkina aari wiiliwa hamusiini. ⁴² Ila oowiiri khuhiiivo mmote aawahiyeyo onripha, ye khuwaaswaamihi oowiiri. Atthu apa awiri amphetachiyeeyo ti tuuvi?”

⁴³ Simawu khujipu araka: “Kinoona yoori ti otule aswaamihiveeyo wa waattavo.”

Yinsa khumuza yoori: “Walikanisa.”

⁴⁴ Ye khumuza Simawu anthoonyezaka muukha otule araka: “Onimoona mwanankha otu? Miiyo kata vaje vawo apha khuhikinkhi hatha maati yoori koose moolu aka, ila ye oosa moolu aka na mishozi zawe khukukuttha na nyuuli zawe. ⁴⁵ Khukipokhereleeni na peeju, ila ye khalikheleleeni opejari moolu aka. ⁴⁶ Khukivaazeen i mafuttha oonukhela mmwishwa mwaka, ila otu avaaza mafuttha moolu aka. ⁴⁷ Pi aphi kiniwuzaaye yoori twampi zawe epile za waatta ariinaazo za swaamihiva; mwaasa woophetacha wawe. Ila otule aswaamihiveeyo vattithiiru opheta wawe vattithiiru.”

⁴⁸ Yinsa khumuza mwanankha otule yoori: “Twampi zaho za swaamihiva.”

⁴⁹ Apale eekhaliyeeyo khusala oozelana yoori: “Otu paani anwahaaye owaaswaamihiva twampi atthu.”

⁵⁰ Ila Yinsa khumuza muukha otule yoori: “Waamini waho wa wuusuru: olawe na heeri.”

8

Aakha aari onrumeyelaaye Yinsa

¹ Paata ya toole, Yinsa khusala eettetta sitati khwa sitati na nti khwa nti alaleyaka hapari zooshapweya zoofwalume wa Nnyizinku. Anakhiyoni awe apale khumi na awiri aari vamote na-ye, ² na aakha akinoko aya apale aavonisiweeyo masheethwani na marati: Mariyamu aari wiitthiwaaye Mataleena, otule ansaruwiyeeyo masheethwani sapa, ³ na Zhuwaana muukha wa Ku-za, nsatoro wa Herooti, Suzaana na aakha akinoko aari onthanttaaye Yinsa na vitthu zaya vamote na anakhiyoni awe.

Nlikaniso wa namazala

⁴ Phantte za waatta za miti aari otawo atthu enkeene oteela okutthanana Yinsa. Aphano ye khulupa nlikaniso mmote araka: ⁵ “Aarivo namazala mmote aalawiye ozala peewu zawe. Amwazaka, kinoko khukwela nshini wa tarikhi, khuluwatthiwa na khuijiwa pi anyannyi. ⁶ Peewu kinoko khukwela vahali aariivo mawe, khoottha ila khuumma mwaasa woohiivo maati. ⁷ Peewu kinoko khukwela vanyiwa, khuwula vamote na nyiiwa, khurapeliwa pi nyiiwa khufwa. ⁸ Ila peewu kinoko khukwela vanshaka wooshapweya, khuwula khwiima mishumo miiya wakhula peewu.”

Alupiyeovo toole, ye khukhuwelela araka: “Ariina mashiilo ti asiile!”

⁹ Anakhiyoni awe khumuuzela maana a nlikaniso aya opule. ¹⁰ Yinsa khuwaajipu yoori: “Mweeyo mwenkhiwa ojuwa zootikinisa zoofwalume wa Nnyizinku, ila akinoko anuuzaniwa nlikaniso yoori oonaka ahisala ajuwa, asiilaka ehisala eweeleya.”

Yinsa oneeleza maana a nlikaniso wa namazala

¹¹ Maana a nlikaniso opu pi toono: peewu eti enthoonyeza ntakhuzi la Nnyizinku. ¹² Peewu zaakweliye ntarikhi, zinlikanisaniwa atthu apale ansiilaaye ntakhuzi la Nnyizinku ila sheethwani khulazavo varoho vaya ntakhuzi ntthile yoori ahaamini apattha wuusurukha. ¹³ Peewu epi zaakweliye vamawe, zinlikanisaniwa atthu apale ansiilaaye ntakhuzi la Nnyizinku khupokherela na furaha. Ila mwaasa woohiina mitathaari, wakathi vattithiiru nawootootiwa ti sheethwani anlikha waamini waya. ¹⁴ Peewu epi zaakweliye vanyiwa, zinlikanisaniwa atthu apale ansiilaaye ntakhuzi la Nnyizinku, ila mwaasa wooshukulikhela opattha tuvela na haali za meekhazi, yo waamini waya vattiitthi-vattiitthi onzima, ahifiyele-laka wiima mishumo. ¹⁵ Peewu epi zaakweliye vanshaka wooshapweya, zinlikanisaniwa atthu apale ansiilaaye ntakhuzi la Nnyizinku khuthokorela nroho mwaya khushututela na khwiyyana niiya, apo aniima mishumo zooshapweya.

Nlikaniso wa khantteya

¹⁶ Khaavo ankhoaayee khantteya khufinikha na enyipo wala khupweha nlivuku. Entthiiwa vahali onooneyaavo yoori esala ewaamwasikhela apale anviraaye nnyupa. ¹⁷ Khayiivo envithiwaaye ehinttelaaye osaruwela oje, zooshi epile za siiri enttela wiiya payana. ¹⁸ Apho mwiyane ophoole wa nanna yoosiila, otule ariina ontta weekezeliba, ila otule ahina hatha na etile anuupuwelelaaye wiiyana ontta onyakanyiwa.

Mamaawe na attwiize Yinsa

¹⁹ Mamaawe na attwiize Yinsa khulankha yoori amoone, ila khuhisala ewaheya mwaasa yoori aarivo atthu a waatta. ²⁰ Khuuziwa Yinsa yoori: "Vaje apho atavo mamaawo na attwiizo."

²¹ Ye khuwaajipu araka: "Maama na attwiizaku pi apale ansiilaaye Ntakhuzi la Nnyizinku khushututela."

Yinsa onnyamaza pheevo

²² Siikhu moote, Yinsa khuwooza anakhiyoni awe yoori: "Olawa neette phantte ya kaapu kinoko." Khupakhira nkalawa khusala alawa. ²³ Aphano eettaka olawa Yinsa khusala alala, khupuwa pheevo ya waatta kalawa khusala esaleela ozama. ²⁴ Anakhiyoni apale khoova khusala anlansa Yinsa araka: "Mwanliimu, Mwanliimu nasaleela ozama!"

Yinsa khulankha khunyamaza pheevo na mawipi, khupuwa nreke. ²⁵ Nawiisha khuwoozela anakhiyoni awe yoori: "Waamini wenu ori vayi?"

Yo khwiyya awoova na ooshanka khusala oozelana, araka: "Otu aya paani anrumaaye pheevo na mawipi khunshututela?"

Ovonisiwa wa nlume mmote aariina masheethwani ootakhala

²⁶ Yinsa na anakhiyoni awe khulankha khulokhela Keraaza, kaapu ya Kalileya. ²⁷ Wakathi Yinsa apakhuwiwevo nkalawa, khuta nlume mmote wa sitati ethiitile aariina masheethwani a waatta. Ye eekhaliye siikhu za waatta ahiwalaka kuwo na ahiikhala vaje, aari wiikhala mvilalo. ²⁸ N'oomoona Yinsa khunyakula, khunkokhorela khukhuwa araka: "Onkitakhela-ni, Yinsa mwaana wa Nnyizinku Nwulu wa Pinkuuni? Safwatali ohikihukhumu." ²⁹ Ye aalupiye mattakhuzi apa mwaasa yoori Yinsa aarumiye onsaruwa masheethwani. Masheethwani apale eekhaliye siikhu za waatta mmwiili wa nlume otule. Na afukaniwaavo makwin-jili khwinkhiwa atthu oomweekesela, eetta ottumulaka n'ooothuuliwa pi masheethwani n'onlawana makuluttu.

³⁰ Aphano Yinsa khumuuzela yoori: “Weeyo nzina lawo o paani?” Ye khujipu yoori: “Miiyo nzina laka ki omathi,” mwaasa yoori ntthu otule aamweettiye masheethwani a waatta mmwiili mwawe. ³¹ Masheethwani apale khusala anvekela Yinsa yoori ahiikarele khilintti.

³² Liphanko liwululene la kuluwe laari oshukisiwa vamwaako, masheethwani apale khunvekela ruhusa Yinsa yoori eette nkuluwe, ye khukhupalela. ³³ Wakathi aliiyeemo masheethwani apale mmwiili wa nlume otule khweetta nkuluwe, aphano kuluwe khusala zitthira ziishukhela vantthatta khutupweela.

³⁴ Apale aari oshukisaaye kuluwe epile nawoona vitthu epile zaarettikhaniyeezo, khutthira khulawa khulupa hapari epile nsitati mphule na miti mikinoko zaya. ³⁵ Khulawa atthu a waatta olawa woona vitthu epile zaarettikhaniyeezo. Wakathi amwaattamiyeyo Yinsa, khumoona nlume otule ansaruwiyeeyo masheethwani eekhaliye nshini wa moolu a Yinsa awaliye kuwo zawe na atthiiyemo akhili zawe, yo khwiya awoova. ³⁶ Apale ooniiyeyo, khulawa khuwoza atthu nanna aavonisiweezo nlume otule. ³⁷ Aphano atthu ooshi apale a nti opule wa Keraaza khunvekela Yinsa yoori aleemo mmuti mwaya mwaasa wa woova channu, Ye khuwela nkalawa khulaawo.

³⁸ Nlume otule ansaruwiyeeyo masheethwani khusala anvekela Yinsa amuuzaka yoori anlikhe alawe vamote na-ye. Ila Yinsa khumuuzza olawa araka: ³⁹ “Orutele owawo wawooze atthu etile Nnyizinku ooretteliyeeyo.” Nlume otule khulankha khusala alawa owawe alaleyaka sitati yooshi etile aaretteliweeyo ti Yinsa.

Owahi wa Yinsa khwa marati na ofwa

⁴⁰ Wakathi Yinsa arutiyeovo, khuntti khuluyeene ya atthu ooshi atthaapale aari onwejaaye khumpokherela na furaha. ⁴¹ Aphano mwinyi mmote aari wiitthiwaaye Yayiiru namalokozela wa nyuppa yoosifwiwamo Nnyizinku, khuta khunkokhorela Yinsa nshini wa moolu awe anvekelaka yoori alawe owawe, ⁴² mwaasa yoori mwanawe aariina mmote paasi wa nyaakha khumi na miwiri aari osaleela ofwa.

Yinsa alawaka, atthu khusala aphunyana-phunyana. ⁴³ Attaaphale khutavo muukha aariina nyaakha khumi na miwiri ari nlwele, yaari omwittikhaaaye taamu wakhula siikhu. Khuharipu nzurukhu awe wooshi aariina nkatthi wa akulukhala, ila khuhiivo mmote aawahiyeyo onvonisa. ⁴⁴ Ye khuta mpakha onyoko wa Yinsa khusapa ajapi yawe vattithiiru, omuuta otthuupule khulikha wiittikha taamu etile.

⁴⁵ Yinsa khuuzela yoori: “Paani akisapiyeeyo?”

Atthu ooshi khusala akhana, Pheeturu khulupa yoori: “Mbwana, atthu pi a waatta pa yo anuuphunyaaye na wuusukhuma!”

⁴⁶ Ila Yinsa khusala avira akhanyarelaka yoori: “Nna akisapiyeeyo keetta woona okisaruwiye owahi waka.”

⁴⁷ Aphano muukha otule ooniyeovo yoori khaari owahi ojivitha, khuta eettaka othukumela khunkokhorela Yinsa vakatthi wa atthu ooshi khusala alupa wa nanna ansapiyeozy na avoniyeozy nasaapiru. ⁴⁸ Attaaphale Yinsa khumuuzza yoori: “Mwanankha waamini wawo woovonisa! Olawe na heeri.”

⁴⁹ Attakhulaka ethhiipile Yinsa, khuta karumeya mmote wa vaje vawe Yayiiru khumuuzza yoori: “Ohimwantipu Mbwana olawa vamote na-weyo, maana mwanawo aya afwa.”

⁵⁰ Yinsa n'oosiila khumuuzza Yayiiru yoori: “Ohoove, wiiyane amini, mwanawo ontta wiiya nkumi.”

⁵¹ N'oofiya owawe Yayiiru, Yinsa khuhinlikhi hatha ntthu ovira nnyupa mphule, khuvira na Pheeturu, Yaahaya, Yaakhumpa, papaawe mwaana na mamaawee. ⁵² Atthu ooshi aassaliye vaje eettaka olila, Yinsa khuwooza yoori: "Mwihilile, otu khafweeni ontta olala."

⁵³ Yo khusala antheya Yinsa mwaasa wa ojuwa yoori afwa. ⁵⁴ Ye khuntheteezela nkhono awe khumuza yoori: "Mwaari, lankha!" ⁵⁵ Rooho yawe khunrutela khulankha nasaapiru. Aphano Yinsa khumuza pa-paawe yoori amwinkhe etthu-yoojiwa. ⁵⁶ Papaawe na mamaawe khwiyya ooshanka, ila Yinsa khuwooza yoori mwihiimuze hatha ntthu vitthu epi zirettikhaniyeezo.

9

Yinsa oniwaaruma maaswihaapa awe khumi na awiri

¹ Yinsa khuwaakusanya maaswihaapa awe khumi na awiri khuwenkha owahi na ofwalume wa wiikara masheethwani a wakhula nanna na woovonisa. ² Khuwaaruma olawa olaleya ofwalume wa Nnyizinku na owaavonisa alwele. ³ Khuwooza yoori: "Mwilawaka mwihiithuule hatha etthu, wala pakhora, wala mfukho, wala phaawu, wala nzurukhu, wala ajapi yaphiiri. ⁴ Nyuupa ethiito mwinttelaaye opokhereliwa, mwimake attaapho mpakha olaavo. ⁵ Amana mwihipokhereliwi saana, mwilaakamo nsitati mwaya mpho mwitathe lifufu la mmoolu mwenu khwa oshaahiti waya yo." ⁶ Aphano yo khulankha khusala alawa aviraka mmamiti alaleyaka hapari zooshapweya na awaavonisaka alwele wakhula phantte.

Mishikili za Herooti

⁷ Nsatoro Herooti khusila vitthu zaari orettikhanaazo ye khwiyya wootikiniwa mwaasa atthu akina aari olupa yoori Yaahaya ti ye asisimuwiye muufwa. ⁸ Akina aari olupa yoori Aliyaasi ti ye awaapuweleliye, akina aari olupa yoori oto napiyu mmote wa raku eetta osisimuwa. ⁹ Ila Herooti khulupa yoori: "Yaahaya miiyo kaarumiye yoori ashijiwe, khi oto kininsilaaye alupiwaka na anrettaaye vitthu epo ti paani?" Khusala atakhacha yoori amoone.

Yinsa oninkha khuntti ya atthu etthu-yoojiwa.

¹⁰ Maaswihaapa apale n'ooruti khumuza Yinsa zooshi aarettaziyeezo. Aphano, ye khuwaathuula khusala alawa sitati moote yaari wiitthi-waaye Betesayita. ¹¹ Ila khuntti ya atthu n'oojuwa khusala anlotta. Ye khuwaapokherela khusala awooga monkoni woofwalume wa Nnyizinku na awaavonisaka apale aari ohithajiyaaye ovonisiwa.

¹² Njuwa leettelaka oveva, apale khumi na awiri khumwaattama Yinsa khumuza yoori: "Owooze atthu apa alawe mmamiti mpho amake eekesaka etthu-yoojiwa, maana mphu niriimo makuluttu." ¹³ Ye khuwaajipu yoori: "Mweeyeena mwiwenkhe etthu-yoojiwa." Yo khunjipu araka: "Niriinaaye apha, phaawu thaanu na swi piiri paasi, woohiiyi olawa wuuzanya etthu-yoojiwa khiniwaafiyela atthu ooshi apa." ¹⁴ Alume aariivo aari etthu ya alufu thaanu, ila ye khuwooza anakhiyoni awe yoori: "Mwiweekhaze atthu hamusiini wakhula khuntti." ¹⁵ Yo khuretta etthiipo khuweekhaza ooshi. ¹⁶ Khuthuula phaawu thaanu na swi epile piiri khweekesa otulu, khuparikhiya khumeya khuwenkha anakhiyoni awe yoori awaawanyeze atthu apale. ¹⁷ Ooshi khuja khurupala, epile zaasaliyye khulokotheliwa khwiitaala khelenke khumi na piiri.

Otukhuru wa Pheeturu

¹⁸ Siikhu moote, Yinsa eetta olompa otthwe, anakhiyoni awe ari kharipu, nawiisha khuwoozela yoori: “Atthu anri miiyo ki paani?”

¹⁹ Yo khunjipu yoori: “Akina anri weeyo o Yaahaya Namoosa, akina Aliyaasi, akina theenya anlupa yoori weeyo o napiyu mmote wa raku weetta osisimuwa.”

²⁰ “Khi mweeyo mwinri ki paani?” Pheeturu khujipu araka: “Weeyo o Al-Masiihu wa Nnyizinku.”

²¹ Yinsa khuwaahirimiza yoori vitthu epile ahimuuze hatha ntthu.

²² Khuwoza araka: “Mwaana wa Pinaatamu ona yoohoowa nkathi wa vitthu za waatta na okatthaliwa pi anamalokozela a tiini na attunkhulu a mahaakhimu a tiini mpakha anamanozela a kano; onlawa afwe, siikhu yattaathu asisimuwe.”

²³ Khuvira awoozaka atthu ooshi yoori: “Nkhama ntthu atakha okilotta miiyo, ona yoojikatthala mwennyewe, khuvikela nsalapa awe wakhula siikhu khusala akilotta. ²⁴ Amana ntthu atakha wuusuru ohaayi awe, ontta ompwetheya; ila otule onimpwetheyaaye ohaayi awe mwaasa wa miiyo, oto onteela wuusurukha. ²⁵ Ona fwayita-ni ntthu opattha vitthu zooshi z'olumwenku, ila khujipwetechama khujitapanya mwennyeweru? ²⁶ Otule anikoonelaaye haaya miiyo na mattakhuzi aka, na Mwaana wa Pinaatamu onteela omoonela haaya mmana ataaka nnuuru mwawe na nnuuru wa Paapa na malayikha oottakatthiifu. ²⁷ Kiniuuuzani khweele yoori awaapo apha akina ahintelaaye ofwa mpakha oone ofwalume wa Nnyizinku.”

Ozukulisiwa wa Yinsa

²⁸ Ziviriyeovo ethu ya siikhu naane paata yoolupa mattakhuzi apale, Yinsa khunthuula Pheeturu, Yaahaya na Yaakhumpa, Ye khuwela vamwaako olawa olompa. ²⁹ Alompaka etthiipile omaasho wawe khuzukuluwawo, kuwo zawe khwiya zoolakala na za waara nkhamma ozerima. ³⁰ Nasaapiru khumpuwelela atthu awiri khusala attakhulana, aari Munsa na Aliyaasi. ³¹ Aatiye nnuuru ya pinkuuni khusala amuuza Yinsa khwa nanna aari weettelaazo ohoowa na ofwa Yeruzaleemu nkhamma etthiipo Nnyizinku asharutheliyeeyo.

³² Pheeturu na ashirikha awe aarettiye eettaka olala, wakathi asisimuviyeovo khoona nuuru ya Yinsa na atthu awiri amweemeleliye. ³³ Atthu apale eettaka olawa Pheeturu khumuza Yinsa yoori: “Mwanliimu, ti yooshapweya wiikhala attaapha! Nintta ojeka mapantta mattatthu, limote laawo, limote la Munsa, na limote la Aliyaasi.” Pheeturu khaari ojuwa ethu aari ottakhulaaye.

³⁴ Attakhulaka etthiipile, khuta liwiku khuwaafinika, anakhiyoni apale khwiya awoova wakathi ooniyeovo liwiku liwaafinikhaka atthu apale.

³⁵ Mmawiku mphule khupuwamo huula yaari oraaye: “Otu mwanaka woorthawuliwa; mwinsiileze etile anlupaaye.” ³⁶ Paata yoonyamala huula etile Yinsa khusalavo otthwe. Siikhu zaya epile anakhiyoni apale khwiya oonyamala, khuhimuuzi hatha ntthu vitthu epile ooniyeozo.

Ovonisiwa wa shapu aariina sheethwani

³⁷ Mmeesho mwaya nawiishukha vamwaako, khuta khuntti ya atthu a waatta oteela okutthanana Yinsa. ³⁸ Vakatthi wa khuntti ya atthu atthaapale khupuwavo mwinyi aari okhuwaaye araka: “Mwanliimu, kinuuvekela yoori wamoone mwanaka, maana kina mmote othuuto paasi. ³⁹ Sheethwani eetta onvelavelisa khusala anthukumelisa, onnyakulisa na onkwisela

vathi n'oolaza maphovu, khaninlikha ahinvulaliseeni. ⁴⁰ Kaawaavekeliye anakhiyoni awo yoori amwiikare sheethwani aya oto, yo khumoojeela.”

⁴¹ Yinsa khujipu araka: “Oo! Atthu oohaamini na ootakhala rooho! Mpakha lini kiiyaka vamote na-mweyo na kuuvilelakan? Ontiise apha mwanawo aya oto.”

⁴² Alawaniwaka etthiipile, sheethwani khunkwisela vathi khusala an-thukumelisa, Yinsa khumwiikara sheethwani khuvona mwaana otule, khumwinkha papaawe. ⁴³ Atthu ooshi khwiya ooshanka mwaasa woowahi wa Nnyizinku.

Yo aashankeliye vitthu epile aari orettaazo Yinsa, ye khuwoza anakhiyoni awe yoori: ⁴⁴ “Mwisiileze saana mattakhuzi apa kiniwuzaanini: Mwaana wa Pinaatamu ontela winkheleliwa mmakhono wa anaatamu.”

⁴⁵ Ila yo khuhisala ajuwa maana a mattakhuzi aya apale mwaasa yoori aari ovitheya yoori ahiweeleye na khusala oova omuuzela.

Nttunkhulu muufwalume wa pinkuuni

⁴⁶ Khupuwa onyakulisana vakatthi wa anakhiyoni apale eekesaka onjuwa paani wa yo aari weettelaaye wiiya nttunkhulu. ⁴⁷ Ila Yinsa kjuwa etthu aari wuupuwelaaye yo, khunthuula mwaana khumweemesa omaasho wawe. ⁴⁸ Aphano khuwoza anakhiyoni awe yoori: “Otule animpokherelaaye mwaana otu khwa nzina laka, onikipokherela miiyo; otule onikipokherelaaye, onimpokherela otule akirumiyeeyo. Otule anji-pushuwisaaye vakatthi venu mooshi, nttunkhulu ti oihuuto.”

⁴⁹ Yaahaya khulupa yoori: “Mwanliimu, namoona ntthu anikaraaye masheethwani khwa nzina lenu. Fweeyo khunkhattaza mwaasa woohiiyi wa khuntti yetthu.”

⁵⁰ Yinsa khuwoza yoori: “Mwihinkhattaze. Maana otule ahinvirikanaaye na-fweyo ori phantte yetthu.”

Asamariiya aninkatthala Yinsa

⁵¹ Osaleelaka ofiya wakathi wa Yinsa orutela pinkuuni, khujilakelela weetta sitati ya Yeruzaleemu. ⁵² Khuwaalokozisa akarumeya awe, yo alawaka khusapuwa nti wa Samariiya yoori amweekesele puuro yoomakavo. ⁵³ Ila atthu a nti wa Samariiya khuhimpokhereli, maana aajuwiyi yoori eetta ovira eettaka Yeruzaleemu. ⁵⁴ Yaakhumpa na Yaahaya nawoona vitthu zaya epile khumuza Yinsa yoori: “Mbwana, ontakha yoori nirume moottho wa pinkuuni owaalukuze, nkhama etthiipo Aliyaasi aaretiyyezo*?” ⁵⁵ Ila Yinsa khuzukuluwa khuwaamaruwela araka: “Mweeyo khamwinjuwa rooho mwiriinaazot. ⁵⁶ Mwaana wa Pinaatamu khateeleeni opwetecha nafusi za atthu, aateeliye wuusuru.” Aphano khulankha khusala alawa nti nkina.

Monkoni wa apale aninlottaaye Yinsa

⁵⁷ Ettaka olawa ntarikhi khupuwa ntthu mmote khumuza yoori: “Kintta wuulotta wakhula vahali oneettaavo.”

⁵⁸ Yinsa khunjipu araka: “Ananthala anaaye maphotto aya, anyannyi anaaye viaaro zaya, ila Mwaana wa Pinaatamu khana vahali woovumulisavo eeshwa yawe.”

⁵⁹ Yinsa khumuza ntthu nkina yoori: “Okilotte.”

Ye khujipu araka: “Mbwana, okilikhe khapula kilawe kanzikhe paapa.”

⁶⁰ Yinsa khumuza yoori: “Owaalikhe anamfwa awaazikhe anamfwa aya; weeyo olawe walaleye ofwalume wa Nnyizinku.”

* ^{9:54} Aaya eti kithaapu kiina khayatikhiweenimo. † ^{9:55} Aaya eti kithaapu kiina khayatikhiweenimo.

⁶¹ Khupuwa ntthu nkina theenya khumuaza Yinsa yoori: “Kintta wuulotta Mbwana, ila okilikhe khapula kawaaleeze ajamaazaku.”

⁶² Yinsa khunjipu yoori: “Otule aneesaaye makhono awe alimaka khusala eekesa nyuma khaneezela muufwalume wa Nnyizinku.”

10

Yinsa oniwaaruma anakhiyoni awe sapiyiini na awiri

¹ Paata ya toole, Mbwana khuwaathawula anakhiyoni awe akinoko sapiyiini na awiri, khuwaaruma yoori alawe awiri-awiri alokoze nsitati na mmiti wooshimo mphule aari weettelaaye oviramo. ² Ye khuwoza yoori: “Wuurula pu wa waatta, ila anakhaazi vattithiiru. Mwinvekele Mwennyewe nshapa yoori awaaperekhe anakhaazi a w提醒. ³ Mwilawe, kinuurumani nkhamma pwittipwithi zinttaaye vakatthi wa miji. ⁴ Mwihiithuule mfukho wala napampa, ama jampali wala mwiheemele ntarikhi mwichelisa.

⁵ Wakhula nyuupa mwimfiyaaye mwilupe khapula yoori: ‘Heeri yiye vamote na-mweyo vaje apha.’ ⁶ Amana eeyavo ntthu wa heeri, heeri yenu enttela wiiya vamote na othuuto; amana ahiivo entta w提醒. ⁷ Mwiheettette nyuupa khwa nyuupa, ila mwiikhale nyuupa ethiito mwije mwinywe wakhula etile mwinttelaaye winkhiwa, maana nakhaazi eninsuhi phakari yawe.

⁸ Wakhula sitati mwimfiyaaye khupokhereliwa saana, mwije etthu-yoojiwa mwinttelaaye winkhiwa. ⁹ Mwiwaavonise alwele mwinttelaaye owaasikana na mwiwooze atthu yoori: ‘Ofwalume wa Nnyizinku ori kharipu na-mweyo.’ ¹⁰ Wakhula sitati mwineettaaye amana mwihipokhere-liwi, mwileemo mwilawe ntarikhi mwiwooze yoori: ¹¹ ‘Lifufu la sitati yenu ntthi liniphariyeeyo mmoolu mwetthu, nootathelani mwamwennyewe; ila mwijuwe yoori ofwalume wa Nnyizinku ori kharipu na-mweyo.’” ¹² Yinsa khuwoza theenya yoori: “Kiniuuuzani yoori siikhu ya kхиyaama, Nnyizinku onteela woonela tthakaraka Sotooma zayita sitati eto.

¹³ Olaanikha pu waawo weeyo Korazini, na weeyo Betesayita! Eriwaka minjuza epi zirettikhaniyeezo mphu, zeettiye orettikhana sitati ya Tiiro na Sidooni, athupwiyyiye raku twampi zaya awala saakhu eekhala vafuutha. ¹⁴ Nakataalikha siikhu ya kхиyaama, Nnyizinku onteela woonela tthakaraka Tiiro na Sidooni zayita mweeyo. ¹⁵ Weeyo Kafwaranawu onoona yoori onsifwiwa mpakha pinkuuni? Wala! Apho onteela wiishukhela motthooni.

¹⁶ Otule anuusilezaanini, onikisileza miiyo; otule anuukatthalaanini, onikikatthala miiyo. Otule anikikatthalaaye miiyo, oninkatthala otule akirumiyeeyo.”

Oruti wa anakhiyoni sapiyiini na awiri apale aarumiweeyo

¹⁷ Anakhiyoni apale sapiyiini na awiri khuruti ari oofurahi khulupa yoori: “Mbwana, hatha masheethwani aari onishututela amana nittakhlaka khwa nzina lawo.”

¹⁸ Yinsa khuwaajipu yoori: “Miiyo kamoonaa Epiliisi akwaka otulu nkhamma ozerima. ¹⁹ Mwikisileze! Kiniwinkhani owahi wooluwattha nyookha, wenye khuhuurettini hatha etthu, na oshintta owahi wooshi wa atuwi*. ²⁰ Mwihifurahi mwaasa wa masheethwani w提醒. mwfuraheli mazina enu waatikhiwa pinkuuni.”

²¹ Wakathi otthuupule Yinsa khwiya woofurahi nkathhi wa Rooho Ttakatthiifu, khuri: “Kinuusifu weeyo Paapa, Mbwana wa pinkuuni na

* ^{10:19} Atuwi otu Epiliisi.

vathi maana vitthu epi zeeya zoovitheya vakatthi wa ajuwi na asomi, khuwaathoonyeza asimaana; khweele Paapa, ti nanna waatakhiyeezo.

²² Zooshi kenkhiwa ti Paapa; na khaavo aninjuwaaye Mwaana woohiiyi Paapa, wala aninjuwaaye Paapa woohiiyi Mwaana, na otule Mwaana anintakhelaaye yoori anjuwise.”

²³ Paata ya toole, khuwaakhuwela anakhiyoni aweru paasi khuwooza yoori: “Ooparikhiiya pi apale anoonaaye epi mwinoonaazo.

²⁴ Kiniuuuzani yoori manapiyu a waatta na afwalume aari otakha woona vitthu ethiipi mwinoonaazo ila khuhooni na aari otakha osiila epi mwinsilaazo ila khuhisiili.”

Nsamariiya wooshapweya rooho

²⁵ N'ooretta toole, namanozela mmote wa kano khulankha yoori amweeze Yinsa khuri: “Mwanlimu, kirette-ni yoori kipatthe ohaayi wa mileele?”

²⁶ Yinsa khumuuzela yoori: “Yaatikhiwa niini nkithaapu ya kano wala eniweeleya toovi amana osomaka?”

²⁷ Ye khujipu araka: “‘Omphete Mbwana Nnyizinku awo na rooho yawo yooshi na nafusi yawo yooshi, na kuvu zaho zooshi na akhili zaho zooshi’ na ‘omphete namwaattamanani awo nkhamma ethiipo onjiphetaazo omwen-nyewe’.”

²⁸ Aphano Yinsa khumuuzala yoori: “Wajipu saana. Orettaru ethiipo onta opattha ohaayi wa mileele.”

²⁹ Ila namanozela wa kano otule aari otakha ojihakikhi khumuuzela Yinsa theenya yoori: “Namwaattamanani aka ti paani?”

³⁰ Yinsa khunjipu araka: “Aarivo ntthu mmote aari olankhaaye Yeruza-leemu eettaka Yeriko, khuvithaaleliwa pi malatarawu khunyakanyiwa vit-thu zawe, khuvuliwa kuwo zawe, khupiwa khulikhiwa asaleelaka ofwa.

³¹ Erettiyeovo toole, khuviravo haakhimu wa tiini mmote, n'oomoona ntthu otule khunwerawera. ³² Khuviravo theenya nleevi† mmote, n'oomoona ntthu otule ari ntarikhi mphule khunwerawera. ³³ Aphano khuviravo nsamariiya‡ mmote aari weettaaye safwari zawe, n'oomoona ntthu otule khumoonela huruma. ³⁴ Khumwaattamela khoosa makhwatta awe na mafuttha na aalikoro khufuka na alikatuura, khunthuula khunttha vapuuru vawe khunlawana onyuupa ya aletto khumwiinanelia. ³⁵ Mmeesho mwaya, khulaza mizurukhu miwiri za feeta aariinaazo khumwinkha mwennyewe nyuupa khumuuzala yoori: ‘Omwiinanele ntthu otu mpakha wakathi kin-rutaavo, wakhula etile ontelaaye oharipu khwa ye, kintta ota kuuriphe n'ooruti.’”

³⁶ Aphano Yinsa khumuuzela namanozela wa kano otule yoori: “Khwa atthu apa attathu paani omooniyeeyo wiiya namwaattamanani awe nampi-iwa pi malatarawu?”

³⁷ Ye khujipu yoori: “Ti otule amooneleyeyo huruma.” Yinsa khumuuzala yoori: “Na-weyo olawe warete ethiipo.”

Owawe Maarata na Mariyamu

³⁸ Yinsa na anakhiyoni awe eetta ovira alawaka khufiya mmuti, khupuwa muukha mmote aari wiitthiwaaye Maarata, khumpokherela.

³⁹ Ye aarina ttwiye aari wiitthiwaaye Mariyamu, eekhaliye nshini a moolu wa Mbwana Yinsa khusala asiila mattakhuzi apale aari olupaaye.

⁴⁰ Ila Maarata eetta ojizukulela mwaasa wa waatta khaazi, khulawa aphale

† **10:32** Aleevi aari awaziri a mahaakhimu a tiini. ‡ **10:33** Asamariiya aari atthu ootarawiwa pi mayaahuuti.

aariivo Yinsa khumuaza yoori: “Mbwana, khinuujali ttwiiyaku okilikhela khaazi za waatta otthome? Omuuze ate akikholise!”

⁴¹ Mbwana khunjiyu yoori: “Weeyo Maarata washukulikha na wajikhaza na vitthu za waatta. ⁴² Ila eti moote ti yiiye yoofatikhana. Mariyamu athawula phantte yooshapweya ahinnyakanyeyaaye.”

11

Yinsa oniwaanozela anakhiyonu awe nanna yoolompa

¹ Siikhu moote Yinsa eetta olompa vahali vaya apho, eeshiyeevo mmote wa anakhiyonu awe khuri: “Mbwana, oninozele olompa nkama ethiipile Yaahaya Namoosa na-ye awaanozeliyezo anakhiyonu awe.” ² Aphano, Yinsa khuwooza yoori: “Amana mwilompaka mwisala mwiri toono:

Papeethu,

littitthimisiwe nzina lawo loottakatthifu.

Wiishushe Ofwalume awo.

³ Oninkhe wakhula siikhu etthu-yoojiwa ninhithajiyaaye.

⁴ Oniswaamihi twampi zetthu,
nkama ethiipi na-fweyo nininswaamiaaye
wakhula otule annikosaaye.

Ohinilikhelele nizayiniwaka ti sheethwani, [[ila onuusuru khwa vitthu zootakhalaa]]*.”

⁵ Yinsa khuwooza theenya yoori: “Nkaakanyerelani mmote wa-mweyo anlankhaaye osikhu layili, khulawa ompiyla nlako swaahipu awe araka: ‘Swaahipu, kiipaashe phaawu ttatthu, ⁶ mwaasa yoori eetta ota swaahipu aka onti na akina hatha etthu yoomwinkha.’

⁷ Khi amana swaahipu enu oojipuni ari nnyupa mwawe araka: ‘Ohikan-tipu! Miyo kafuka milako zaka, karapalela na aanaaka alala; akinwahi olankha yoori kuupatthise phaawu zaya.’ ⁸ Weekhweele miiyo kiniwuzani yoori, hatha nkama khatakheeni olankha yoori oopatthise phaawu mwaasa w'ooswaahipu, oniishela olankha na awinkhe zooshi onhithajiyaazo mwaasa wa nthiti.

⁹ Ti eto kiniwuzaanini yoori: Mwiveke, mwintta winkhiwa; mweekese mwintta opattha; mwipiye nlako mwintta ofukuleliwa. ¹⁰ Maana wakhula anvekaaye oninkhiwa, aneekesaaye ompattha, ampiyaaye nlako ontta ofukuleliwa.

¹¹ Paapa-ni mmote wa mweeyo anraaye mwanawe anvekeliye phaawu khumwinkha liwe? Ama anvekeliye swi khumwinkha nyookha?[†] ¹² Wala anvekeliye laayi khumwinkha wenye? ¹³ Moone, mweeyo wootakhala rooho mwinjuwa owenkha aaneenu vitthu zooshapweya, sapiseni Paapa wa pinkuuni khanziti owenkha Rooho Ttakathiifu apale aninvekelaaye?”

Owahi wa Yinsa wa wiikara masheethwani

¹⁴ Siikhu moote, Yinsa aari omwiikara sheethwani mmwiili wa mwinyi mmote antotheliyeeyo ohittakhuli. Wakathi ansaruwiyevo sheethwani otule, ye khwaaza ottakhula; apale aari omoonaaye khushanka. ¹⁵ Ila atthu akina khusala alupa yoori: “Ye oniikara masheethwani na owahi wa Belezibuuli[‡], mfwalume wa masheethwani.” ¹⁶ Akinoko eetta omweeza, khusala anvekela alama moote ya pinkuuni.

* ^{11:4} Warakha za raku khina aaya eti ya 4. † ^{11:11} Kithaapu za kiina khina mattakhuzi aya apa: ‘anvekeliye phaawu khumwinkha liwe?’ ‡ ^{11:15} Nzina likina la Epiliisi ti Belezibuuli.

¹⁷ Yinsa khujuwa vitthu aari ofikhiraazo, khuwooza yoori: “Ofwalume woojaawanya khusala wuumana oniishelana otapanyeya, na ojama wa waawanyeya oniishelana wiisha. ¹⁸ Nkhama Epiliisi eetta ojaawanya, ofwalume awe onttela wiiyavo toovi? Mweeyo mwinlupa yoori miiyo kiniikara masheethwani khwa owahi wa Belezibuuli. ¹⁹ Nkhama pi ethiipo, khi aaneenu aniiikara na owahi waani? Atthaapo pa yo anttelaaaye wuuthoonyezani yoori khamwina shariya. ²⁰ Ila nkhama khweele masheethwani apa kiniikhara na owahi wa Nnyizinku, eto enthoonyeza yoori ofwalume wa Nnyizinku wafiya vakatthi venu.

²¹ Ntthu woozivala na woojuumaanya, amana eekeselaka vaje vawe saaneene, mali zawe ziniiya zookholeleleya. ²² Ila ntthu woozivala zayita ye, amana ankukuttela khunshintta ontta onnyakanya zaana zawe anrorome-laazo athuule phantte ya mali zawe.

²³ Otule ahina vamote na-miyo oto ona lupattha na-miyo, otule ahinkusanyaaye na-miyo ontta omwaza.”

²⁴ Yinsa khurutela olupa yoori: “Sheethwani, amana alaamo mmwili oneekesa puuro yoohiina maati yoori avumule, n'oohisikani puuro ye onlupa yoori kintta orutela mphule kaariimo. ²⁵ Amana aruti asikana nnyupa ori wooseeliwamo na wa waattaleliwamo, ²⁶ ontta oruti eettele masheethwani makinoko sapa ootepa zayita otule, aviremo asala eekhala nttumphule. Attaaphale ohaayi wa ntthu aya otule oniiya wootepa zayita omwanzo.”

²⁷ Yinsa eettaka olupa mattakhuzi apale, muukha mmote aari attaaphale khunyakula araka: “Wooshapweyiwa muukha otule oovokoliyeeyo khuwaamwisa.”

²⁸ Ila Yinsa khunjipu araka: “Ooshapweyiwa pi apale ansilaaye ntakhuzi la Nnyizinku khushututela.”

Alama ya Yuunusa

²⁹ Wakathi atthu akusanyeyiyevo vhali vamote, Yinsa khusala alupa yoori: “Atthu a leelo pi ootakhala rooho, anveka woona alama ya minjuza ila khanlawha othoonyeziwa hatha alama moote, yoohiyyi etile ya napiyu Yuunusa. ³⁰ Nkhama ethiipo Yuunusa eeyiyeyo alama ya atthu a Neniive, na-ye Mwaana wa Pinaatamu ontela wiiya alama ya atthu a leelo. ³¹ Siikhu ya khiyaama rayisi wa kusini ontela olankha awaaphuke atthu a aphano; maana ye alankha okhu wiisheliyeewo olumwenku oteela osiila ojuwa wa Seleyimaana, ila otu mwiriina apha anziti Seleyimaana. ³² Siikhu ya khiyaama atthu a Neniive anttelala wuuphukani mweeyo, maana yo athupwiya twampi zaya, n'oosiila tafusiiri epile aari olupaazo Yuunusa; otu mwiriina apha nasaapi anziti Yuunusa.”

Nuuru ya mwiili

³³ Yinsa khuvira alupaka yoori: “Khaavo ntthu ankhozaaye khantteya khuvitha ama khukhutela na yuuku, ila entthiwa vhali wa wooneyavo yoori esala ewaamwasikhela apale anviraaye nnyupa. ³⁴ Khantteya ya mwiili maasho, amana maasho awo eeya oosaana, mwiili awo wooshi oniiya wa nuuru. Ila amana maasho awo ahiiyi saana mwiili awo oniiya n'yiiza. ³⁵ Wiyanne phoole na nuuru eto oriinaaye yoori ehiiye yiiza. ³⁶ Amana mwiili awo wooshi wiyyana nuuru khuhina hatha phantte moote ya yiiza, oniiya woomwasikheliwa nkhama khantteya yuumwasikhelaka weeyo.”

Yinsa na mafwarizeewu na anamanozela a kano

³⁷ Wakathi Yinsa eeshiyeevo ottakhula, mfwarizeewu mmote khumuuzza olawa oja owawe. Ye n'oofiya khwiikhala vameeza. ³⁸ Mfwarizeewu otule khushanka mwaasa woomoona Yinsa eettela oja woohinawi.

³⁹ Mbwana khuwooza yoori: "Mweeyo mafwarizeewu, mwinoosa koopho na parathu oje waya, ila rooho zenu zeetaala vitthu za omaasho kopho na zoohusuti. ⁴⁰ Alolo! Otule aattaliyeeyo oje khahi othuuto attaliyeeyo nkatthi? ⁴¹ Khapula mwaaze winkha etile eriiye nkatthi wa rooho yenu nkhamma zimola, toowo mwintta woona zooshi ziwiikhaleliyeni saana.

⁴² Olaanikha pu weenu mweeyo mafwarizeewu, maana mwininkha l-funku lakhuumi mathapa na vitthu za nwoorotha, ila khusala mwitarawu shariya na pheta ya Nnyizinku! Mweeyo mwina yooretta vitthu epo woohiluki phantte kiina.

⁴³ Olaanikha pu weenu mweeyo mafwarizeewu, wawuutuvelani puuro ya wiilokozi nnyupa woosifwiwamo Nnyizinku na ochelisiwa wa shitahavo vamwanttiwa.

⁴⁴ Olaanikha pu weenu mweeyo, mwiyyiyeyo nkhamma khapuri yoohooneyi anviraavo atthu vatulu vaya khuhijuwi."

⁴⁵ Aphano namanzela wa kano mmote khunjipu Yinsa araka: "Khahiyoo toowo! Mattakhuzi apo kinoona yoori annithoonya fweeyo."

⁴⁶ Yinsa khuri: "Olaanikha pu weenu mweeyo anamanozela a kano, mwiniwaapwecherisaaye atthu mapwattha oolemelaa wala mweeyo mwihinwahaaye osapa na yaala yenu.

⁴⁷ Olaanikha pu weenu mweeyo mwiniwaajekelaaye khapuri zooshapweya manapiyu, atthaapale ooliweeyo pi amarehemu apapazenu. ⁴⁸ Apho mweeyo mwinthoonyeza yoori mwinlawela oshaahiti wookhupalela epile apapazenu arettiyeeyo, yo awoola manapiyu, mweeyo khuwaajekela khapuri zooshapweya. ⁴⁹ Ti eto Nnyizinku alupiyeeyo nkatthi woojuwa wawe yoori: 'Kinlawa kawaaperekhe manapiyu na maaswihaapa; yo anteela owoola, akina aweekarise.' ⁵⁰ Mwaasa wa manapiyu apa ooliweeyo tokhiya olumwenku waazaka, atthu ooshi apa a leelo eti ana paathuli. ⁵¹ Waaza taamu ya Apeele mpakha taamu ya Zakariya otule ooliweeyo kharipu ya vaalitaari vaje wa nyuupa ya Nnyizinku. Kiniuuuzani yoori, atthu a leelo anlawa ahukhumwiwe mwaasa wa ethiito.

⁵² Olaanikha pu weenu mweeyo anamanozela a kano, maana mwathuula efukulo yoojuwa, ila khuhivirimo na khuwaakhattaza apale aari otakhaaye oviramo."

⁵³ Paata ya Yinsa olaavo aphale vaya, mafwarizeewu na anamanozela a kano khwaaza omuuzela vitthu za waatta ari ookatipukha. ⁵⁴ Yo aari onwazela shawuri yoori kusapi onalupa etthu, apatthe onlokoveza.

12

Ohirimiza na olipisela

¹ Khuntti ya atthu khukusanyeya, mwaasa wa waatta akinoko khusala aluwathhana. Yinsa khuwooza khapula anakhiyon awe yoori: "Phoole na thwapiya zoonaafikhi za mafwarizeewu. ² Khayiivo yoovithiwa ehintee-laaye ovithuliwa na zooshi epile zoottiyeleliwa zinteeela ojuwiwa." ³ Zooshi zinlupiwaazo n'yiiza, zinlawa zasaruleliwe veetakale, na zooshi epile zinlupiwaazo sirini zinlawa zeeye payana.

Nimoove Nnyizinku paasi

⁴ Yinsa khuvira attakhulaka araka: "Miiyo kiniuuuzani ashirikha yoori: Mwihiwoove apale anuulaaye mwiili, nawiisha khuhiretteli hatha etthu.

⁵ Miiyo kintta wuuthonyezani paani woomoova: Mwimoove Nnyizinku otule anwahaaye wuula mwiili enu, nafusi yenu khweeselela motthooni. Oto ti mwiriina yoomoova. ⁶ Anyannyi athaanu attiitthi-attiitthi khanuzanyisiwa sinku piiri? Ila apo aya khaavo mmote Nnyizinku aninsahawaaye. ⁷ Hatha na nyuuli za mmwishwa mwenu zooshi pi za waalakiwa. Mwihoove, mweeyo mwinaaye fwayita zayita anyannyi apo a waatta.”

Otukhuru na onkathala Yinsa

⁸ Yinsa khuri: “Miiyo kiniwuuzani yoori: otule antukhurwaaye vakatthi wa atthu yoori namalottela aka, Mwaana wa Pinaatamu onteela otukhuru vakatthi wa malayikha a Nnyizinku. ⁹ Ila otule ankikatthalaaye vakatthi wa atthu, na-ye onteela okatthaliwa vakatthi wa malayikha a Nnyizinku. ¹⁰ Wooshi otule anintarawaaye Mwaana wa Pinaatamu onswaamihiva, ila otule ankufurwelaaye Rooho Ttakatthiifu khanswaamihiva.

¹¹ Amana mwithuuliwa olawa ophukiwa nnyupa woosifwiwamo Nnyizinku ama wa afwalume, mwihiiyane shaakha khwa nanna mwinttelaaye ojaakisa ama ethu mwinttelaaye olupa. ¹² Wakathi otthuupo Rooho Ttakatthiifu entta wuuthoonyezani etthu yoolupa.”

Thaajiri woohiina akhili

¹³ Mwinyi mmote wa khuntti etile khunvekela Yinsa araka: “Mwanliimu, omuuze ttwiyyaku akaawanye maali epile alikiyyeeyo papeetthu.”

¹⁴ Yinsa khunjipu araka: “Weyo, paani akirettiye wiiya namaphuka enu wala namwaawanya wa maali zenu?” ¹⁵ Khuwooza yoori: “Phoole na omaashokopho wooshi wa vitthu, mwaasa yoori ohaayi wa pinaatamu khunlipa na vitthu epile ampatthaazo za waatta.”

¹⁶ Yinsa khulupa nlikaniso araka: “Aarivo mwinyi mmote wa thaajiri aaruweriyeeyo channu. ¹⁷ Ye khusala awaza toono: ‘Kirette-ni? Akina vahali wootthaavo peewu zaka epi.’

¹⁸ Khulupa yoori: ‘Aa, kajuwa etthu yooretta. Kintta opwecha matthala apa mattiitthi kijeke mawulu-mawulu yoori kittheemo peewu zaka na vitthu zaka zooshi epile kiriinaazo. ¹⁹ Nawiisha, kuuze nafusi yaka yoori: onaaye peewu na vitthu za waatta zintoshelezaaye nyaakha za waatta; ovumule, oje, onywe na opuhe.’

²⁰ Ila Nnyizinku khumuuba yoori: ‘Nlolo! Osikhu otthuupu ontta ofwa. Maali zaho paani anttelaaye osalana?’ ”

²¹ Yinsa khumarisela araka: “Ntthu oto ori nkama atthu apale anlipanaaye maali zaya ila khuhiiyi mathaajiri mmakhono wa Nnyizinku.”

Onroromela Nnyizinku

²² Aphano Yinsa khuwooza anakhiyoni awe araka: “Ti eto kiniwuzaanini yoori: mwihiiyane shaakha na ohaayi enu, wala etthu mwinttelaaye oja ama etthu mwinttelaaye owala. ²³ Maana ohaayi ona fwayita khuluyeene zayita etthu-yoojiwa na mwiili ona fwayita khuluyeene zayita kuwo. ²⁴ Mwiwoone anakhuku; khanzala wala khanuurula hatha ntthala khana loopwehavo vitthu-zoojiwa zaya, ila Nnyizinku oniwenkha etthu-yoojiwa. Mweeyo mwinaaye fwayita khuluyeene zayita anyannyi apo! ²⁵ Paani vakatthi venu anwahaaye weekezelaa mansha awe hatha nkama eetta oshukulikhela? ²⁶ Mweeyo khamwinwahi oshintta vitthu ttiitthi-ttiitthi, khi mwinshuku likhela toovi kinoko zaya?

²⁷ Moone nanna anwulaazo maluwa oshapweya ntthuttu, khankhola khaazi wala khanvaasha kuwo, ila kiniwuuzani yoori: Seleyimaana aari thaajiri nwulweene, ila khawaleeni kuwo zooripelela nkama maluwa

atthaapo. ²⁸ Nnyizinku onwalisa nyaani ziriiye ntthuttu leelo meesho zeettle-laka olukula, sapiseni mweeyo atthu a amini ttiitthiiru khatepeeni wuuwal-isani? ²⁹ Mwihihukulikhele etthu mwinttelaaye oja ama onywa. ³⁰ Atthu apale ahinjuwaaye Nnyizinku pa yo anshukulikhelaaye vitthu epo, ila mweeyo Papeenu onjuwa yoori enuuhithajiyani vitthu epo. ³¹ Mweekese klapula Ofwalume wa Nnyizinku, vitthu zaya epo mwintta weekezelawa.”

³² Yinsa khulupa theenya araka: “Mwihoove mweeyo mwiyyiye nkhamma khuntti ttiitthiiru ya pwittipwitthi, maana Papeenu ti ye atakhiye owinkhani Ofwalume awe. ³³ Muuzanyize zooshi mwiriinaazo nzurukhu aya mwiwenkhe asikhini, mwijaattalelele mifukho zihinvaruwaaye, toowo mwinthokorela maali pinkuuni zihiniishaawo, okhu ahimfiyaawo nantarawu wala maweephe yoori aharipu. ³⁴ Maana attaapho eniyyaavo maali zawo rooho yawo eniyya attaapho.”

Anamarumeyela oojeekesela

³⁵ Yinsa khuvira alupaka yoori: “Mwiyye anamarumeyela oojeekesela na khantteya zenu ziri zookhoziwa. ³⁶ Mwina yawiya nkhamma anamarumeyela aninwejelaaye mbwanaaya yoori arutaka onjampo la harus, amana apiya nlako amfukulele nasaapiru. ³⁷ Ooshapweyiwa anamarumeyela apale mbwanaaya anttelaaye owaasikana eettaka ojeekesela. Kiniuuuzani khweele yoori mbwanaaya na-ye ontta ojivalisa yoori arum-eye, awooze wiikhala vameeza asala awaarumeyela. ³⁸ Hatha nkhamma ata osikhu layili ama lifwajiri, ooshapweyiwa anamarumeyela apale mbwanaaya anttelaaye owaasikana ari oojeekesela. ³⁹ Mwijuwe yoori eriwaka mwennyewe nyuupa eetta ojuwa wakathi nantarawu antaavo, toono ahinlikhaka ovira nnyupa mwawe. ⁴⁰ Na-mweyo mwiyye woojeekesela, maana Mwaana wa Pinaatamu ataaka khaavo anjuwaaye wakathi aya.”

Karumeya wa waamineya na woohaamineyi

⁴¹ Aphano Pheeturu khumuuzela Yinsa yoori: “Mbwana, nlikaniso opo pu weetthu ama pu wa atthu ooshi?”

⁴² Mbwana khujipu araka: “Paani eeyiyeyo karumeya wa waamineya na w'aakhili, mbwanaawe amwinkhiyeyo owaalokozela akarumeya azaawe na owenkha ethu-yoojiwa mmana ofiya wakathi? ⁴³ Wooshapweyiwa karumeya otule mbwanaawe amana ataaka anttelaaye onsikana arettaka ethiipo. ⁴⁴ Weekhweele, kiniuuuzani yoori ontela wiiya wa waaminiwa alikheliwe weettettisa maali zooshi. ⁴⁵ Mwaakanyerele, karumeya otule amana alupa nroho mwawe yoori: ‘Mbwanaaka khanta nasaapi,’ khwaaza owaapiya akarumeya apale akina aakha na aalume, okhuno ajaka, anywaka na ahapaliwaka, ⁴⁶ mbwanaawe ontela ota siikhu etile ye ahaari waakanyerelaaye na wakathi ahaari ofikhirelaaye, ahukhumwiwe venkivene atthiwe puuro ya atthu oojaamineyi.

⁴⁷ Karumeya otule anjuwaaye matakhele a mbwanaawe, ila khuhisala ajeekesela na khuhisala aretta epile antakhaazo mbwanaawe, onteela ohukhumwiwa na ojaphiwa venkivene. ⁴⁸ Ila otule ahinrettaaye matakhele a mbwanaawe mwaasa woohijuwi, onteela ojaphiwa na ohukhumwiwa vattitthiiru. Wakhula otule enkhiweeyo za waatta ona yoorutisa za waatta; na otule aaminiweeyo venkivene, onlawa avekeliwe zooziti channu.”

Waawanyeya mwaasa wa Yinsa

⁴⁹ Yinsa khuri: “Miiyo kateela okhoza moottho vatuniya, enikituvela ovira okholelaka! ⁵⁰* Ila yamwanzo kina yoohoowa kifwe, kina huzuni mpakha vitthu epi zirettikhane ziishe! ⁵¹ Mweeyo mwinaakanyera yoori miiyo katana heeri vatuniya? Wala! Kiniwuzani khweele yoori miiyo katiisa ohisiilani. ⁵² Waaza leelo eti mpakha okho ninttaawo, nkatthi woojama wa atthu athaanu, onteela opuwamo waawanyeya; attatthu ohisiilanani apale awiri, apale awiri ohisiilanani apale attatthu. ⁵³ Paapa wuumana na mwanawe na mwaana wuumana na papaawe. Maama wuumana na mwanawe wankha, mwaana wankha wuumana na mamaawe, namaraliwa wuumana na nkhwewe, akhwe wuumana na namaloola.”

Alama za wakathi

⁵⁴ Yinsa khuwooza atthu aakusanyeyiyeeyo yoori: “Mweeyo amana moona liwiku liwelelaka phantte y'ookhu lintupweelaawo njuwa mwinlupaka yoori: ‘Entakha onya vuula’, khweele khurettikhana. ⁵⁵ Amana moona pheevu ya kuusi mwinlupaka yoori: ‘Enteela opuwa haari’, khweele khurettikhana. ⁵⁶ Manaafikhi! Mweeyo mwinjuwa olupa alama za vatuniya na z'ootulu; aphano toovi mwihijuwaka olupa alama za wakathi opu?

⁵⁷ Mwaasa aya niini mwihijuwaka othawula etile yiyyiyeyo ya shariya? ⁵⁸ Amana weeyo na muumani awo mwilawaka wa namaphuka, enhithajiya osiilana khapula rakuzeene mwihinalawé, maana amana ofiya wa namaphuka ontta omuuza namweekesela ootthe nkalapooso. ⁵⁹ Miiyo kiniwuuza khweele yoori khunlaamo ohiripheeni khapula.”

13

Othupwiya ama ofwa

¹ Wakathi aya opule, atthu aariivo khumuza Yinsa yoori Pilaatu awoola atthu akina a Kalileya wakathi aari orettaavo twaha zaya. ² Yinsa khuwaajipu yoori: “Mweeyo mwinoona yoori akalileya apo aari anatwampi zayita atthu akina, mwaasa woohoowa toowo? ³ Miiyo kiniwuzani yoori: wala! Apho amana na-mweyo mwihithupwiyi twampi zenu, mooshi mwintta opwetheya nkama yo. ⁴ Ama mweeyo mwinaakanyera yoori apale khumi na wanaane yaawaakweliyeeyo korofwa ya Siloowe aari anapaathuli zayita apale aniikhalaaye Yeruzaleemu? ⁵ Wala! Kiniwuzani theenya yoori amana mwihithupwiyi twampi zenu mooshi mwintta opwetheya nkama etthiipo na-yo apwetheyiyeezo.”

Mfikeera woohiimi

⁶ Aphano Yinsa khulupa nlikaniso opu onraaye: “Mwinyi mmote aarina mfikeera awe aazaliyeeyo mmashapa mwawe. Khulankha olawa oshuma mishumo zaya, hatha mmote khuhisikanimo. ⁷ Aphano khumuza namalimela nshapa ntthile yoori: ‘Kina nyaakha mittatthu kitaaka oshuma, kihisikanakamo hatha ethu. Okakatte! Mwaasa wa ethu-ni ottiyelelaka puuro ya mahala?’

⁸ Ila karumeyaawe otule khunjipu araka: ‘Mbwana, kinuuvekelani yoori mwilikhe mfikeera opu wiiye nttumphu mpakha mwaakhani; miiyo kintta othipa nshini mwaya kisala kiitthela vitutu. ⁹ Mwaakha nkina amana wiima mishumo ti yooshapweya; amana ohiimi okakatte.’”

Muukha Woovonisiwa Saapatu.

* **12:50** ‘Eu seja batizado com um certo batismo’ khwa luuka ya kereeku.

¹⁰ Siikhu ya saapatu, Yinsa eetta osomisa nnyupa moote yoosifwiwamo Nnyizinku. ¹¹ Nttumphule aarimo muukha aari ohoochiwaaye ti sheethwani khwa nyaakha khumi na minaane, aari wookhutupuwa ahaari owahaaye wookowa. ¹² Wakathi Yinsa amooniyeevo khunkhuwela khumuuzo yoori: “Maama mwavona orati enu.”

¹³ Yinsa khunttheela makhono nunu otule omuuta otthuupule khookowa, khwaaza otthapa ansifwaka Nnyizinku. ¹⁴ Ila haakhimu wa nyuupa yoosifwiwamo Nnyizinku khwiya wa wiiphiiriwa mwaasa wa Yinsa ovonisa siikhu ya saapatu, ti eto aawooziyeeyo atthu yoori: “Ziwaapho siikhu sitha zookhola khaazi; mwisala mwita siikhu etthiipo yoori mwivonisiwe, ila saapatu wala.”

¹⁵ Aphano Mbwana khujipu araka: “Manaafikhi! Paani mmote wa mweyo anraaye efiye saapatu khuhifikuli mompe zawe na apuuru awe olawa onywisa maati? ¹⁶ Nunu otu peewu ya Eburahiima, eettiye ofukiwa ti Epiliisi khwa nyaakha khumi na minaane, nanna-ni ahaari weettelaaye otaphuliwa mwaasa wa wiiya saapatu?”

¹⁷ Alupiyeevo mattakhuzi apale, maatuwi awe Yinsa ooshi khuwaapattha haaya, atthu ooshi aariivo khwiya oofurahi mwaasa wa vitthu zooshapweya epile aari oreetaazo Yinsa.

Nlikaniso wa phunje ya mfikeera na Fwaramento

¹⁸ Yinsa khulupa yoori: “Ofwalume wa Nnyizinku onlattana na niini, wala kilattisane niini? ¹⁹ Opo ori nkhamma phunje ya mfikeera, mwinyi mmote anthuulaaye khulawa khuzala mmashapa mwawe. Khuwula khwiya muuthi nwulweene, anyannyi o'otulu khusala ajekamo viaaro zaya nvirapi mwaya.”

²⁰ Yinsa khulupa theenya araka: “Ofwalume wa Nnyizinku walattana na niini? ²¹ Opo ori nkhamma fwaramento muukha anthuulaaye khuttha ofu koopho ttatthu, khujakuwa wooshi.”

Nlako woophunyeya

²² Yinsa eetta ovira anozelaka nsitati na miti mikina za waatta eettaka Yeruzaleemu. ²³ Ntthu mmote khumuuzela yoori: “Mbwana, vattithiiru atthu anttelaaye wuusurukha?”

²⁴ Yinsa khunjipu araka: “Mwijilipse yoori mwivire vanlako woophunyeya, maana a waatta anlawa eekese ovira ila khanteela owahi.

²⁵ Mwennyewe nyuupa amana alankha afuka nlako awe, mweeyo mwinsala vaje mwipiyaka nlako na mwivekaka yoori: ‘Mbwana mwinifukulele!’

Ye ontta wuujipuni araka: ‘Akinjuwa ohali mwinlankhaawo.’

²⁶ Aphano mwinlawwa mwalupe yoori: ‘Naja vamote, khunywa vamote na wanozela mmuti mwetthu.’

²⁷ Ila ye onlawa ajipu yoori: ‘Akinuujuwani wala ohali mwinlankhaawo akinjuwawo, mwikisuse mweeyo anamarettu zootakhala.’

²⁸ Mwinlawwa mwamoone Eburahiima, Esiyaakha, Yaakhumpa na manapiyu ooshi ari muufwalume wa Nnyizinku, ila mweeyo mwiikareliwe oje. Attaapho onlawa weeyevo olila na oluma meeno. ²⁹ Atthu anttela olankha malawa-njuwa akina okhu lintupweelaawo njuwa, kusini na kashikhazini ate eekhale vameeza woofwalume wa Nnyizinku. ³⁰ Miyo kiniwuuzani khweele yoori, awaapho amwanzo anttelaaye wiiya awiishela, na awiishela anttelaaye wiiya amwanzo.”

Yinsa onoonela huruma Yeruzaleemu

³¹ Wakathi otthuupule khutavo mafwarizeewu khumuuzo Yinsa yoori: “Oleovo apha, maana Erooti ontakha owuula.”

³² Ye khuwaajipu yoori: “Mwilawe mwamuuze nanthala aya oto yoori: Leelo na meesho kiniikara masheethwani na owaavonisa alwele, siikhu yattaathu kintta wiishisa khaazi yaka. ³³ Enhithajiya, leelo, meesho na nrotto ovira kilawaka; maana weekhwhee khaavo napiyu amfwaaye nti nkina woohiiyi Yeruzaleemu!

³⁴ Yeruzaleemu, Yeruzaleemu, oniwoolaaye manapiyu na owaavonya anamalaleya apale omperekheziwaaye! Swaafu kavi miiyo kitakhaka owaakusanya aanaawo nkhamu mwanakhu aniwaakusanyaazo aanaawee mmapaphelo mwawe, ila weeyo khuhitakhi? ³⁵ Apho moone yoori nyuupa yenu enttela wiiya puuro yoohiikhaliwi. Weekhwhee kiniwuuzani yoori khamwinteela okoona theenya mpakha wakathi mwinttelaaye olupa yoori: ‘Attottopeliwe otule antaaye khwa nzina la Mbwana!’ ”

14

Ovonisa nkina Siikhu ya Saapatu

¹ Saapatu moote, Yinsa aalawiye wa ntunkhulu mmote wa mafwarizeewu olawa oja, atthu aari ntumphule khusala amweekesela Yinsa. ² Attaaphale aariivo, arivo mwinyi aavipiyeyo mwiili awe wooshi. ³ Yinsa khuwoozela mafwarizeewu na anamanozela a kano araka: “Enkhupaleliwa onvonisa nlwele saapatu ama wala?” ⁴ Ila yo khwiya oonyamala. Attaaphale, khunkhola mwinyi otule nkhone awe, khunvonisa khumuuzza olawa safwari zawe.

⁵ Aphano khuwoozela yoori: “Paani wa mweyo anraaye amooniye mwanawe ama mompe yawe ekweliye vanlipu khuhilazivo nasaapiru eri saapatu?”

⁶ Yo khuhiwahi ojipu.

Ojipushuwisa na omakeleya.

⁷ Wakathi ajuwiyevo yoori atthu apale aalaleyiweeyo njampo aari othawula puuro za wiilokozi, Ye khulupa nlikaniso opu: ⁸ “Amana olaleyiwa njampo la harusi, ohithawule puuro etile ya wiilokozi, maana khinjuweya alaleyiwe ntthu wootepa oshitahiwa zayita weeyo. ⁹ N'oota otule oolaleyiyeeyo ontta owuuza yoori: ‘Puuro eto omwinkhe otu’. Attaaphale weeyo oniiya woopatthiwa ti haaya olawaka wiikhala puuro ya wiishela. ¹⁰ Ila amana olaleyiwa ona yawiikhala puuro ya wiishela, n'oota otule oolaleyiyeeyo ontta owuuza yoori: ‘Swaahipu, ote wiikhale puuro eti ya wiilokozi’. Aphano, weeyo ontela wiiya woohishimiwa venkivene vakatthi wa ananlaleyiwa ooshi. ¹¹ Maana wakhula otule anjiwulisaaye ontta opushuwisiwa na otule anjipushuwisaaye ontta owulisiwa.”

¹² Attaaphale Yinsa khumuuzza mwinyi otule anlaleyiyeeyo yoori: “Amana wiiyana ethu-yoojiwa yawo ama njampo lawo ohiwalaleye attwiizo, ashirikhaawo, ajamaazo ama anamwaattamanani awo oothaaajiri, yoori nayo ahuulaleye wumpuwa nkhamu oriphana. ¹³ Ila amana wiiyana njampo owaalaleye asikhini, anamarakala na atthu oochooni. ¹⁴ Toowo oparikhiiyiwa ontela wiiya wawo, maana apo aya khanlawa wiiyana ethu yawuurutisela. Oraphiwa wawo ontela ota siikhu yoosisimuliwa anashariya.”

Nlikaniso wa njampo liwululene

¹⁵ Nthu mmote wa atthaapale aariina vameeza asiiliyevo mattakhuzi apale khumuuzza Yinsa yoori: “Ooshapweyiwa pi apale anttelaaye oja njampo l'oofwalume wa Nnyizinku.”

¹⁶ Aphano Yinsa khujipu yoori: “Mwinyi mmote aarina njampo lawe khuwaalaleya atthu a waatta. ¹⁷ N’oofiya wakathi khunruma karumeyaawe olawa owooza anamalaleyiwa yoori: ‘Mwite, zalikana.’

¹⁸ Ila wakhula mmote khwaaza olupa tafwawuthi zawe, wamwanzo khulupa yoori: ‘Keetta wuuzanya nshapa laka, apha kinttela woona, kinveka nswammaha.’

¹⁹ Waphiiri khulupa yoori: ‘Keetta wuuzanya mompe khumi zoolima, kintakha kilawe keezelele, kinveka nswammaha.’

²⁰ Wattaatthu khuri: ‘Kintta wiisharu oolola, akinwahi olawa.’

²¹ Karumeya otule khuruti khulawa khumuza mbwanaawe vithu epile. Mwennyewe njampo khwiya wa wiiphiiriwa khulupa yoori: ‘Waakuve olawe mmatarikhi na mmamuti wa sitati wawaatiise anamarakala, asikhini na apale oofoonni.’

²² Karumeya otule n’ooruti khulupa yoori: ‘Mbwnana, karetta epile mwaakirumiyeego, ila nalelo zinsala puuro.’

²³ Mbwnanaawe khumuza yoori: ‘Olawe mmatarikhi khuulu na mmamipiitelo, wa waakhanyarele apale onttelaaye owaasikana ate eetaale vaje vaka. ²⁴ Kiniuuuzani yoori khaavo khwa apale aalaleyiweeyo anttelaaye oja njampo laka.’ ”

Nanna ya wiya namalottela wa Yinsa

²⁵ Siikhu moote, atthu a waatta eetta onlottelela Yinsa, Ye khuzukuluwa khuwooga yoori: ²⁶ “Otule antakhaaye okilotta, ona yookipheta channu zayita papaawe, mamaawe, muukhaawe, aanaawe, attwiize, alupuwe, ama ohaayi awe, n’oohiretti etthiipo khaniyya nakhiyoni aka. ²⁷ Wakhula otule ahinhuulaaye nsalapa awe akilotta khaniyya nakhiyoni aka.

²⁸ Paani wa mweeyo anraaye atakhaka ojeka korofwa yawe, ahinaazaaye wiikhala khapula attheela hisapu vithu zintakhaavo oona nkhamma onwahi wiishisa? ²⁹ Ahirettiru etthiipo, ye onta waaza ila khaniishisa. Atthu apale anttelaaye omoona antta ontheaya alupaka yoori: ³⁰ ‘Mwinyi otu aaza ojeka ila khanwahi wiishisa.’

³¹ Ama mfwalume-ni anraaye alawaka wuumana viittha na mfwalume nkina khuhuaazi wiikhala khapula apheleleza na anajanka awe apale alufu khumi, nkhamma anlawa awaakhitiri apale alufu eshiriini anttelaaye wumanana? ³² Amana ahiretti toowo, apale ahinafiye ari peetiwene nalelo, onta onruma waziri awe olawa owaavekela heeri. ³³ Khwa nanna etthiipo wakhula mmote wa mweyo ahinlikhaaye epile ariinaazo khansuhi wiyya nakhiyoni aka.

³⁴ Mwiinyu ona fwayita, khi mmana olikha onyuunya onrutiseleya toovi onyuunya waya? ³⁵ Khunretteliwa etthu wala mmashapa ama shituruumu, onta wiitthiwa.

Otule ariina mashiilo, ti asiile.”

15

Pwittipwitthi ya waashikha

¹ Wakathi nkina anamariphisa lumpuru na anatwampi khusala ata oteela onsiila Yinsa. ² Mafwarizeewu na anamanozela a kano khusala aapa araka: “Mwinyi otu oniwaapokherela anatwampi khusala aja vamote na-yo.”

³ Aphano Yinsa khuwooga nlikaniso mmote araka: ⁴ “Paani mmote wa mweyo anraaye arina pwittipwitthi zawe miiya khumwaashikha moote, khuhilikhi ntthuttu epile tiisiini na tiisiya zisaliyeezo, eettela etile moote emwaashikhiyeeyo mpakha opattha? ⁵ Amana asikana onta ovikela ari

woofurahi,⁶ khusala arutela owawe. N'oofiya oniwaakhuwela maswaahipu zawe na anamwaattamanani awe awooze yoori: 'Nlaweni nitthape, maana kapattha pwittipwitthi yaka etile yaakaashikhiyeeyo.'⁷ Khwa nanna ethiipo kiniuuuzani yoori ontela wiiyawo otthapa nwulweene pinkuuni mwaasa wa natwampi othupwiya, zayita atthu tiisiini na tiisiya anashariya ahinhithajiyaae othupwiya.'

Nzurukhu wa waashikha

⁸ Kuvira araka: "Ama muukha-ni anraaye arina nzurukhu awe khumi, khumwaashikha mmote khuhikhozi khantteya aseela nnyupa mwawe, eekesa w'aakhilivo mpakha opattha?"⁹ Amana apattha oniwaakhuwela maswaahipu zawe na anamwaattamanani awe awooze yoori: 'Nlaweni nitthape, maana kapattha nzurukhu aka opule waakaashikhiyeeyo.'¹⁰ Miyo kiniuuuzani yoori eniiyavo furaha khuluyeene vakatthi wa malayikha a Nnyizinku mwaasa wa natwampi mmote othupwiya."

Nlikaniso wa mwaana wa waashikha

¹¹ Yinsa khurutela theenya yoori: "Aarivo mwinyi mmote aariina aanaawe awiri.¹² Otu ntiitthi aya khumuuzu papaawe yoori: 'Paapa, mwikinkhe lifunku la erathi yaka.' Papaawe khuwaawanyela maali epile aanaawe.

¹³ Oviriyeevo wakathi vattithiiru, mwaana otule ntiitthi khuthuula maali zawe epile aawanyeliweeo khulawa tuniya kiina ya woolepawo. Ottuukho khuharipu maali zawe epile khwa mwentto woololo.¹⁴ N'ooharipu zooshi khupuwa jala ya waatta mmuti mwaya mphule, ye khusala ahankayikha.¹⁵ Khulankha mpakha wa mwinyi mmote wa tuniya ethiitile khunvekela khaazi, ye khumwinkha oshukisa kuluwe zawe ntthuttu.¹⁶ Ye aari ohithajiya oja vitthu epile zaari ojivaazo pi kuluwe na khaavo aari omwinkhaaye etthu-yoojiwa.

¹⁷ Khujipayini khuri: 'Anakhaazi a paapa ana etthu-yoojiwa yoowaafiyela, miiyo kiri okhuno entta okikhola jala.¹⁸ Kintta olankha kilawe wa paapa khamuuze yoori: Paapa, kakosa mmakhono wa Nnyizinku na mmakhono mwenu.¹⁹ Akinsuhi theenya wiitthiwa yoori ki mwanenu, mwikipokherele nkhamma mmote wa anakhaazi enu.'²⁰ Khulankha khusala alawa mpakha wa papaawe.

Nalelo ari peetiwene papaawe khumoona, khwiyyana huruma khuluyene khusala antthirela khulawa khumpatikha na khumpejari.

²¹ Attaaphale mwaana otule khumuuzu papaawe yoori: 'Paapa, kakosa mmakhono wa Nnyizinku na mmakhono mwenu. Akinsuhi wiitthiwa yoori ki mwanenu.'

²² Ila papaawe khuwooza akarumeya awe yoori: 'Mwaakuve, mwitiise kuwo zooziti oshapweya mwinwalise. Na peetthe mwinwalise nzaala mwawe na shapattho mmoolu mwawe.²³ Mwilawe onzizi mwanthuule mwaana wa mompe otule eesheliyeeyo oneneva mwite mwishije, nirette njampo la furaha.²⁴ Mwaasa yoori mwanaka otu aafwiiye apha ori haayi; aashikhiye apha apattikhana.' Khwaaziwa njampo.

²⁵ Epo zaari orettikhana mwaana otule nwulu ari omashapa. Khuta mpakha kharipu na vaje, khusala asiila koma zeettaka ovuma na atthu eettaka wiina.²⁶ Aphano ye khunkhuwela karumeya mmote wa vaje attaaphale khumuuzela niini yaari orettikhanaaye.²⁷ Ye khumuuzu yoori: 'Ttwiiyo ti ye arutiyeeyo, papaawo khunshijela mwaana wa mompe otule eesheliyeeyo oneneva, mwaasa wompokherela ari haayi.'

²⁸ Mwaana otule nwulu khwiiphiriwa khuhisala atakha oviramo. Attaaphale papaawe khusaruwa khusala ankhanyarela.²⁹ Ila ye khumuuzu

papaawe yoori: ‘Moone! Nyaakha za waatta kuurumeyelakani, wala aki-nakhijilele hatha nttakhuzi lenu limote. Ila khamwinakinkhe hatha puuzi moote yoori kirette njampo na ashirikha aka.’³⁰ Arutiyeovo mwanenku oto aharipwiyeeyo vitthu zenu na amalempe, mwanshijela mwaana wa mompe otule wooneneva aya.’

³¹ Aphano papaawe khumuza yoori: ‘Mwanaka! Wakhula siikhu oniiya vamote na-miyo, wakhula etile kiriina ti yaawo.’³² Ila yaari ohithajiya oretta njampo la furaha, mwaasa yoori ttwiyo aafwiye apha ori haayi, aashikhiye apha apattikhana.’”

16

Nlikaniso wa namalokozela wa anakhaazi woohaamineyi

¹ Yinsa khuwooza anakhiyoni awe yoori: “Aarivo mwinyi mmote wa thaajiri aariina namalokozela wa anakhaazi awe, khuuziwa yoori: ‘Na-malokozela otule ontta ohariju maali zawo.’² Ye khunkhuwelisa khu-muuzela yoori: ‘Niini epi kinsilaazo onrettaazo weeyo? Otiise warakha za kontha koone etthu oretteliyeyo nzurukhu aka. Maana khunteela orutela wiiya namalokozela wa anakhaazi.’

³ Namalokozela wa anakhaazi otule khuupuwela toono: ‘Kinttela oretta-ni mbwanaaka amana akilikhisa khaazi? Othipa akinkhitiri na olawa olola enikipattha haaya.’⁴ Aa, kajuwa etthu yooretta yoori amana kiikariwa atthu akipokherele mmavaje mwaya.’

⁵ Aphano ye khuwaakhuwela ooshi apale aari wiiliwaaye ti mbwanaawe. Khumuuzela otule wamwanzo yoori: ‘Oniwiila kavi mbwanaaka?’⁶ Ye khujipu yoori: ‘Onikiila ttompwiyo miiya za mafuttha.’

Namalokozela wa anakhaazi otule khuri: ‘Teeni yawo ti eti eriye vawarakha apha, wiikhale waatikhe hamusiini.’

⁷ Elottelanaka khumuuzela otule waphiiri yoori: ‘Khi weeyo oniiliwa kavi ti mbwanaaka?’ Ye khujipu yoori: ‘Kiniliwa miphimo miiya za tiriku.’ Namalokozela wa anakhaazi otule khumuza yoori: ‘Teeni yawo eti eriye vawarakha apha, waatikhe thamaaniini.’

⁸ Aphano mbwanaawe khunttottopela namalokozela wa anakhaazi otule woohaamineyi mwaasa wa akhili epile aariinaazo. Miiyo kiniuuuzani yoori, atthu a voolumwenku apha ana akhili za waatta mmenttezi mwaya, zayita atthu apale aneettetaaye nnuuru.’⁹ Apho kiniuuuzani yoori: mwirumeyele maali zenu za voolumwenku apha zoohiiyi za shariya yoori mwiiwaapatthe ashirikha, amana ziwiishelani yo oopokhereleni pinkuuni.

¹⁰ Otule anaamineyaaye khwa etthu ttiitthiiru onaamineya khwa etthu khuluyeene; otule ahinaamineyaaye khwa etthu ttiitthiiru hatha etthu khuluyeene khanaamineya.’¹¹ Nkhamma khamwaamineyeeni na maali za voolumwenku zoohiiyi za shariya, paani anttelaaye owaaminini na maali zookhweele?’¹² Nkhamma khamwaamineyeeni na vitthu za watthu, paani anttelaaye owinkhani etthu enttelaaye wiiya yeenu?

¹³ Khaavo karumeya anwahaaye owaarumeyela a mbwana awiri, mwaasa yoori ontta omwiiphiirisa mmote, antovelise otu nkina; ama oniiya wa waamineya khwa otu mmote, antarawu otu nkina. Khinwaheya on-rumeyela Nnyizinku na Nzurukhu.”

¹⁴ Mafwarizeewu apale oopheta nzurukhu na kuvu, n'oosiila mattakhuzi apale khusala antheya Yinsa antarawaka.’¹⁵ Aphano Ye khuwooza yoori:

“Mweeyo pi apale oojoona wiiya anashariya vakatthi wa atthu, ila Nnyizinku onjuwa rooho zenu. Etile atthu anoonaaye wiiya ya fwayita, omaasho wa Nnyizinku ti yootaraweya.

Owahi wa Kano

¹⁶ Kano na manapiyu khazilikheleenei mpakha wakathi wa Yaahaya. Waaza wakathi otthuupo hapari za Ofwalume wa Nnyizinku zinvira zilaleyiwaka, wakhula ntthu onjilipisa yoori eettemo. ¹⁷ Ti yookhweya pinku na vathi wiisha zayita olaziwavo alama ttiitthiiru ya ntakhuzi la kano.

¹⁸ Wakhula nlume animwaashaaye muukhaawe khunrala muukha nkina ontta oraruwa; na aninralaaye muukha otule wa waashiwa na-ye ontta oraruwa.”

Thaajiri na Laazaru

¹⁹ Yinsa khurutela olupa theenya yoori: “Aarivo mwinyi mmote wa thaajiri aari owalaaye kuwo zooshapweya na zootafikhana, na wakhula siikhu eetta opuha, owawe yaari wiipikhiwaho etthu-yoojiwa ya nnofu. ²⁰ Vanlako wa thaajiri otule aattattikheliwevo masikhini mmote wa waatta makhwatta aari wiitthiwaaye Laazaru. ²¹ Aari ohithajiya oja tathela zaari okwaazo vameeza wa thaajiri otule, anapwa khusala ata olapa makhwatta awe.

²² Masikhini otule khufwa, khuthuuliwa pi malayikha khulawa khwiyya vamote na Eburahiima. Na-ye thaajiri otule khufwa khulawa khuzikhiwa.

²³ Motthooni okhule eettaka woona shaani, ye khulansa maasho awe khweekesa otulu khumoona Laazaru ari mpavu wa Eburahiima. ²⁴ Ye khusala akhuwa araka: ‘Paapa Eburahiima, kooneleni huruma! Mwinrume Laazaru anaanise yaala yawe na maati ate azizimise nlimi laka, maana kintta ohukhumweya vamootho apha kiriivo.’

²⁵ Eburahiima khunjipu yoori: ‘Mwanaka, omfwahamu yoori muuhaayi mwawo waapokheriye vitthu zooshapweya, ila Laazaru muuhaayi mwawo eetta ohoowa. Aphano ye asithirikha, weeyo ontta ohoowa. ²⁶ Olikha eto, vakatthi vetthu yatthiiwavo khilintti khuluyeeene ehinlokheyaaye ntthu olankha okhuno ataaka okho wala okho ataaka okhuno.’

²⁷ Thaajiri khulupa yoori: ‘Paapa Eburahiima, safwatali kinuuvekelani yoori mwinrume Laazaru alawe wa ajamaazaku, ²⁸ kinaaye attwiizaku athaanu alawe awooze yoori ahipatthe ota okhuno kiriwo woohoowiwawo.’

²⁹ Eburahiima khunjipu yoori: ‘Attwiizo anaaye kano za Munsa na kithaapu za manapiyu, asiileze ethiipo.’

³⁰ Thaajiri khukhanyarela araka: ‘Wala paapa Eburahiima! Amana ntthu asisimuwa muufwa alawa awooza, antta othupwiya.’

³¹ Eburahiima khujipu yoori: ‘Ahisiileziru kano za Munsa na za manapiyu, hatha nkama ntthu eetta osisimuwa muufwa, yo khanteela okhupali.’ ”

17

Twampi na nswammaha

¹ Yinsa khuwooza anakhiyoni awe yoori: “Enteela opuwa vitthu zinteealaaye owaakwisela atthu ntwampi, ila atakhaliwa otule anttelaaye othowelela. ² Afwataali ntthu otupweeziwa mpahari afukeleliwe liwe liwululene mmwisiko, ehiyeeeni owaathowelelisa apele eeyiye oohikhomaali.

³ Mwiiyane ophoole: ttwiyo amana ookosa, onshowere; amana athupwiya, onswaamihi. ⁴ Amana ookosa swaafu sapa siikhu moote, na wakhula swaafu khusala ata olupa yoori: ‘Kathupwiya’, onswaamihi.”

Weekezelawa wa amini

⁵ Maaswihaapa khunvekela Yinsa yoori: “Mbwana, weekezele amini yetthu!”

⁶ Mbwana khujipu araka: “Eriwaka amini yenu yeettiye wiiya nkhamma phunje ttiitthiiru ya muuyu, mweetta wuuza muutthi opu yoori: ‘Okhuleye watupweele mpahari,’ opo weetta wuushututelani.”

⁷ Yinsa khuvira alupaka yoori: “Paani mmote wa mweyo anraaye nakhaazi awe woolima, ama wooshukisa pwittipwitthi ntthuttu, eettaka otaru animuzaaye yoori: ‘Ote niikhale vameeza apha nijel’” ⁸ Kinoona yoori khaavo! Ila khapula onimuza yoori: ‘Wiipikhe etthu-yoojiwa, owale kuwo zawo okirumeyele kijaka na kinywaka. Aphano amana kiisha na weeyo oje na onywe!’ ⁹ Karumeya otule oninsuhi oshukhurweliwa mwaasa wooretta etile aarumiweeyo? Kinoona yoori wala! ¹⁰ Etthiipo na-mweyo, amana mwiretta epile mwirumiweezo, mwina yoolupa yoori: ‘Naakarumeya oohi-inna maana; narettta etile naariina yooretta paasi.’”

Yinsa oniwaavonisa anamakuttula khumi

¹¹ Yinsa eettaka Yeruzaleemu, aaviriye enakathhi-nakatthi ya Samariiya na Kalileya. ¹² N'oofiya nti aya opo, khuta anamakuttula khumi khweemela peetiwene ¹³ khusala ankhuwela araka: “Yinsa, Mwanliimu, noonele hruma!”

¹⁴ Ye n'oowoona khuwooza yoori: “Mwilawe mwajithoonyeze wa ma-haakhimu a tiini.” Eettaka olawa ethiipile, yo khwiya oovona.

¹⁵ Mmote wa apale khumi, nawoona yoori avona, khuruti ansifwaka Nnyizinku na huula yoonyakula. ¹⁶ Khukokhora khufiyisa ajihi yawe vathi, khunshukhurwela Yinsa; ye aari nsamariiya.

¹⁷ Yinsa khumuuzela yoori: “Khahi atthu khumi avoniyeeyo? Khi apa akina tiisiya ari vayi?” ¹⁸ Khaavo awahiyeeyo oruti oteela onshukhurwela Nnyizinku, woohiiyi otu wa malaponi?” ¹⁹ Yinsa khumuza yoori: “Olankhe olawe amini yawo yauusuru.”

Matelo a Ofwalume wa Nnyizinku

²⁰ Yinsa eetta wuuzeliwa pi a mafwarizeewu wakathi waari weettelaavo ota Ofwalume wa Nnyizinku. Ye khujipu araka: “Ofwalume wa Nnyizinku otaaka khunttelu wiiya etthu enooneyaaye. ²¹ Khina anttelaaye olupa yoori: ‘Moone, opu ori apha!’ ama ‘Opule oriye okhule!’ Maana ofwalume wa Nnyizinku ori vakatthi venu.”

²² Attaaphale khuwooza anakhiyoni awe yoori: “Ontela ofiya wakathi mwinttelaaaye otakha wiiyana vamote nenkawu siikhu moote Mwaana wa Pinaatamu, ila ehisala ewaheya. ²³ Akinoko anlawa alupe yoori: ‘Ori okhule!’ ama ‘Ori apha!’ ila mwihilankhe olawa omweekesa. ²⁴ Nkhama ethiipo taari enzerimaaye phantte moote yeettaka phantte kiina, enteela wiiya ethiipo siikhu anttelaaye ota Mwaana wa Pinaatamu. ²⁵ Ila mwanzo ye ona yoohoowa venkivene na okatthaliwa pi atthu a leelo.

²⁶ Nkhama zaarettikhaniyeozy wakathi opule wa Nuuhi, enttela oret-tikhana ethiipo wakathi wa Mwaana wa Pinaatamu. ²⁷ Atthu eetta oja na onywa, na oralana, mpakha siikhu Nuuhi aapakhiriyeeyo mmwaarakka, khuta nnyeri ooshi khufwa.

²⁸ Nkhama zaarettikhaniyeozy wakathi wa Loothi. Atthu eetta oja na onywa, wuuzanya na wuuzanyisa, ozala na ojeka manyupa aya. ²⁹ Wakathi Loothi aliiyeewo Sotooma, khukwa vuula pinkuuni ya moottho na oka, khuwoola atthu ooshi.

³⁰ Enttela orettikhana ethiipo siikhu anttelaavo ota Mwaana wa Pinaatamu. ³¹ Siikhu yaya eto, otule anttelaaye wiiya vatulu wa nyuupa

ahiishukhe yoori alokotthele vitthu ziriiye nnyupa mwawe; otule anttelaaye wiiya ntthuttu ahirutele onti. ³² Mwimfikhirele muukha wa Loothi! ³³ Otule antakhaaye wuusuru ohaayi awe ontta ompwetheya, ila otule onimpwetheya ontta wuusuru. ³⁴ Miyo kiniuuuzani yoori: osikhu wa siikhu ethiitile, atthu awiri oorapalela olili mmote, onttela othuuliwavo mmote asalevo mmote. ³⁵ Atthu awiri achilaka tiriku, onttela othuuliwavo mmote asale mmote. ³⁶ [Atthu awiri ari mmashapa, onttela othuuliwavo mmote asale mmote.]^{*}

³⁷ Yo khumuuzela Yinsa yoori: "Mbwana, enttela orettikhana vayi?" Yinsa khuwaajipu yoori: "Vahali aniiyaavo muufwi, anakhuku aniiya attaapho."

18

Nlikaniso wa namaphuka wootakhala rooho

¹ Yinsa khuwoza anakhiyoni awe nlikaniso mmote yoori aarina yoolompa woohilikheleli wala woohinyoonyeyi. ² Ye khulupa yoori: "Sitati moote aariwo namaphuka mmote ahaari omoovaaye Nnyizinku, wala ahaari onshitahaaye ntthu. ³ Sitati ethiitile aariwo nunu mmote woofweliwa ti mannawe aalawiiyeeyo onvekela namaphuka otule araka: 'Okaawanyele haakhi khwa muumani aka.'

⁴ Khunkatthalela wakathi mwinkeene, ila omwiisho waya khusala alupa nroho mwawe yoori: 'Nakihimoovi Nnyizinku na ohinshitahi ntthu, ⁵ nunu otu aaza raku okantipu; kintta omwaawanyela haakhi na paathuli yoori ahirutele okiwuti.'

⁶ Mbwana Yinsa khuvira alupaka yoori: "Mwisileze saana ethu anlupaaye namaphuka otu woohiiyi wa shariya. ⁷ Nnyizinku khaniwaawanyela shariya ananthawuliwa awe apale aninvekelaaye nthana na osikhu, hatha nkhamma Ye eetta orupaza owaajipu? ⁸ Kiniuuuzani yoori Ye oniwaawanyela shariya woohirupazi. Aphano Mwaana wa Pinaatamu wakathi anrutelaavo voolumwenku apha, onteela osikanavo amini?"

Nlikaniso wa mfwarizeewu na namariphisa lumpuru

⁹ Yinsa khulupa nlikaniso mmote awoozaka atthu apale aari ojoonaaye wiiya makhaamili khusala awaatarawu azaaya. Ye khuri: ¹⁰ "Alume awiri aaviriye Nnyupa wa Nnyizinku khusala alompa; mmote aari mfwarizeewu, nkina aari namariphisa lumpuru. ¹¹ Mfwarizeewu ari wa weemela, aari olompa nkaththi-nkatthi araka: 'Nnyizinku, miiyo kinuushukhurwela maana miiyo aki nkhamma atthu, apale oheettelteli shariya, malatarawu anamararuwa, wala nkhamma namariphisa lumpuru oto ariye apho. ¹² Miiyo kimfuka siikhu piiri wakhula sumana na kininkha zaakha khwa lifunku lakhuumi ya wakhula etile kimpattaaye.'

¹³ Ila namariphisa lumpuru eemeliye peetiwene, ye hatha khaari wiinuwa yoori eekese otulu, ila ajipiyaka veefuwa aari ori: 'Oo Nnyizinku koonele huruma, miiyo ki natwampi.'

¹⁴ Miiyo kiniuuuzani yoori, namariphisa lumpuru aalawiye owawe ari woohakikhiwa ti Nnyizinku, ila otule woojikhupali wala. Maana otule anjiwulisaaye ontta opushuwisiwa, ila otule anjipushuwisaaye ontta owulisiwa."

Yinsa oniwaaparikhya asimaana

¹⁵ Atthu akina khusala awaatiissa asimaana yoori asapiwe ti Yinsa. Ila anakhiyoni awe n'oowoona khusala awaamaruwela. ¹⁶ Ila Yinsa

* ^{17:36} Warakha za raku khina aaya eti ya 36.

khuwaakhuwela asimaana apale araka: "Mwiwaalikhe asimaana akiteele miiyo, mwihiwakhattaze; maana Ofwalume wa Nnyizinku pu waaya apale eeyiye nkhamma asimaana. ¹⁷ Miiyo kiniuuuzani khweele yoori wakhula otule ahimpokherelaaye Ofwalume wa Nnyizinku nkhamma nsi-maana, khanteela weettamo."

Thaaajiri na Yinsa

¹⁸ Ntunkhulu mmote khumuuzela Yinsa yoori: "Mwanliimu woosaana, kirette niini yoori kipatthe ohaayi wa mileele?"

¹⁹ Yinsa khunjiyu araka: "Mwaasa wa niini okikhuelaka yoori woosaana? Khaavo ntthu woosaana woohiiyi Nnyizinku paasi. ²⁰ Weeyo onjuwa mirumo za Nnyizinku: ohiraruwe, ohuule, ohiiye, wala chilawele oshaahiti woovonyeya, onhishimu papaaowo na mamaawo."

²¹ Mwinyi otule khujipu yoori: "Waaza osimaana aka zooshi epo kinretta."

²² Yinsa n'ooosiila mattakhuzi apale khumuuzza yoori: "Enuusaleela etthu moote. Wuuzanyise vitthu zawo zooshi nzurukhu aya owenkhe asikhini, toowo ontta wiiyana maali pinkuuni; nawiisha ote okilotte."

²³ N'ooosiila mattakhuzi apale khwiya woozinkuwa venkivene, mwaasa yoori ye aari thaajiri nwulweene. ²⁴ Yinsa n'oomoona yoori azinkuwa khulupa yoori: "Nanna enlipaazo thaajiri weetta muufwalume wa Nnyizinku! ²⁵ Ti yookhwuya enkamiiya ovira valiphotto la sikano zayita thaajiri weettamo muufwalume wa Nnyizinku."

²⁶ Apale aari onsiilaaye khumuuzela yoori: "Nkhama pi toowo, paani anwahaaye wuusurukha?"

²⁷ Yinsa khujipu yoori: "Etile pinaatamu ahinwahaaye Nnyizinku on-wahi."

²⁸ Aphano Pheeturu khumuuzza Yinsa yoori: "Woone! Fweeyo nalikha vitthu zetthu zooshi, khusala nuulotta."

²⁹ Yinsa khujipu araka: "Miiyo kiniuuuzani khweele yoori, wakhula otule anlikhaaye nyuupa yawe ama muukhaawe, ama attwiize ama apapaze, ama aanaawe mwaasa wa Ofwalume wa Nnyizinku, ³⁰ oto onteela opokhera venkivene vathi attaapha, na omwiisho waya apokhere ohaayi wa mileele."

Yinsa oniwooza anakhiyoni awe ofwa na osisimuwa wawe

³¹ Yinsa khuwaakuwelela othetekeli anakhiyoni awe apale khumi na awiri khuwooza yoori: "Mwisiileze! Apha nintta Yeruzaleemu, ottuukho zinttelaaowo orettikhana zooshi epile zaatikhieeyo pi manapiyu monkonni wa Mwaana wa Pinaatamu. ³² Ye onttela winkheleliwa mmakhono wa amalapo, antheye, anveyise, antthememe, ³³ anjaphe na amuule. Ila siikhu yattaathu onttela osisimuwa."

³⁴ Anakhiyoni awe khuhiveeleyi mattakhuzi aya apale maana aari oovitheya, yo khuhijuwi etthu aari olupaaye.

Ovoniwiwa ntthu woohooni wa Yeriko

³⁵ Yinsa asaleelaka ofiya Yeriko, mwinyi mmote woohooni eekhaliye nshini wa tarikki alolaka zimola. ³⁶ N'ooosiila shintto za atthu aari oviraaye, ye khuuzela etthu yaari orettikhanaaye. ³⁷ Khuuziwa yoori: "Yinsa wa Nazareeti ti ye anviraaye."

³⁸ Aphano ye khusala akhuwa araka: "Yinsa, Mwaana wa Daawuuda, koonele huruma!"

³⁹ Atthu apale aari oviraaye khusala ammaruwela yoori anyamale, ila ye khusala atepa okhuwa araka: "Yinsa, Mwaana wa Daawuuda, koonele huruma!"

⁴⁰ Aphano Yinsa khweemela khuruma yoori atiseliwe mwinyi otule. N'ootiiseliwa khumuuzela yoori: ⁴¹ “Ontakha yoori kuurettele niini?”

Ye khujipu yoori: “Mbwana, kintakha kirutele woona.”

⁴² Attaaphale Yinsa khumuuzza yoori: “Ona! Amini yawo yoovonisa.”

⁴³ Nasaapiru ye khurutela woona, khusala anlotta Yinsa ansifwaka Nnyizinku. Wakathi atthu ooniyeovo etile yaarettikhaniyeeyo, khunsifu Nnyizinku.

19

Yinsa na Zakewu namariphisa lumpuru

¹ Yinsa khuvira sitati ya Yeriko ettaka olawa. ² Ottuukho aariwo mwinyi mmote aari wiitthiwaaye Zakewu, nttunkhulu wa anamariphisa lumpuru na aari thaajiri. ³ Ye aari otakha omoona Yinsa, ila khuhisala awahi mwaasa woofupheya channu na atthu aari enkeene. ⁴ Aphano khutthira khulokoza khulawa khuwela mmutthi yoori awahi omoona, mwaasa yoori Yinsa aari weettela ovira attaaphale.

⁵ Yinsa n'oofiya puuro etile, khweekesa otulu khumoona khumuuzza yoori: “Zakewu, waakuve wiishukhe, leelo kinttela omaka vaje vavo.”

⁶ Attaaphale, ye khwiishukha wa waakuvavo khumpokherela Yinsa na furaha.

⁷ Atthu apale akinoko aari woonaaye vitthu epile, khwaaza ottettha araka: “Nka mooneni otu ontela omaka vaje wa natwampi!”

⁸ Zakewu khulankha khweemela khumuuzza Mbwana yoori: “Woone Mbwana! Kintta owenkha asikhini phantte moote ya maali zaka na apale kaari oweeyelaaye, kintta owaarutisela swaafu nne.”

⁹ Aphano Yinsa khulupa yoori: “Leelo vaje apha yafiyavo nusura maana otu na-ye peewu ya Eburahiima. ¹⁰ Mwaasa yoori Mwaana wa Pinaatamu ateela oweekesa apale aashikhiyeeyo awoosuru.”

Nlikaniso wa nzurukhu khumi wa feeta

¹¹ Yinsa aattameliyeovo Yeruzaleemu, atthu khusala oopuwela yoori Ofwalume wa Nnyizinku waari oteela orettikhana nasaapiru. Aphano Yinsa khulupa nlikaniso opu araka: ¹² “Nlume mmote w'oojama wootafikhana, aasaafriye khulawa nti woolepawo yoori athawaziwe ofwalume nawiisha aruti. ¹³ Ahinalawe khuwaakhuwela akarumeya awe khumi, wakhula mmote khumwinkha nzurukhu wa feeta* khuwooza yoori: ‘Mwirettele zanshara mpakha miiyo oruti.’

¹⁴ Ila atthu a mmuti mwawe khwiiya awiippiiriwa, khunruma waziri onlotta olawa olupa yoori: ‘Khanimweepu wiiya mfwalume ethu.’

¹⁵ N'oorthawaziwa ofwalume khurutela owawe, khulawa khuwaakhuwela akarumeya awe apale aawenkhiyeeyo nzurukhu wa feeta yoori ajuwe fwayita apattheliyeeyo wakhula ntthu.

¹⁶ Khuta otule wamwanzo khulupa yoori: ‘Mbwana, nzurukhu opule mmote mwaakinkhiyeeyo kapatthela fwayita, wafiya khumi.’

¹⁷ Mbwanaawe khunjipu yoori: ‘Waretta saana, o karumeya wa waamineya. Mwaasa yoori weeyo waamineya khwa vitthu vattitthiiru, apho ontela wiiya mfwalume wa sitati khumi.’

¹⁸ Otule waphiiri khuta khulupa yoori: ‘Mbwana, nzurukhu enu opule mwaakilikeliyeeyo, kapatthela fwayita wafiya mithaanu.’

* ^{19:13} Hisapu ya wakhula karumeya aari opokheraaye yaari ofiyela ya nyeezi mine.

¹⁹ Khumuuba yoori: ‘Kemaani, weeyo onttela wiiya mfwalume wa sitati thaanuu.’

²⁰ Otule wa wiishela khuta khulupa yoori: ‘Mbwana, nzurukhu enu opu, miiyo kaatthiiye mmufukho khuthokorela. ²¹ Miiyo keetta owoovani mwaasa woojuwa yoori mweeyo mwa awoopisa, mwinthuula ethu mwihizaleeni na mwinuurula mwihizaleeni.’

²² Mbwana otule khuri: ‘Karumeya wootakhala rooho! Kintta wuuphuka khwa mattakhuzi awo atthaapo! Weeyo waajuwiye yoori ki ntthu wa woopisa, kinthuulavo etile kihithokoreleeni na kinuurula etile kihizaleeni. ²³ Khi wahaathuuliye nzurukhu aka ottha mpango n'ooruti kisikana ottheerelaniye?’

²⁴ Khuwooza apale aari attaphale yoori: ‘Mwinnyakanye nzurukhu aya opo mwimwinkhe otule ariina khumi.’

²⁵ Yo khujipu yoori: ‘Otu aya mwinlupaaye yoori nimwinkhe onaaye nzurukhu khumi!’

²⁶ Mbwana khulupa yoori: ‘Kiniwuuzani khweele yoori otule ariina ontta weekezelawa, otule ahina hatha etile ariina ontta onyakanyiwa. ²⁷ Maatuwi aka apale ahaari okitakhelaaye ofwalume, mwiwaatiise apha ooliiwe kwoonaka.’”

Ofiya wa Yinsa Yeruzaleemu

²⁸ Paata ya wiisha olupa mattakhuzi apale, Yinsa khusala avira awelelaka eettaka Yeruzaleemu. ²⁹ Asaleelaka ofiya nti wa Betifwaye na wa Betaaniya kharipu ya mwaako Oluveera†, khuualokozisa anakhiyonи awe awiri.

³⁰ Khuwooza yoori: ‘Mwilawe mmuti mphule, mwifyaka mwinlawwa mwan-sikane mwaana wa puuru afukeleliwe woohaazi opakhiriwa. Mwimfukule mwintiise. ³¹ Amana apuwa ntthu awuuzelani yoori: ‘Mwinimfukulela-ni?’ Mwinjipu yoori: ‘Mbwaneeetthu ti ye anintakhaaye.’”

³² Apale aawaarumiyeeyo khulawa khusikana nkhamma ethiipile aalupiyeezo Yinsa. ³³ Wakathi aari omfukulaavo mwaana wa puuru otule, ennyewe khuwoozela yoori: “Mweyo! Mwaana wa puuru oto mwinimfukulela-ni?”

³⁴ Yo khujipu yoori: “Mbwaneeetthu ti ye anintakhaaye.”

³⁵ Aphano khuntiisela Yinsa, yo khuttattikhavo kuwo zaya vapuuru Ye khupakhiravo. ³⁶ Ataaka Yinsa, atthu khusala attattikha kuwo zaya ntarikhi.

³⁷ Wakathi aattameliyeovo vamwiishukhelo wa mwaako Oluveera, khunti ya anakhiyonи ooshi khwiyya oofurahi khwaaza onyakula ansifwaka Nnyizinku khwa minjuza epile ooniiyeezo, ³⁸ araka:

“Attottopeliwe mfwalume antaaye
khwa nzina la Mbwana.
Yiyyewo heeri pinkuuni
na siifwa otulu.”

³⁹ Mafwarizeewu apale aari vakatthi wa atthu apale khusala amuuza Yinsa yoori: “Mwanliimu, owooze anakhiyonи awo anyamale.”

⁴⁰ Ye khuwooza yoori: “Atthu apa amana anyamala, mawe pi anttelaaye onyakula.”

Yinsa onlila oonelaka huruma Yeruzaleemu

⁴¹ Wakathi Yinsa aifiyeovo Yeruzaleemu, nawoona sitati etile khulila, ⁴² araka: “Oo! Yeruzaleemu, eriwaka waari onjuwa otule aniwinkhaaye heeri leelo! Ila apho epo zaya zavitheya khwa weyo. ⁴³ Onlawa

† ^{19:29} Oluveera muutthi oriina mishumo zaya enriwaaye azetoona.

wafiye wakathi maatuwi enu anttelaaye wuukukuttelani phantte zooshi ari mmaphotto mwaya. ⁴⁴ Onttela ophwantteliwa vamote weeyo na aanaawo, khalinlawa osala hatha liwe vatulu wa liwe nzaaya, maana weeyo khumpokhereleeni Nnyizinku wakathi aateeliyeeyo owuusuru.”

Yinsa Nnyupa wa Nnyizinku

⁴⁵ Yinsa khuvira Nnyupa wa Nnyizinku khusala aweekara apale aari wuuzanyisaamo, ⁴⁶ awoozaka yoori: “Yaatikhiwa yoori: ‘Nyuppa yaka enttela wiiya nyuppa yoolompiwamo, ila mweeyo mwarettisa wiiya puuro ya malatarawu.’”

⁴⁷ Wakhula siikhu Yinsa eetta onozela Nnyupa wa Nnyizinku, ila attunkhulu a mahaakhimu a tiini, anamanozela a kano na anamalokozela a atthu aari weekesa shawuri zoomuula, ⁴⁸ ila khuhisala apattha nanna yooretta, maana atthu ooshi aari omwiitaalela Ye n'onsiileza.

20

Ofwalume wa Yinsa na woosa wa Yaahaya

¹ Siikhu moote, Yinsa aari owaanozela atthu Nnyupa wa Nnyizinku na awaatafusirelaka hapari zooshapweya. Nttumphule khutamo attunkhulu a mahaakhimu a tiini, anamanozela a kano na anamalokozela a tiini. ² Yo khusala amuuzela araka: “Vitthu epi onrettana ofwalume-ni, wala ti paani awinkhiyeeyo ofwalume aya opo?”

³ Yinsa khuwaajipu yoori: “Na-miyo kintta owuuzelani etthu moote mwikuuze; ⁴ woosa wa Yaahaya waari wa pinkuuni ama wa anaatamu?”

⁵ Yo khusala oozelana atthaaporu araka: “Amana nilupa yoori waari wa pinkuuni, ontta onuuuzela yoori: ‘Khi mwaasa aya niini mwihinkhupale-laka?’ ⁶ Na amana nilupa yoori waari wa anaatamu, atthu ooshi antta onivonya na mawe maana ankhupalela yoori Yaahaya napiyu.”

⁷ Attaaphale yo khujipu yoori: “Khanijuweeni nlupa amwinkhiyeeyo ofwalume.”

⁸ Aphano Yinsa khuwooza yoori: “Na-miyo akiniwuuzani ofwalume kinrettanaaye vitthu epi.”

Anamalima oohisuhu

⁹ Yinsa khulupa nlikaniso awoozaka atthu yoori: “Aarivo mwinyi mmote aazaliyeeyo mmashapa mwawe miitthi za wuuba, khuweekesa atthu yoori asala alimela, ye khulawa safwari yawe khwiikhala siikhu za waatta. ¹⁰ N'oofiya wakathi wa wuurla khunruma karumeyaawe mmote yoori alawe enkiwe wuuba, ila anamalima apale khumpiya, khumwiikara woohimwinkhi etthu. ¹¹ Mwennyewe nshapa khunruma nkina, na oto theenya yo khunveyisa, khumpiya khumwiikara woohimwinkhi etthu. ¹² Aphano khunruma wattaaatthu, anamalima apale khumpiya, khunvulalisa na khumwiikara.

¹³ Paata ya toole, mwennyewe nshapa khusala oopuwela araka: ‘Kiretteni? Aa! Kintta onruma mwanaka kinimphetachaaye, n'oomoona khweele khweele antta onhishimu.’

¹⁴ Anamalima apale wakathi amooniyeevo mwaana wa mwennyewe nshapa ntthile khulupa yoori: ‘Namarithi nshapa ntthi ti otu. Olawa nimuule, liiye leetthu.’ ¹⁵ Khunsukhumela othetekele wa nshapa khumuula.

Mwennyewe nshapa ontela owaarettela niini? ¹⁶ Ye ontta ota awoole anamalima apale, nshapa laya ntthile awenkhe atthu akina.”

Atthu apale aariivo n'oosiila mattakhuzi apale khulupa yoori: “Zihiretikhane vitthu epo!”

¹⁷ Yinsa khuweekesa khuwoozela yoori: “Maana a mattakhuzi apa aatikhii-weeyo anlupa-ni?

‘Liwe ntthile eeseliyeyo anamajeka nyuupa,
larettiwa wiiya liwe lootafikhana zayita mawe ooshi.’

¹⁸ Otule anttelaaye okwela liwe nttho ontta onyenye, na otule lininkwelaaye ontta osakeya eeye lifufu.”

Wuuzelə monkoni wa lumpuru

¹⁹ Attunkhulu a mahaakhimu a tiini na anamanozela a kano khusala eekesa nanna yonkhola wakathi otthuupule, maana yo aajuwiye yoori nlikaniso opule oniwaalupa yo. Ila khuhisala akholeya mwaasa woowoova atthu apale aari attaphale.

²⁰ Aphano yo khusala anlupattha, khuwaaruma atthu aari ojinkhelelaaye wiiya anashariya onsaya sirini, yoori ansikanane paathuli ankhole an-lawane wa mfwalume.

²¹ Yo khusala amuuzela yoori: “Mwanliimu, fweeyo najuwa yoori onttakhula na onnozela epile ziyyiyeyo za shariya, ninjuwa yoori khuninthawula ntthu, onnozela haakhi wa nanna Nnyizinku antakhaazo.

²² Nkanuuze, nkhamma ti yooshapweya oripha lumpuru la Seezari ama wala?”

²³ Yinsa khujuwa olavilavi aya khuwooza yoori: ²⁴ “Nkakitiiseleni nzurukhu apha. Ratarato eti vanzurukhu apha ti yaani?” Atthu khujipu yoori: “Ti ya Seezari!”

²⁵ Khuwooza yoori: “Mwimwinkhe Seezari etile yiyyiye ya Seezari na mwimwinkhe Nnyizinku etile yiyyiye ya Nnyizinku.”

²⁶ Yo khuhisala ansikanana hatha paathuli vakatthi wa atthu apale; khwi-ya ootikinisiwa pi mattakhuzi apale aajipwiweeyo ti Yinsa, yo khunyamala.

Wuuzelə monkoni woosisimuwa

²⁷ Masatukhi apale ahaari okhupalaaye osisimuwa wa anamfwa, khu-lawa akina khumwaattama Yinsa. ²⁸ Khusala alupa yoori: “Mwanliimu, Munsa aatikha yoori, nlume amana afwa, muukhaawe ahinvokoleenei mwaana, ona yooraliwa ti ttwiye ampatthele aana eeye a marehemu ttwi-ye. ²⁹ Aarivo attwi sapa: otu nwulu aya khuloola khufwa, muukhaawe ahimpattheleenei mwaana. ³⁰ Khuraliwa ti ttwiye, khufwa ahimpattheenii mwaana, ³¹ khuraliwa ti ttwiye wattathu, khufwa ahimpattheleenei mwaana, ooshi apale sapa khufwa woohimpattheli mwaana. ³² Omwiisho waya muukha otule khufwa. ³³ Siikhu yoosisimuwa ontela wiiya muukha waani maana oosaapa anraliye?”

³⁴ Aphano Yinsa khuwaajipu yoori: “Atthu a voolumwenku apha an-loola na anraliwa. ³⁵ Ila atthu apale anttelaaye osuhi olawa pinkuuni noosisimuwa muufwa, khanlawa oloola wala oralika; ³⁶ maana khamfwa theenya, anttela wiiya nkhamma malayikha na aana a Nnyizinku, mwaasa yoori asisimuleliwa muuhaayi. ³⁷ Hatha napiyu Munsa athoonyeza monkoni woosisimuwa wa anamfwa, wakathi moottho opule waari okholelaaye va-mutthi nwishi, ye khunkhuvela Mbwana yoori, Nnyizinku wa Eburahiima wa Esiyaakha na wa Yaakhumpa. ³⁸ Eto enthoonyeza yoori Nnyizinku khahiyo wa anamfwa, Nnyizinku wa atthu awoona. Maana khwa Ye atthu ooshi anaaye ohaayi.”

³⁹ Anamanozela akina a kano apale aari attaaphale khumuuzo yoori: “Wajipu saana Mwanliimu!” ⁴⁰ Khuhiiwo hatha ntthu kiina wootakha omuuzela theenya.

Al-Masiihu Mbwana wa Daawuuda

⁴¹ Elottelanaka Yinsa khuwoozela yoori: “Mwaasa aya niini atthu alupaka yoori Al-Masiihu mwaana wa Daawuuda?

⁴² Daawuuda alupa nkithaapu ya Zaapuuri yoori:

‘Mbwana Nnyizinku,
amuza Mbwanaaka yoori:
“Wiikhale nkhono-nlume aka,
⁴³ mpakha miiyo kitthe
moolu awo vatulu wa maatuwi awo.”’

⁴⁴ Nkhama Daawuuda onimwiittha Al-Masiihu yoori Mbwana, enretikhana toovi wiiya mwanawee?”

Yinsa na anamanozela a kano

⁴⁵ Atthu ooshi khusala ansileza, Yinsa khuwooza anakhiyoni awe yoori:

⁴⁶ “Phoole na anamanozela a kano, apale woowaatuvla owala ajapi zoolepisana, ochelisiwa vaparasa na woowaatuvla wiikhala puuro za wiilokozi nnyupa woosifwiwamo Nnyizinku na puuro za wiilokozi vanjampo,

⁴⁷ aniweeyelaaye anamfweliwa pi amanna zaya vitthu zaya*, ajinkhaka oretta lompa zoolepa. Apo aya anlawa apokherele hukhmu khuluyeene.”

21

Zaakha ya muukha woofweliwa ti mannawe

¹ Yinsa khuwoona mathaajiri alazaka zaakha zaya atthaaka n'yopo ya zaakha. ² Khumoona theenya nunu mmote wa masikhini woofweliwa ti mannawe, alazaka zaakha ttoosu piiri. ³ Yinsa khulupa yoori: “Kiniuuuzani khweele yoori nunu otu wa masikhini woofweliwa ti mannawe, enkha zayita atthu ooshi. ⁴ Maana apale ooshi na othaajiri aya enkha tathela na khusalana, ila nunu otu na osikhini awe enkha wooshi aari ororomelaaye.”

Yinsa onlupa monkoni wa woopwechiwa Nyuupa ya Nnyizinku

⁵ Anakhiyoni awe akina khusala attottopela Nyuupa ya Nnyizinku yaajekaniweeyo mawe ooshapweya na vitthu zaatthiweemo zoolaziwa nkhama zaakha, Yinsa khuwooza yoori: ⁶ “Enlawa zafiye siikhu vitthu zaya epo mwinoonaazo zinttelaavo opwecheliwa, maana khalinlawwa olikhiwa liwe vatulu wa liwe nzaaya.”

Olupathiwa na ohoowa

⁷ Yo khumuuzela yoori: “Mwanliimu, vitthu zaya epo zinteela orettikhana lini? Wala alama-ni enttelaaaye onijuwisa yoori zasaleela orettikhana?”

⁸ Yinsa khuwaajipu yoori: “Phoole! Mwihihatiwe, maana anlawa apuwe atthu a waatta araka, ‘Al-Masiihu ti miyo!’ ama ‘Wakathi wafiya!’ Ila mwihiwaalotte apo aya. ⁹ Amana mwisiilaka viittha ama nzuuzu mwihoove, maana epo zaya zina yoorettikhana khapula, ila wakathi aya opo khahiyoo wiisha w'oolumwenku.”

¹⁰ Yinsa khulupa theenya yoori: “Khapila moote enlawa yoomanane na khapila kiina, na ofwalume woomanane ofwalume nzaaya. ¹¹ Phantte za

* ^{20:47} Aniwaajelaaye anamfweliwa pi amanna zaya khwa luuka ya ekereku.

waatta za miti zinlawa zapuve visikinyaatthi khulu-khulu, jala, marati, vitthu zootikinisa na theenya alama khulu-khulu zoolankha pinkuuni.

¹² Khapula zihinarettikhane vitthu zaya epo, mwinlawa mwalupatthiwe, mwilawaniwe mmakhono wa afwalume na mahaakhimu, mwiphukiwe nnyupa woosifwiwamo Nnyizinku, mwifukeliwe mwaasa wookilotta miiyo. ¹³ Enttela orettikhana yoori wiiye oshaahiti enu. ¹⁴ Mwiye awiithaaza rooho zenu, mwihihukulikhele etthu mwinttelaaye ojipu mmana ofiya wakathi aya opo. ¹⁵ Maana miiyo kinlawa kawinkheni mattakhuzi na ojuwa nanna yoowaajipu maatuwi enu, ahinttelaaye owahi ozukulisa wala okheeti. ¹⁶ Mwinlawa mwafukisiwe wa afwalume pi apapazenu, attwiizenu, ajamaazenu na ashirikha enu, akinoko a mweeyo anlawa ooliiwe. ¹⁷ Atthu awaatta anttela wiiya awiiphiiriwa ti mweyo mwaasa wa nzina laka. ¹⁸ Ila hatha nyuuli yenu moote khinlawa waashikha. ¹⁹ Mwiye woovilela, toowo mwintta wuusurukha.”

Yinsa onrutela olupa opwechiwa Yeruzaleemu.

²⁰ Yinsa khulupa theenya yoori: “Amana moona sitati ya Yeruzaleemu ezukuleliwe pi anajanka, mwijuwe yoori wafiya wakathi woopwechiwa. ²¹ Aphano apale anttelaaye wiiya nti wa Yudeya athhirele omwaako, apale anttelaaye wiiya nsitati atthiremo na apale anttelaaye wiiya ntthuttu ahirutele ositati. ²² Maana siikhu zaya epo enttela wiiya siikhu za hukhumu khuluyeene yoori ertextikhane zooshi epile zaatikhiweezo nkatthi wa nt-takhuzi la Nnyizinku. ²³ Atakhaliwa muukha otule anttelaaye osikanika ari wa wiimittha ama eettaka waamwissa siikhu zaya epo, maana vatuniya anlawa apuwevo mashakha mawulweene na hukhumu vakathi wa anaatamu ooshi. ²⁴ Awaatta anttela wuuliiwa na phanka, akinoko athuuliwe nkhamma anapherezu eettettisiwaka miti zooshi z'olumwenku. Yeruzaleemu enlawa yakurumuliwe pi amalapo mpakha yenzi ya amalapo wiisha.”

Ota wa Mwaana wa Pinaatamu

²⁵ Yinsa khuvira awoozaka theenya yoori: “Zinlawa zeeyeve alama vanjuwa, vamweezi na vamatthottowa. Atthu a voolumwenku anteela wi-iyana huzuni na woova nwulweene mwaasa woottithima na otapanyeya wa pahari. ²⁶ Anlawa azirikhe atthu a waatta mwaasa wa woova vitthu zinttelaaye orettikhana voolumwenku, maana owahi wa pinkuuni onttela osakhinyeya. ²⁷ Aphano phi anttelaavo wooneya Mwaana wa Pinaatamu ataaka enakatthi-nakatthi ya mawiku na owahi na nuuru khuluyeene. ²⁸ Mmana zaazaka vitthu zaya epo, mwilankhe mwiinuwe mweekese otulu, maana wuusurukha wenu ori kharipu na-mweyo.”

Nlikaniso wa mfikeera

²⁹ Elottelanaka Yinsa khulupa nlikaniso mmote araka: “Moone mfikeera na miitthi zooshi. ³⁰ Amana aazaka ophutuwela mathapa aya, mwinoona na mwinjuwa yoori wasaleela ofiya mwiita. ³¹ Wa nanna ethiipo, amana moona zirettikhana vitthu epo, mwijuwe yoori Ofwalume wa Nnyizinku wasaleela ofiya.

³² Miyo kiniwuzani khweele yoori atthu apa aleelo khanlawa ofwa ooshi vitthu epi zihirettikhaneeni. ³³ Pinku na vathi zooshi zinteela ovira, ila mattakhuzi aka khanviraru.”

Owahi woojeekesela

³⁴ Yinsa khulupa yoori: “Mwiye woojeekesela yoori rooho zenu zi-hipakhire vitthu zoohifwayi, ohapaliwa, ama tafwawuthi za muuhaayi mwenu, yoori siikhu yaya ethiito ehuusikaneleni. ³⁵ Maana siikhu yaya eto

enttel a owaatela atthu ooshi a voolumwenku nkhamma nraakho. ³⁶ Mwiye woojeekesela na olompa wakhula wakathi, yoori zuuwerawereni vitthu zaya epo zinttelaaye orettikhana na yoori mwapatthe weemela omaasho wa Mwaana wa Pinaatamu amana ata.”

³⁷ Yinsa wakhula siikhu aari onozela vaje wa Nyuupa ya Nnyizinku, mmana oripa aari weettaka vamwaako Oluveera khwiya ottuukho mpakha ocha. ³⁸ Atthu ooshi supuyeene aari weettaka vaje wa Nyuupa ya Nnyizinku olawa osiila vitthu aari onozelaazo Yinsa.

22

Shawuri za wuuliwa Yinsa

¹ Osaleelaka ofiya wakathi woorettiwa njampo la phaawu yoohiina fwamento, liniitthiwaaye Paashikowa*, ² attunkhulu a mahaakhimu a tiini na anamanozela a kano aari owaza shawuri zoomuula Yinsa sirini, khuhisala ewaheya mwaasa woowoova atthu.

³ Ila Epiliisi khumweetta Yuuda, aari wiittheliwaaye Shikariyooti, wa khuntti ya apale khumi na awiri. ⁴ Ye khulawa osiilanana attunkhulu a mahaakhimu a tiini na attunkhulu a anamweekesela a Nyuupa ya Nnyizinku, yoori eekese shawuri yonkholisa Yinsa. ⁵ Yo khuwaatuvela khumwaahiti Yuuda omwinkha nzurukhu wa feeta. ⁶ Ye khukhupali khusala eekesa kiphenyo yonkholisa Yinsa, woohiivo hatha ntthu.

⁷ Khufiya siikhu yoorettiwa njampo la phaawu yoohiina fwamento, siikhu yaya ethiito yaarina yootwahiwa pwittipwitthi yoojeliwa Paashikowa.

⁸ Yinsa khunruma Pheeturu na Yaahaya araka: “Mwilawe mwaattalele etthu-yoojiwa ya Paashikowa.”

⁹ Yo khumuuzela yoori: “Ontakha naattalele vayi?”

¹⁰ Ye khuwaajipu yoori: “N'oofiya ositati mwinlawwa mwansikane mwinyi apwecheriye yuuku ya maati. Mwinlotte mpakha nyuupa anttaamo.

¹¹ Mwimuuze mwennyewe nyuupa yaya eto yoori: ‘Mwanliimu eetta oniruma owuuzelani yoori puuro anttelaaye ojavo njampo la Paashikowa na anakhiyon i awe pi vayi?’ ¹² Othuuto onta wuuthoonyezani nsana nwulweene wa vatulu oriina zaana zooshi, mwaattalele attaapho njampo nttho.”

¹³ Yo khulawa khusikana epile Yinsa aawooziyeezo, khwaattalela etthu-yoojiwa ya Paashikowa. ¹⁴ N'oofiya wakathi Yinsa na maaswihaapa awe khwiikhala vameeza. ¹⁵ Khuwooza yoori: “Kaari ohithajiya venkivene onja Paashikowa vamote na-mweyo kihinalawe ohoowa. ¹⁶ Kiniuuuzani yoori akinteela oja theenya njampo ntthi mpakha linttelaavo omariseliwa muufwalume wa Nnyizinku.”

¹⁷ Athuuliyeovo jiikira khunshukhurwela Nnyizinku, khuwooza yoori: “Mwithuule mwaawanyena. ¹⁸ Kiniuuuzani yoori akinrutela onywa nshumo wa nrayi wa wuuva mpakha ontaavo Ofwalume wa Nnyizinku.”

¹⁹ Athuuliyeovo phaawu khunshukhurwela Nnyizinku, khumeya khuwenkha khuwooza yoori: “Opu mwiili aka onttelaaye ovahiwa khwa mweeyo, mwisala mwiretta etthiipi mwifikifhiraka miiyo.”

²⁰ Khwa nanna ethiito nawiisha oja khuthuula jiikira khulupa yoori: “Jiikira eti wahati mpheya onrettiwaaye ti taamu yaka, enttelaaye wiittikha khwa mweeyo.

* **22:1** Nzina la Paashikowa lina maana a wakathi Nnyizinku awaataphuliyeeyo Meezirayeele mmakhono wa Amisuri.

²¹ Ila mwijuwe yoori, otule anttelaaye okikhola ori vameeza attaapha vamote na-miyo. ²² Mwaana wa Pinaatamu onttela ofwa khwa nanna ethhipo Nnyizinku asharutheliyeozo. Ila atakhaliwa otule anttelaaye onkhola.” ²³ Yo khusala oozelana atthaaporu yoori anjuwe nlupa aari weettelaaye oretta etthu yaya eto.

Nttunkhulu muufwalume wa Nnyizinku ti paani?

²⁴ Aphano maaswihaapa khusala anyakulisana atakhaka onjuwa paani eezeliyeeyo ottunkhulu vakatthi vaya. ²⁵ Yinsa khuwooza yoori: “Afwalume a vathi apha aniiyana oshintta vakatthi wa athu aya, na apale aneettettisaaye ofwalume oniwaatuvela olupezewa onamaretta saana. ²⁶ Ila mweeyo mwihiye toowo, nttunkhulu vakatthi venu eeye ti nttiithi aya, otule anlokozelaaye eeye ti namarumeyela aya. ²⁷ Nttunkhulu ti paani, ti otule aniikhalaaye vameeza ama otule anrumeyaaye? Khaniya otule aniikhalaaye vameeza? Ila vakatthi venu mweeyo, miiyo kiri nkhamma otule anrumeyaaye. ²⁸ Mweeyo ti ye mwiriiye vamote na-miyo mphule kinzayiniwaamo. ²⁹ Nkhamma ethhipo Paapa akinkhiyeeyo ofwalume, na miiyo kiniwinkhani mweeyo, ³⁰ yoori mwije na mwinywe vameeza vaka muufwalume mwaka, na mwiikhale vakhukulu y'oofwalume yoori mwiphuke mahimo khumi na mawiri a Ezirayeele.

³¹ Simawu, Simawu, Epiliisi avekela yoori awootooten i nkhamma empepet-thiwaazo tiriku. ³² Ila miiyo koolompela yoori amini yawo ehiwaashikhe. Amana orutela wiiya vamote na-miyo, owaalipisele azaawo.”

³³ Simawu khujipu yoori: “Mbwanaaka, miiyo kakhupali wuulotta hatha nkhamma nkalapooso, hatha nkhamma ofwa.”

³⁴ Ila Yinsa khunjipu araka: “Miiyo kiniwuza weeyo Pheeturu yoori leelo eti likukhuwi lihineekhe, onkikhana swaafu ttatthu oraka khunkijuwa.”

³⁵ Aphano Yinsa khuwooza araka: “Wakathi opule koorumiyeenini mwihina hatha mfukho wala napampa, ama shapatthu, niini yoosaleeliyeenini?”

Yo khujipu yoori: “Hatha etthu khayaanisaleeliye.”

³⁶ Ye khuwooza yoori: “Ila nasaapi eti otule ariina mfukho athuule na napampa awe anthuule. Otule ahina phanka oozanyise ajapi yawe oozanye.

³⁷ Nkhamma ethhipo Nttakhuzi la Nnyizinku linlupaazo yoori: ‘Ye onaalakiwa nkhamma nanretta zootakhala.’ Miiyo kiniwuuzani khweele yoori sharuthi vitthu epi zirettikhane khwa miiyo, maana etile yaatikhweeyo monkoni wa miiyo ena yoorettikhana.”

³⁸ Maaswihaapa apale khulupa yoori: “Fweeyo apha Mbwana ninaaye phanka piiri.” Ye khujipu araka: “Weesha mwaasa aya opo!”

Yinsa onlompa vamwaako wa Oluveera

³⁹ Khulankha khusala alawa vamwaako wa Oluveera nkhamma ethhipo aazowereliyeozo, anakhiyon awe khunlotta. ⁴⁰ N'ooziya khuwooza yoori: “Mwilompe yoori mwihiwele muuzayiniwa.” ⁴¹ Ye khuwaasusa vattithi-iru† khukokhora khusala alompa araka: ⁴² “Paapa amana otakha, okilaze jiikaza eti yoohoowa; ila ehirettikhane otakha waka miiyo, arettikhane matakheulo awo.” ⁴³ [Aphano khumpuwelela nlayikha la pinkuuni khusala linlipisela. ⁴⁴ Ari mmashakha, khusala alompa woojilipisavo, mattottonka oovujuwela wawe khuretteya wiiya taamu khusala akwela vathi.]‡

⁴⁵ N'oolaavo aphale aari olompaavo, khweetta aphale aariivo anakhiyon awe, khuwaasikana eettaka olala mwaasa woohuzunikha. ⁴⁶ Khuwoozela

† ^{22:41} Owaasusa vattithi-iru: luuka ya Ekereku ena maana 'yoosusa kiyasi ya likolokotto la weesiwa.' ‡ ^{22:44} Aaya epi kithaapu kiina zaraku khina.

araka: "Mwinlala-ni? Mwilankhe mwilompe yoori mwihiikwele muuza-yiniwa."

Okholiwa wa Yinsa

⁴⁷ Eettaka ottakhula ethiipile, khutavo atthu a waatta alokoziwe ti mmote wa anakhiyonи apale khumi na awiri aari wiiithiwaaye Yuuda. Ye khuta aphale aariivo Yinsa yoori amwinkhe peezehu. ⁴⁸ Attaaphale Yinsa khuri: "Yuuda, Mwaana wa Pinaatamu oninkholisa na peezehu?"

⁴⁹ Anakhiyonи awe nawoona vitthu epile khulupa yoori: "Mbwana, ni-woomanane na phanka?" ⁵⁰ Aphano nakhiyonи mmote khunshija nshiilo la nkhone-nlume mwiitthwaana wa haakhimu nwulu wa tiini.

⁵¹ Ila Yinsa khuri: "Onlikhe ohinrutele!" Ye khukhola nshiilo la ntthu otule khunvonisa.

⁵² Aphano Yinsa khuwoozela attunkhulu a mahaakhimu a tiini na attunkhulu a anamweekesela a Nyuupa ya Nnyizinku na anamalokozela a tiini apale aateeliye onkhola araka: "Mwakiteela na phanka na puutta nkama kiiyiye namalokozela wa azompare?" ⁵³ Wakhula siikhu kaari wiya vamote na-mweyo vaje wa Nyuupa ya Nnyizinku khuhisala mwikikhola, aphano, opu wakathi enu na otule ariina ofwalume wa n'yiiza."

Pheeturu oninkhana Yinsa

⁵⁴ Aphano Yinsa n'ookholiwa khulawaniwa mpakha vaje wa haakhimu nwulu wa tiini. Pheeturu khusala anlottelela Yinsa woohimwaattami. ⁵⁵ Yo khukhoza moottho vaje khusala oottha, na-ye Pheeturu khuta attaapho khwiikhala. ⁵⁶ Njaazi mmote aariivo n'oomoona eekhaliye nshini wa moottho khumweekesa saaneene khuri: "Otu aari vamote na Yinsa."

⁵⁷ Pheeturu khukhana araka: "Weyo mwanankha! Miiyo akininjuwa ntthu aya oto."

⁵⁸ N'ovira wakathi vattitthiiru, Pheeturu khooniwa ti ntthu nkina kumuza yoori: "Weeyo o wa khuntti ethiitile."

Ila Pheeturu khukhana araka: "Mwinyi, khahiyo miiyo!"

⁵⁹ Oviriyeovo wakathi mmote, ntthu nkina theenya khulupachacha yoori: "Khweele-khweele otu aari vamote na-ye, maana otu aya na-ye nkalileya."

⁶⁰ Pheeturu khujipu araka: "Mwinyi! Miiyo akininjuwa etthu mwinlu-paaye." Eettaka ottakhula ethiipile, likukhuwi khwiikhala. ⁶¹ Mbwana khuzukuluwa khumweekesa Pheeturu, ye khufikhiri mattakhuzi apale ooziweeyo ti Mbwana yoori: "Leelo ethiiti likukhuwi lihineekhe, onteela okikhana swaafu ttatthu." ⁶² Pheeturu khulaavo aphale vaya khusala alila ari wookafilikha.

⁶³ Atthu apale aari omweekeselaaye Yinsa khusala anveyisa na ompiya,

⁶⁴ khumfinikha omaasho wawe khusala amuuzela yoori: "Weeyo khahi o napiyu? Onlupe otu oopiyieeyo!" ⁶⁵ Khusala anlupeza mattakhuzi a waatta a mattukhano.

Yinsa onlawaniwa wa amashawuriya awulu

⁶⁶ N'oocha khukusanyeya attunkhulu a mayahuuti, attunkhulu a mahaakhimu a tiini na anamanozela a kano, khuthuuliwa Yinsa khulawaniwa nhali anthukumanaamo attunkhulu oophuka milattu. ⁶⁷ Khusala amuuzela yoori: "Nkahaya, nkanuuze nkama weeyo o Al-Masiihu."

Ye khujipu araka: "Amana kiwuuzani khamwinkaamini, ⁶⁸ na amana kiwuuzelani khamwinkijipu. ⁶⁹ Ila waaza nasaapi ethiiti Mwaana wa Pinaatamu onttela wiikhala nkhone-nlume wa Nnyizinku Woowahi."

⁷⁰ Aphano ooshi khumuuzela yoori: "Apho niri weeyo o Mwaana wa Nnyizinku?"

Yinsa khujipu araka: "Mweeyo mwalupa yoori ti miiyo."

⁷¹ Yo khulupa yoori: “Nininhithajiya shaahiti theenya? Mwennyewe alupa na nlomo awe.”

23

Yinsa onlawaniwa wa Pilaatu

¹ Khulankha khuntti yooshi khunthuula Yinsa khusala anlawana wa Pilaatu. ² N'oofiya khusala anlokoveza yoori: “Nansikana otu awaalikhisaka atthu etthu oripha lumpuru la Seezari, khusala ajilupeza yoori ti Al-Masiihu na mfwalume.”

³ Aphano Pilaatu khumuuzela yoori: “Ti weeyo mfwalume wa mayaahuuti?”

Yinsa khujipu yoori: “Weeyo walupa.”

⁴ Pilaatu khuwooza attunkhulu a mahaakhimu a tiini apale na khuntti ya atthu etile yaariivo yoori: “Miiyo akinimoonana hatha paathuli otu.”

⁵ Atthu apale khusala avira akhanyarelaka olupa yoori: “Otu onta owaatapanya atthu a Yudeya yooshi eti, aaza Kalileya mpakha ofiya okhuno.”

⁶ Paata yoosiila mattakhuzi apale, Pilaatu khuuzela yoori: “Otu aya nkalileya?” ⁷ Pilaatu ajuwiyeovo yoori Yinsa aari wa nti wa mfwalume Herooti, khuruma olawaniwa ottuukho. Wakathi aya opo Herooti na-ye aarettiye ari Yeruzaleemu.

⁸ Herooti n'oomoona Yinsa, khwiya woofurahi venkivene maana aaziye raku otakha omoona mwaasa woosiila vitthu aari orettaazo, khusala aweeja woona minjuza arettaka. ⁹ Aphano khusala amuuzela vitthu za waatta, ila ye khuhisala anjipu hatha etthu. ¹⁰ Attunkhulu a mahaakhimu a tiini na anamanozela a kano khusala anlokoveza mattakhuzi mawulu-mawulu. ¹¹ Herooti na anajanka awe khwaaza onveyisa Yinsa na ontarawu, khunwalisa ajapi y'oofwalume khuruma yoori arutiseliwe wa Pilaatu. ¹² Herooti na Pilaatu khaari osiilanaka, ila siikhu ethiito khupuwa oshirikha.

Yinsa onttela wuuliwa

¹³ Aphano Pilaatu khuwaakhuwela attunkhulu a mahaakhimu a tiini, anamaphuka milattu na atthu, ¹⁴ khuwooza yoori: “Mwakitiisela otu mwinlupezaka yoori onta owaatapanya atthu, ila miiyo kamuuuzela vakatthi venu mweeyo, akimoonaneeni hatha paathuli khwa vitthu epo mwininlupezaazo. ¹⁵ Herooti na-ye khamoonaneeni hatha paathuli, ti eto arumiyeeyo orutiseliwa okhuno. Eto enthoonyeza yoori kharetteeni etthu yoosuhi wuuliiwa. ¹⁶ Miiyo kintta oruma opiiwa nawiisha kinleve.”

¹⁷ [[N'oofiya siikhu ya njampo la Paashikowa, Pilaatu aarina sharuthi yoowaafukulela atthu napherezu mmote.]]*

¹⁸ Attaaphale atthu ooshi khusala anyakula araka: “Mwimuule oto! Mwinifukulele Baraba!” ¹⁹ Baraba aafukeliwe mwaasa woolaza onazompere nsitati na khumuula ntthu.

²⁰ Aphano Pilaatu khurutela owooza atthu atakhaka onleva Yinsa. ²¹ Ila atthu khusala anyakula venkivene araka: “Akhomeliwe, akhomeliwe vansalapa!”

²² Pilaatu khuwoozela swaafu yattaatthu: “Niini arettiyeeyo yootakhala? Miiyo akinimoonana hatha paathuli yoosuhi wuuliiwa. Kinruma yoori mwinhukhumu nawiisha kinleve.”

²³ Ila yo khusala avira anyakulaka avekaka yoori Yinsa alawe akhomeliwe, akhanyarelaka onyakula. ²⁴ Aphano Pilaatu khukhupalela oretta etile aari otakhaaye atthu apale. ²⁵ Ye khumfukulela Baraba otule aafukeliweeyo

* ^{23:17} Warakha za raku khina aaya eti ya 17.

mwaasa woolaza onazompere na wuula, khuwenkha Yinsa otule anvekiyeyo yoori alawe anrettele etile aari ontakhelaaye.

Simawu onthuulisiwa nsalapa wa Yinsa

²⁶ Yinsa khuthuuliwa khusala alawaniwa, eettaka olawaniwa ethiipile, khusikanika mwinyi mmote wa Sireeni aari wiithiwaaye Simawu, aari olankhaaaye omashapa. Khukholiwa khuthuulisiwa nsalapa opule yoori anlottisele Yinsa. ²⁷ Aari olottiwa pi atthu a waatta na aarivo aakha aari onlilelaaye ankhupanyeraka. ²⁸ Yinsa khuzukuluwa khuweekesa aakha apale aari onlilelaaye khuwooza yoori: “Aakha a Yeruzaleemu, mwihikililele miiyo, ila mwijililele mweeyo na aaneenu. ²⁹ Maana zinteela ofiya siikhu mwinttelaaye olupa yoori: ‘Ashapweyiwa aakha apale oohiina mavokozi, ahinavokole na ahinaamwise.’

³⁰ Siikhu ethiito mwinlawwa mwalupe yoori:

‘Nyaako zinikwele
kulu zinifinikhe!’

³¹ Muutthi nwishi onretteliwa toono khi wa wuuma onttela wiiya toovi?”†

³² Khuthuuliwa theenya anazompere awiri yoori alawe ooliiwe vamote na Yinsa. ³³ N'oofiya puuro eniithiwaaye Kalavaariyu‡, Yinsa khukhomeliwa na anazompere apale awiri, mmote nkono-nlume nkina nkono-nkha. ³⁴ [Aphano Yinsa khulupa yoori: “Paapa, owaaswaamihi atthu apa maana khanjuwa etthu anrettaaye.”]§ Elottelanaka yo khwaawanyelana kuwo epile za Yinsa nkatthi wa nasipu.

³⁵ Atthu aari attaphale aari woona zooshi. Mahaakhimu a Yudeya khusala antarawu Yinsa araka: “Ye awoosuru atthu akina, mwinlikhe ajusuru mwennyewe nkama khweele ti Al-Masiihu nanthawuliwa ti Nnyizinku.”

³⁶ Anajanka na-yo khusala antarawu Yinsa antiiselaka viinyu yoonyuny, ³⁷ n'oomuuza yoori: “Nkama khweele weeyo o mfwalume wa mayaahuuti, ojuusuru omweenyewe.”

³⁸ Vansalapa attaphale aakhomeliweevo, khutthiiwavo lipawu laatikhiiweeyo yoori: “OTU MFWALUME WA MAYAAHUUTI.”

³⁹ Anazompere apale aakhomeliweeyo vamote na Yinsa, mmote aya khusala anveyisa amuuzaka yoori: “Nkama weeyo o Al-Masiihu, ojuusuru na onusurwaka na-fweyo.”

⁴⁰ Otule nkina khujipu ammaruwelaka nzaawe araka: “Weeyo khuni-moova Nnyizinku, ye na-fweyo hukhumu yetthu moote? ⁴¹ Fweeyo khweele ninsuhi ohukhumweliwa epile nirettiyeego, ila ye kharetteeni hatha etthu yootakhala.”

⁴² Aphano khulupa yoori: “Yinsa, okuupuwele amana ofiya muufwalume mwawo.”

⁴³ Yinsa khujipu yoori: “Miiyo kiniwuza khweele yoori leelo eti weeyo onttela wiiya vamote na-miyo pephooni.”

Ofwa wa Yinsa

⁴⁴ Esaleelaka ofiya elukuluku njuwa khuzima, khupuwa yiiza olumwenku wooshi mpakha makaaripi. ⁴⁵ Phazira khuluyeene yaari Nnyupa wa Nnyizinku khuvaruwa vakatthi. ⁴⁶ Aphano Yinsa khukhuwa na kuvu araka:

† **23:31** Maana a muutthi nwishi anthoonyeza Yinsa otule eeyiye wa haakhi, muutthi wa wuuma onthoonyeza anatwampi. † **23:33** Kalavaariyu maana aya likurakuza la eeshwa ya ntthu woofwa.

§ **23:34** Warakha za raku khina aaya eti ya 34.

“Paapa, rooho yaka kininkhelela mmakhono mwawo.” N'oolupa ntakhuzi ntthile, khuttiya phuumu.

⁴⁷ Nrooma mmote aari ntunkhulu wa anajanka, nawoona vitthu epile zaarettikhaniyezo, khunsifu Nnyizinku araka: “Khweele-khweele otu aari ntthu aari weettettisaaye shariya.” ⁴⁸ Ooshi apale aari attaphale, nawoona vitthu epile zaarettikhaniyezo, khuruti apiyaka vifuwa zaya athoonyezaka huzuni. ⁴⁹ Ashirikha awe Yinsa ooshi na aakha apale anlottiyeeyo a Kalileya, aarettiye ari peetiwene eettaka wooma vitthu epile.

Ozikhiwa wa Yinsa

⁵⁰⁻⁵¹ Aarivo mwinyi mmote aari wiitthiwaaye Yuusufu wa sitati ya Arumateeya nti wa Yudeya. Ye aari wooshapweya rooho na wa shariya, na aari weekeselaaye ota wa Ofwalume wa Nnyizinku. Aari wa khuntti ya mashawuriya, ila ye khaakhupaleliye epile mashawuriya aawaziyezo na aarettiyezo. ⁵² Ye khulawa wa Pilaatu oveka mwiili wa Yinsa. ⁵³ Khulazavo vansalapa aphale, khuputaputela vajoora khulawa khuzikha nliphotto la mwaako laari ahinazikhiwemo hatha ntthu. ⁵⁴ Epo zaarettikhaniye juumwa ochelaniwa jumwaa-monsi**.

⁵⁵ Aphano, aakha apale aataniyeeyo Yinsa Kalileya, khunlottelela Yuusufu omwaako okhule eetteliyeewo ozikha mwiili wa Yinsa, olawa wooma khapuri na mwiili nanna waazikhiwezo. ⁵⁶ Nawiisha, khurutela owaya olawa waattalela mafuttha oonukhela yoori alawe avaaze mwiili wa Yinsa. Jumwaa-monsi yo khuvumula nkama etthiipo enrumaazo kano.

24

Osisimuwa wa Yinsa

¹ Siikhu yamwanzo ya sumana, jumwaa-phiili supuyeene, aakha apale khusala alawa okhapuri okhule aazikhiweewo Yinsa athuuliye mafuttha oonukhela apale aattaliyeeyo. ² Yo n'oofiya khoona liwe ntthile laafukaniweeyo nlako wa khapuri liri loolaziwavo. ³ N'oviramo, mwiili wa Mbwana Yinsa khusikana ohimo. ⁴ Khwiiya oozinkuwa venkivene, attaphale khuwaapuwelela atthu awiri awaliye kuwo za waara. ⁵ Aakha apale khuwaapattha woova khukokhora khufiyisa ajihi zaya vathi, atthu apale khusala awoozela yoori: “Mwinimweekesela-ni ntthu wa wooma vakatthi wa alupa oofwa? ⁶ Ye khaamo mphu; asisimuwa, muupuwele mattakhuzi apale aawuuziyeenini ari nti wa Kalileya! ⁷ Aalupiye yoori: ‘Mwaana wa Pinaatamu ona ya winkheleliwa mmakhono wa anatwampi, akhome-liwe vansalapa, siikhu yattaatthu asisimuwe.’” ⁸ Aphano aakha apale khuupuwela mattakhuzi apale aalupiyeeyo Yinsa.

⁹ N'ooruti okhapuri okhule, khuwooza vitthu epile zooshi maaswihaapa apale khumi na mmote na atthu apale akinoko aariivo. ¹⁰ Aakha aya aari Mariyamu Mataleena, Yowaana na Mariyamu mamaawe Yaakhumpa na aakha akinoko aalawaniyeeyo ottuukhu. Yo khuwooza maaswihaapa vitthu epile. ¹¹ Ila maaswihaapa khuhisala akhupali mattakhuzi aakha apale, oonaka yoori aari oololo. ¹² Aphano Pheeturu khulankha khusala atthira alawaka okhapuri, n'oofiya khuthurumelamo khusikanamo jooraru, khusala aruti ari wootkinisiwa khwa epile zaarettikhaniyezo.

Anakhiyoni eettaka Emawu

¹³ Siikhu ethiile, anakhiyoni awiri a Yinsa khulankha khusala alawa nti waari wiitthiwaaye Emawu woolepelana Yeruzaleemu kiyasi ya phiima

** ^{23:54} Jumwaa-monsi: yiyyiye saapatu, siikhu ttakatthiifu ya mayaahuuti.

alufu khumi na moote. ¹⁴ Yo aari olawa attakhulaka monkoni wa vitthu epile zaarettikhaniyezo. ¹⁵ Eettaka olawa etthiipile apiyaka mwaasa na akheetisanaka, Yinsa mwennyeweene khuwaatthoowela khusala alawa vamote na-yo. ¹⁶ Ila yo khumpuwa nkama oowaariipa omaasho, khuhisala anjuwa yoori Yinsa aya aari othuutule.

¹⁷ Ye khuwoozela yoori: “Niini mwinnyakulisanelaaaye ntarikhi mphu mweettaka weettetta?”

Yo khweemela omaasho waya athoonyezaka ohuzunikha. ¹⁸ Mmote wa yo aari wiithiwaaye Keleyoopa, khumuuzela Yinsa yoori: “Niri weeyo o nletto mmote paasi wa Yeruzaleemu ohinjuwaaye vitthu zirettikhaniyezo siikhu epi?”

¹⁹ Yinsa khuwoozela yoori: “Niini erettikhaniyeeyo?”

Yo khunjipu yoori: “Epile zinrettikhaneliyeeyo Yinsa wa Nazareeti. Ye aari napiyu woowahi khwa zooretta zawe na mattakhuzi awe vakatthi wa Nnyizinku mpakha wa atthu ooshi. ²⁰ Ila attunkhulu a mahaakhimu a tiini na afwalume a mmuti mwetthu, khuruma ohukhumweliwa ofwa khulawa khukhomeliwa vansalapa. ²¹ Fweeyo naari ororomela yoori ti ye aari weettelaaye owoosuru atthu a Ezirayeele, thanku zirettikhane vitthu zaya epo leelo siikhu yattaatthu. ²² Neeya wooshanka mwaasa yoori aakha akina a nkhuntti mwetthu, aalawiye okhapuri leelo lifwajiri ²³ khuhisikani mwili awe, khuta khunuza yoori ooniye malayikha, atthaapo pi alupiyeeyo yoori Ye asisimuwa ori haayi. ²⁴ Khulawa ashirikha ethu akina okhapuri, khusikana etthiipile aalupiyeexo aakha apale, ila yo khuhimooni.”

²⁵ Aphano Yinsa khuwoza yoori: “Atthu oorupaza weeleyiwa na oolipa waamini zooshi epi alupiyeexo manapiyu! ²⁶ Al-Masiihu khaarina yoohoowa etthiipo, yoori eette nnuuru mwawee?” ²⁷ Khusala awweleza mattakhuzi ooshi aatikheweeyo nkithaapu aari onlupaaye Ye, waaza kithaapu ya napiyu Munsa mpakha za manapiyu akinoko.

²⁸ Asaleelaka ofiya nti opule aari weettaaye, Yinsa khusala ompuwa nkama aari otakhaaye owaavikana. ²⁹ Ila yo khunkhanyarela araka: “Ohivikane wiiye attaapha na-fweyo, njuwa linttela otupweela waripa.” Yinsa khuvira nnyupa khwiya vamote na-yo.

³⁰ Wakathi eekhaliyeovo vameeza vamote na atthaapale awiri, khuthula phaawu khuparikhya, khumeya khuwenka. ³¹ Attaaphale, oowiiri maasho aya khufunuwa khunjuwa yoori ti Yinsa, na-Ye khunaanelia.

³² Aphano khusala oozelana araka: “Wakathi opule naari ottakhulanaavo ntarikhi aneelezaka mattakhuzi a nkithaapu, rooho zetthu khazeetta onikaphula?”

³³ Yo khulankha nasaapiru khusala arutela Yeruzaleemu, khuwaasikana maaswihaapa apale khumi na mmote na anakhioni akina a Yinsa akusanyeyiye vahali vamote, ³⁴ alupaka yoori: “Khweele Mbwana asisimuwa, ampuwelela Simawu.” ³⁵ Na-yo apale awiri khusala alupa epile ooniyeexo ntarikhi na nanna anjuwiyeexo Mbwana wakathi ameyiyeovo phaawu.

Yinsa oniwaapuwelela anakhiyoni awe

³⁶ Anakhioni apale nalelo eettaka ottakhula etthiipile, Yinsa khuta vakatthi vaya, khulupa yoori: “Heeri yiye vamote na-mweyo.”

³⁷ Yo khwiya oosuthuwa na woova amoonaka nkama nshitapehe.

³⁸ Yinsa khuwoozela yoori: “Mwasuthuwa-ni? Wala mishikili ziriiye nroho mwenu pi za niini? ³⁹ Moone makhono aka na moolu aka yoori ti miyo! Mwikikhole moone, maana nshitapehe khuniiyana nyama wala makhonkolo nkama etthiipo mweeyo mwinikoonaazo.”

⁴⁰ Attakhulaka ethhiipile, khuwaathoonyeza makhono awe na moolu awe. ⁴¹ Mwaasa wa furaha khuluyeene na oshanka, yo khuhisala aamini nalelo, aphano Yinsa khuwoozela yoori: “Mwinaaye ethhu-yoojiwa mwikinkhe kije?” ⁴² Yo khumwinkha phantte ya swi yawoochiwa. ⁴³ Khuthuula khusala arafuna attaapho yo amoonaka.

⁴⁴ Nawiisha khulupa yoori: “Pi ethhiipi kaawuuziyeenini wakathi opule kaari vamote na-mweyo, yoori zaarina yoorettikhana zooshi epile zaatikhii-weeyo khwa miiyo nkithaapu ya kano ya napiyu Munsa na kithaapu za manapiyu akina na nzaapuuri.”

⁴⁵ Aphano Yinsa khuwaapatthisa fwahamu yoori ziweeleye zawaatikhiiwa za nkithaapu. ⁴⁶ Khuwoza araka: “Yaatikhiiwa yoori Al-Masiihu aarina yoohoowa na osisimuwa siikhu yattaatthu vakatthi wa anamfwa; ⁴⁷ na khwa nzina lawe onlawa walaleyiwe othupwiya yoori ziswaamihewe twampi, waaza Yeruzaleemu mpakha khapila zooshi za voolumwenku. ⁴⁸ Mweeyo mwa amashaahiti wa vitthu zaya epi. ⁴⁹ Miiyo kinlawwa kooperekhezeni etile Paapa aahitiyeyo, mweeye Yeruzaleemu ottuukho mpakha mwiitaazaniwe owahi wa pinkuuni.”

Owela wa Yinsa pinkuuni

⁵⁰ Aphano Yinsa khuwaathuula anakhiyonu awe khulawana Betaaniya, n'ooziya khulansa makhono awe khuwaaparikhya. ⁵¹ Awaaparikhyaaka ethhiipile, khuwaasusa khusala aweziwa alawaka pinkuuni. ⁵² Yo khumwaa-putu, khurutela Yeruzaleemu na furaha khuluyeene. ⁵³ Wakhula siikhu aari othukumana vaje wa Nyuupa ya Nnyizinku ansifwaka Nnyizinku.

Yaahaya

Nttakhuzi la Nluku lajiretta opinaatamu

¹ Omwanzo laari Nttakhuzi. Nttakhuzi laari vamote na Nluku na Nttakhuzi laari Nluku. ² Ye laari vamote na Nluku omwanzo.

³ Vitthu zooshi zarettiwa khwa ye; eriwaka khaari ye khayiivo moote yaari weettelaaye orettiwa. ⁴ Ohaayi waari nkatthi mwawe, ohaayi opo yaari nuuru ya anaatamu. ⁵ Nuuru enaara n'yiiza, na yiiza khuhikhitiri oshintta.

⁶ Aarivo nlume mmote aaperekhiweeyo ti Nluku aari wiithiwaaye Yaahaya. ⁷ Ye ata nkhamma shaahiti yoori alawele oshaahiti monkoni wa nuuru, yoori atthu ooshi apatthe osiila hapari na akhupali khwa ye. ⁸ Ye khaari nuuru, ila ata nkhamma shaahiti wa nuuru. ⁹ Nuuru yeekhweele, eniwaamwasikhelaaye anaatamu ooshi, yata voolumwenku.

¹⁰ Nttakhuzi laari voolumwenku na olumwenku wompiwa ti ye, ila olumwenku khuhinjuwi. ¹¹ Awaateliye apale eeyiyeyo awe, yo khuhimpwekhereli. ¹² Ila apale ampwekhereliyeeyo na akhupaliyeeyo nzina lawe, awenka ruhusa yooretteya aana a Nluku. ¹³ Atthaapo ahivokoliweeni khwa ephattu, wala khwa matakhele a onaatamu wala ohiiyi makhaamu a nlume, ila avokoliwa khwa matakhele a Nluku.

¹⁴ Nttakhuzi khujiretta ntthu na khwiikhala na-fweyo. Noona siifwa yawe, siifwa nkhamma mwaana mmote paasi wa Paapa wawiitaala rehema na khweele.

¹⁵ Yaahaya alaza oshaahiti awe araka: “Otu ti otule kaari onlupaaye, aari otaaye paata ya miiyo na nwulu zayita miiyo, maana ye aarivo miiyo kihineeyevo.” ¹⁶ Maana fooshi fweeyo napokherela phantte ya zooshi ariina na rehema khwa rehema. ¹⁷ Maana kano zatiisiwa khwa vakatthi wa Munsa; rehema na haakhi yata khwa Yinsa Al-Masiihu. ¹⁸ Khina anamoone Nluku, ila Nluku mmote paasi, othuuto ariiye mpavu wa Paapa, ti anithoonyeziyeyo.

Oshaahiti wa Yaahaya Namoosa

¹⁹ Opu oshaahiti wa Yaahaya, wakathi mayahuuti a Yeruzaleemu awaaperekhiyeeyo anamalokozela a tiini na aleevi* yoori amuuzele yoori: “Opaani weeyo aya.” ²⁰ Ye khutukhuru na khuhikatthali, khulupa woosileyavo yoori: “Akiyo Al-Masiihu!”

²¹ Khumuuzela yoori: “Aphano, weeyo o paani? Ti weeyo Aliyaasi?”

Khuri: “Akiyo!”

“Ti weeyo Napiyu aari weettelaaye ota?”

Khujipu yoori: “Wala!”

²² Khumuuzela yoori: “Khi o paani? Onijipu yoori nawooze apale anirumiyeeyo. Nanna eti onjilupezaaye omweenyewe?”

²³ Yaahaya khujipu na mattakhuzi a napiyu Ezaaya araka: “Miiyo ki huula enkuwaaye n'yaara eraka: ‘Mookolele tarikhi ya Mbwana.’”

²⁴ Apale aarumiweeyo aari akhuntti ya mafwarizeewu, ²⁵ khumuuzela yoori: “Khi oniwooselani atthu ohi Al-Masiihu wala Aliyaasi ama Napiyu?”

²⁶ Yaahaya khuwaajipu yoori: “Miiyo kinoosa na maati, ila vakatthi venu mweeyo owaapho ntthu mwihinujuwaaye, ²⁷ antaaye paata ya miiyo na wala akinsuhi ofukula mikhoyi za jampali zawe.”

* **1:19** Aleevi awaziri a mahaakhimu a tiini.

²⁸ Vitthu epo zarettikhana nti wa Betaaniya phantte ya khipula ya muuttho Yorotaani, ottuukho Yaahaya aari orettaawo njampo la woosa.

Pwittipwitthi ya Nluku

²⁹ Mmeesho mwaya Yaahaya khumoona Yinsa eettaka ota khuri: “Mwimoone! Oto antaaye apho, pwittipwitthi ya Nluku anlazaaye twampi voolumwenku!” ³⁰ Otu ti otule kaari onlupaaye, wakathi opule kaari oraaye: ‘Onta nyumani waka ntthu akizitiye maana ye aarivo miiyo kihineeyeyevo.’ ³¹ Miiyo akaari onjuwa paani yaya, kateela omoosa na maati yoori athoonyeziwe Ezirayillu.”

³² Aphano Yaahaya khulawela oshaahiti alupaka theenya yoori: “Miiyo koona Rooho Ttakatthiifu yiishukhaka pinkuuni nkhamma jiwa khummorela ye. ³³ Miiyo akaari onjuwa paani yaya, ila otule akirumiyeeyo omoosa na maati, khukuza yoori: ‘Weeyo onteela woona Rooho Ttakatthiifu yiishukhaka na emmorelaka, ntthu aya oto ti anoosanaaye Rooho Ttakatthiifu.’ ³⁴ Miiyo koona vitthu epo, tiito kinlawelaaye oshaahiti yoori ye Mwaana wa Nluku.”

Anakhiyoni a Yinsa a mwanzo

³⁵ Mmeesho mwaya Yaahaya aari attaphale opheya na anakhiyoni awe awiri. ³⁶ Noomoona Yinsa aviraka, khuri: “Mwimoone! Oto antaaye apho Pwittipwitthi ya Nluku!”

³⁷ Anakhiyoni apale awiri a Yaahaya noosiila mattakhuzi apale khusala anlotta Yinsa. ³⁸ Aphano Yinsa khuzukuluwa khweekesa nyuma, khuwoona anakhiyoni apale awiri eettaka onlotta khuwoozela yoori: “Mweeyo mwi-neekesani?”

Khujipu araka: “Rabi” (liriina maana a mwaaliimu), “wamaka vayi?”

³⁹ Khuwaajipu yoori: “Olawa moonewo.”

Khulawa khoonawo ohali Yinsa amakiyeewo na khwiya vamote na ye siikhu yaya etile yooshi. Epo zaarettikhaniye payina ya saa-khumi ya njuwa-looveva.

⁴⁰ Antere, ttwiye Simawu Pheeturu, aari mmote wa mamwinyi apale awiri ansiliyeeyo Yaahaya attakhulaka monkoni wa Yinsa, tiito anlottiyeyo. ⁴¹ Mwanzo wonsikana aari ttwiye Simawu, na khumuza yoori: “Nampattha Al-Masihu” (enlupaaye yoori Namathawaziwa). ⁴² Antere khunthuula ttwiye khunlawana wa Yinsa. Yinsa khumweekesa Simawu khuri: “Weeyo o Simawu, mwaana wa Yaahaya, ila waaza nasaapi nzina lawo eriwaka Seefwa.” (Seefwa enlupa yoori Pheeturu†).

Yinsa oninkhuvela Filiipe na Natanayeele

⁴³ Mmeesho mwaya Yinsa khulakela olawa Kalileya na khunsikana Filiipe, khumuza yoori: “Okilotte!”

⁴⁴ Filiipe aari wa sitati ya Betezayiita ottuukho waari owawe Pheeturu na Antere ⁴⁵ Filiipe khunsikana Natanayeele khumuza yoori: “Nampattha otule Munsa aatikhiyeeyo nkithaapu ya kano monkoni wa ye na manapiyu. Ti Yinsa wa Nazareeti, mwaana wa Yuusufu!”

⁴⁶ Natanayeele khuuzela yoori: “Nazareeti, enlankhawo ethu yooshapweya?”

Filiipe khunjipu yoori: “Ote woone!”

⁴⁷ Yinsa amooniyeevo Natanayeele amwaattamaka khuri: “Oto mwi-izirayillu weekhweele, ntthu woohiina ottettekha va rooho vawe.”

⁴⁸ Aphano Natanayeele khumuuzela Yinsa yoori: “Mwaari okijuwa vayi?”

† 1:42 Liriina maana a liwe

Yinsa khunjipu yoori: “Filiipe ahinookhuwele miiyo kiwooniye wiikhaliye nshini wa nfikeera opule.

⁴⁹ Attaaphale Natanayeele khushanka khuri: “Rabi, weeyo o Mwaana wa Nluku. Weeyo O Mfwalume wa Ezirayiilu!”

⁵⁰ Yinsa khunjipu yoori: “Weeyo wakikhupali mwaasa wa olupa yoori kaawooniye nshini wa nfikeera? Toowo onttela woona vitthu khulukhulu zayita epi.” ⁵¹ Khuvira alupaka yoori: “Miiyo kiniwuzani khweele yoori, mwinoona pinku eri yoofukuwa na malayikha a Nluku awelaka na wiishukha amwiishukhelaka Mwaana wa Pinaatamu.”

2

Yinsa ontta oharusi

¹ Siikhu ya ttaatthu, khwiyyawo harusi Kanaani ya Kalileya na mamaawe Yinsa aari ottuukho. ² Yinsa na anakhiyoni awe khulaleyiwa awe olawa oharusi. ³ Paata ya wiisha viinyu, mamaawe Yinsa khumuza yoori: “Yaweeshela viinyu.”

⁴ Ila Yinsa khujipu araka: “Muukha, enihithajiya okuuza? Nalelo khunafiye wakathi aka.”

⁵ Aphano mamaawe khuwooza anamarumeyela yoori: “Mwirette zooshi epile anttelaaye owuuzani.”

⁶ Attaaphale, zaarivo zuuku sitha mayaahuuti aari orumeyelakaaye wakathi wa otwahareshiwa zaari za maliituru thamaaniini kiina zaari za maliituru miiya na eshiriini.

⁷ Yinsa khulupa yoori: “Mwiitaaze maati wakhula yuuku,” yo khwiitaaza mpakha omilomo waya.

⁸ Aphano Yinsa khuwooza yoori: “Mwittekhe vattithiiru mwimweet-tisele mahutumu wa njampo.” Yo khuretta ethiipile. ⁹ Attaaphale mahutumu wa njampo khoota maati apale aarettiweeyo viinyu woohijuwi ohali yaalankhiyeewo, aari ojuwaaye anamarumeyela apale atekhiyeeyo maati aya. Aphano mahutumu khumuza mposi, ¹⁰ araka: “Attu ooshi azowerela owenkha atthu viinyu ya mwanzo anamalaleyiwa, amana anywa ewaatosha phi mwiniwenkhaavo viinyu yoohafwiifweya, ila weeyo nalelo wapweha viinyu yooshapweya mpakha apha.”

¹¹ Alama ya eto ya minjuza, yaari ya mwanzo Yinsa oretta nti wa Kanaani ya Kalileya. Siifwa yawe yaathonyezeyiye attaapho, na anakhiyoni awe khunkhupali.

¹² Paata ya vitthu epile khusala alawa Kafwaranaawu na mamaawe, attwiize na anakhiyoni awe. Khwiya ottuukhule siikhu vattithiiru.

Yinsa ontwaharesha Nyuupa Yoosifwiwamo Nluku

¹³ Osaleelaka ofiya wakathi wa njampo la Paashikowa wa mayaahuuti, Yinsa khuwelela Yeruzaleemu. ¹⁴ Khuwaasikana Nnyupa Woosifwiwamo Nluku atthu aari wuuzanyisaaye mompe, pwittipwitthi, jiwa, na atthu aari opatilisaaye nzurukhu. ¹⁵ Aphano khweesa puutta ya nkoyi, khuweekaramo atthu ooshi Nnyupa Woosifwiwamo Nluku, vamote na pwit-tipwitthi mpakha mompe zaya. Khumwazela vathi nzurukhu wa apale aari opatilisaaye na khuphinttula meeza aya. ¹⁶ Na khuwooza apale aari wuuzanyisaaye jiwa yoori: “Mwilazemo vitthu zooshi! Mwilikhe oretta pazari nyuupa ya Paapa.”

¹⁷ Aphano anakhiyoni awe khuupuwela zawaatikhiwa ttakatthiifu enraaye: “Ojilipisana waka khwa nyuupa yawo, Oo Nluku, enlukuzela nkatthi mwaka nkama moottho.”

¹⁸ Attaaphale anamalokozela amayaahuuti khumuuzela yoori:” Alama-ni ya minjuza ontakhaaye onithoonyeza” yoori weeyo onaaye owahi wooretta vitthu zooshi epo?”

¹⁹ Yinsa khujipu yoori: “Mwipweche nyuupa eti ya Nluku, miiyo kintta ojeka opheya khwa siikhu ttatthu!”

²⁰ Yo khulupa yoori: “Ojekwa wa nyuupa eti yaathuuliye nyaakkha arupayiini na sitha, weeyo onlupa yoori onttela ojeka opheya khwa siikhu ttatthu?” ²¹ Ila Yinsa nyuupa aari olupaaye waari mwiili awe.

²² Wakathi Yinsa asisimuwiyevo nkhapuri, anakhiyoni awe khuupuwela epile aalupiyeyo, aphano khukhupalela zawaatikhwa ttakatthiifu na mat-takhuzi awe.

Yinsa onjampo la Paashikowa

²³ Wakathi Yinsa aari Yeruzaleemu, onjampo la Paashikowa, atthu awaatta khunkhupali nzina lawe mwaasa wa woona alama za minjuza epile aari orettaazo. ²⁴ Ila Yinsa khaari owaamini maana aari owaajuwa ooshi.

²⁵ Khaari ontakha ntthu woomwinkha oshaahiti monkoni wa pinaatamu, maana ye aari ojuwa niini ephattu ya onaatamu.

3

Nkutthaano wa Yinsa na Nikoteemu

¹ Aarivo mfwarizeewu mmote aari wiitthiwaaye Nikoteemu, ntunkhulu wa mayaahuuti. ² Ye khulawa okutthanana Yinsa osikhu na khumuuzo yoori: “Rabi, ninjuwa yoori onsomisa khwa phantte ya Nluku, maana khina anwahaaye oretta alama za minjuza nkhama epo, aheetteeni Nluku wiiya vamote na-ye.”

³ Yinsa khujipu yoori: “Miiyo kiniuuuzani khweele yoori, khina antakhaaye woona ofwalume wa Nluku aheetteeni ovokoliwa opheya.”

⁴ Nikoteemu khumuuzela yoori: “Nanna-ni ntthu anvokoliwaaye opheya ooluvaliye? Kinretteya ntthu weetta mwiirukulu wa mamaawe swaafu yaphiiri khuvokoliwa opheya!”

⁵ Yinsa khujipu yoori: “Miiyo kiniuuuzani khweele yoori, aheetteeni ovokoliwa na maati na Rooho khina anwahaaye weetta muufwalume wa Nluku. ⁶ Maana otule anvokoliwaaye khwa mwili, mwili, na otule anvokoliwaaye khwa Rooho, rooho. ⁷ Ohiye wootikinisiwa mwaasa wa miiyo olupa yoori: ‘Enihithajiya mweeyo ovokoliwa opheya.’ ⁸ Pheevo envitelela aphale entakhaavo, ensiileya evumaka, ila khinjuweya ohali enlankhawo wala eneettaawo. Enrettikhana ethiipo khwa apale ooshi oovokoliwa khwa Rooho.”

⁹ Nikoteemu khuuzela theenya yoori: “Epo enttela orettikhana toovi?”

¹⁰ Yinsa khujipu araka: “Weeyo o mwaaliimu wa nti wa Ezirayilu khini-weeleya vitthu epo? ¹¹ Miiyo kiniuuuzani khweele yoori, fweeyo ninlupa etile ninjuwaaye na ninlawela oshaahiti wa etile nooniyeyo; ila mweeyo khamwinkhupalela oshaahiti etthu. ¹² Miiyo kawuuzani vitthu za vathi khamwinkhupaleeni khi mwinttela okhupalela toovi amana kiwuuzakani vitthu za pinkuuni? ¹³ Maana khina anawele pinkuuni woohiiyi otule alankhiyeeyo pinkuuni: Mwaana wa Pinaatamu. ¹⁴ Nkhama ethiipo Munsa alansiyeeyo nyookha n'yaara, ethiipo theenya enihithajiya Mwaana wa Pinaatamu wiiya woolansiwa, ¹⁵ yoori wakhula otule aninkhupalaaye eeyane ohaayi wa mileele.

¹⁶ Khwa nanna ethiipo Nluku apheta olumwenku afiyelela onleva Mwanawe mmote paasi, yoori wakhula otule aninkhupalaaye ahipweth-eye ila eeyane ohaayi wa mileele. ¹⁷ Nluku amperekha Mwanawe voolumwenku, khahiyo yoori ahukhumu olumwenku, ila yoori olumwenku wuusurukhe khwa ye. ¹⁸ Wakhula otule aninkhupalaaye khamphukiwa, ila otule ahininkhupalaaye aphukiwa, mwaasa wa ohikhupali nzina la Mwaana mmote paasi wa Nluku. ¹⁹ Ophukiwa waya pi opu; nuuru yata voolumwenku, ila atthu khupheta yiiza, khwiiphiiriwa ti nuuru, mwaasa wa menttezi aya aari ootakhala. ²⁰ Otule anrettaye zootakhala oniiphiiriwa ti nuuru na wala kheepu waattamelu nuuru ontakha yoori khaazi zawe zihooneye. ²¹ Ila otule aneettettisaaye haakhi onta nnuuru, yoori zooneye saaneene, yoori khaazi zawe enkholiwa khwa Nluku.”

Oshaahiti wa Yaahaya Namoosa monkoni wa Yinsa

²² Paata ya vitthu epile Yinsa na nakhiyonи awe khweetta nti wa Yudeya, ottuukho eeshiyewo wakathi vattitthiiru nooretta njampo la woosa. ²³ Yaahaya naye aari owoosa atthu nti wa Enoomi, kharipu ya Saliimi maana aariwo maati awaatta na atthu aari ota oteela woosiwa. ²⁴ (Vitthu epo zarettikhana Yaahaya ahinathhiwe nkalapooso). ²⁵ Khupuwa onyakulisana khwa anakhiyonи akinaaya a Yaahaya na yaahuuti mmote monkoni wa njampo la otwahareshiwa. ²⁶ Yo khulawa wa Yaahaya na khumuuzu yoori: “Rabi, mwinyi otule waariina kaapu ya muuttho Yorotaani wanlaweliyeeyo oshaahiti, ontta woosa na atthu ooshi antta olawa ottuukho ariiwo.”

²⁷ Yaahaya khujipu yoori: “Khina ampwekheraaye etthu aheetteeni winkhiwa pinkuuni. ²⁸ Mweeyo mwa mashaahiti wa etile kilupiyeeyo yoori: “Miiyo akiyo Al-Masiihu, ila ki otule aperekhiweeyo wiilokozi wawe.” ²⁹ Namaposiwa ti wa namaposiwa. Swaahipu aninrumeyelaaye namaposiwa oninjali na onsiileza oniiya woofurahi amana asiila huula ya namaposiwa. Eto furaha yaka yookamilikha. ³⁰ Enihithajiya yoori ye awule na miiyo kijipushuwise.

³¹ Otule anlakhaaye otulu weekhweele ori vatulu wa vitthu zooshi. Otule ari wa vathi ti wa vathi na onttakhula vitthu za vathi; ila otule alankhiyeeyo pinkuuni ori vatulu wa vitthu zooshi. ³² Ye ahakikhi epile oniyeezo na asiiliyeeyo ila khina ankhupaleelaaye oshaahiti awe. ³³ Otule ankhupaleelaaye oshaahiti awe onhakikhi yoori Nluku haakhi. ³⁴ Otule Nluku amperekhiyeeyo onttakhula mattakhuzi a Nluku, maana ye oninkha Rooho Ttakatthiifu woohiphimi. ³⁵ Paapa onimpheta Mwanawe na zooshi attha mmakhono mwawe. ³⁶ Otule aninkhupalaaye Mwaana onaaye ohaayi wa mileele, ila otule aninkatthalaaye Mwaana khanlawa woona ohaayi na theenya katapu ya Nluku empharelela khwa ye.”

4

Yinsa ompiya mwaasa na muukha wa Samariiya

¹ Wakathi Yinsa asiiliyeovo yoori mafwarizeewu asiila yoori Yinsa ontta owaarettta anakhiyonи na owoosa zayita Yaahaya, ² (eettiye ohiiyiru Yinsa aari woosaaye ila anakhiyonи awe), ³ Yinsa khulaawo Yudeya khurutela Kalileya.

⁴ Ila yaari ohithajiya ye ovira nti wa Samariiya. ⁵ Ye khufiya sitati moote ya Samariiya yaari wiitthiwaaye Sikaari yaattamananiyeeyo nshapa la Yaakhumpa amwinkhiyeeyo mwanawe Yuusufu. ⁶ Ottuukhule waariwo nlipu wa Yaakhumpa. Yinsa ari wooshokhera nkatti wa safwari, khulawa khwiikhala nshini wa nlipu. Zarettikhaniye payina ya atuhuri.

⁷ Wakathi otthuupule khuta muukha wa Samariiya ottekha maati. Yinsa khumuza yoori: “Kimeele maati vattitthiiru kinywe.” ⁸ (Zarettikhaniye wakathi anakhiyoni awe eettiyeevo ositati wuzanya ethu-yoojiwa.)

⁹ Muukha otule wa Samariiya khumuuzela Yinsa yoori: “Weeyo oyaahuuti onikivekela maati miiyo, muukha wa Samariiya?” (Maana mayaahuuti na asamariiya khansiilana saana.)

¹⁰ Yinsa khunjipu yoori: “Weeyo eriwaka waari ojuwa tthuwo ya Nluku na paani anuuvekelaaye maati, weeyo weetta onvekela na-ye eetta owinkha maati ohaayi.”

¹¹ Muukha otule khuri: “Mbwana khuna etthu yoottekhana maati maana nlipu opu wiicha. Onttela opattha vayi maati aya apo ohaayi? ¹² Talili weeyo onwulweene zayita papeetthu Yaakhumpa? Ye aninkha nlipu otthuupo aari onywakaavo na aana awe na mompe zawe.”

¹³ Yinsa khumuza yoori: “Otule annywaaye maati apa onlawa eeyane nnyottha theenya, ¹⁴ ila otule anttelaaye onywa maati kinttelaaye omwinkha khanlawa wiiana nnyottha theenya. Olikha toowo, maati kinttelaaye owinkha anttela oretteya naattuuttu wa wiittikha maati a ohaayi wa mileele.”

¹⁵ Muukha otule khumuza yoori: “Mbwana, kimeele maati aya apo yoori kihirutele wiiana theenya nnyottha, wala kihirutele vanlipu apha ottekha maati theenya.”

¹⁶ Yinsa khumuza yoori: “Olawe owawo, wankhuwele mannawo ote.”

¹⁷ Muukha otule khujipu araka: “Akina manna.”

Yinsa khuri: “Weeyo wajipu saana olupa yoori khuna manna. ¹⁸ Maana waarina amanna athaanu, ila aphano otu oriina nasaapi khahiyo mannawo. Eto olupiyeeyo nasaapi khweele.”

¹⁹ Muukha otule khuri: “Mbwana, kiniwoona yoori o napiyu.

²⁰ Amarehemu apapazethu aari waaputwaka vamwaako apha, ila mweeyo mayaahuuti mwinri Yeruzaleemu ti yiyyiye puuro ya waaputwiwawo.”

²¹ Yinsa khumuza yoori: “Okhupali epi kiniwuzaaye muukha, maana ontta waattamela wakathi mweeyo mwihinttelaaye omwaapetu Paapa vamwaako apha wala Yeruzaleemu. ²² Mweeyo asamariiya mwinaapetu etthu mwihinjuwaaye, ila fweeyo ninaapetu etile ninjuwaaye maana nusura enta khwa mayaahuuti. ²³ Khwa attaapho ontta ofiya wakathi na khweele wafiya, anamwaapetu eekhweele anttela omwaapetu Paapa khwa rooho na khweele. Anamwaapetu Paapa aniweekesaaye pi atthaapo. ²⁴ Nluku rooho ti eto eniwaahithajiyaaye apale animwaaputwaaye ana ya omwaapetu khwa rooho na khweele.”

²⁵ Muukha otule khuri: “Miiyo kajuwa yoori o Al-Masiihu (aniithiwaaye Namathawaziwa) onsaleela ota. Amana ata onteela onuuza zooshi.”

²⁶ Aphano Yinsa khumuza yoori: “Ti miiyo! Othuuto ontakhlulanaaye.”

Anakhiyoni a Yinsa antta oruti ositati

²⁷ Wakathi otthuupule anakhiyoni awe khuruti khwiiya ooshanka mwaasa wa onsikana apiyaka mwaasa na muukha. Ila khuhiiivo hatha mmote aamuzeliyeeyo yoori: “Oneekesa-ni?” Ama “Ottakhulanaka ye mwaasa aya niini?”

²⁸ Aphano muukha otule khulikha yuuku yawe khurutela ositati khuwooza atthu yoori: ²⁹ “Mwite mwimoone mwinyi akuuziyeeyo zooshi kinrettaazo. Talili khahiyo Al-Masiihu?” ³⁰ Aphano khulankha atthu nsitati khulawa okhule aariiwo Yinsa.

³¹ Wakathi wa vitthu epile anakhiyoni awe aari onkhanyarela yoori: “Rabi, mwije etthu-yoojiwa.”

³² Ila ye khuwooza yoori: “Kinaaye etthu-yoojiwa mwihiinjuwaaye.”

³³ Aphano anakhiyoni awe khusala oozelana araka: “Talili ena ntthu antiseliyeeyo etthu-yoojiwa?”

³⁴ Yinsa khuri: “Etthu yoojiwa yaka oretta matakhelo a otule akiperekhiyeeyo na okhola khaazi zawe. ³⁵ Mweeyo khamwinlupaka yoori: ‘Nkatthi wa nyeezi mine ninuurula?’ Miyo kiniuuuzani yoori: Mwifunule maasho enu na moone mmashapa! Vitthu zakhomaala entakha wuuriuliwa. ³⁶ Otule anurulaaye ompwekhera phakari yawe na onuurula mishumo za ohaayi wa mileele, khwa nanna namuurula anttelaaye ofurahi vamote na anamazala. ³⁷ Maana khweele etile elupiweeyo yoori: ‘Mmote onzala nkina khuurula.’ ³⁸ Miyo koorumani yoori moorule epile mwihiizaleeni. Akina akhola khaazi, mweeyo khuta opuhela khaazi yaya.”

Asamariiya awaatta a sitati etile aninkhupali Yinsa

³⁹ Asamariiya awaatta a sitati etile khunkhupali Yinsa mwaasa wa osahaahiti aalupiyeyo muukha otule araka: “Ye akuuza zooshi epile kaarettiyeeyo.” ⁴⁰ Attaaphale paata ya Asamariiya ofiya aphale aariivo Yinsa, khunvekela yoori eeye vamote na-yo. Yinsa khwiya vamote na-yo siikhu piiri. ⁴¹ Mwaasa wa mattakhuzi awe atthu awaatta khunkhupali.

⁴² Na khumuza muukha otule yoori: “Aphano nakhupali, khahiyo mwaasa wa mattakhuzi apale olupiyeyo, maana fweeyo nansiila na najuwa yoori khweele Namuusuru wa olumwenku.”

Yinsa oninvonisa mwaana wa waziri wa mfwalume

⁴³ Ziviriyeovo siikhu piiri, khulaawo okhule waya khusala eetta Kalileya. ⁴⁴ Maana Yinsa Mweenyeweene alupa yoori napiyu khanshitahiwa saana mmuti mwawe. ⁴⁵ Afiiyeovo Kalileya, akalileya khumpwekherela saana yo ooniye zooshi aarettiyeeko Yeruzaleemu, vanjampo la Paashikowa, maana yo aari ottuukho.

⁴⁶ Khurutela theenya othotola Kanaani ya Kalileya, ottuukho athatushiyeewo maati khwiya viinyu. Aariwo waziri mmote aariina mwanawewe aari olwaaziwaaye Kafwaranaawu. ⁴⁷ Wakathi asiiliyeovo elupiwaka yoori Yinsa ori Yudeya onlankha Kalileya, khusala amweekesa nonsikana khunvekela yoori anvonise mwanawewe, aari osaleelaaye ofwa.

⁴⁸ Yinsa khuri: “Mweeyo mwinkhupali paasi amana moona alama za minjuza miwulu-miwulu.”

⁴⁹ Waziri otule khuri: “Mbwnana, waakuve okilotte mwanaka ahinafwe.”

⁵⁰ Yinsa khujipu yoori: “Olawe, mwanawo ontta wiiya haayi.” Mwinyi otule khukhupalela mattakhuzi apale a Yinsa khulawa owawe. ⁵¹ Nalelo mwinyi otule ari ntarikhi, akarumeya awe khusala anthepeeza oteela omuuza yoori mwanawo ori haayi. ⁵² Paata awoozeliyeovo yoori wakathi-ni mwaana otule apatthiyeovo ashikhaali, yo khujipu yoori: “Hooma yanlikha taana payina ya saa-sapa ya makaaripi.”

⁵³ Aphano papaawe mwaana khufwahamu yoori wakathi ooziweeyo ti Yinsa waari otthuupule yoori: “Mwanawo ontta wiiya haayi.” Attaaphale khunkhupali Yinsa ye na vaje vawe wooshivo. ⁵⁴ Eto yaari alama yaphiiri ya minjuza Yinsa aarettiyeeyo, paata ya olankha Yudeya eettaka Kalileya.

¹ Ziviriyeovo vitthu epile, Yinsa khulawa Yeruzaleemu mwaasa wa njampo la mayaahuuti. ² Ewaakho Yeruzaleemu, kharipu ya Vanlako wa Pwittipwitti, kulaathayini khwa luuka ya meepereewu eniitthiwa Betezita, eriina mapantta mathaanu oovikhiwa. ³ Attaapho aari orapalelakaavo anamarati enkeene; anamarakala, anahooni na anasupiyaani awejaka nziko wa maati*, ⁴ maana nlayikha la Mbwana laari wiishukhaka swaafu kiina na wunttula maati apale. Otule aari wiiyaaye wa mwanzo weetta nkulaathayini noovona marati awe. ⁵ Attaaphale aarivo mwinyi aariina nyaakha talaathiini na minaane arina supiyaani. ⁶ Yinsa khumoona mwinyi otule ari woorapalela ajuwiyeovo yoori aaza raku olwaaziwa, khumuuzela yoori: “Weeyo ontakha ovonisiwa?”

⁷ Nlwele otule khujipu yoori: “Mbwanan aka, akina hatha ntthu wookaawuni okittha nkulaathayini amana maati onttuliwa. Kitakhaka weettamo, akina antta weettamo miiyo kihineettemo.”

⁸ Aphano Yinsa khumuza yoori: “Olankhe, othuule nrepa lawo weettette!” ⁹ Nasaapiru mwinyi otule khwiiya woovona, khuthuula nrepa lawe khwaaza weettetta.

Siihku yaya etile yaari saapatu. ¹⁰ Mwaasa wa ethiito mayaahuuti khumuza otule aavonisiweeyo yoori: “Leelo saapatu, enikhattaziwa weeyo othuula nrepa lawo.”

¹¹ Ye khuwaajipu yoori: “Ntthu akivonisiyeeyo ti akuuziyeeyo yoori: ‘Othuule nrepa lawo na weettette.’”

¹² Khumuuzela theenya yoori: “Paani mwinyi aya oto awuuziyeeyo: ‘Othuula nrepa lawo na weettetta?’”

¹³ Mwinyi otule aavonisiweeyo khaari onjuwa paani otule aya, maana Yinsa khaari wooneya mwaasa wa wawaattiwavo.

¹⁴ Paata ya vitthu epile, Yinsa khukutthanana Nnyupa Woosifwiwamo khumuza yoori: “Woone, weeyo wavonisiwa! Ohirutele ntwampi yoori ehuurettikhanele etthu yooziti.” ¹⁵ Mwinyi otule khulawa khuwooza mayaahuuti yoori aari Yinsa anvonisiyeeyo. ¹⁶ Aphano mayaahuuti khwaaza onlupattha Yinsa, maana ye eetta ovonisa saapatu. ¹⁷ Ila Yinsa khuwooza yoori: “Paapa ontta okhola khaazi mpakha leelo, na-miyo kintta okhola.” ¹⁸ Mwaasa wa ethiito mayaahuuti khusala atakha omuula, woohiyyi paasi mwaasa wa ohishututeli kano monkoni wa saapatu, ila theenya eetta olupa yoori Nluku ti Paapa na ajilikanisanaka Nluku.

Yinsa oneeleza khaazi yawe

¹⁹ Aphano Yinsa khuwooza yoori: “Miiyo kiniuwuzani khweele yoori, Mwaana khanretta etthu yawe, ila onretta etile animoonaaye Paapa arettaka. Maana zooshi epile anrettaaye Paapa, Mwaana onretta etthiipo.

²⁰ Maana Paapa onimpheta Mwaana na oninthonyeza zooshi anrettaazo, onteela onthoonyeza khaazi kiina zoziti epi yoori mweeyo mwishanke.

²¹ Maana etthiipo Paapa aniwaasisimulaaye ananfwa na khuwinkha ohaayi, Mwaana naye oniwinkha ohaayi apale ye aniwatakhaaye. ²² Paapa khanimpukha hatha ntthu, ila Paapa amwinkha Mwanawewe ophuka wooshi, ²³ yoori ooshi anshitahi Mwaana nkama aninshitahaazo Paapa. Otule ahininshita-haaye Mwaana khaninshitahi Paapa otule anrumiyeyo.

²⁴ Miiyo kiniuwuzani khweele yoori, otule ansiilaaye nttakhuzi laka na aninkhupalaaye otule akiperekhiyeeyo onaaye ohaayi wa mileele, wala khamphukiwa, ila avirela ofwa yoori eeyane ohaayi. ²⁵ Miiyo kiniuwuzani

* 5:3

khweele yoori ontta ofiya wakathi, na wafiya, ananfwa anttelaaye osiila huula ya Mwaana wa Nluku na otule anttelaaye osiila oniiya haayi.²⁶ Nkhamma etthiipo Paapa eeyiyeyo mweenyewe ohaayi, amwinkha mwanawe wiiya mweenyewe ohaayi,²⁷ na amwinkha ofwalume yoori aphuke, maana ye Mwaana wa Pinaatamu.

²⁸ Mwihiye wooshankela epo zaya, maana ontta ofiya wakathi wa ooshi apale ari nkhapuri anttelaaye osiila huula yawe²⁹ anlawa asisimuwe nkhapuri. Apale aari orettaaye zooshapweya anttela osisimuwa eeye haayi, apale aari orettaaye zootakhala anttela osisimuwa eeye ophukiwa.³⁰ Otthome akinwahi oretta hatha ethu. Miiyo kimphuka khwa nanna Paapa aku-uziyeeyo, na ophuka waka pi wa shariya maana akineekesa ojituvelisa, ila matakhele a otule akiperekhiyeeyo.

Oshaahiti monkoni wa Yinsa

³¹ Nkhamma kinjilawela oshaahiti kimweenyewe, oshaahiti aka khahi wa khweele. ³² Ila owaapho nkina anlawelaaye oshaahiti monkoni wa miiyo na miiyo kinjuwa yoori oshaahiti aya opo alupiyeyo monkoni wa miiyo haakhi.

³³ Mwawaarumiye atthu olawa omuuzela Yaahaya, yo khulaza oshaahiti wa khweele. ³⁴ Miiyo akininhithajya hatha ntthu okilawela oshaahiti, ila kinlupa vitthu epo yoori mweeyo mwiiye wa wuusurukha. ³⁵ Yaahaya aari nkhamma likhompe laari okholelaaye nuuru yaya nawuumwasikhelani, mweeyo khukhupalela khwa wakathi vattitthiiru ofurahela nuuru yaya eto. ³⁶ Ila miiyo kinaaye oshaahiti nwulweene zayita Yaahaya, mwaasa wa khaazi akinkhiyeeyo Paapa yoori kikhole. Ethiito oshaahiti yoori Paapa ti akirumiyeeyo. ³⁷ Paapa otu akiperekhiyeeyo, onlaza oshaahiti monkoni wa miiyo. Mweeyo khamwina siile huula yawe, wala khamwina moone nanna ariiyo, ³⁸ theenya khamwina nttakhuzi lawe nroho, maana khamwinkhupaleeni otule amperekhiyeeyo. ³⁹ Mwasoma zawaatikhiwa ttakatthiifu, maana mwinoona yoori khwa yo mwinaaye ohaayi wa mileele, ila pi ethhipo zinikilawelaaye oshaahiti, ⁴⁰ ila mweeyo khamwintakha okiteela miiyo yoori mwiiyane ohaayi.

⁴¹ Miiyo akinkhupalela siifwa za anaatamu. ⁴² Maana miiyo kajuwa yoori mweeyo khamwina pheta ya Nluku nkathhi mwenu. ⁴³ Miiyo kata khwa nzina la Paapa, ila khamwikipwekhereleeni. Nkina amana ata khwa nzina lawe mweenyewe, weekhwhee mwintta ompwekherela. ⁴⁴ Mwinttela okhupali toovi mwitakhaka osifwiwa pi atthu, mwihitakhaka siifwa ya Nluku mmote paasi?

⁴⁵ Khwa ethiipo mwihaakanyere miiyo wuulokovezani mmakhono wa Paapa. Anttelaaye wuulokovezani ti Munsa, othuuto mwiriinaaye nromelo enu. ⁴⁶ Eriwaka mwaari okhupalela epile Munsa alupiyeyo, mweetta okikhupalela na-miyo, maana ye aatikha vitthu monkoni wa miiyo. ⁴⁷ Ila amana mwiikhupalaka etile aatikhiyeeyo, nanna-ni mwinttelaaye okhupalela etile miiyo kinlupaaye?”

6

Yinsa onjisa khuntti ya atthu

¹ Paata ya vitthu epile, Yinsa khulokha ntthatta la Kalileya theenya liniithiwaaye Tiperiyaati. ² Khuntti khuluyeene ya atthu khusala enlotta, maana eettiye woona alama za minjuza aarettiyeego za owaavonisa alwele. ³ Ye khuwela vamwaako khwiikhala attaapho na anakhiyoni awe. ⁴ Esaleelaka ofiya siikhu ya orettiwa njampo la Paashikowa la mayaahuuti.

⁵ Aphano alansiyeovo maasho khoona khuntti khuluyeene ya atthu yeettaka onteela, Yinsa khumuuzela Filiipe yoori: “Noozanye vayi phaawu niwenkhe atthu apa aje?” ⁶ Aamuzeliye yoori amweeze, maana ye aajuwiye etthu aari weettelaaye oretta.

⁷ Filiipe khujipu araka: “Nzurukhu miiya piiri wa feeta khunfiyela wuuuzanya phaawu yoori wakhula ntthu apatthe pattaasu.”

⁸ Aphano nakhiyoni mmote anitthiwaaye Antere, ttwiyi Simawu Pheeturu, khuri: ⁹ “Shaapu otu ariiyapha onaaye phaawu thaanu na swi piiri, ila epo zaya niini khwa atthu awaatta apa?”

¹⁰ Yinsa khuri: “Mwiwooze atthu apo eekhale.” Puuro yaya etile zaarivo nyaani zawaatta. Atthu apale khwiikhala, alumme aari etthu ya alufu thaanu. ¹¹ Aphano Yinsa khuthuula phaawu khunshukhurwela Nluku, khwaawanya na khuretta ethiipo khwa swi, wakhula ntthu khwa kхиima aari otakhaaye. ¹² Paata ya orupalaza, Yinsa khuwoza anakhiyoni awe yoori: “Mwilokotthele zooshi epo zisaliyeozo yoori ehaashikhevo hatha moote.” ¹³ Khulokotthela tathela za phaawu epile thaanu, khwiitaala khelenke khumi na piiri, aalikhieeyo apale aari orafunaaye. ¹⁴ Ooniyeovo alama etile ya minjuza Yinsa aarettiyeozo khulupaza yoori: “Woohiivo hatha shaakha otu ti Napiyu aari weettelaaye ota voolumwenku.” ¹⁵ Yinsa noojiwa yoori aari otakha onthuula na kuvu zaya anrette wiiya mfwalume aya, khulaavo aphale vaya khulawa theenya omwaako otthwe.

Yinsa oneettetta vatulu wa maati

¹⁶ Njuwa-looveva anakhiyoni a Yinsa khwiishukhela ontthatta.

¹⁷ Khupakhira nkalawa, khulokhela kaapu phantte ya Kafwaranaawu. Vathi waariipyeyevo, ila Yinsa khaari vamote na-yo. ¹⁸ Khusala evuma pheevo yookhomaala na mpahari khupuwamo mawipi. ¹⁹ Anakhiyoni eettaka ofuttha alawaka ethiipile eettettiye kiyasi ya phiima alufu thaanu ama sitha, khusala amoona Yinsa eettaka ota eettettaka vatulu wa maati aattamelaka kalawa; yo khwiya awoova. ²⁰ Ila Yinsa khuwoza yoori: “Ti-miyo! Mwihoove!” ²¹ Aphano anakhiyoni apale khumpwekherela na furaha nkalawa mphule nasaapiru khufiya ohali aari weettaawo.

Yinsa phaawu ya ohaayi

²² Mmeesho mwaya, atthu apale asaliyeeyo phantte etile kiina ya ntthatta, khujuwa yoori kalawa moote etile yaari aphale, Yinsa kapakhiriyevo, anakhiyoni awe aalawiye ottho. ²³ Elottelanaka, kalawa kiina za sitati ya Tiperiyaati khufiya kharipu ya aphale atthu aari orafunaavo phaawu wakathi Yinsa anshukhurweliyeovo Mbwana. ²⁴ Wakathi atthu apale ajuwiyeovo yoori Yinsa khaarivo aphale na anakhiyoni awe, khweetta nkalawa mwaya khusala alawa Kafwaranaawu olawa omweekesa.

²⁵ Nonsikana kaapu ya ntthatta, khumuuzela yoori: “Rabi, wafiya lini okhuno?” ²⁶ Yinsa khuwaajipu yoori: “Miiyo kiniwuuzani khweele yoori, mweeyo mwinikeekesa, khahiyo mwaasa wa woona alama za minjuza, ila mwaasa wa orafuna phaawu khwiya woorupala. ²⁷ Mwihihole khaazi khwa etthu-yoojiwa enharipweyaaye, ila khwa etthu-yoojiwa eninkhaaye ohaayi wa mileele, ethiito Mwaana wa Pinaatamu aniwinkhaanini. Maana, Nluku Paapa, anttheliyeeyo alama yawe ya onhakikhi.”

²⁸ Aphano khumuuzela Yinsa yoori: “Ninhithajiya oretta niini yoori nikhole khaazi Nluku antakhaaye?”

²⁹ Yinsa khuwaajipu yoori: “Khaazi Nluku antakhaaye tiiti, onkhupali otule amperekhiyeeyo.”

³⁰ Aphano khumuuzela yoori: “Alama-ni ya minjuza onttelaaye onithoonyeza yoori noone na nuukhupali weeyo? Wala onttela oretta-ni?”

³¹ Amarehemu apapazetthu aja mana n’yaara, nkhamma ethiipo enlupaazo zawaatikhiwa ttakatthiifu eraka: ‘Ye awenkha etthu-yoojiwa ya pinkuuni.’”

³² Yinsa khuwooza yoori: “Miiyo kiniwuuzani khweele yoori: Khahiy Munsa awinkhiyeenini phaawu ya pinkuuni, ila Paapa ti aninkhaaye phaawu ya khweele ya pinkuuni. ³³ Maana phaawu ya Nluku ti otule eeshukhiyeeyo pinkuuni khwinkha ohaayi olumwenku.”

³⁴ Yo khuri: “Mbwna, oninkhe phaawu ethiito khwa mileele!”

³⁵ Aphano Yinsa khulupa yoori: “Miiyo ki phaawu ya ohaayi. Otule aniki-teelaaye miiyo khinteela onkhola theenya jala na otule anikikhupalaaye miiyo khalinteeela onkhola theenya nnyottha. ³⁶ Ila nkhamma ethiipo miiyo kiwuuziyeenini yoori, mweeyo mwakoona, ila nalelo khamwinkikhupali.

³⁷ Wakhula otule Paapa anikinkhaaye, onikiteela miiyo, na otule anikiteelaaye miiyo akinteela onthanya ³⁸ Maana keeshukha pinkuuni, khahiy yoori kirette matakhero aka, ila kirette matakhero awe otule akiperekhiyeeyo. ³⁹ Matakhero a otule akiperekhiyeeyo pi apa: ahikaashikhe hatha mmote wa otule akinkhiyeeyo, ila miiyo kinsisimule siikhu ya mwiisho.

⁴⁰ Maana matakhero a Paapa pi yoori wooshi otule animoonaaye Mwaana na khunkhupali eeyane ohaayi wa mileele na miiyo kintta onsisimula siikhu ya mwiisho.”

Waapa wa mayahuuti

⁴¹ Mayaahuuti khusala aapa mwaasa wa Yinsa owooza yoori: “Miiyo ki phaawu yiishukhiyeeyo pinkuuni.” ⁴² Khurutela olupa yoori: “Khahiy Yinsa otu, mwaana wa Yuusufu? Onoona yoori fweeyo khanninjuwa papaawe na mamaawe? Onlupa toovi yoori: ‘Keeshukha pinkuuni?’

⁴³ Yinsa khuwaajipu yoori: “Mwilikhe okaapa. ⁴⁴ Khaavo ankiteelaaye miiyo woohiiyi otiisiwa ti Paapa, otule akiperekhiyeeyo na miiyo kininsimula siikhu ya mwiisho. ⁴⁵ Yaatikhiwa nkithaapu za manapiyu yoori: ‘Ooshi anttela osomisiwa ti Nluku.’ Nakatalikha, wooshi otule asiliyeeyo phantte ya Paapa na khujuwa, onikiteela miiyo. ⁴⁶ Khina anamoone Paapa, ila otule alankhiyeeyo wa Nluku ti amooniyeeyo Paapa. ⁴⁷ Miiyo kiniwuuzani khweele yoori: Otule anikikhupalaaye onaaye ohaayi wa mileele. ⁴⁸ Miiyo ki phaawu ya ohaayi. ⁴⁹ Apapazenu aja mana n’yaara na khufwa. ⁵⁰ Eti phaawu yiishukhiyeeyo pinkuuni, yoori wakhula otule anjaaye ahifwe. ⁵¹ Miiyo ki phaawu ya ohaayi yiishukhiyeeyo pinkuuni. Ntthu amana aja phaawu yaya eto, ontta wiiyana ohaayi wa mileele na phaawu kininkhaaye olumwenku yoori wiiyane ohaayi, mwiili aka.”

⁵² Aphano mayahuuti khwaaza onyakulisana atthaaporu araka: “Mwinyi otu onttela oninkha toovi mwiili awe yoori nirafune?” ⁵³ Yinsa khuwooza yoori: “Miiyo kiniwuuzani khweele yoori: Amana mweeyo mwihirafuni mwiili wa Mwaana wa Pinaatamu na khuhinywi taamu yawe, khamwina ohaayi mwaamweenyewe. ⁵⁴ Wakhula otule anrafunaaye mwiili aka na khunywa taamu yaka onaaye ohaayi wa mileele na miiyo kinteela onsisimula siikhu ya mwiisho. ⁵⁵ Maana mwiili aka etthu-yoojiwa ya khweele na taamu yaka etthu yoonywiwa ya khweele. ⁵⁶ Otule anrafunaaye mwiili aka na khunywa taamu yaka oto oniikhala khwa miiyo na miiyo khwa ye. ⁵⁷ Nkhamma Paapa akiperekhiyeeyo eeyiyeeyo haayi, na miiyo kiniikhala mwaasa wa ye. Khwa ethiipo otule anrafunaaye mwiili aka oniiyana ohaayi mwaasa wa miiyo. ⁵⁸ Eti phaawu elankhiyeeyo pinkuuni. Apapazenu aja mana na khufwa, ila otule anrafunaaye phaawu eti oniiya haayi mileele.”

⁵⁹ Ye aalupiye mattakhuzi apa wakathi aari osomisaaye nsinakooka ya Kafwaranaawu.

Anakhiyoni awaatta anintthira Yinsa.

⁶⁰ Paata ya osiila mattakhuzi apale, anakhiyoni enkeene khulupa yoori: “Olipa mattakhuzi aya apa. Paani anwahaaye okhitiri?”

⁶¹ Ila Yinsa khujuwa nkatthi mwawe yoori anakhiyoni awe eetta onyakulisana khuwoozela yoori: “Mattakhuzi aka antta wuutapanyani?

⁶² Khi enttela wiiya toovi amana mwimoona Mwaana wa Pinaatamu arutelaka okhu alankhiyeewo? ⁶³ Rooho ya Nluku eninkha ohaayi, ila mwiili khuna fwayita; mattakhuzi apa kiwuuziyeenini pi a rooho na ohaayi. ⁶⁴ Ila khwa etthiipo awaapho vakatti venu akina ahinkhupalelaaye.” Ila Yinsa aari ojuwa omwanzweene paavi apo aya ahaari okhupalaaye na paani aari weettelaaye onzukuluwela. ⁶⁵ Ye khuri: “Tiito kiniwuuzanini yoori, khina anwahaaye okiteela miiyo kiheetteeni winkhiwa ti Paapa.”

⁶⁶ Wakathi otthuupule anakhiyoni enkeene khuntthira na khulikha on-lotta.

⁶⁷ Yinsa khuwoozela apale khumi na awiri yoori: “Na mweeyo mwintakha okitthira mwilawe?”

⁶⁸ Simawu Pheeturu khujipu yoori: “Ninttela onlotta paani? Weeyo onaaye mattakhuzi a ohaayi wa mileele. ⁶⁹ Fweeyo ninkhupalela na ninjuwa yoori o Ttakatthiifu wa Nluku.”

⁷⁰ Aphano Yinsa khujipu yoori: “Khahi miiyo kiwaathawuliyeeyo apale khumi na awiri? Ila mmote wa mweeyo sheethwani.” ⁷¹ Ye aari onlupa Yuuda, mwaana wa Simawu Eshikariyoote, aari mmote wa apale khumi na awiri, ila ti aari weettelaaye onzukuluwela Yinsa.

7

Yinsa ontta onjampo la heema

¹ Paata ya vitthu epile, Yinsa khusala eettetta nti wa Kalileya, maana khaari otakha wiiya Yudeya, mwaasa wa mayaahuuti aari otakha omuula.

² Ila njampo la heema la mayaahuuti leetta waattamela. ³ Yinsa khuuziwa ti attwiize yoori: “Weeyo ona yoolaamo mphu olawe Yudeya yoori anakhiyoni awo awahi woona khaazi onkholaaye. ⁴ Maana khina aneekesaaye ojuwiwa pi atthu awaatta ankholaaye khaazi zawe sirini. Nkhama weeyo onretta vitthu epi, othoonyeze vamwanttiwa.” ⁵ Maana hatha attwiize khaari onkhupali.

⁶ Yinsa khuwoza yoori: “Wakathi aka nalelo khunafiye, ila khwa mweeyo wakhula wakathi pi woolikana. ⁷ Olumwenku khunwahi wiiphiiriwa ti mweeyo, ila oniiphiiriwa ti miiyo, maana miiyo kininkha oshaahiti wa yoori khaazi zaya pi zootakhala. ⁸ Mwilawe onjampo, ila miiyo akinlawwa maana khunafiye wakathi aka.” ⁹ Paata ya olupa mattakhuzi apale khwiikhala Kalileya ottuukhule.

¹⁰ Aphano paata ya attwiize olawa onjampo, ye khaalawiye payana, ila sirini. ¹¹ Vanjampo aphale mayaahuuti eetta onsaya na omuuzelela araka: “Mwinyi otule ori vayi?”

¹² Vakatthi wa atthu apale waarivo waapa monkoni wa ye, akina aari olupa toono: “Mwinyi wooshapweya rooho.” Akina araka: “Wala, oniwaattet-tekha atthu.” ¹³ Ila khaavo aari ottakhulaaye payana mwaasa wa owoova mayaahuuti.

Yinsa oneetta onjampo

¹⁴ Wakathi lifiyeevo vakatthi njampo ntthile, Yinsa khweetta Nnyupa Woosifwiwamo khwaaza osomisa. ¹⁵ Amayaahuuti khwiya ooshanka na khuuzela yoori: “Mwinyi otu ajuwa toovi kano ahisomeeni?”

¹⁶ Yinsa khuwaajipu yoori: “Osomisa waka khahiy waka, walankha wa otule akiperekhiyeeyo. ¹⁷ Amana ntthu ajilakelela oretta matakhele a Nluku, ontta osophela nkhamma osomisa waka onlankha wa Nluku ama kinjilupa ki mweenyewe. ¹⁸ Otule anjilupaaye mweenyewe oneekesa siifwa yawe, ila otule aneekesaaye siifwa ya otule amperekhiyeeyo, oto ti wa khweele; khayiivo hatha ethu yoovonyeya vakatthi vawe. ¹⁹ Munsa awinkhani kano! Ila khina mmote wa mweeyo anshututelaaye. Khi mwineekeselani okuula?”

²⁰ Atthu apale khujipu yoori: “Weeyo ona sheethwani! Antakhaaye owuula ti paani?”

²¹ Aphano Yinsa khuri: “Keetta oretta minjuza, mooshi mweeyo khwiya wooshanka. ²² Mwaasa wa yoori Munsa awenka okhiriya (weetta ohiiyiru woolankha wa Munsa ila walankha wa amarehemu apapazethu), mweeyo mwinkhiriysiwa saapatu. ²³ Moone, nkhamma athuuliwa nlume khukhiriysiwa saapatu, yoori kano za Munsa zimariseliwe, khi mwiniphireliwani ti miiyo mwaasa wa ovonisa mwiili wooshi wa ntthu otu saapatu? ²⁴ Mwihiphukane mwaasa woona nanna ariizo ntthu aya, ila mwisala mwi-phukana khwa shariya.”

Yinsa onsomisa vanjampo

²⁵ Atthu akina a Yeruzaleemu khusala alupa yoori: “Khahiy mwinyi othuutu mwaari omwekesaaye yoori mwimuule? ²⁶ Mwimoone, ye ont-takhula vamwanttiwa, ila khuhisala apuwa hatha ntthu wonkheeti! Talili afwalume anjuwa saaneene yoori otu ti Al-Masihu? ²⁷ Ila fweeyo ninjuwa ohali alankhiyeeyo. Amana Al-Masihu ata, khina anttelaaye ojuwa ohali alankhiyeewo.”

²⁸ Wakathi aari osomisaaye Nnyupa Woosifwiwamo, Yinsa khuttakhula woosileyavo araka: “Aaa, mweeyo mwakijuwa na mwinjuwa ohali kilankhiyeewo. Miiyo akiri apha khwa matakhele aka, ila otule akiperekhiyeeyo ti eeyiye khweele. Otule mweeyo mwihinujuwaaye, ²⁹ ila miiyo kininjuwa maana kata khwa ye na ti akiperekhiyeeyo.”

³⁰ Aphano khusala atakha onkhola, ila khayiivo mmote ansapiyeeyo maana wakathi waari ohinafiye. ³¹ Atthu enkeene aari aphale khumkhupali na khusala alupa yoori: “Amana Al-Masihu ata, onteela oretta alama zootikinisa zayita epi arettiyeeyo mwinyi otu? Wala!”

Anamweekesela arumiweeyo yoori ankhole Yinsa

³² Mafwarizeewu noowasiila atthu aapaka monkoni wa Yinsa, aphano mahaakhimu a tiini na mafwarizeewu khuwaaruma anamweekesela a Nnyupa Yoosifwiwamo yoori ankhole. ³³ Yinsa khuwooza yoori: “Kiri vamote na mweeyo wakathi vattithiiru nawiisha kinlawa wa otule akiperekhiyeeyo.

³⁴ Mweeyo mwinlawa mwakeekese, ila mwihipatthe; maana mweeyo khamwinwahi ofiya okhu kinttelaaye wiiyawo.” ³⁵ Mayaahuuti khusala oozelana atthaaporu yoori: “Ontta vayi mwinyi aya otu nihinttelaaye on-sikana? Talili onttela wiikhala na mayaahuuti apale anikhalaaye malaponi, ama onttela owaasomisa akereku? ³⁶ Maana aya niini, a eto aalupiyeeyo yoori: ‘Mweeyo mwinlawa mwakeekese ila mwihipatthe,’ maana ‘mweeyo khamwinwahi ofiya okhu kinttelaaye wiiyawo?’

Nlipu wa maati ohaayi

³⁷ Siikhu ya mwiisho, siikhu khuulu ya njampo, Yinsa khulankha khweemela khukhuwelela araka: “Nkhama owaapho linkholiyeyo nnyottha, akiteele miiyo anywe. ³⁸ Maana otule anikikhupalaaye miiyo, nkhamma enlupaazo zawaatikhiwa ttakatthiifu; ‘nkatthi mwawe zinttela wiittikhamu nyuuttho za maati ohaayi.’” ³⁹ Ye aari olupa monkoni wa Rooho Ttakatthiifu etile aari oteelaaye winkhiwa apale akhupaliyeeyo. Maana nalelo Yinsa aari ahinasifwiwe.

Waawanyeya wa atthu

⁴⁰ Aphano noosiila atthu apale athukumaniyeyo aphale khuri: “Otu ti Napiyu weekhwhee!” ⁴¹ Akina khusala alupa yoori: “Ye ti Al-Masiihu!” Akina khusala oozelana yoori: “Al-Masiihu ontela olankha Kalileya? ⁴² Zawaatikhiwa ttakatthiifu zinlupa yoori Al-Masiihu ontela olankha khwa peewu ya Daawuuda nti wa Belemu, okhu aari wiikhalaawo Daawuuda.” ⁴³ Mwaasa wa ye khupuwa waawanyeya khwa atthu apale. ⁴⁴ Akina khusala atakha onkhola Yinsa, ila khuhiiwo hatha ntthu ansapiyeeyo.

Anamalokozela amayaahuuti aninkatthala Yinsa

⁴⁵ Anamweekesela khulawa wa mahaakhimu a tiini na mafwarizeewu, atthaapo oozeliyeeyo yoori: “Mwaasa aya niini mwihintisaka?” ⁴⁶ Yo khujipu yoori: “Khina anattakhule nkhamma mwinyi oto anttakhulaazo.” ⁴⁷ Mafwarizeewu khuuzela yoori: “Niri talili na mweeyo mweetta ohatiwa? ⁴⁸ Awaapho afwalume ama mafwarizeewu ankhupaliyeeyo? ⁴⁹ Ila atthu apo ahinjuwaaye hatha etthu ya kano alaanikha.” ⁵⁰ Mmote wa atthaapale aari wiithiwaaye Nikoteemu, otule swaafu moote alawiyeeyo okutthanana Yinsa, khuuzela yoori: ⁵¹ “Kano zeetthu khazinhukhumu ntthu, ahaazeeni khapula osiiliwa khujuwiwa etthu arettiyeeyo, khahi ethiipo?” ⁵² Yo khujipu yoori: “Na weeyo wa Kalileya? Woone na ontta ojuwa yoori Kalileya khampuwawo hatha napiyu.” ⁵³ Aphano wakhula mmote khulankha khusala alawa owawe.

8

Muukha aasikaniweeyo araruwaka

¹ Attaaphale Yinsa khulankha khusala alawa omwaako wa Oluveera. ² Supuyeene khurutela Nnyupa Woosifwiwamo, atthu ooshi khusala alawa onkutthanana, ye khwiikhala khusala awaasomisa. ³ Anamanozela a kano na mafwarizeewu khuntana muukha mmote ansikaniyeeyo eettaka oraruwa. Khumweemesa vakatthi wa atthu apale. ⁴ Khuuziwa Yinsa yoori: “Mwaaliimu, muukha otu asikaniwa eettaka oraruwa. ⁵ Muukha toowo, nkatthi wa kano za Munsa, enniruma onvonya na mawe. Khi weeyo onlupa ni?” ⁶ Aari olupa toowo atakhaka yoori apatthe nanna yonlokoveza. Ila Yinsa khwiinama khusala aatikha vathi na yaala. ⁷ Wiiya eetta okhanyarela omuuzela, Yinsa khulankha khuwooza yoori: “Otule khwa mweeyo, ahina twampi eeye wamwanzo omweeselela liwe muukha otu.” ⁸ Khurutela wiinama khusala aatikha theenya vathi.

⁹ Noosiila mattakhuzi apale, ooshi khulaazavo mmote, aaziye apale awulu. Khusalavo Yinsa na muukha otule eemeliye, attaaphale.

¹⁰ Aphano Yinsa khulankha khweemela khumuuzela yoori: “Muukha, ari vayi apale aya? Khina oohukhumwiyeeyo?”

¹¹ Ye khujipu yoori: “Khina mmote, Mbwana.” Aphano Yinsa khumuuzela yoori: “Na miiyo akinuuuhukhumu. Olawe na ottharuwe oretta twampi.”

¹² Yinsa khurutela owooza theenya yoori: “Miiyo ki nuuru ya olumwenku; otule anikilottaye khaneetteta n’yiiza, ila oniiyana nuuru ya ohaayi.”

¹³ Mafwarizeewu khusala amuuza yoori: “Weeyo ojilawela oshaahiti omwenyeweru. Apho oshaahiti awo khahiyo wa khweele.”

¹⁴ Yinsa khuwaajipu araka: “Hatha nkhamma kintta ojilawela oshaahiti, oshaahiti aka pi wa okhweele, maana kinjuwa ohali kilankhiyeewo na ohali kineettaawo. Ila mweeyo khamwinjuwa ohali kilankhiyeewo wala ohali kineettaawo. ¹⁵ Ophuka wenu mweeyo pi wa phantte ya onaatamu; ila miiyo akinimphuka hatha ntthu. ¹⁶ Hatha nkhamma kintta ophuka, ophuka waka pi wa khweele, maana akiri otthome. Kina Paapa otule akiperekhiyeeyo. ¹⁷ Nkano zenu mweeyo yaatikhwa yoori oshaahiti wa atthu awiri pi wa khweele. ¹⁸ Miiyo kinjilawela oshaahiti na Paapa otule akiperekhiyeeyo onikilawela oshaahiti.”

¹⁹ Aphano khumuuzela yoori: “Papaawo aya ori vayi?” Yinsa khuwaajipu yoori: “Mweeyo khamwinikijuwa miiyo na khamwininjuwa Paapa, eriwaka mwaari okijuwa, mweetta onjuwa Paapa.” ²⁰ Ye aalupiye mattakhuzi apa eettaka osomisa Nnyupa Woosifwiwamo, kharipu ya puuro etile entthiwaamo zaakha. Ila khina mmote ankholiyeeyo, maana waari ohinafiye wakathi aya.

Yinsa onaakisela khaazi yawe na ofwalume

²¹ Yinsa khurutela olupa theenya yoori: “Miiyo kintta olawa, mweeyo mwinlawa mwakeekese na mwinfwa na twampi zenu. Ohali kineettaawo mweeyo khamwineettawo.”

²² Aphano mayaahuuti khuuzelana yoori: “Talili ye onttela ojuula? Tiito anlupaaye yoori: ‘Ohali kineettaawo mweeyo khamwineettawo?’”

²³ Yinsa khurutela olupa theenya yoori: “Mweeyo mwa atthu a vathi attaapha; miiyo ki wa otulu. Mweeyo mwa voolumwenku; ila miiyo akiyio wa olumwenku. ²⁴ Tiito kinlupaaye yoori mwinttela ofwa ntwampi mwenu. Nkhama mweeyo khamwinkhupali yoori Miiyo Ti Miiyo, weekhweele mwinttela ofwa ntwampi mwenu.”

²⁵ Aphano khumuuzela Yinsa yoori: “O paani weeyo?” Yinsa khujipu yoori: “Tokhiya omwanzo kawuuzani. ²⁶ Kinaaye vitthu zawaatta zoolupa na ophuka monkoni weenu mweeyo. Ila otule akiperekhiyeeyo ti wa khweele na kinuuza olumwenku epile kinsiliyeeyo paasi.”

²⁷ Yo khuhieeleyi yoori Yinsa aari owuuza monkoni wa Paapa. ²⁸ Aphano Yinsa khuri: “Amana mweeyo mwinsifu Mwaana wa Pinaatamu, mwintta ojuwa yoori Miiyo Ti Miiyo na akinretta hatha etthu ya matakhelo aka, ila kinlupa etile Paapa aksomisiyeeyo. ²⁹ Otule akiperekhiyeeyo ori vamote na-miyo, ye khakilikheeni wiiya otthome, maana wakhula wakathi kinretta etile enintuvelaaye.” ³⁰ Alupiyeovo mattakhuzi apale, atthu awaatta khumkhupali.”

Aana a Eburahiima na aana a sheethwani

³¹ Yinsa khuwooza mayaahuuti apale ankhupaliyeeyo yoori: “Amana mweeyo mwijilipisana nttakhuzi laka, mwinttela wiiya anakhiyoni aka khweele; ³² na mwinttela ojuwa haakhi, na haakhi ethiito entta wuutaphulani.”

³³ Yo khunjipu yoori: “Fweeyo na peewu ya Eburahiima wala khani-neeyeke viitthwaana za ntthu nkina. Weeyo onlupa toovi yoori ninttela wiiya wootaphuliwa?”

³⁴ Yinsa khuwaajipu araka: “Miiyo kiniwuuzani khweele yoori, wooshi otule ankosaaye mwiiththaana wa twampi. ³⁵ Mwiiththaana khaniyyana

puuro ya mileele vakatthi wa ajaama, ila mwaana oniiyana puuro ya mileele. ³⁶ Amana Mwaana ootaphulani, weekhwhee mwiniiya wootaphuwa. ³⁷ Miiyo kinjuwa saaneene yoori mweeyo mwa peewu ya Eburahiima, ila mwineekesa okuula, maana khwa mweeyo nttakhuzi laka khalina puuro. ³⁸ Miiyo kiniuuuzani epile kooniyeezo wa Paapa, na mweeyo mwinretta epile mwisiiliyeezo wa papeenu.”

³⁹ Aphano yo khunjipu yoori: “Papeetthu ti Eburahiima!” Yinsa khuwooza theenyi yoori: “Nkhama mwa aana a Eburahiima, mwikhole khaazi epile Eburahiima akholiyeezo. ⁴⁰ Ila mweeyo mwintakha okuula, kiri miiyo kiwuuziyeenini haakhi etile kisiiliyeezo wa Nluku. Eburahiima kharetteeni toowo. ⁴¹ Mweeyo mwinretta etile papeenu arettiyeeyo.” Yo khujipu yoori: “Fweeyo khaniyi aana pure, ninaaye Paapa mmote paasi Nluku.”

⁴² Yinsa khuwooza yoori: “Eriwaka Nluku aari Papeenu, mweetta okipheta, maana miiyo kalankha wa Nluku tiito kiriyo apha. Miiyo aki-jitiiseeni otthome, ila ye ti akiperekhiyeeyo. ⁴³ Mwaasa wa niini mweeyo ehiweeleyakani hapari zaka? Ama mwintta woona olipa nttakhuzi laka.

⁴⁴ Mweeyo mwinaaye papeenu, sheethwani, na mwintakha oretta etile enintuvelaaye. Ye namahusuti waaza omwanzweene wala khanalotteleke haakhi, maana ye khana haakhi. Amana ahataka onlupa mattakhuzi awe, maana namahata, paapa wa ohata. ⁴⁵ Maana mwaasa wa miiyo olupa haakhi khamwinkitakha! ⁴⁶ Paani wa mweeyo anwahaaye okilokoveza oretta twampi? Nkhama kinlupa haakhi, khi mwaasa wa niini mwihikikhupalaka? ⁴⁷ Otule eeyiyeeyo wa Nluku onsiila mattakhuzi a Nluku; mweeyo khamwininsiileza maana khayi mwa a Nluku.”

Yinsa na Eburahiima

⁴⁸ Mayaahuuti khumuuzu Yinsa yoori: “Fweeyo khanivonyeleeni olupa yoori weeyo o nsamariiya na onaaye sheethwani.”

⁴⁹ Yinsa khuwaajipu yoori: “Miiyo akina hatha sheethwani; olilha toowo, kininshitahi Paapa, ila mweeyo mwinkitarawu. ⁵⁰ Miiyo akineekesa ojisifu, ila owaapho anekesaaye khwa miiyo na namaphuka. ⁵¹ Miiyo kiniuuuzani khweele yoori, otule anshututelaaye nttakhuzi laka khanteela woona ofwa.”

⁵² Mayaahuuti khujipu araka: “Aphano ninjuwa yoori khweele onaaye sheethwani! Eburahiima afwa, na manapiyu, ila weeyo onlupa yoori: ‘Ntthu amana ashututela nttakhuzi aka khanteela ofwa.’ ⁵³ Weeyo onwulweene zayita papeetthu Eburahiima? Ye afwa na manapiyu afwa, khi weeyo onjoona nkhamma paani?”

⁵⁴ Yinsa khuwaajipu yoori: “Nkhama kintta ojisifu, ojisifu waka khuna maana. Paapa otule mweeyo mwinraaye ‘Nluku etthu,’ ti ankisifwisaaye.

⁵⁵ Mweeyo khamwininjuwa, ila miiyo kininjuwa. Eriwaka keettiye olupa yoori akininjuwa, kaari wiiya namahata nkhamma mweeyo, ila miiyo weekhwhee kininjuwa na kinshututela nttakhuzi lawe. ⁵⁶ Eburahiima papeenu aari woofurahi paata ya woona siikhu ya ota waka; khoona na khufurahela.”

⁵⁷ Mayaahuuti khumuuzela yoori: “Weeyo nalelo khuneeyane nyaakha hamusiini, wamoona toovi Eburahiima?”

⁵⁸ Yinsa khuwaajipu yoori: “Miiyo kiniuuuzani khweele yoori, Eburahiima ahinavokoliwe Miiyo Ti Miiyo.” ⁵⁹ Aphano mayaahuuti khuthula mawe yoori anvonye, ila Yinsa khujivitha na khusaruwamu Nnyupa Woosifwiwamo.

9

Yinsa oninvonisa ntthu aavokoliweeyo ahoonaka.

¹ Yinsa alawaka, ntarikhi khumoona mwinyi mmote aavokoliweeyo ari woohooni. ² Anakhiyoni awe khumuuzela yoori: “Rabi, otu ovokoliwa ahoonaka, mwaasa wa twampi zawe, ama, twampi za apapaze?”

³ Yinsa khuwaajipu yoori: “Khahiyo ye wala apapaze akosiyeeyo, ila vitthu epi zarettikhana yoori owahi wa Nluku othoonyezeye muuhaayi mwawe. ⁴ Maana enihithajiya okhola khaazi nthana otthuupu za otule akiperekhiyeeyo, amana oripa khina anwahaaye okhola khaazi. ⁵ Wiiya kiri voolumwenku, ki nuuru ya olumwenku.”

⁶ Paata ya olupa mattakhuzi apale khutthemela vathi, maattha awe khuphakanya na mattophe khuttukunttela mmaasho wa mwinyi otule.

⁷ Aphano khumuza yoori: “Olawe wajoose nkulaathayini ya Siloowe” (liriina maana a “operekhiwa”). Mwinyi otule khulawa khupoosa khuruti eettaka woona.

⁸ Anamwaattamanana awe na apale aamoniyeeyo raku alolaka zimola khuuzela yoori: “Khahiyo mwinyi othuutu aari wiikhalkhaaye na olola zimola?” ⁹ Akina khusala alupa yoori aari ye. Akina khusala alupa yoori: “Khahiyo, eetta olattanana.” Ila mweenyeweene khusala akhanyarela yoori: “Ti miiyo ena.”

¹⁰ Aphano khusala amuuzela yoori: “Afunuliwa toovi maasho awo?”

¹¹ Mwinyi otule khuwaajipu yoori: “Mwinyi anithiwaaye Yinsa eetheyiye mattophe, khuttha mmaasho mwaka na khukuza olawa ojoosa okulaathayini ya Siloowe. Miiyo khulawa khupoosa apha kinoona.”

¹² Yo khumuuzela yoori: “Ori vayi mwinyi aya oto?” Mwinyi otule khujipu yoori: “Akijuweeni.”

Mafwarizeewu animuuzela nanhooni

¹³ Khuthuuliwa mwinyi otule ahaari woonaaye khulawaniwa wa mafwarizeewu. ¹⁴ Siikhu Yinsa eetheyiyeeyo mattophe khufunulana maasho a mwinyi otule, yaari Saapatu. ¹⁵ Aphano mafwarizeewu khumuuzela theenya mwinyi otule nanna awahiyeezo woona. Mwinyi otule khujipu yoori: “Ye eettiye weetheya mattophe khuttha mmaasho mwaka miiyo khulawa khupoosa, apha kinoona.”

¹⁶ Mafwarizeewu akina khulupa yoori: “Mwinyi oto khahiyo wa Nluku, maana khanshitahi Saapatu.” Akina aya khusala oozela yoori: “Natwampi onretta nanna-ni alama nkhama epo zootikinisa?” Attaaphale khupuwavo ohisiilani.

¹⁷ Khurutela omuuzela otule ahaariwoonaaye yoori: “Khi weeyo onttela olupa niini monkoni wa oto aya, maana oofunula maasho awo?” Mwinyi otule khujipu yoori: “Ye napiyu.”

¹⁸ Mayaahuuti khaari okhupalela yoori ye khaari woonaka apha ti anwahaaye woona. Tiito khukhuwelwa apapaze. ¹⁹ Khuwoozela yoori: “Otu mwanenu othuutu mwaari onlupaaye yoori avokoliwa woohooni? Khi nanna-ni anoonaavo nasaapi ti?”

²⁰ Apapaze khujipu yoori: “Fweeyo ninjuwa yoori otu mwanetthu na avokoliwa ari woohooni; ²¹ ila khanijuweeni nanna oniyeezo nasaapi eti na ntthu anfunuliyeeyo maasho khaninjuweeni. Mwimuuzele mweenyewe, hirimu eto ariina, onwahi onlupa.” ²² Apapaze aajipwiye toowo mwaasa wa owoova mayaahuuti; maana eettiye olupa yoori otule anttelaaaye olupa yoori Yinsa ti Al-Masihu, ontta wiikariwa nsinakooka. ²³ Tiito apapaze alupiyeeyo yoori: “Khwa hirimu eto ariina, mwimuuzele mweenyewe.”

²⁴ Khunkhuwela swaafu ya phiiri mwinyi otule ahaari woonakaaye khumuza yoori: “Olaphe khwa Nluku na olupe haakhi. Maana najuwa yoori mwinyi ayo oto natwampi.”

²⁵ Mwinyi otule khujipu yoori: “Nkhama natwampi miiyo akijuweeni; etthu kinjuwaaye ti yoori miiyo akaari woona ila apha kinoona!”

²⁶ Khumuuzela theenya yoori: “Oorettela niini? Ama oofunula toovi maasho?”

²⁷ Mwinyi otule khujipu yoori: “Miiyo kawuuzani! Mweeyo khuhikisilezi. Mwaasa niini mwintakhelaaye osiila theenya? Na-mweeyo mwintakha mwiyie anakhiyoni awe?”

²⁸ Aphano khunttukhana na khulupa yoori: “Nakhiyoni awe ti weyo! Fweeyo na anakhiyoni a Munsa! ²⁹ Fweeyo ninjuwa yoori Nluku attakhula na Munsa; ila mwinyi oto fweeyo wala khaninjuwa ohali alankhiyeewo.”

³⁰ Mwinyi otule ahaari woonakaye khujipu yoori: “Eto etthu yootikinisa! Mweeyo khamwinjuwa ohali alankhiyeewo, ila akifunula maasho miiyo.

³¹ Ninjuwa yoori Nluku khaninsileza natwampi; ila olilha toowo, nkhamma ntthu onimoova Nluku na khusala aretta matakhelo awe, oto Nluku onta onsiila. ³² Tokhiya olumwenku wumpiwe khina hatha ntthu mmote ana siile yoori maasho a ntthu woovokoleliwa ohooni afunuliwa. ³³ Eriwaka mwinyi oto khaari wa Nluku, khaari owahi aretta hatha etthu.”

³⁴ Mayaahuuti khunjipu yoori: “Weeyo wavokoliwa ntwampi; onaaye makhaamu oonisomisa fweeyo?” Attaaphale khumwiikara.

Ohooni wa nroho

³⁵ Yinsa khusiila yoori mwinyi otule eekariwa nsinakooka. Khulankha olawa omweekesa nonsikana khumuuzela yoori: “Weeyo oninkhupali Mwaana wa Pinaatamu?”

³⁶ Ye khujipu yoori: “Mbwana, paani oto aya yoori na miiyo kinkhupali?”

³⁷ Yinsa khumuza yoori: “Weeyo wamoona ti othuutu ontakhulanaaye.”

³⁸ Aphano mwinyi otule khulupa yoori: “Oo Mbwana, kookhupali!” Khunkokhorela.

³⁹ Yinsa khuri: “Miiyo kata voolumwenku apha oteela ophuka, na yoori apale ahinoonaaye oone, apale anoonaaye azukuluwe eeye oofoonni”.

⁴⁰ Mafwarizeewu akina aya aari attaaphale nonsiila alupaka mattakhuzi apale khumuuzela yoori: “Talili na-fweyo khaninoona?”

⁴¹ Yinsa khuwaajipu yoori: “Eriwaka mweeyo mweettiee wiiya woohooni, khamwaari wiiyana paathwili ya twampi; ila apha wiiya mwinlupa yoori mwinwahi woona, paathwili yenu nalelo mwinaaye.”

10

Yinsa nshuki wookhaamili

¹ “Miiyo kiniwuuzani khweele yoori: Otule ahinviraaye vanlako wa nzizi la pwittipwithi, ila khweetta wawiirukhelamo, oto nantarawu na nazompere. ² Otule anviraaye vanlako, oto nshuki wa pwittipwithi. ³ Amana ataaka oto aya, namweekesela ontta ofukula nlako na pwittipwithi zintta osiila huula yawe na ye ontta okhuwela wakhula moote na nzina laya asarulelaka vaje. ⁴ Paata ya osarula zooshi epile ziiyiyeeyo zawe, ontta olokozela, khusala zinlotta maana zinjuwa huula yawe. ⁵ Ila khazinlawa onlotta ntthu woohijuveyi: zinintthira oto aya, maana khazinjuwa huula yawe.” ⁶ Yinsa awooziye nlikaniso opo, ila yo khuhiveeleyi maana a epile aari owozaaye.

⁷ Yinsa khurutela owooza theenya yoori: “Miiyo kiniwuuzani khweele yoori: Miiyo ki nlako wa pwittipwithi. ⁸ Ooshi apale atiyeeyo kihinate,

manantarawu na anazompere, ila pwittipwitthi khuhiwaasiili. ⁹ Miiyo ki nlako; otule anviraaye khwa miiyo ontta wuusurukha. Na onaaye ruhusa ya ovira khusaruwa na onsigana nnyepu. ¹⁰ Nantarawu onteela wiiya, wuula na otapanya; ila miiyo kata yoori mwiiyane ohaayi wawaatta na woolikana.

¹¹ Miiyo ki nshuki wookhaamili. Nshuki wookhaamili onleva ohaayi awe mwaasa wa pwittipwitthi zawe. ¹² Namapokhera, khahiyo nshuki wa pwittipwitthi na khahiyo mweenyewe, amana oona miji zitaaka, ontta otthira khulikha pwittipwitthi ottho. Aphano miji ontta wiikarisa pwittipwitthi zimwazeye. ¹³ Ye ontta otthira maana ontta opokhera na khanjali pwittipwitthi zaya.

¹⁴ Miiyo ki nshuki wookhaamili; kinjuwa pwittipwitthi zaka na yo ziniki-juwa, ¹⁵ ethiipo Paapa anikijuwaaye na-miyo kininjuwa Paapa; na kininkha ohaayi aka pwittipwitthi zaka. ¹⁶ Kinaaye theenya pwittipwitthi kiina zihimo mmwizizi mphu. Epo enikihitajiya weettela kikusanye na epi ziiye liphanko limote na nshuki mmote na epo zinteeela osiila huula yaka. ¹⁷ Tiito Paapa onikipheta, maana miiyo kininkha ohaayi aka yoori kipwekhorele opheya. ¹⁸ Khina anikinyakanyaaye, ila miiyo kininkha khwa matakhero aka ooshi. Kinaaye ruhusa ya winkha na othuula. Oruma opo kapokhera wa Paapa.”

¹⁹ Mwaasa wa mattakhuzi atthaapo, mayaahuuti khurutela waawanyeya theenya. ²⁰ Akinoko aari olupa yoori: “Ye onaaye masheethwani na ona tutu! Mwininsilezela-ni?” ²¹ Akina khusala alupa yoori: “Nanna nkhamma eto yoottakhula khahiyo ya namasheethwani; sheethwani khanwahi ofunula maasho a ntthu woohooni!”

Mayaahuuti khaninkhupali Yinsa

²² Waari wakathi wa mwiita Yeruzaleemu laariwo njampo la winkhelela.

²³ Yinsa aari ovira Nlivenu la Seleyimaana vaje wa Nnyupa Woosifwiwamo.

²⁴ Aphano mayaahuuti khunzukulela khusala amuuzelaa yoori: “Onnilikhela mishikili mpakha lini? Onuuze saana nkhamma weeyo o Al-Masiihu?”

²⁵ Yinsa khuwaajipu yoori: “Miiyo kauuzani, ila mweeyo khuhikhupali. Khaazi kinkholaazo miiyo khwa nzina la Paapa enhakikhi monkoni waka miiyo. ²⁶ Ila mweeyo khamwinkhupalela maana khayi mwa pwittipwitthi zaka. ²⁷ Pwittipwitthi zaka ensiila huula yaka na miiyo kinjuwa na enikilotta.

²⁸ Miiyo kininkha ohaayi wa mileele; wala khazimpwetheya na khaavo anttelaaye olazamo mmakhono mwaka. ²⁹ Paapa otu akinkhiyeeyo epi, nwulweene zayita vitthu zooshi, na mmakhono wa Paapa khina anwahaaye olazamo. ³⁰ Miyo na Paapa na amote.”

³¹ Mayaahuuti khuthuula mawe opheya yoori anvonye, ³² Yinsa khuwooza yoori: “Miiyo karetta vakatthi venu vitthu zawaatta zooshapweya Paapa akirumiyeeyo oretta, khwa zooshi ti tiivi mwintakhelaaye okivonyela?”

³³ Mayaahuuti khunjipu Yinsa yoori: “Khahiyo mwaasa wa khaazi zooshapweya ninttelaaaye wuupwechela, mwaasa wa okufuru, maana weeyo o pinaatamu, ila onjiretta wiiya Nluku.”

³⁴ Yinsa khuwooza yoori: “Yaatikhwa nkano mwenu na ‘Miiyo khulupa yoori: Mweeyo mwa miluku!’ ³⁵ Nkhamma ye awaathaja o miluku apale liwaateliyeeyo nttakhuzi la Nluku, (na zawaatikhwa ttakatthiifu khazinfujiwa), ³⁶ aphano otule Paapa anttakatthisiyeyo na khumperekha voolumwenku, mwinri: ‘Weeyo onamakufuru,’ mwaasa wa niini kilupaka yoori ‘Ki mwaana wa Nluku?’ ³⁷ Amana kihikholi khaazi ya paapa, khamwinkikhupalela miiyo. ³⁸ Ila nkhamma kinretta, hatha nkhamma khamwinkikhupali miiyo, mwikhupalele khaazi ethiito, yoori mwiwahi

ojuwa na oweeleyani yoori Paapa ori vamote na miiyo na miiyo kiri wa paapa.” ³⁹ Khusala atakha onkhola theenya, ila Yinsa khusuruwamo mmakhono mwaya.

⁴⁰ Aphano Yinsa khulokha opheya muuttho Yorotaani khulawa mpakha puuro etile Yaahaya aari owoosaawo athu, eettaka waazaru khaazi yawe. Khwiikhala ottuukho. ⁴¹ Atthu awaatta khulawa mpakha aphale aariivo khusala alupa yoori: “Yaahaya khaarettiye alama za minjuza, ila zooshi epile aari olupaazo monkoni wa mwinyi otu zaari za haakhi.” ⁴² Attaaphale atthu awaatta khumkhupali Yinsa.

11

Ofwa wa Laazaru

¹ Aarivo mwinyi mmote aariwitthiwaaye Laazaru ye aari wa nti wa Betaaniya, ottuukho aari wiikhalaawo Mariyamu na ttwiye Maarata. Laazaru otule khwiiya nlwele. ² Mariyamu otu, nlupuwe Laazaru aari olwaaziwaaye, ti otule aavaziyeeyo mafuttha oonukhela moolu a Yinsa khukukuttha na nyuuli zawe. ³ Alupuwe khunruma ntthu olawa omuuza Mbwana yoori: “Mbwana, jiraani awo nlwele.”

⁴ Wakathi Yinsa asiiliyeevo vitthu epile khuri: “Olwele aya opo khunlawa omuula, pi wa siifwa ya Nluku, yoori Mwaana wa Nluku asifwiwe khwa olwele otthuupo.” ⁵ Yinsa aari ompheta Maarata, Mariyamu na Laazaru. ⁶ Ila wakathi asiiliyeevo olwele opule aarupaziyewo siikhu piiri okhule aariwo.

⁷ Nawiisha khuwooza anakhiyoni awe yoori: “Nlaweni theenya nirutele Yudeya.”

⁸ Anakhiyoni khulupa araka: “Rabi, onfwahamu yoori khwa siikhu vattithiru mayaahuuti aari otakha wuuvonya, apho onrutela ottuukho?”

⁹ Yinsa khujipu araka: “Nthana khuna wakathi khumi na miwiri? Ntthu amana eettetta nthana khankwakwattuwa, maana onoona nuuru ya olumwenku otthuupu. ¹⁰ Ila amana ntthu eettetta osikhu ontta okwakwanttuwa maana khiniyyavo nuuru.”

¹¹ Paata ya olupa toowo, khurutela theenya araka: “Swaahipu eetthu Laazaru ontta olala, ila miiyo kineetta ottuukhu kanlanse.”

¹² Aphano anakhiyoni awe khumuua theenya yoori: “Mbwanan, nkhamaye ontta olala, onvona.” ¹³ Ila Yinsa aari olupa yoori Laazaru afwa. Ila yo aari waakanyera yoori aari olupa osikizi paasi.

¹⁴ Aphano Yinsa khuwooza saana yoori: “Laazaru afwa, ¹⁵ ila Miiyo ki woofurahi mwaasa woohiiwo okhuwaya, maana toowo mweeyo mwinttelaa okikhupali. Nlaweni mpakha owawe.”

¹⁶ Aphano Tome aari wiitthiwaaye Maphapo khuwooza anakhiyoni azawae: “Nlaweni nafwe vamote na-ye.”

Yinsa oniwaathuza nafusi alupuwe Laazaru

¹⁷ Wakathi Yinsa afiyyeevo ansikaniye Laazaru azikhiwe ziviriyeovo siikhu nne. ¹⁸ Betaaniya waari kharipu kiyasi ya mwentto wa phiima alufu ttatthu olankha Yeruzaleemu, ¹⁹ na mayaahuuti enkeene aalawiye onthotola Maarata na Mariyamu na onzuru mwaasa wa opwetheyiwa ti nlupwaaya.

²⁰ Maarata noosiila yoori Yinsa ontta ota khunthepeeza, ila Mariyamu aasaliye eekhaliye onti.

²¹ Maarata khumuua Yinsa yoori: “Mbwanan, eriwaka waario, nlupwaaka khaari ofwa. ²² Ila theenya kinjuwa yoori hatha nkhamana nasaapi eti, Nluku oniwinkha wakhula etile oninvekelaaye.”

²³ Yinsa khumuza: “Nlupuwo onteela osisimuwa.”

²⁴ Maarata khuri: “Miiyo kajuwa yoori onsisimuwa va osisimuliwa wa siikhu ya mwiisho.”

²⁵ Yinsa khulupa araka: “Miiyo ki osisimuwa na ohaayi; otule anikaamiaaaye miiyo hatha nkamaa eetta ofwa oniiya ohaayi, ²⁶ na wakhula otule ari haayi na khukaamini miiyo khanfwaru. Weeyo onkhupali epo zaya?”

²⁷ Ye khujipu yoori: “Miiyo, Mbwana kinkhupali yoori o Al-Masiihu, mwaana wa Nluku, aari weettelaaye ota voolumwenku.”

²⁸ Paata ya olupa mattakhuzi apale, khulawa owawe na khunkhuwelela Mariyamu othetekele khumuza yoori: “Oo, Mwaaliimu otu ari apha onuukhwela weeyo.” ²⁹ Wakathi Mariyamu asiiliyeovo mattakhuzi apale, khulankha nasaapiru na khulawa okutthanana Yinsa. ³⁰ Yinsa nalelo aari ahinafiye oluwan, ila aari ottuukhule Maarata eetteliyeeyo onkutthanawo. ³¹ Mayaahuuti aari nnyupa na Mariyamu, aateliyeeyo onzuru, khusala oopuwela yoori ye aari weetta ovilalo yoori alile ottuukho. Na-yo khulankha khusala anlotta. ³² Wakathi Mariyamu afiyeovo aphale aariivo Yinsa, noomoona khunkokhorela moolu awe khumuza yoori: “Mbwanan, eriwaka waari attaapha nlupwaaka khaari ofwa.”

³³ Yinsa amooniyeevo eettaka olila na mayaahuuti apale aataniyeeyo, ye khwiya wawantipweya nroho mwawe venkivene na wooshukulikha.

³⁴ Ye khuuzela yoori: “Mwanzikha vayi?” Yo khujipu yoori: “Mbwanan, ote omoone.”

³⁵ Yinsa khulila.

³⁶ Mayaahuuti khulupa yoori: “Mmoone nanna aari omphetaazo!”

³⁷ Akina khusala alupa yoori: “Otu aari owaavonisa apale ohooni, khaari owahi oretta etthu Laazaru khuhifwi?”

Yinsa oninsisimula Laazaru

³⁸ Yinsa nalelo ari woohuzunikha khulawa ovilalo. Yaari likurakuza laattiyelelaniweeyo liwe liwululene va nlako vaya.

³⁹ Yinsa noofiya khulupa yoori: “Mwilazevo liwe nttho.” Maarata khulupa araka: “Leelo ona siikhu nne; aaza onukha.”

⁴⁰ Yinsa khunjipu yoori: “Akaawuuziye yoori amana okhupali ontta woona siifwa ya Nluku?”

⁴¹ Aphano yo khulazavo liwe ntthile. Yinsa khweekesa otulu khulupa yoori: “Paapa, miiyo kinuushukhurwela mwaasa wookisiila. ⁴² Miiyo kinjuwa yoori weeyo onikisiila wakathi wooshi, ila mwaasa wa khuntti eti ya atthu apa ariivo ti eto, kinlupaaye toowo yoori yo apatthe okhupali yoori weeyo ti okiperekhiyeeyo.” ⁴³ Paata ya olupa toono, khukhuwa venkivene araka: “Laazaru, osaruwele oje okhuno!” ⁴⁴ Otule aafwiyeeyo khusaruwa, moolu awe na makhono awe ari oopachiwa na tarapu na wuuso awe na makhono awe khuzukulelisuwa. Aphano Yinsa khulupa yoori: “Mwintaphule tarapu eto mwinlikhe alawe.”

Shawuri yoori ooliwe Yinsa

⁴⁵ Mayaahuuti enkeene alawiyeeyo onthotola Mariyamu, ooniyeovo vitthu epile arettiyeeyo Yinsa, yo khunkhupali. ⁴⁶ Ila akina khulankha olawa owooza mafwarizeewu monkoni wa epile Yinsa arettiyeego. ⁴⁷ Aphano mahaakhimu a tiini na mafwarizeewu khuwaakhuwela mashawuriya khusala awooza yoori: “Niri je? Okho owaakho mwinyi oto anrettaaye alama za-waatta za minjuza. ⁴⁸ Amana ninlikha etthiipo, atthu ooshi antta onkhupali na antta ota arooma aninyakanye puuro yeethu ttakatthiifu na nti etthu.”

⁴⁹ Aphano mmote wa-yo, aari wiitthiwaaye Kayifwa, aari haakhimu nwulu wa tiini wa mwaakha aya opule, ye khulupa yoori: “Mweeyo khamwinjuwa hatha etthu! ⁵⁰ Khamwinjuwa yoori afwataali ofwa ntthu mmote awaafwelaka atthu ooshi zayita olıkha khapila zooshi waashikha.” ⁵¹ Wakathi aya opule Kayifwa khaari ojilupa mweenyewe. Ila mwaasa wa yoori ye aari haakhimu nwulu wa tiini mwaakha aya opule, etta ohupiri yoori Yinsa aari oteela ofwela khapila ya mayaahuuti, ⁵² khahiyo paasi khwa khapila ya mayaahuuti, ila theenya yoori awaakusanye khwa mwili mmote aana a Nluku apale amwazeyiyeeyo. ⁵³ Waaza siikhu ethiitile khusilana omuula.

⁵⁴ Khwa ethiito Yinsa khuhisala ajithoonyeza vakatthi wa mayaahuuti, khulawa nti waattameliyeeyo n'yaara waari wiitthiwaaye Efwarayiimu. Khiikkala ottuukho na anakhiyon awe.

⁵⁵ Yaarettiye esaleelaka ofiya siikhu ya Paashikowa wa mayaahuuti, atthu enkeene a nti aya opule aalawiye Yeruzaleemu olawa ojitwaharesha ehi-nafiye siikhu ya Paashikowa ⁵⁶ Yo aari omweekesa Yinsa oozelanaka ari vaje wa Nnyupa Woosifwiwamo: “Nkahayani niri toovi? Talili onta vanjampo?” ⁵⁷ Ila mahaakhimu a tiini na mafwarizeewu aarumiye yoori, amana ntthu amoona Yinsa vahali ariivo, awooze, yoori yo alawe ankhole.

12

Yinsa onvaaziwa mafuttha oonukhela nti wa Betaaniya

¹ Siikhu sitha ehinafiye siikhu ya Paashikowa Yinsa eettiye Betaaniya, ottuukho aari wiikhalaawo Laazaru, otule Yinsa ansisimuliyeeyo muufwa. ² Ottuukho khwiipikheliwa etthu woojiwa ya osikhu; Maarata khusala arumeya, Laazaru eekhaliye vameeza vamote na Yinsa. ³ Aphano Mariyamu khuthuula suupha ya mafuttha oonukhela awaatta nzurukhu, khuttukunt-tela moolu a Yinsa khusala akukuttha na nyuuli zawe. Nnyupa wooshimo khwiitaalamo arufu ya mafuttha apale.

⁴ Aphano mmote wa anakhiyon awe, Yuuda Eshikariyoote othuuto aari weettelaaye onzukuluwela khulupa yoori: ⁵ “Ahoozanyisiwe mafuttha aya apo nzurukhu aya enkhiwa asikhini? Nzurukhu aya yaari phakari ya nakhaazi khwa mwaakha mmote!” ⁶ Ye khaalupiye toowo mwaasa wa wiiyana huruma na asikhini ila mwaasa wa wiiya nantarawu; na tiye aari opwehaaye nfukho wa nzurukhu, amana otthiwamo eetta olazakamo. ⁷ Yinsa khunjipu araka: “Onlikhe khwa heeri! Yoori apwehe mafuttha apo mpakha siikhu ya ozikhiwa waka. ⁸ Asikhini ari vamote na mweeyo mpakha mileele, ila miiyo khanniiya vamote mpakha mileele.”

⁹ Paata ajuwiyeovo yoori Yinsa aari attaphale, khuntti khuluyeene ya mayaahuuti khuta, woohiiyi mwaasa wa Yinsa paasi, ila theenya yoori amoone Laazaru, otule ansisimuliyeeyo muufwa. ¹⁰ Khwa ethiipo ma-haakhimu a tiini khuwaza shawuri zoomuula Laazaru naye; ¹¹ maana atthu enkeene mwaasa wa ye eetta ophakuwanana mayaahuuti na khusala ankupali Yinsa.

Ovira wa oshintta

¹² Siikhu ya phiiri, khuntti khuluyeene ya atthu yaatiyeewo onjampo khusiila yoori Yinsa ontta ota Yeruzaleemu. ¹³ Khuthuula virapi za mirita, khusala alawa onkutthanana ye, anyakulaka araka:

“Ozaana!

Woottitthimisiwa ti otule atiiyeyo khwa nzina la Mbwana, Woottitthimisiwa ti Mfwalume wa Ezirayiilu!"

¹⁴ Yinsa ampatthiyeevo mwaana wa puuru khupakhira attaapho, nkama etthiipo yaatikhieevo yoori:

¹⁵ "Atthu a Yeruzaleemu,
mwihoove
mfwalume enu onta
aapakhiriye va mwaana wa puuru!"

¹⁶ Omwanzo anakhiyoni awe khazaaweleyiye epo za; ila wakathi aaziyeyo osifwiwa Yinsa yo eetta wuupuwela yoori ethu yaya eto yaatikhieevo monkoni wa ye, na khweele khurettikhana etthiipo.

¹⁷ Atthu apale aariina wakathi opule anrumiyeyo Laazaru osaruwamo nkhapuri khusisimuwa muufwa, yo khuvira alawelaka oshaahiti vitthu epile zaarettikhaniyeeyo. ¹⁸ Mwaasa wa ethiito, khuwaakusanya atthu awaatta olawa okutthanana, maana eettiye osiila elupiwaka yoori Yinsa aarettiye alama eto. ¹⁹ Aphano mafwarizeewu khusala oozana yoori: "Khanipattheenivo etthu. Nkoonani olumwenku wa atthu onnta onlottelela."

Yinsa onlupa ofwa wawe

²⁰ Khwa atthu apale aalawiyeeyo omwaaputu Nluku onjampo la Paashikowa akina aari akereeku. ²¹ Yo, khulawa ottakhulana Filiipe aari wa nti wa Betezayiita ya Kalileya, khunvekela araka: "Mwinyi, nintakha omoona Yinsa". ²² Filiipe khulawa khumuza Antere; aphano yo oowiiri khumuza Yinsa.

²³ Yinsa khujipu yoori: "Wafiya wakathi woosifwiwa Mwaana wa Pinaatamu. ²⁴ Miiyo kiniwuuzani khweele yoori, amana phunjya tiriku ehikweli vathi na ehifwi nalelo eniyya phunjya paasi, ila amana efwa empwetwetaa. ²⁵ Otule amphetaaye ohaayi awe, onteela omnipwetwetaa; ila otule antarawaaye ohaayi awe khwa voolumwenku apha, onthokorela ohaayi wa mileele. ²⁶ Otule antakhaaye okirumeyela, akilotte; na puuro kiniyyaavo na karumeya aka oniiya attaapho. Otu anikirumeyelaaye, Paapa onteela onttithimisa.

²⁷ Nasaapi eti rooho yaka ti yoohankayikha. Kiri niini? Kiri paapa, okusuru wakathi opu wa ohoowa waka? Wala! Maana miiyo kateela ethiito. ²⁸ Paapa osifu nzina lawo!" Aphano khuta huula yoolankha pinkuuni yaari olupaaye yoori: "Koosifu na kinteela wuusifu opheya." ²⁹ Khuntti etile yaariivo noosiila aariye taari eto; akina khusala alupa yoori: "Nlayikha ti lattakhulaniyeeyo Yinsa."

³⁰ Yinsa khulupa yoori: "Huula eto khiteeni mwaasa wa miiyo yata mwaasa wa mweeyo. ³¹ Wafiya wakathi woophukiwa olumwenku opu, nasaapi eti onttela wiikariwa mfwalume wa olumwenku opu. ³² Ila miiyo amana kilansiwa vathi apha kintta ojitiisela atthu ooshi." ³³ Ye aalupiye mattakhuzi apa yoori athoonyeze nanna aari weettelaazo ofwa.

³⁴ Khuntti etile khunjipu yoori: "Fweeyo ninsiilaka kano elupaka yoori: Al-Masiihu ona yawiiyavo khwa mileele, khi weeyo onlupa toovi yoori Mwaana wa Pinaatamu ona ya olansiwa? Mwaana wa Pinaatamu aya oto ti paani?"

³⁵ Aphano Yinsa khuwooza yoori: "Nuuru eri vamote na mweeyo khwa wakathi vattithiiru. Mweettette wakathi otthuupu mwiriinaavo nuuru, yoori yiiza ehuusikaneni, maana ntthu aneettettaaye n'yiiza khanjuwa ohali aneettaawo. ³⁶ Wakathi otthuupu mwiriinaavo nuuru mwikhupalele nuuru

ethiito yoori mwiretteye wiiya aana a nnuuru.” Paata ya olupa toowo Yinsa khulaavo khujivitha khuhisala amoona.

Ohikhupali wa mayahuuti

³⁷ Hatha nkama Yinsa eettiye owaarettela alama epile zooshi za minjuza vakatthi vaya, khankhupaleliye, ³⁸ yoori limariseleye ntakhuzi la napiyu Ezaaya, linraaye:

“Mbwana, paani akhupaleliyeeyo
tafusiiri yeetthu?

Na paani athoonyeziweeyo
nkhono wa Mbwana?”

³⁹ Khwa ethiito yo khaari oteela okhupali, nkama etthiipo aalupiyeeyo Ezaaya theenya yoori:

⁴⁰ “Oola maasho aya
na oomisa rooho zaya,
yoori ahoone na maasho aya,
eweeleya nroho mwaya
aruti kiwaavonisa.”

⁴¹ Ezaaya aalupiye mattakhuzi apa maana ooniye siifwa ya Yinsa na khulupa monkoni wa ye.

⁴² Nakatalikha, attunkhulu awaatta a mayahuuti khunkhupali Yinsa. Ila mwaasa wa mafwarizeewu, khuhisala atukhuru amini yaya, na woova wiikariwa nsinakooka. ⁴³ Maana yo waari owaatuvela venkivene osifwiwa pi atthu zayita osifwiwa ti Nluku.

⁴⁴ Aphano Yinsa khulupa woosileyavo araka: “Otule anikaaminaaye miiyo, khanikaamini miiyo paasi, ila otule akiperekhiyeeyo. ⁴⁵ Na otule anikoonaaye, amoona otule akiperekhiyeeyo. ⁴⁶ Miiyo kata voolumwenku nkama nuuru, yoori wakhula otule anikikhupalaaye miiyo, ahijileme n'yiiza.

⁴⁷ Amana ntthu asiila mattakhuzi aka na khuhishututeli, miiyo akin-inphuka. Maana miiyo akaateeliye ophuka olumwenku ila wuusuru olumwenku. ⁴⁸ Owaapho namaphuka wa otule anikikatthalaaye na ahinkhupalelaaye mattakhuzi aka; ntakhuzi laka ntinttho kinlupiyeeyo ti linttelaaye omphuka siikhu ya mwiisho. ⁴⁹ Akinjilupa miiyo, ila Paapa otu akiperekhiyeeyo ti akirumiyeeyo ethu yoolupa na olaleya. ⁵⁰ Miiyo kinjuwa yoori oruma wawe ohaayi wa mileele. Nakatalikha etile akirumiyeeyo paapa kinlupa ethiito.”

13

Yinsa onoosa moolu a anakhiyonie awe

¹ Esaleelaka ofiya siikhu ya Paashikowa, Yinsa aajuwiye yoori wafiya wakathi wa ye olika olumwenku opu eette wa Paapa, khuwaapheta apale awe aari voolumwenku, awaaphetiye mpakha mwiisho.

² Wakathi wa ethu-yoojiwa ya osikhu, sheethwani aarettiye ahatiye rooho ya Yuuda Eshikariyoote mwaana wa Simawu, yoori anzukuluwele, ³ Yinsa aajuwiye yoori Paapa vitthu zooshi attha mmakhono mwawe, na alankhiye wa Nluku na aari orutela wa Nluku, ⁴ khulankhavo vameeza aphale, khu-vula ajapi yawe khuthuula epakuso khujifukelela n'yuunu. ⁵ Khuttha

maati mpasiya khwaaza woosa moolu a anakhiyon i awe awaapakusaka na epakuso etile aafukeleliyeeyo n'yuunu mwawe.

⁶ Khufiya zwaamu ya Simawu Pheeturu, othuuto aamuziyeeyo yoori: "Mbwana, ontakha woose moolu aka?"

⁷ Yinsa khunjipu yoori: "Eti kinrettaaye apha NASAAPI khiniweeleya; ila owulu-othana enteela oweeleya."

⁸ Pheeturu khulupa yoori: "Wala! Khinretteya weeyo woosa moolu aka."

Yinsa khunjipu araka: "Miiyo amana kihiwoosi, weeyo khunteela wiiyana phantte na-miyo."

⁹ Simawu Pheeturu khulupa yoori: "Mbwana, khayi moolu aka paasi na theenya na makhono aka na eeshwa yaka!"

¹⁰ Yinsa khujipu: "Ntthu owiyeyo eninhithajiya woosa moolu paasi, maana mwiili awe wooshi pi woottakattha. Mweeyo mwa oottakattha, ila khahi mooshi." ¹¹ Maana ye aari onjuwa ntthu aari weettelaaye onzukuluwela; ti eto aalupiyeeyo yoori: "Khayi mooshi mwiyyiyeyo oottakattha."

¹² Paata ya wiisha owoosa moolu, khuthuula ajapi yawe khuwala khuрутела aphale eekhaliyeovo. Aphano khuwoozela yoori: "Eniweeleyani vit-thu epi khuuretteliyeenini? ¹³ Mweeyo mwikiitthaka miiyo mwinri 'Mwaali-imu' na 'Mbwana,' mwina shariya, miiyo ki othuuto. ¹⁴ Aayo, pi ethiipo miiyo kiiyiye Mbwana na Mwaaliimu enu, kawoosani moolu, na-mweyo theenya mwina ya woosana moolu mmote na nzaawe. ¹⁵ Miiyo kawinkhani nthoonyezo yoori ethiipi kirettiyeeko na-mweyo mwisala mwiretta ethiipi. ¹⁶ Miiyo kiniwuuzani khweele yoori, khaavo karumeya wonziti mbwana awe, nkhama ethiipo nanhupi khaninziti otule anrumiyeyo. ¹⁷ Nkhama mwinjuwa vitthu zaya epo, amana mwiretta, mwaparikhiiwa.

Yinsa onlupa yoori onlawa azayiniwe

¹⁸ Akinuulupani mooshi, kiniwaajuwa apale kiwaathawuliyeeyo. Ila epo enttela orekkhana yoori emariselye epile zilupiyeeyo zawaatikhiwa ttakatthiifu, yoori: "Othuuto kimeelaniyeeyo phaawu yaka akizukuluwela."

¹⁹ Kinaaza NASAAPI ouuuuzani ehinarettikhane, yoori amana erettikhanaaka mweeyo mwikhupali yoori Miiyo Ti Miiyo. ²⁰ Miiyo kiniwuuzani khweele yoori: Otule animpokherelaaye otule kininrumaaye onikipokherela miiyo; na anikipokherelaaye, onimpokherela otule akirumiyeeyo."

²¹ Paata ya olupa toowo, rooho yawe khwiya yawaantipweya, khutukhuru alupaka yoori: "Miiyo kiniwuuzani khweele yoori, ntthu mmote wa mweeyo onlawa akizukuluwele."

²² Anakhiyon i khusala eekesana mmote na nzaawe ahinjuwaka paani aninlupaaye. ²³ Mpavu mwawe eekhaliyemu nakhiyon i mmote otule aari omphetachaaye. ²⁴ Simawu Pheeturu khunttheela alama nakhiyon i othuutule; yoori amuuzele Yinsa anlupe oto ari weettelaaye onzukuluwela.

²⁵ Aphano nakhiyon i otule khwiinamela vamweyo wa Yinsa khumuuzela yoori: "Mbwana, paani oto aya?"

²⁶ Yinsa khunjipu yoori: "Ti otule kinttelaaye omwinkha pattaasu ya phaawu kinaanisiye n'yopo." Aphano khunaanisa pattaasu ya phaawu, khumwinkha Yuuda Eshikariyoote, mwaana wa Simawu. ²⁷ Paata ya Yuuda orafuna phaawu etile, Epiliisi eetta omweetta. Yinsa khumuuzza yoori: "Etthu ontakhaaye oretta, orette NASAAPI." ²⁸ Ila apale aari vameeza khuhiiwo mmote yamweliyeeyo mwaasa niini Yinsa aamuzeliyeeyo toowo. ²⁹ Maana Yuuda ti aari opwehaaye nfukho wa nzurukhu, akina aari waakanyera yoori Yinsa amuuza olawa wuuzanya vitthu zooretteliwa

njampo, ama yoori alaze etthu awinkhe asikhini. ³⁰ Paata ya wiisha orafuna phaawu etile, Yuuda khulankha nasaapiru. Na waari osikhu.

Nrumo mpheya

³¹ Wakathi Yuuda aliyeovo, Yinsa khulupa yoori: “Nasaapi Mwaana wa Pinaatamu onsifwiwa, na Nluku onsifwiwa khwa ye. ³² Nkhama Nluku onsifwiwa khwa ye, na-ye Nluku onsifwiwa mwanaweh kwa ye mweenyewe, na onteela osifwiwa woohirupazivo.

³³ Aanaaka, nalelo khwa wakathi vattithiiru kiri vamote na-mweyo. Mweenyowe mwinlawwa mwakeekese, ila miiyo kiniwuuzani nkhamma kiwoozieezo mayaahuuti yoori: ohali kineettaawo mweenyowe khamwinlawwa. Namweyo enasaapi eti kiniwuuzani ethiipo. ³⁴ Kiniwinkhani oruma mpheya kiraka: mwiphetane mmote na nzeenu. Nkhama ethiipo kuuphetiyeenini, mwiphetane mmote na nzeenu. ³⁵ Khwa ethiipo atthu ooshi antta ojuwa yoori mwa anakhiyonaka aka, amana mwiphetanaka mmote na nzaawe.”

Yinsa onlupa yoori Pheeturu onteela onkatthala

³⁶ Simawu Pheeturu khumuuzela yoori: “Ontta vayi Mbwana?”

Yinsa khunjipu: “Ohali kineettaawo, weeyo khunikilotta nasaapi eti, ila owulu-othana onteela okilotta.”

³⁷ Aphano Simawu khuri: “Mbwana, mwaasa wa niini kihuulottaka nasaapi? Miiyo kinleva ohaayi aka mwaasa wa weeyo!”

³⁸ Aphano Yinsa khujipu araka: “Weeyo onleva ohaayi awo mwaasa wa miiyo? Miiyo kiniwuza khweele yoori, khapula likukhuwi lihineekhe, weeyo onteela okikhana swaafu ttatthu.

14

Yinsa oniwaalipisela maaswihaapa awe

¹ Mwihihankayikhise rooho zenu. Mwinkhupali Nluku, na theenya mwikikhupali miiyo. ² Owawe papaaka awaakho mapuro menkeene; eriwaka khayaari ethiito, akaari owuuuzani, yoori kinttela otthenkeza puuro yenu. ³ Na amana kilawa kitthenkeza puuro yaya eto, kinlawa karuti kuthulen i mweeye vamote na-miyo attaapho kinttelaaye wiiyavo. ⁴ Mweenyowe mwinjuuwawo ohali kineettaawo na tarikhi yaya.”

⁵ Khujipu Tome yoori: “Mbwana, fweeyo khaninjuwa ohali oneettaawo! Khi ninjuwa toovi tarikhi yaya?”

⁶ Yinsa khujipu yoori: “Miiyo ki tarikhi, haakhi na ohaayi. Khina anfiyaaye wa Paapa, ahiiyeeni khwa miiyo. ⁷ Eriwaka khweele mwaari okijuwa, nka mwinjuwaka Paapa. Apha enasaapi eti mwinjuwa na mwaaza omoona.”

⁸ Filiipe khulupa yoori: “Mbwana, onithoonyeze Paapa, ethiito ennitosheleza.”

⁹ Yinsa khunjipu yoori: “Filiipe, kiikhaliyezo wakathi mwinkeene namweyo; nalelo khunikijuwa? Otule akooniye miiyo amoona Paapa. Khi onlupa toovi yoori: ‘Onithoonyeze Paapa’? ¹⁰ Weeyo khunkhupali yoori miiyo kiri wa Paapa na Paapa ona miiyo? Mattakhuzi apa kiniwuuzanini khahiyo aka paasi. Ila, Paapa anikhalaaye khwa miiyo, ontta okhola khaazi yawe. ¹¹ Mwikikhupali miiyo amana kilupa yoori kiri khwa Paapa na Paapa ori khwa miiyo; ama nenkawu mwikikhupali mwaasa wa khaazi epi kinkholaazo. ¹² Miiyo kiniwuuzani khweele yoori, otule anikhupalaaye miiyo onkhola khaazi epi kikhaliyezo hatha okhola zooziti epi, maana miiyo kineetta wa Paapa. ¹³ Na zooshi mwinttelaaye oveka khwa nzina laka,

miiyo kinretta, yoori Paapa asifwiwe khwa mwanawewe. ¹⁴ Wakhula etile mwinvekaaye khwa nzina laka kintta oretta.

Yinsa onaahiti operekha Rooho Ttakatthiifu

¹⁵ Nkhama mweeyo mwinikipheta, mwintela oshututela oruma waka. ¹⁶ Miiyo kinttela onvekela Paapa yoori awinkheni Namalipisela nkina, yoori eeye vamote na-mweyo khwa mileele, ¹⁷ Rooho ya okhweele, atthu a voolumwenku ahinttelaaye opokhera, maana, khanteela woona na wala khanjuwa. Ila mweeyo mwinjuwa, maana Yo eniikhala nkathhi mwenu na enttela wiiya na-mweyo.

¹⁸ Miiyo akinuulikhani mwiri anasisa, kinlawa kooruteleni. ¹⁹ Khwa wakathi vattithiiru atthu a voolumwenku khanteela okoona theenya, ila mweeyo mwinlawa mwakoone. Mwaasa wa miiyo wiiya haayi, na mweeyo mwinlawa mweeyane ohaayi. ²⁰ Siikhu ethiito enteela oweeneyani yoori kiri khwa Paapa, mweeyo mwiri khwa miiyo na-miyo kiri khwa mweeyo. ²¹ Otule ansilaaye oruma waka na khushututela oto ti anikiphetaaye; na otule anikiphetaaye oniiya woophetiwa ti Paapa, na-miyo theenya kininpheta na kinjithoonyeza khwa ye.”

²² Yuuda (nkina woohiiyi Yuuda Eshikariyoo) khuri: “Mbwana, mwaasa aya niini weeyo ontakhaaye ojithoonyeza khwa fweeyo paasi khuhi-jithoonyezi olumwenku wooshi?”

²³ Yinsa khujipu yoori: “Nkhama ntthu onikipheta, onshututela mattakhuzi aka na Paapa ontta omphetu. Paapa na-miyo nintta wiikhala na-ye. ²⁴ Otule ahinikiphetaaye khanshututela mattakhuzi aka. Na ntakhuzi mwinsiilaaye khahiyo laka, ila tthi la Paapa otule akirumiyeeyo.

²⁵ Kaari olupaka zooshi epo nalelo niri vamote.” ²⁶ Ila Namalipisela, Rooho Ttakatthiifu, eto Paapa anttelaaye omperekha khwa nzina laka, onteela wusomisani mweeyo vitthu zooshi na wuukupuselani zooshi epile kiwuuziyeenini. ²⁷ Kinuulikhelani heeri, heeri yaka kiniwinkhani, ila akiniwinkhani nkhama oninkhaazo olumwenku. Mwihihankayikhise rooho zenu, wala mwihoove.

²⁸ Mwasiila eti kilupiyeeyo: ‘Miiyo kintta olawa, ila kinlawa kooruteleni mweeyo. Eriwaka mwaari okipheta, mweetta ofurahi mwaasa wa miiyo weetta wa Paapa, maana Paapa akiziti miiyo. ²⁹ Kiniwuuzani nasaapi eti zihinarettikhane, yoori wakathi zinttelaavo orekkhana, mweeyo mwikhupalele. ³⁰ Enasaapi eti akinlawa ottakhulana mweeyo, maana mfwalume wa voolumwenku ontta ota; ye khana hatha ruhusa khwa miiyo, ³¹ nakatalikha yoori atthu a voolumwenku ojuwe yoori miiyo kininpheta Paapa, eniki-hithajiyi oretta etile akirumiyeeyo. Lankhani, nileevo apha.”

15

Nrayi wa nviteera na virapi zaya

¹ Yinsa khulupa yoori: “Miiyo ki nrayi wa wuuva weekhweele, Paapa namalima. ² Wakhula erapi etile eriye khwa miiyo khuhisala yiima, ye ontta oshija; na wakhula etile eniimaaye ontta okasurela yoori etepe wiima.

³ Mweeyo mwattakatthisiwa ti ntakhuzi kiwuuziyeenini. ⁴ Mwijilipisane miiyo, na-miyo kintta ojilipisana mweeyo. Nkhama ethiipo erapi ehiniimaaye ottho ehijilipisaneeni nrayi, na-mweyo pi ethiipo khamwiniima mishumo woohijilipisani miiyo.

⁵ Miiyo ki nrayi, mweeyo mwa virapi. Otule anjilipisanaaye miiyo, na-miyo khwa ye, oto aya oniima mishumo zawaatta; maana mweeyo

woohiiyani miiyo, khina etthu mwinwahaaye oretta. ⁶ Amana ntthu ahili-pani miiyo, ontta weeseleliwa oje, oome nkhamma erapi enlokothiwaaye khweeseleliwa va moottho khulukuziwa. ⁷ Ila amana mwijilipisana miiyo na mattakhuzi aka khwiya na mweeyo, mwiveke wakhula etile mwin-takhaaye mwintta winkhiwa. ⁸ Paapa onsifwiwa mwaasa wa mweeyo wiima mishumo zawaatta, ethiipo enthoonyeza yoori mweeyo mwa anakhiyon iaka. ⁹ Khwa nanna ethiipo Paapa akiphetiyezo, na-miyo koophetani; mwijilipisane pheta yaka. ¹⁰ Amana mweeyo mwishututela oruma waka mwiniyiya nkathhi wa pheta yaka, nkhamma ethiipo na miiyo kinshututelaaye oruma wa Paapa na kiriyeeyo nkathhi wa pheta yawe. ¹¹ Kaawuziyeni vitthu epi yoori furaha yaka yiiye khwa mweeyo, na yoori furaha yenu ekamilikhe.

¹² Oruma waka pi opu: Mwiphetane mmote na nzaawe nkhamma ethiipi miiyo khinuuphetanini mweeyo. ¹³ Khina ariina pheta yooziti, woohiiyi otule aninkhaaye ohaayi awe khwa maswaahipu zawe. ¹⁴ Mweeyo mwa maswaahipu zaka, mwirettaru etile kinuurumanini. ¹⁵ Akiniwiitthani theenya akarumeya, maana karumeya khanjuwa niini anrettaaye Mb-wana awe. Nakatalikha, miiyo kiniwiitthani yoori maswaahipu zaka, maana zooshi epile kinsiliyeeyo Paapa koojuwisani. ¹⁶ Khahiyo mweeyo mwikithawuliyeeyo miiyo, ila miiyo ti kuuthawuliyeenini mweeyo na khu-utthomani yoori mwilawe mweeme mishumo, mishumo zoolipaneya, yoori Paapa awahi owinkhani wakhula etile mwinvekaaye khwa nzina laka. ¹⁷ Opo pi oruma waka: mwiphetane mmote na nzaawe.

Olumwenku oniiphiriwa ti anakhiyoni

¹⁸ Amana atthu a voolumwenku eephiriwaka ti mweeyo, mwifikhiri kha-pula yoori yo eephiriwe ti miiyo. ¹⁹ Eriwaka mweeyo mwaari atthu a voolumwenku, yo aari otuveliwa ti mweeyo mwaasa wa wiiya aya. Nakatalikha mweeyo khahi mwa atthu a olumwenku, ila miiyo koothawulani khulazani vakatthi wa atthu a olumwenku. Tiito atthu a olumwenku aniiphiriwaaye ti mweeyo. ²⁰ Mwifikhiri mattakhuzi kiwuuziyeenini yoori: 'Khaavo karumeya anzitiyeeyo Mbwana awe.' Nkhama akilupatthiyezo miiyo, na anlawa oolupattheni mweeyo theenya. Nkhama anshututela mattakhuzi aka, theenya anlawa ashututele apale mwinttelaaye olupa mweeyo. ²¹ Zooshi epo anlawa oorettele mweeyo, mwaasa wa nzina laka, maana khaninjuwa otule akirumiyeeyo. ²² Eriwaka akaatiye kilupa, yo khaari wiiyana paathwili ya twampi. Ila apha khana hatha nanna ya ojaakisa monkoni wa twampi zaya. ²³ Otule aniiphiriwaaye ti miiyo na theenya oniiphiriwa ti Paapa. ²⁴ Eriwaka akeettiye oretta vitthu vakatthi vaya ahinwahaaye oretta ntthu nkina, yo khaariwiiyana paathuli ya twampi. Ila yo oona epi kirettiyezo na khusala akhanyarela wiiphiiriwa ti miiyo na Paapa. ²⁵ Ila epo zaya zarettikhana yoori lilikaniseliwe ntthakhuzi ntthile laatikhiweeyo nkathhi wa kano zaya yoori: 'Yo eephiriwa ti miiyo woohiivo hatha kiiswa.'

²⁶ Ila, amana ata Namalipisela, otule kinttelaaye wuuperekhezan woolankha phantte ya Paapa, Rooho ya okhweele ya olankha wa Paapa, ye ontela olaza oshaahiti monkoni wa miiyo. ²⁷ Na mweeyo mwinlawwa mwalawele oshaahiti, maana mwina miiyo thanku omwanzo.

16

¹ Miiyo kawuuzani mattakhuzi apa yoori mwihanswi amini yenu.
² Mweeyo mwinteeela wiikariwa nsinakooka; weekhwhee, onlawa wafiyi wakathi onraaye ntthu amana awuulaani khoona nkhamma ankholaaye

khaazi ya Nluku. ³ Yo anttela oretta toowo mwaasa woohinjuwi Paapa wala miiyo.

Khaazi ya Rooho Ttakatthiifu

⁴ Mattakhuzi apa kiniuuuzani yoori amana ofiya wakathi enttelaavo oretikhana muupuwele yoori miiyo kaawuziyeni ⁵ Ila enasaapi eti kineetta wa otule aakirumiyeeyo, khaavo mmote anikuuzelaaye yoori: ‘Oneetta vayi?’ ⁶ Ila mwaasa woolupa vitthu epo, rooho zenu zahuzunikha. ⁷ Miiyo kiniuuuzani haakhi yoori ena fwayita khwa mweeyo miiyo olawa, maana amana kihilawi, Namalipisela khanteela ota, ila amana kilawa, kintta omperekha. ⁸ Ye amana ata onteela owaakhitiri athu a olumwenku monkoni wa twampi, wa shariya na ophuka: ⁹ khwa twampi, mwaasa wa ohikikhupali miiyo; ¹⁰ khwa shariya, maana kineetta wa Paapa, khamwinteela okoona theenya; ¹¹ khwa ophuka, maana mfwalume wa voolumwenku apha aphukiwa.

¹² Kinaaye nalelo vitthu zawaatta za owuuzani, ila nasaapi eti mweeyo khamwinteela ovilela. ¹³ Ila amana Rooho ya khweele eta, ye enttela wuusomisani khweele yooshi mweeyo. Ye kinteela ojilupa, ila enttela olupa zooshi esiiliyeeyo na owuuzani mweeyo vitthu zinttelaaye orettikhana. ¹⁴ Ye enteela okisifu, maana enteela opokherela etile yiyyiye yaka na owuuzani mweeyo. ¹⁵ Yooshi Paapa ariinaaye ti yaka, tiito kilupiyeeyo yoori Rooho Ttakatthiifu epokheraka etile yiyyiye yaka na owuuzani mweeyo.

¹⁶ Khwa wakathi vattithiiru khamwinteela okoona, ila khwa wakathi vattithiiru theenya mwinteela okoona opheya.”

Huzuni na furaha ya anakhiyoni

¹⁷ Anakhiyoni awe khuhieeleyi khusala oozelana yoori: “Khwa mattakhuzi apo anlupaaye araka: ‘Wakathi vattithiiru khamwinteela okoona; wakathi vattithiiru mwinteela okoona opheya.’ Theenya onri: ‘Maana kineetta wa Paapa.’ Onri niini?” ¹⁸ Aphano khuuzelana theenya yoori: “Khwa wakathi vattithiiru enlupa niini? Khinneleya ethu ye anlupaaye.”

¹⁹ Ajuwiyeevo Yinsa yoori aari otakha omuuzela, monkoni wa mattakhuzi apale, ye khuwoza yoori: “Mweeyo mwintta wuuzelana monkoni wa mattakhuzi apa kilupiyeeyo yoori: ‘Khwa wakathi vattithiiru khamwinteela okoona; khwa wakathi vattithiiru theenya mwinteela okoona opheya?’

²⁰ Miiyo kiniuuuzani khweele yoori mwinteela olila na ojikhupanyisa, ila atthu a olumwenku afurahiye. Mweeyo mwiri oohuzunikha, ila huzuni ya ethiito ezukuluwe yiye furaha. ²¹ Muukha amana atakhaka omnipattha mwaana, onoona olwaaza channu mwaasa wa ofiya wakathi awe woohoowa, ila amana ampattha oniyyana furaha, onsahawu olwaaza opule oniyeyo mwaasa wa ontana mwaana voolumwenku. ²² Zinrettikhana ethiipo khwa mweeyo: opu wakathi wa huzuni khwa mweeyo, ila miiyo kinteela owoonani swaafu kiina theenya, na mwinteela ofurahi, na furaha eto khaavo anttelaaye wuulazani. ²³ Siikhu yaya eto khamwinteela okuuzela hatha ethu. Miiyo kiniuuuzani khweele yoori, amana mwinvekela ethu Paapa khwa nzina laka miiyo, ye ontta owinkhani. ²⁴ Mpakha nasaapi eti khamwinaveke hatha ethu khwa nzina laka. Mwiveke, mwintta winkhiwa, yoori furaha yenu ekamilikhe.”

Yinsa ashintta olumwenku

²⁵ “Miiyo kiniuuuzani vitthu epo khwa nlikaniso. Onteela ofiya wakathi kihinttelaaye orumeyela mattakhuzi nkhamma apo, ila kinteelaaye owuuzani saaneene monkoni wa Paapa. ²⁶ Siikhu yaya eto, mweeyo mwinteela oveka khwa nzina laka na khinlawo ohithajiya miiyo oveka

zwaamu yenu mweeyo, ²⁷ Paapa mweenyeweene onuuphetani, maana mweeyo mwinikipheta na mwinkhupalela yoori miiyo kalankha wa Nluku. ²⁸ Kalankha wa Paapa khuta voolumwenku; nakatalikha, kinlaavo voolumwenku kirutele wa Paapa.”

²⁹ Aphano anakhiyoni awe khulupa araka: “Onlupa woosileyavo, woohiyyi khwa milikaniso! ³⁰ Nasaapi eti enneleya yoori onjuwa vitthu zooshi khinihithajiya opuwa ntthu owuuzela, khwa ethiipo nakhupali yoori weeyo walankha wa Nluku.”

³¹ Yinsa khuwaajipu yoori: “Mwinkhupali nasaapi? ³² Wakathi waat-tama, weekhweele wafiya, mweeyo mwinttelaaye omwazeya wakhula ntthu alawe owawe, mwikilikhe otthome. Ila akiri otthome, maana Paapa ona miiyo.

³³ Miiyo kawuuzani vitthu epi yoori mwiiyane heeri khwa miiyo. Voolumwenku apha mwinteela wiiyana tafwawuthi; ila mwivilele! Miiyo kashintta olumwenku.”

17

Yinsa ontta ojilompela

¹ Paata ya Yinsa wiisha olupa vitthu opo, khweekesa otulu na khulompa araka:

“Paapa, wafiya wakathi. Onsifu mwanawo, yoori naye mwanawo oosifu. ² Maana wamwinkha ofwalume khwa anaatamu ooshi, yoori awenkhe ohaayi wa mileele ooshi apale omwinkhiyeeyo. ³ Na ohaayi opo wa mileele pi opu: Oojuwe weeyo, Nluku mmote paasi weekhweele, na Yinsa Al-Masiihu otule omperekhiyeeyo. ⁴ Miiyo koosifu vathi, kimariselaka khaazi okinkhiyeeyo oretta. ⁵ Na, nasaapi eti, okisifu oo Paapa, vamote na-weyo khwa siifwa kaarinaaye na-weyo khpulathi olumwenku ohineeyev.

Yinsa oniwaalompela anakhiyoni awe

⁶ Kawaathoonyeza nzina lawo apale okinkhiyeeyo voolumwenku. Apo aya aari awo; weeyo khukinkha miiyo, na yo anshututela ntthakhuzi lawo.

⁷ Aphano yo anjuwa yoori vitthu zooshi onikinkhaaye zinlankha khwa weeyo. ⁸ Maana miiyo kawooza mattakhuzi okinkhiyeeyo yo khupokherela, ajuwa yoori khweele miiyo kalankha mmakhono mwawo na khukhupalela yoori weetta okiruma. ⁹ Miiyo kiniwaavekelela yo. Akiniwaavekelela atthu ooshi a voolumwenku, ila apale okinkhiyeeyo maana pi awo. ¹⁰ Zooshi kiriinaazo pi zaho, na zooshi oriinaazo pi zaka. Miiyo kinsifwiwa mwaasa wa yo. ¹¹ Nasaapi eti akinteela wiikhala voolumwenku ila yo ari voolumwenku, maana miiyo kineetta okho oriwo weeyo. Paapa woot-takatthifu, oweenanele khwa nzina lawo, nzina okinkhiyeeyo, yoori yo eeye vamote nkama niyyieezo fweeyo. ¹² Wakathi kaari vamote na-yo voolumwenku, miiyo kaaweenaneliye na khuwaathokorela khwa owahi wa nzina lawo, nzina ntinttho okinkhiyeeyo. Kaaweenaneliye na khuhivo mmote aashikhiyeeyo, woohiiyi otule atthomeliweeyo waashikha yoori epile zilupiyeeko zawaatikhiwa ttakatthiifu zirettikhane.

¹³ Ila nasaapi eti kintta okho oriwo weeyo, kinlupa mattakhuzi apo nalelo kiri voolumwenku, yoori yo eeyane furaha yaka yookamilikha.

¹⁴ Miiyo kawinkha ntthakhuzi lawo, atthu a voolumwenku khwiiphiiriwa ti yo, maana yo khahiyo a voolumwenku, nkama ethiipi miiyo kihiy-eeni. ¹⁵ Akinuuvekela yoori owaalazevo voolumwenku, ila oweenanele

khwa ntakhali. ¹⁶ Yo khahi a voolumwenku nkhamma etthiipo miiyo kihiyeni. ¹⁷ Owaattakathise na haakhi; nttakhuzi lawo haakhi. ¹⁸ Nkhamma etthiipo weeyo okirumiyeego miiyo voolumwenku, na miiyo kawaaruma voolumwenku. ¹⁹ Khwa zwaamu yaya kinjittakatthisa miiyo, yoori na-yo attakatthe khwa haakhi.

Yinsa oniwaalompela anamalottela awe ooshi

²⁰ Akiniwaavekelela apa otto paasi, ila na apale anteelaaye okikhupali miiyo khwa nttakhuzi laya yo, ²¹ yoori ooshi eeye amote, nkhamma etthiipo nriizo miiyo na weeyo, na-yo ti eeye khwa fweeyo, yoori atthu a voolumwenku akhupali yoori weeyo weetta okiruma. ²² Miiyo kawinkha siifwa etile weeyo okinkhiyeego, yoori yo eeye amote nkhamma fweeyo niiyiyeego amote. ²³ Miiyo khwa yo na weeyo khwa miiyo. Khwa nanna ethiito osiilana waya onttela wiiya khaamili, yoori atthu a voolumwenku ajuwe yoori weeyo ti okirumiyeego, na yoori oniwaapheta nkhamma etthiipo onikiphetaazo miiyo.

²⁴ Paapa, niiya yaka ti yoori attaapho kiriivo miiyo na-yo eeye attaapho ooshi apale okinkhiyeego, yoori oone siifwa okinkhiyeego, maana wakipheta khapulathi olumwenku ohinompiwe.

²⁵ Paapa wa shariya, atthu a olumwenku khanujuwa, ila miiyo kinuujuwa; na apa okinkhiyeego anjuwa yoori weeyo weetta okiruma. ²⁶ Miiyo kawaajuwisa nzina lawo, na nalelo kinvira kiwaajuwisaka, yoori pheta etile okiphetaniyeego yiiye vamote na-yo, na miiyo kiiye vamote na-yo.”

18

Ofukiwa wa Yinsa

¹ Paata ya Yinsa wiisha olompa, khulankha na anakhiyoni awe khulokhela kaapu ya nttapo la Kedroni. Waariwo woorotha, ye khweetta ottuukho na anakhiyoni awe.

² Yuuda namazukuluwela aari ojuwa ohali okhule, maana Yinsa swaafu zinkizene aari okusanyeyaka ottuukho na anakhiyoni awe. ³ Aphano Yuuda khuthuula khuntti ya anajanka khweetta ottuukho na mawaziri akina aya arumiweeyo pi mahaakhimu a tiini na mafwarizeewu, athuuliye vimwasikhelo, na zuuma za nvittha. ⁴ Yinsa, ajuwaka niini yaari weettelaaye orettikhana khwa ye, khuweettela khuwoozela yoori: “Mwinimweekesa paani?” ⁵ Yo khujipu: “Yinsa, wa Nazareeti!” Aphano ye khuwoza yoori: “Ti-miyo.” Yuuda namazukuluwela, ti aariina atthu apale. ⁶ Wakathi Yinsa alupiyeevo yoori “ti-miyo,” yo etta osusa khukwela vathi. ⁷ Yinsa khuwoozela opheya yoori: “Mwinimweekesa paani?” Yo khujipu: “Yinsa wa Nazareti!” ⁸ Yinsa khuwoza yoori: “Miiyo kawuuzani yoori ti-miyo. Nkhamma mwinikekesa miiyo, mwiwaalikhe apa alawe.”

⁹ Yinsa aalupiyie toowo yoori eretteye etile aalupiyeyo rakuzeene yoori: “Paapa, ooshi apale okinkhiyeego khakaashikheeni hatha mmote.”

¹⁰ Aphano Simawu Pheeturu khusrula phanka, khunshija karumeya mmote wa haakhimu nwulu wa tiini, nshiilo lawe la nkhone nlume. Nzina lawe karumeya aya otule laari Maliko. ¹¹ Ila Yinsa khumuza Pheeturu yoori: “Opwehe phanka yawo mmufukho mwawo! Niri akinteela onywela jiikira akinkhiyeego Paapa?”

Yinsa onttaniyiwa wa Anaasi

¹² Elottelanaka khuntti etile ya anajanka, namalokozela aya na anamweekesela wa mayaahuuti khunkhola Yinsa na khunfuka.

¹³ Omwanzweene khumweettana wa Anaasi, nkhwewe Kayifwa, aari

haakhimu nwulu wa tiini mwaakha aya opule. ¹⁴ Ti othuuto awooziyeyo mayaahuuti yoori yaari yooshapweya ntthu mmote owaafwela atthu ooshi.

Pheeturu oninkatthala Yinsa

¹⁵ Simawu Pheeturu na nakhiyoni nkina eetta onlottelela Yinsa. Mwaasa wa yoori nakhiyoni oto aari ojuwanana haakhimu nwulu wa tiini, ye awahiye ofiya vaje wa nyuppa ya haakhimu nwulu wa tiini, ¹⁶ ila Pheeturu aasaliye anwejaka othetekele wa nlako. Nakhiyoni otule nkina, aari ojuwananaye haakhimu nwulu wa tiini, khusaruwa, khulawa khuttakhulana nakhinzi otule aari weekeselaaye nlako khunlikha Pheeturu ovira. ¹⁷ Aphano njaazi otule aari weekeselaaye milako, khumuuzela Pheeturu yoori: “Weeyo khahi ommote wa anakhiyoni wa mwinyi otu?” Ye khujipu araka: “Akiyo!” ¹⁸ Mwaasa wa ozizima, akarumeya na anamweekesela khusikhanyela moottho khusala oottha. Pheeturu khweemela attaapho na ye, khusala oottha.

Haakhimu nwulu wa tiini onimuuzela Yinsa

¹⁹ Aphano, haakhimu nwulu wa tiini khumuuzela Yinsa monkoni wa anakhiyoni awe na masomi awe. ²⁰ Yinsa khujipu araka: “Miiyo kawooza atthu a voolumwenku woosileyavo saaneene, na kaari osomisa nsinakooka mpakha Nnyupa Woosifwiwamo, nttumpho aari othukumanamaamu mayaahuuti. Khina etthu kilupiyeyo sirini. ²¹ Khi onikuzelelani? Owoozele apale akisiiliyeeyo, anjuwa saaneene vitthu kilupiyeyo.” ²² Wakathi Yinsa alupiyeevo toowo, namweekesela mmote amwaattamiyeeyo khumpiya omaasho, araka: “Haakhimu nwulu wa tiini onjipwiwa etthiipo?” ²³ Yinsa khunjipu yoori: “Nkhama kajipu etthu yootakhala, olupe yootakhala, ila nkhamma kattakhula haakhi, khi mwakipiyelani?” ²⁴ Aphano, Anaasi khumperekha Yinsa wa Kayifwa haakhimu nwulu wa tiini ari woffukiwa.

Pheeturu oninkhana Yinsa swaafu ya phiiri

²⁵ Pheeturu nalelo aari oretta eettaka woottha moottho. Aphano khuzeliwa yoori: “Weeyo khahi mmote wa anakhiyoni a mwinyi otu?” Ye khukhana araka: “Miiyo akiyio.” ²⁶ Elottelanaka, karumeya wa haakhimu nwulu wa tiini, jaama mmote wa otule Pheeturu anshijiyeeyo nshiilo, khumuza yoori: “Miiyo kaawooniye nwoorotha orina othuuto!” ²⁷ Pheeturu khurutela theenya okhana. Wakathi otthuupo likukhuwi khwiikha.

Yinsa ari wa Pilaatu

²⁸ Nawiisha khuthuuliwaho Yinsa wa Kayifwa khulawaniwa nyuppa khuulu ya nsatoro. Yaari supuyeene. Anamalokozela a mayaahuuti khuhivirimo nnyupa mphule, aari ontakha yoori ehiwaalawe twahara, yoori awahi onja Paashikowa. ²⁹ Aphano Pilaatu khusaruwa olawa ottakhulana yo na owoozela yoori: “Niini mwininlupezaye ntthu otu?”

³⁰ Yo khujipu yoori: “Eriwaka khaari oretta vitthu zootakhala khanaari wuutisela weeyo.”

³¹ Pilaatu khuwaajipu yoori: “Mwinthuule mwilawe mwamphuke khwa nanna enlupaazo kano zenu.” Aphano mayaahuuti khujipu yoori: “Enikhat-taziwa fweeyo omuula ntthu.” ³² Epo zaarettikhaniye toowo yoori emariselle mattakhuzi apale Yinsa aalupiyeyo, wakathi aari ottakhulaavo monkoni wa nanna aari weettelaazo ofwa.

³³ Pilaatu khurutela nnyupa khuulu ya nsatoro, khunkhuwela Yinsa khumuuzela yoori: “Weeyo o mfwalume wa mayaahuuti?”

³⁴ Yinsa khujipu yoori: “Mattakhuzi aya apo onikuuzelaaye pi awo, ama atthu akina ti awuuziyeeyo monkoni wa miiyo?” ³⁵ Pilaatu khunjipu yoori: “Miiyo ki yaahuuti? Atthu awo na mahaakhimu a tiini ti akitiseeliyeeyo weeyo. Niini orettiyeeyo?”

³⁶ Yinsa khujipu yoori: “Ofwalume aka khayi wa voolumwenku apha! Eriwaka ofwalume aka waari wa voolumwenku apha, akarumeya aka eetta wuumanana mayaahuuti awaakhattazaka okikhola, ila wa ekhwhee ofwalume aka khahiyo wa voolumwenku attaapha.”

³⁷ Aphano Pilaatu khulupa yoori: “Khupe weeyo o mfwalume.”

Yinsa khunjipu yoori: “Weeyo ti onlupaaye yoori ki mfwalume. Miiyo kavokoleliwa ethiito na ti ethiito ekitaniyeeyo voolumwenku, yoori kite kilawele oshaahiti wa haakhi. Wakhula otule eeyiye wa haakhi onsiila huula yaka.”

³⁸ Pilaatu khumuuzela yoori: “Haakhi niini?” Noolupa toowo khulankha opheya khulawa aphale aariivo mayaahuuti khuwooza yoori: “Miiyo akinimoonana hatha nlattu. ³⁹ Ila khwa zowera yenu mweeyo, miiyo kintta ontaphula napherezu mmote mwaasa wa ofiya wakathi wa Paashikowa. Mwintakha yoori miiyo kintaphule mfwalume wa mayaahuuti?”

⁴⁰ Yo khunyakula ajipwaka yoori: “Wala, ye wala! Ninintakha Baraba.” Ila Baraba aari namahusuti.

19

Yinsa ahukhumweliwa okhomeliwa

¹ Aphano Pilaatu khuruma ojaphiwa Yinsa. ² Anajanka khuvaasha khaara ya miiwa khunwalisa mmewishwa. Na khunwalisa ajapi yookhuttuwa.

³ Ansuselaka amuuzaka yoori: “Mfwalume wa mayaahuuti, otulu!” Na khusala ampiya omaasho wawe.

⁴ Swaafu kiina Pilaatu khulankha khuwooza mayaahuuti yoori: “Moone! Miiyo kinuutiselani mweeyo yoori mwijuwe yoori miiyo akimoonaneeni hatha nlattu.” ⁵ Wakathi attisiweeyo vaje awaliye khaara ya miiwa, na ajapi yookhuttuwa, Pilaatu khuwooza yoori: “Mmoone mwinyi otule, otu ari apha!”

⁶ Wakathi amooniyeevo Yinsa mahaakhimu a tiini na anamweekesela, khusala anyakula alupaka yoori: “Akhomeliwe! Akhomeliwe!” Ila Pilaatu khujipu yoori: “Mwinthuule mweeyo-ena mwankhomele, miiyo akinimoonana hatha nlattu.”

⁷ Yo khujipu yoori: “Fweeyo ninaaye kano, kano etthiipo enlupa yoori ooliwe maana onjilupeza yoori Mwaana wa Nluku.”

⁸ Paata ya osiila toowo, Pilaatu khutepa woova. ⁹ Khurutela nyuupa khuulu ya nsatoro, khumuuzela Yinsa yoori: “Weeyo owa vayi?” Ila Yinsa khuhinjipu. ¹⁰ Aphano, Pilaatu khumuza yoori: “Khunikijipu? Khunjuwa yoori miiyo kinaaye owahi wa wuutaphula ama wuukhomela?”

¹¹ Yinsa khunjipu yoori: “Weeyo khawaari wiiyana hatha owahi khwa miiyo, eriwaka khawenkhiwe otulu. Ti eto otule ootiseliyeeyo Miiyo ona paathuli ya twampi yooziti.”

¹² Waaza wakathi otthuupule Pilaatu khusala atakha ontaphula Yinsa, ila mayaahuuti khusala anyakula araka: “Amana onlikha Mwinyi oto ojitatha, khuniiya swaahipu wa Seezari. Wakhula otule anjilupanaaye ofwalume oniyya muumani wa Seezari!”

¹³ Pilaatu noosiila toowo, khunsarulela Yinsa vaje, khwiikhala vakhukulu ya namaphuka puuro yaari wiithiwaaye ‘Eshotthelo ya mawe’, khwa luuka

ya meepereewu enriwa ‘Kabata’. ¹⁴ Yaari payina ya saasiitha, yaari Siikhu ya Ojilokothela, maana yaari sumana ya njampo la Paashikowa.

Aphano Pilaatu khuwooza mayaahuuti araka: “Mwimoone, otu ari apha Mfwalume enu!”

¹⁵ Ila yo khusala anyakula araka: “Onsarulele oje! Onsarulele oje! Akhomeliwe!”

Pilaatu khuwoozela yoori: “Kinkhomele mfwalume enu?”

Mahaakhimu a tiini khujipu araka: “Khanina mfwalume fweeyo woohiiyi Seezari!”

¹⁶ Aphano Pilaatu khunthuula Yinsa khuwenkha anajanka yoori ankhomele, yo khunthuula.

Okhomeliwa

¹⁷ Yinsa khusaruwa attikhewe nsalapa awe, khusala alawaniwa puuro yaari wiitthiwaaye Kalavaariyu, khwa luuka ya meepereewu yaari wiitthiwa Kolokoota, ¹⁸ attaapho akhomeliweevo ye na atthu awiri, wakhula mmote mpavu mwawe, ye khwiya vakatthi.

¹⁹ Pilaatu khwaatikha lipawu khuthomeya pontha wa nsalapa; attikhieyevo yoori: “YINSA WA NAZARETI, MFWALUME WA MAYAAHUUTI!

²⁰ Mayaahuuti enkeene aasomiye lipawu ntthile, maana puuro etile Yinsa akhomeliweeyo yaari kharipu na va sitati, lipawu ntthile laatikhiwe luuka ya meepereewu, ya elatiinu na ekereku. ²¹ Mahaakhimu a tiini aari omuuza Pilaatu yoori: “Ohaatikhe yoori: ‘Mfwalume wa Mayaahuuti’, waatikhe etile aalupiyeyo yoori: ‘Miiyo ki Mfwalume wa mayaahuuti.’”

²² Pilaatu khujipu yoori: “Etile kaatikhiyeeyo kaatikha.”

²³ Anajanka paata ya onkhomela, khuthuula kuwo zawe, khwaawanya phantte nne yoori wakhula najanka apatthe phantte moote; na khuthuula ajapi yawe theenya. Ila ajapi yaari yoohisoniwi waaza vathi mpakha vatulu.

²⁴ Yo khulupa yoori: “Nihivarule, ila neekese nasipu nimoone anttelaaye opattha.” Epo zaarettikhaniye yoori emarisele zawaatikhiwa ttakatthiifu enlupaaye yoori:

“Aawanya kuwo zaka, na khweekesa nasipu khwa ajapi yaka.

Na pi ethiipo anajanka aarettiyeozo.”

²⁵ Kharipu ya vansalapa wa Yinsa aarivo mamaawe, na ttwiye mamaawe, na Mariyamu muukha wa Kolopa, na Mariyamu Mataleena. ²⁶ Yinsa noomoona mamaawe ari vamote na nakhiyonni otule wompheta wawe, khumuuzu mamaawe yoori: “Muukha mwanawo oto,” ²⁷ na khumuuzu nakhiyonni awe yoori: “Omoone, mamaawo oto.” Waaza wakathi otthupule, nakhiyonni otule khuretteya wiiya jaama.

Ofwa wa Yinsa

²⁸ Paata ya Yinsa woona yoori zooshi zintta omariseleya, khushankela yoori zirettikhane epi zaari olupaazo zawaatikhiwa ttakatthiifu yoori: “Lakikhola nnyottha!” ²⁹ Yaarivo suupha aarimo viinyu yoonyuunya khuthuuliwa khunywisiwa ethiiwe va shiponja yoofukeleliwa va ttekettthe ya hisoopo na khuweziwa mpakha omilomo wa Yinsa. ³⁰ Yinsa wakathi anywiyyeeyo maati apale oonyuunya khulupa yoori: “Zooshi zamariseliwa”, khwiinamisa eeshwa yawe khwinkhelela rooho yawe.

³¹ Yaari Siikhu ya Ojilokothela na Saapatu eti yaari siikhu yootepa wiiya ttakatthiifu. Wiiya khaari otakha yoori mwiili wa Yinsa wiiye vansalapa mpakha Saapatu, mayaahuuti khunvekela Pilaatu yoori arume okakattiwa

moolu otule akhomeliweeyo na olaziwavo vansalapa. ³² Khuta anajanka khukakatta moolu a ntthu otule wa waaza aakhomeliweeyo vamote na Yinsa elottelanaka khukakattiwa a otule nkina. ³³ Ila noofiyeliwa Yinsa, khooniwa yoori ye aari woofwa, khuhikakattiwi moolu awe. ³⁴ Ila najanka mmote khukuphula pavu ya Yinsa na nkokhi, nasaapiru khusala esaruwa taamu na maati. ³⁵ Otule oniyeyo vitthu zaya epo alawela oshaahiti, na oshaahiti awe pi wookhweele. Ye onjuwa yoori onlupa haakhi, na onlaza oshaahiti yoori na-mweyo mwikhupali. ³⁶ Vitthu epo zarettikhana yoori emariseleye epile enlupaazo zawaatikhiwa ttakatthiifu yoori: “Hatha likhonkolo lawe limote khalintela opwecheya,” ³⁷ na nkhamma theenya enlupaazo zawaatikhiwa phantte kiina yoori: “Yo anttela omoona othuuto anshomiyeeyo.”*

Ozikhiwa wa Yinsa

³⁸ Paata ya toole Yuusufu wa sitati ya Arimateeya, khunvekela Pilaatu mwiili wa Yinsa. Yuusufu aari nakhiyoni wa Yinsa, ila wa sirini, maana aari owoova mayaahuuti. Pilaatu khwinkha ruhusa, na Yuusufu khulawa na khulazavo mwiili opule wa Yinsa. ³⁹ Ye aaperekhiwe ti Nikoteemu, otule alawiyeyo ottakhulana Yinsa osikhu. Nikoteemu aathuliye ma-futtha oonukhela oophakanyaniwa ela yaari ofiyaaye ethu ya miphimo talaathiini na thaanu. ⁴⁰ Khuthuula mwiili wa Yinsa, khuputaputela va joora yoottukunttelisa ofu woonukhela, nkhamma anrettaazo mayaahuuti va ozikha. ⁴¹ Vahali akhomeliwevo Yinsa waariwo woorotha, waariina khapuri pheeya, yoohizikhiwivo hatha ntthu. ⁴² Maana yaari osaleela ofiya Siikhu ya Ojilokothela wa mayaahuuti, na khapuri yaari kharipu, khuzikhiwa attaapho.

20

Osisimuwa

¹ Siikhu ya mwanzo ya sumana Jumwaa-phiili supuyeene, Mariyamu Mataleena khulawa ovilalo, khoona liwe ntthile laattiyelaniweeyo khapuri lilaziwevo. ² Aphano khutthira khulawa mpakha vahali aariivo Simawu Pheeturu na nakhiyoni nkina, otule Yinsa aari omphetaaye, khuwooza yoori: “Mbwana alaziwamo nkhapuri, khanijuweeni vahali atthiweevevo!”

³ Pheeturu khulankha na nakhiyoni nkina khulawa mpakha okhapuri. ⁴ Oowiiri khulankha eettaka otthira, ila otu nkina khutthira channu khunziti Pheeturu, khwiiya mwanzo woofiya ovilalo. ⁵ Khwiinama khutturumelamo, khoona joora, ila khuhivirimo nkhapuri mphule. ⁶ Aphano, Simawu Pheeturu otule aari onlottaaye, khufiya khuvira nkhapuri mphule na ye khoona joora etile, ⁷ na joora etile yaari veeshwa wa Yinsa, eri yooputaputeliwa eri phantte kiina. ⁸ Aphano naye nakhiyoni otule aari mwanzo woofiya khuvira nkhapuri nttumphule, khoona na khukhupali. ⁹ Yo nalelo zaari ehinaaweelye zawaatikhiwa ttakatthiifu, zaari olupaaye yoori yaari ohithajiya Yinsa osisimuwa muufwa.

Yinsa onimpeweleta Mariyamu Mataleena

¹⁰ Anakhiyoni apale khurutela onti theenya. ¹¹ Ila Mariyamu, khusala nalelo ari vanlako wa khapuri, eettaka olila, khwiinama khuthurumela nkatthi. ¹² Khoona malayikha mawiri awaliye kuwo zoolakala, eekhaliye aphale waariivo mwiili wa Yinsa, mmote ovishwa nkina omoolu.

¹³ Aphano malayikha apale khumuuzela yoori: “Weeyo muukha, onlilani?”

* 19:37 Moone kithaapu ya Zakariiya 12.10

Ye khujipu araka: "Yo anthuula Mbwana aka khulawana safwari zaya na akinjuwa vhali antthiiyeevo." ¹⁴ Paata ya olupa towo, khuzukuluwa khumoona Yinsa eemeliye, ila khuhinjuwi yoori ti Yinsa.

¹⁵ Aphano Yinsa khumuuzela yoori: "Weeyo, muukha onlila-ni? Onimweekesa paani?"

Ye khusala oopuwela yoori aari namalimela woorotha, khunjipu yoori: "Mwinyi, nkhamma mweetta onlazamu, nkakuuzeni vhali mwintthiyeovo, miiyo kilawe kanthuule."

¹⁶ Yinsa khuri: "Mariyamu!"

Ye khuzukuluwa, khulupa khwa luuka ya meepeereewu yoori: "Raboni!" (Eriina maana la Mwaaliimu). ¹⁷ Yinsa khulupa yoori: "Ohikikholele, maana nalelo akinarutele wa Paapa. Olawe vakatthi wa attwiizaku wawooze yoori: 'Miiyo kintta orutela wa Paapa na Papeenu mweeyo, wa Nluku aka na Nluku wenu mweeyo."

¹⁸ Aphano Mariyamu Mataleena khulawa khuwooza anakhiyoni a Yinsa yoori: "Kamoona Mbwana!" Na khuwooza zooshi epile oziweeyo ti Yinsa.

Yinsa oniwaapuwelela anakhiyoni awe

¹⁹ Njuwa-looveva siikhu ethiitile, siikhu ya mwanzo ya sumana, jumwaa-phiili, anakhiyoni akhusanyeyiye milako ziri zoofukiwa, mwaasa wa owoova mayaahuuti, Yinsa khuvira khweemela vakatthi vaya khuri: "Heeri yiiye vamote na-mweyo!" ²⁰ Alupiyeevo vitthu epile khuwaathonyeza makhono awe na pavu yawe. Anakhiyoni apale khwiya ofurahi paata ya omoona Mbwana.

²¹ Yinsa khulupa theenya yoori: "Heeri yiiye vamote na-mweyo! Nkhamma etthiipo Paapa akirumiyeeyo, na-miyo kinuuruman mweeyo." ²² Paata ya olupa towo khuwaavitelela khuri: "Mwipokhere Rooho Ttakatthiifu. ²³ Amana mwiswaamihi twampi za ntthu, twampi zaya epo eniyya zooswamihiva, ila amana mwihsaamihi khazinswamihiva."

Yinsa onimpuvelela Tome

²⁴ Tome, anitthiwaaye Maphapo, mmote wa anakhiyoni apale khumi na awiri, kaari vamote na anakhiyoni wakathi Yinsa awaapuweleliyeovo.

²⁵ Anakhiyoni apale akina khumuza yoori: "Namoona Mbwana!" Ila ye khuri: "Miiyo noohooni mmakhono alama za misumari epile, kitthaamo yaala yaka mphule aakhomeliweemo, na kittha nkono pavu yawe, hatha vattithiiru akinkhupali!"

²⁶ Paata ya ovira siikhu naane anakhiyoni awe khurutela okusanyeya nttumphule theenya na Tome aarivo. Milako ziri zoofukiwa, Yinsa khuta khweemela vakatthi vaya khuri: "Heeri yiiye vamote na-mweyo!" ²⁷ Aphano Yinsa khumuza Tome yoori: "Otthe yaala yaho apha, na woone makhono aka, na wookole nkono awo ottheele pavu yaka. Ohiiye nanhikhupali, ila wiiye namakhupali."

²⁸ Tome khujipu araka: "Mbwana aka na Nluku aka!"

²⁹ Yinsa khumuza yoori: "Mwaasa wa okoona, wakhupali? Ooparikhiiyiwa pi apale ahooneeni ila khukhupali."

³⁰ Yinsa khuretta alama za minjuza kiina zinkizene vakatthi wa anakhiyoni zihaatikhiweenimo nkithaapu mphu, ³¹ ila epi zaatikhiwa yoori mweeyo mwikhupali yoori Yinsa ti Al-Masiihu, Mwaana wa Nluku na yoori amana mwinkhupali mwiiyane ohaayi khwa nzina lawe.

¹ Paata ya toowo Yinsa khuwaapuwelela anakhiyoni awe opheya nshini wa ntthatta liniithiwaaye Tiperiyaati*. Ti nanna ye aajithonyeziyeeyo: ² aari vamote Simawu Pheeturu, Tome aniitthiwaaye Maphapo, Natanayeele wa nti wa Kanaani ya Kalileya, na aana a Zepeteewu na anakhiyoni akina awiri. ³ Simawu Pheeturu khuwooza ashirikha awe yoori: “Kinttela ojiya.” Akinoko aya khulupa yoori: “Fweeyo nintta wuulotta!” Yo khulawa na khweetta mmwaatiya, ila osikhu aya opule khuhipatthi hatha etthu.

⁴ Ekhunkumu ya lifwajiri Yinsa aarettiye ari vapatari, ila anakhiyoni awe khuhinjuwi.

⁵ Ye khuwoozela yoori: “Aanaaka, mwapattha swi?”

Yo khujipu yoori: “Wala!”

⁶ Ye khulupa yoori: “Mweeselele ntthavi phantte ya nkhono nlume ya mwaatiya, mwintta opattha.” Yo khweesa, khuhisala awahi ofuttha ntthavi mwaasa wa swi waatta.

⁷ Nakhiyoni wa Yinsa woophetacha khumuuzza Pheeturu yoori: “Oto aya ti Mbwana!” Wakathi Simawu Pheeturu asiiliyeovo elupiwaka yoori aari Mbwana, khuwala juupa, maana eettiye ovula na khujeeselela mmaati.

⁸ Anakhiyoni akina khuta na mwaatiya, eettaka ofuttha ntthavi liitaaliye swi, aari kiyasi ya phiima miiya asaleela ofiya vapatari. ⁹ Wakathi afiyyeovo vapatari, khoona vahali waariivo moottho, na swi vatulu a makhala; na erivo phaawu.

¹⁰ Aphano Yinsa khuwooza yoori: “Mwitiise swi vattitthiiru ethiipo mwi-jiyiyeeyo nasaapi.”

¹¹ Aphano Simawu Pheeturu khuwela mmwaatiya khupurulela ntthavi vathi. Liri lawiitaala swi miiya na hamusiini na ttatthu khuluzeene, ila ntthavi khuhivarawi. ¹² Aphano Yinsa khuwooza yoori: “Mwite mwije!” Khuhivo hatha nakhiyoni awe mmote aminyaliyeeyo khumuuzela yoori: “Weeyo aya o paani?” Maana anjuwiye yoori otu ti Mbwana. ¹³ Yinsa khuwaattama khuthuula phaawu, khuwenkha na khuretta ethiipo khwa swi. ¹⁴ Eto yaari swaafu ya ttaatthu Yinsa ajithoonyezaka vakatthi wa anakhiyoni awe, paata ya osisimuwa nkhapuri.

Yinsa oninkaphula Pheeturu

¹⁵ Paata ya wiisha oja Yinsa khumuuzela Simawu yoori: “Simawu, mwaana wa Yaahaya, onikipheta zayita apa?”

Ye khuri: “Aa Mbwana, hatha na-weyo onjuwa yoori miiyo kinuupheta.”

Yinsa khumuuzza yoori: “Ojise pwittipwitthi zaka.”

¹⁶ Khumuuzela theenya swaafu ya phiiri yoori: “Simawu, mwaana wa Yaahaya, weeyo onikipheta?”

Ye khujipu yoori: “Aa Mbwana, hatha na-weyo onjuwa yoori miiyo kinuupheta.”

Yinsa khumuuzza yoori: “Oshuke pwittipwitthi zaka.”

¹⁷ Khumuuzela theenya swaafu yattaatthu, yoori: “Simawu, mwaana wa Yaahaya, weeyo onikipheta?”

Pheeturu khunyoonyeya mwaasa wa Yinsa omuuzela swaafu ya ttaatthu, yoori: “Weeyo onikipheta?” Ye khuri: “Mbwana, weeyo onjuwa vitthu zooshi na onjuwa yoori miiyo kinuupheta.”

Yinsa khumuuzza yoori: “Ojise pwittipwitthi zaka. ¹⁸ Miiyo kiniwuza khweele yoori, wakathi opule waari shaappu, weetta ojiwalisa, khweetta wakhula aphale ontakhaavo, ila amana wuuluvala onteela owookolela

* **21:1** Tiperiyaati theenya eniitheliwa nzina la ntthatta la Kalileya.

makhono, azaawo oothuule aweettane ohali ohintakhaawo weettawo.”
¹⁹ Yinsa aalupiye toowo yoori athoonyeze nanna ya ofwa Pheeturu aari weettelaaye onsiwana Nluku. Nawiisha, khumuaza yoori: “Okilotte!”

²⁰ Pheeturu azukuluwiyeovo khummoona yoori nakhiyoni otule Yinsa aari omphetachaaye etta owaalotta. Oto ti aari mpavu wa Yinsa wakathi wa ethu-yoojiwa ya osikhu, na ti othuuto eenameliyeeyo vamweyo wa Yinsa khumuuzela yoori: “Mbwana paani anttelaaye wuuzukuluwela?”
²¹ Wakathi Pheeturu amooniyeevo khuri: “Mbwana, khi otu?”

²² Khunjipu Yinsa yoori: “Hatha nkhamma miiyo katakha yoori ye eeye haayi mpakha miiyo oruti, weeyo enuujali niini? Ila weeyo okilotte miiyo.”

²³ Khwa ethhiipo khumwazeyela vakatthi wa attwi yoori nakhiyoni otule khaari oteela ofwa. Ila Yinsa khaalupiye yoori khaari oteela ofwa; aalupiye yoori: “Nkhama miiyo katakha yoori eeye haayi mpakha miiyo oruti, weeyo enuujali niini?”

²⁴ Otu ti nakhiyoni anlazaaye oshaahiti wa vitthu zaya epo na aatikhiiyeeyo. Ninjuwa yoori oshaahiti awe pi wookhweele.

²⁵ Yinsa aretta vitthu kiina theenya zawaatta. Eriwaka wakhula moote yeettiye waatikhiwa, kinoona yoori hatha voolumwenku wooshi khayaari wiiyavo puuro zootthiiwavo kithaapu zaari weettelaaye waatikhiwa.

Khaazi za Maswihaapa

Oweziwa wa Yinsa

¹ Warakha yaka yamwanzo khaatikhiye kiwuuzaka weeyo Tiyoofilu, monkoni wa zooshi epile Yinsa arettiyeego na anozeliyeego, ² mpakha siikhu aweziweevo pinkuuni, paata ya owaanozela khwa owahi wa Rooho Ttakatthiifu atthu apale awaathawuliyeeyo yoori eeye maaswihaapa. ³ Yinsa n'oosisimuwa awaapuweleliye ajithoonyezaka nanna nannazene yooritiye entta osisimuwa. Khwiya vamote na yo mpakha siikhu arupayiini enttaka omoona, opiyana mwaasa na ojama vamote, na attakhulaka vitthu monkoni wa ofwalume wa Nnyizinku. ⁴ Wakathi aari ojaavo na maaswihaapa awe Yinsa khuwaaza yoori: “Mwihiilewo Yeruzaleemu, mwiwejele etile kiwuuziyeenini aahitiyeeyo Paapa. ⁵ Yaahaya awoosani na maati, ila nkathhi wa siikhu vattitthiiru, mweeyo mwinteela woosiwa na Rooho Ttakatthiifu.”

⁶ Yo khumuuzela: “Mbwama, wakathi aya pi otthuupo ontelaaye owminkha ofwalume wa Nnyizinku atthu a Ezirayeele?”

⁷ Yinsa khuwaajipu yoori: “Kahi pantte yenu ojuwa wakathi ama siikhu Paapa attattikhyeego ofwalume awe. ⁸ Ila mweeyo mwinteela winkhiwa owahi wa Rooho Ttakatthiifu ewiishukelani, mwinteela wiiya mashahiti aka, waaza Yeruzaleemu na Yudeya yooshi, Samariya mpakha ohali wiishe- liyeewo olumwenku.”

⁹ Paata ya wiisha olupa mattakhuzi apa, khuweziwa pinkuuni, eettaka omweekesela olawaka khupuwa liwiku khunkutela khuhisala amoona.

¹⁰ Yo khusala nalelo ari wookhontola maasho aya enkesaka otulu ye eettaka olawa, khupuwa aluke awiri awaliye kuwo zoolakala, ¹¹ khuwooza yoori: “Mweyo akalileya, otulu mwineekesa-niwo? Yinsa alaziweeyo vakatthi venu khuweziwa pinkuuni onteela oruti khwa nanna ethiipile mwimooniy- eezeo alawaka.”

Matiiyasi oninrentteri Yuuda

¹² Aphano maaswihaapa khulankha vamwaako oniitthiwaaye Oluveera oriiyeeyo kharipu na sitati ya Yeruzaleemu. ¹³ N'oofiya khuwela nyuupa ya vatulu nhali amakiyeemo, maaswihaapa aya apo aari Pheeturu, Yaahaya, Yaakhumpa na Antere; Filiipe, Tome, Paturumeeuw na Mateewuzhu; Yaakhumpa mwaana wa Alufayo, Simawu Zelooti na Yuuda mwaana wa Yaakhumpa. ¹⁴ Apo khaazi yaya yaari okhusanyeya na olompa wakhula siikhu, na aakha akinaaya vamote na Mariyamu mamaawe Yinsa na atthwiize.

¹⁵ Aphano siikhu moote mamuumini miiya na eeshiriini aakusanyeyiye vhali vamote. Pheeturu khulankha khweemela khulupa awoozaka mamuumini ooshi yoori: ¹⁶ “Atthwiizaku, zaarina yoorettikhana zooshi epile Rooho Ttakatthiifu alupeyeezo nkathhi ya nttakhuzi la Nnyizinku khwa Daawuuda monkoni ya Yuuda, othuuto awaalokoziyeeyo atthu olawa onkhola Yinsa. ¹⁷ Yuuda aya oto aari wa khuntti yetthu, aari oretta phantte ya khaazi ethiiti.

¹⁸ Ila mwaasa wa nzurukhu enkhiweeyo khumuuzanyisa Yinsa, nzurukhu aya khuuzanyela nshapa. Aakhweliye mmashapa mwawe nttumpho khufwa. Erukulu yawe khuphwetuwa marupo awe ooshi khumwazeyela

vathi. ¹⁹ Atthu ooshi a Yeruzaleemu khujuwa. Apho nshapa ntthile khutthajiwa nzina khwa luuka yaya yo la Akelataama: liriina maana a ‘nshapa la taamu’.

²⁰ Nliivuru la Zaburi yaatikhiwamo yoori:

‘Nhali mwawe ethamiwe ahiikhalemo hatha ntthu.’

Khwaatikhiwa theenya yoori

‘khaazi yawe asalane ntthu nkina.’

²¹ Apho ninthawula ntthu nkina ninthe nkhuntti mwetthu eeya shaahitiwa osisimuwa wa Mbwana Yinsa. Ila ona ya wiiya ntthu aari onilottakaaye mphule naari ovirakamo Yinsa ari haayi, ²² waaza wakathi opule Yaahaya aari woosavo mpakha siikhu Yinsa alaziweeve vakatthi vetthu aweziwaka pinkuuni.”

²³ Aphano, khuthoonyiwa atthu awiri: Yuusufu aarina nzina likina la Barisapa, woojuwaniwa wiiya ntthu wa waaminey, na nlume nkina aari wii thiwaaye Matiiyasi. ²⁴ Nawiisha atthu khulompa araka: “Mbwana, weeyo ti onjuweeyo rooho za atthu ooshi. Khwa atthu apa awiri nintakha onithoonyeze onthawuliyeeyo ²⁵ yoori akhole khaazi ya omaaswihaapa vamote na-fweyo, eti Yuuda ahitakheeni khweetta puuru yaari onsuhaaye.”

²⁶ Paata ya toole khweekesiwa nasipu khusala enthoonya Matiiyasi. Khwa etthiipo ye khuphakanyeya na apale khumi na mmote aasaliyeyo khwiyya khumi na awiri.

2

Ota wa Rooho Ttakatthiifu Siikhu ya Takhiriima

¹ Efiyeevo siikhu ya takhiriima amamlottela a Yinsa ooshi aakhusanyeyiye vamote. ² Nasaapiru khuta huula yoolankha pinkuuni wuupuka nkama pheeyo yaari ovumaaye saaneene, khwiitaala nnyupa wooshimo mphule aakusanyeyiyeemo. ³ Khuwaapuwela etthu yaari wuupuwaaye nkhamma nlimi la moottho laari waawanyeyaaye khusala linkwela vakhula ntthu veeshwa vawe. ⁴ Ooshi khwiyya awiitaala Rooho Ttakatthiifu, khwaaza ottakhula luuka pheeya khwa nanna wakhula ntthu Rooho Ttakatthiifu yaari onthoonyezaazo ottakhula.

⁵ Yeruzaleemu aarivo ayudeya awaatta aari omwaaputwaaye Nnyizinku aalankhiyeeyo khapila zooshi za olumwenku. ⁶ Ooshi n'oosiila huula etile khwiyya ooshanka. Khukusanyeya vahali vamote maana ooshi aasiiliye ovuma wa huula ya etile, na wakhula ntthu aari osiila khwa luuka yawe.

⁷ Aari oshankawene etthiipo milomo khuuma khusala olupa yoori: “Atthu apa ntthulaaye apha ooshi khahi akalileya apa? ⁸ Khi ensulukhwana toovi fweeyo niwaasiilaka khwa luuka zetthu? ⁹ Fweeyo nalankha Parithiya, akina alankha Mediiya, akina Elaami, akina Mesopotamiya, akina Yudeya, akina Kapatosiya, akina Pontu na Aasiya, ¹⁰ akina alankha Firijiya, akina Pamfiliya, akina Misuri na pantthe za Liibiya kharipu na Sireeni, na anamathotola alankhiyeeyo Rooma. ¹¹ Waaza mayaahuti mpakha apale eettiyeeyo ntiini ya maya huuti, akereeti na aarapu. Ila nawaasiila khwa luuka zetthu yo alupaka vitthu zootkinisa na khuluzeene za Nnyizinku. ¹² Ooshi aari oshankisiwa khuhisala ajuwa hatha etthu yoolupa, khusala oozelana araka: “Maana a vitthu zaya epi niini?”

¹³ Atthu akina khusala awaatheya maaswihaapa apale owoozaka yoori eetta ohapaliwa.

Otafusiri wa Pheeturu

¹⁴ Aphano Pheeturu na ashirikhaawe apale khumi na mmote khulankha khusala owooza atthu yoori: "Maswahipu zaka mayaahuti mpakha mooshi mweeyo mwiniikhalaaye nti wa Yeruseleemu, mwisiileze etthu kintakhaaye olupa: ¹⁵ mweeyo mwinoona nkama atthu apa eettiye ohapaliwa, ila wala khahapaliweeni nkama mwinaakanyerazo mpakha apha saawuuni ya supu. ¹⁶ Vitthu zaya epi zirettikhaniyeeyozo zaalupiwe rakuzeene ti napiya Yowele araka:

¹⁷ 'Nnyizinku alupa yoori: "Siikhu za mwiisho
kinteela oweeshushela atthu ooshi Rooho Ttakatthiifu.
Aana enu aalume na apa aakha anteela alupa
vitthu zinteeelaaye orettikhana khwa nzina laka,
mashaapu anteela ooothonyeziwa vitthu zootikinisa.
Ana khuuluvale anteela wiiyana jozi.

¹⁸ Khwa akarumeya aka aalume na aakha,
yo kiniweekha Rooho yaka siikhu zaya ethiipo
yo anteela olaleya hapari zaka.

¹⁹ Kinteela othoonyeza vitthu zootikinisa,
kinteelaazo ottha otulu pinkuuni
kinteela opuwisa vitthu zootikinisa vathi voolumwenku,
zinteeela orettikhana minjuza,
enteela wiyyavo taamu na moottho mawiku na loosi.

²⁰ Njuwa lithatuwe liiye looripa,
mweezi na-ye othatuwe wiiye taamu,
epoza enteela orettikhana khapula
ehinafiye siikhu khuulu ya siifwa za Nnyizinku.

²¹ Ila atthu ooshi apale anttelaaaye onkhwuela Nnyizinku
yoori awaawuuni antta wuusurukha!"'

²² Mweeyo mwa atthu a Ezirayeele mwisiileze mattakhuzi apa: Yinsa wa Nazareeti tu wookhupaliwa ti Nnyizinku. Ye Nnyizinku oretta minjuza za waatta vakatthi venu mweeyo na alama kiina zaya khwa ye. ²³ Othuuto Nnyizinku awinkhiyenini mweeyo arina shawurina, ila mweeyo khkusanyeya na atthu ootakhala rooho khunkhomela vansalapa khumuula. ²⁴ Nnyizinku othuuto ansisimula muufwa na khunsinttisa owahi woofwa maana yaari etthu yooronyiwa ye oshintti ti oofwa. ²⁵ Daawuuda anlopeziye yoori:

'Wakhula wakathi kaari omoona Mbwana ari omaasho waka
maana ye ori nkhona-nlume aka, yoori kihiveveluwe.

²⁶ T'iito rooho yaka yoofurahi na nlimi laka lininttitthimisa;
mili aka onteela onvumula orina nroromelo,

²⁷ maana khunteela olıkha nafusi yaka nkhapuri
khunteela okanswi,

khukhupaleli na khunteela okhupalela yoori
Nttakatthiifu awo oone vitthu zootakhala nkhapuri.

²⁸ Wakinozela tarikhi ya ohaayi,
onteela okiitaaza furaha amana kiiya vamote na-weyo.'

²⁹ Pheeturu khuri: “Attwizaka, mwikiwejele kiwuuzeni saana saana monkoni wa papeetthu Daawuuda yoori ye afwa khuzikhiwa khapuri yawe eri mmuti mweththu ntmphu mpakha leelo eti. ³⁰ Ye aari napiyu na aari ojuwa yoori Nnyizinky ahitiye yoori vakatthi wa peewu yawe aari on-teela opuwavo mfwalume ari oteelaaye osalana puuro yawe ya ofwalume. ³¹ Daawuuda aari ojuwa etthu Nnyizinkku aari weettelaaye oretta t'iito aari aalupiyeyo monkoni wa osisimuwa wa Al-Masiihu othuuto Nnyizinku ahanlikhiyeeyo nkhapuri, wala mwiili awe ophomowa. ³² Nnyizinku an-sisimula Yinsa, fweeyo naamashaahiti a vitthu zaya epo. ³³ Khuweziwa olawa wiikhala nkhono-nlume wa Nnyizinku, ye enkhiwa Rooho Ttakatthiifu ti Papaawe nkhama ethhiipile aamwahitiyeeyo apha eetta oniitthelela t'iithiiti mwinoonaaye na mwinsilaaye enasaapi eti. ³⁴ Daawuuda khawezweeni pinkuuni, ila atukhunu alupaka yoori:

‘Mbwana amuuza Mbwanaaka yoori:

“Wiikhale pantteya nkhono weelume aka,

³⁵ mpakha miiyo kiwaattha maatuwi awo awaaluwatthele.”’

³⁶ Aphano, atthu ooshi a Ezirayeele ana yoojuwa yoori: Yinsa, othuuto mweeyo mwankhameliyeeyo, Nnyizinku omwinkha wiiya Mbwana na wi-iya Al-Masiihu.

³⁷ Paata yoosiila mattakhuzi apale, khuwaapattha kupari nroho mwaya, khumuuzela Pheeturu na maaswihaapa apale akinaaya yoori nkahayani: “Attwiizetthu, apho niri je?”

³⁸ Pheeturu khawaajipu araka: “Mwithupwiye na wakhula mmote wa mweeyo oosiwe khwa nzina la Yinsa Al-Masiihu yoori mwipatthe nswammaha wa twampi zenu. Mwintta opokhera tthuvu ya Rooho Ttakatthiifu. ³⁹ Ahiti yaya eto ti yenu, mweeyo mpakha aaneenu na atthu akina awoolepawo: khwa apale ooshi Mbwaneethu Nnyizinku awaakhuweliyeeyo.”

⁴⁰ Khwa mattakhuzi menkeene Pheeturu khusala awaalipisela atthu na awaatumenela araka;” Mwijuusuru vakatthi ya khapila ya atthu apa otakhala rooho.” ⁴¹ Atthu awaatta khukhupalela tafusiiri ya Pheeturu, khujilakelela olawa woosiwa. Siikhu yaya etile atthu eekezeleyiye khwiyya alufu ttatthu.

Nanna aari wiikhalaayo atthu apale aakhupaliyeeyo

⁴² Yo aari ooshututela masomi apale oosomisiwa ti maaswihaapa aari oosilana, na okusanyeya oja vamote na olompa vamote. ⁴³ Ooshi aarina woova nwulweene, maana Nnyizinku eetta ovira aretttaka vitthu zootikinisa na minjuza zawaatta khwa khaazi ya maaswihaapa apale. ⁴⁴ Atthu ooshi apale ankhupaliyeeyo Yinsa aarina osilana wookhomaala saaneene, wakhula etile yaari opattikhanaaye eetta omeelana. ⁴⁵ Akina aari wuuzanya-isa mashapa aya na vitthu zaya: onzurukhu aya n'ootiisa oteela owaamela azaaya, wakhula ntthu aari winkhiwa khwa khipi ya othowiwa wawe.

⁴⁶ Yo aazowereliye okusanyeya wakhula siikhu vaje wa Nyuupa ya Nnyizinku na mmawaya na omeyelana phaawu ajaka na furaha khuluyeene na rooho yeemaani, ⁴⁷ ansifwaka Nnyizinku. Atthu ooshi aari wiiya ootuveliwa phi menttezi aya. Apho Nnyizinku wakhula siikhu aari ovira o weekezelaka atthu ootakha wuusurukha.

3

Ovonosiwa wa Ntthu Woorakala

¹ Siikhu moote Pheeturu na Yaahaya eetta owelela nnyupa woosifwiwamo Nnyizinku wakathi woolompa wakathi mittatthu wa makaaripi. ² Aarettiye athuuliwe ntthu aavokoliweeyo ari woorakala eettaniwaka vanlako wa nyuupa yoosifwiwamo Nnyizinku, onitheliwaaye Nlako Wooshapweya, yoori asala awaavekela zimoola atthu apale aari oviramo. ³ Amooniyeevo Pheeturu na Yaahaya aviraka nnyupa mphule, khusala awaavekela zimola. ⁴ Pheeturu na Yaahaya khusala amweekesa saana khulupa yoori; “Oneekese fweeyo!” ⁵ Mwinyi otule khusala aweekesa woophalevo awejelaka op-wekherele etthu ya wenkhiwa pi yo.

⁶ Pheeturu khulupa yoori: “Akina feeta na tahapu, etthu kiriina ethiito kintta owinkha. Khwa nzina la Yinsa Al-Masiihu Nnazareeti, ettetta!” ⁷ Khunkhalela nkhono-nlume awe khusala anshashulela yoori alankhe, nasaapiru moolu na khoza zawe khwiya za wookowa. ⁸ Mwinyi otule khwiirukha khweemela khwaaza weettetta. Khuvira nnyupa woosifwiwamo Nnyizinku vamote na Pheeturu na Yaahaya, eettataka na wiirukha ansifwaraka Nnyizinku. ⁹ Wakathi atthu ooshi amooniyeevo eettaka weettetta na ansifwaka Nnyizinku, ¹⁰ khunjuwa yoori mwinyi othuutule aari okitirakaaye wiikhala vaNlako Wooshapweya wa nyuupa yoosifwiwamo Nnyizinku khusala alola zimola. Ooshi aya khwiya ootikinisiwa na oshanka channu wa vitthu zanrettikaneliyeeyo.

Otafusiri wa Pheeturu Nnyupa wa Nnyizinku

¹¹ Wakathi mwinyi otule aavoniseweeyo ti Pheeturu na Yaahaya aari owaaperekhaavo. Atthu ooshi khwiya ootikinisiwa, khusala atthirela attaaphale aarivo Pheeturu na Yaahaya, puuro yaari wiithiwaaye nlako wa Sleyimaana. ¹² Ooniyeovo vitthu epile, Pheeturu khuwaaza yoori: “Meezirayeele mwaasa aya niini mwisutisiwaka pi vitthu epo? Mwaasa aya niini mweeyo mwinekesaka fweeyo nkhamma etthu emweettettisiyeeyo mwinyi otu owahi wetthu ama tthakaraka yetthu? ¹³ Nnyizinku wa Eburahima wa Esiyaakha na wa Yaakhumpa, Nnyizinku wa mamarehemu etthu ansifu karumeya awe Yinsa, othuutule mweeyo mwaawenkhiyeeyo atthu yoori amuule na khunkatthala vamote na Ponsiyu Pilatu, ye afilakeleliye onfukula. ¹⁴ Mweeyo mwankhana vamwantiiwa Nttakatthiifu wa shariya, khuveka yoori afukuliwe namahusuti. ¹⁵ Mweeyo khumuula mwennyewe ohaayi, ila Nnyizinku khunsisimula muufwa na fweeyo namashahiti wa vitthu zaya epo. ¹⁶ Mwaasa wa waamini nzina la Yinsa, nzina nttiittho lanvonisa mwinyi otu mwinimaanaaye na mwininjuwaaye. Amini entaaye khwa nzina la Yinsa yamwinkha ekumi y'ekhwhee, nkhamma ethiipo mwinoonaaye mooshi.

¹⁷ Aphano attwizaku, miiyo kajuwa yoori mwaarettiye mwihijuwaka ata na anamalokozela enu. ¹⁸ Ti nanna yaya Nnyizinku eettettisiyeeyo etile aalupiyeyo awoozaka yoori Al-Masiihu awe aari oteela ohoowa. ¹⁹ P'aapho mwithapwiye mwirutele wa Nnyizinku yoori twampi zenu ziiye zooswammihika. ²⁰ Neekeselaka wakathi woovumula ontaaye wa Mbwana na Al-Masiihu aperekhiweeyo tokhiya asulani aniithiwaaye Yinsa. ²¹ T'iito Yinsa ona ya wiiya pinkuuni mpakha ofiya wakathi Nnyizinku anttelaaye arutisa vitthu zooshi ethiipile Nnyizinku aari olupaazo waaza raku vakatthi wa manapiyu. ²² Munsa khulupa yoori: ‘Mbwana Nnyizinku onlawa anlanse vakatthi wa attwiize napiyu mmote nkhamma miiyo; mwinsiileze zooshi

anttelaaaye owuuzani. ²³ Otule ahininsiilezaaye napiyu aya ota antta olazi-wavo vakatthi wa atthu awe.'

²⁴ Wookhweele manapiyu ooshi, waaza Samuweele na apale akinoko aya, alaleya vitthu zinrettikanaazo siikhu epi. ²⁵ Mweeyo mwaanamarithi wa manapiyu na olapha Nnyizinku alaphaniyeeyo mamarehemu aya, ye aamuuziye Eburahiima yoori: 'Mwaasa wa peewu yawo atthu ooshi a voolumwenku anttela wiiya aaparikhiiyiwa. ²⁶ Nnyizinku nansisimula karumeya awe, amperekha omwanzo eene vakatthi venu mweeyo yoori ooparikhiiyeni na oolikisakani zootakhala epile mwaari orettaazo wakhula ntthu."

4

Okholiwa wa Pheeturu na Yaahaya phi Atthunkulu a Mayaahuuti

¹ Wakathi Pheeturu na Yaahaya aari ottakhulaavo owoozaka atthu, khutavo mahaakhimu na attunkhulu a anamweekesela a nyuupa ya Nnyizinku na masatukhi. ² Yo aari ookafilikha venkivene mwaasa wa yoori maaswihaapa entta owaasomisa atthu, na owooza yoori owaapho osisimuwa wa ananfwa nkama etthiipile Yinsa asisimuweyiyeozo. ³ Aphano yo khunkhola Pheeturu na Yaahaya, khuwaattha nkalapooso yaari makaaripi khuwaalikha mpakha ocha. ⁴ Ila atthu asiiliyeeyo hapari epile aari olupaaye enkeene eyiye omwamini Yinsa. Khwa ethiipo mamauni khusala avira eekezeleyaka khufiya ethu ya alufu thaanu.

⁵ Siikhu yaphiiri khuthukumana afwalume, mashawuriya na anamwaatikha nti wa Yeruseemu. ⁶ Atthu aarivo pi apa: Anaasi, ntunkhulu wa mahaakhimu a tiini, Khayiifwa, Yaahaya, Alishantere na atthu ooshi apale aari oojama wa ntunkhulu wa mahaakhimu a tiini. ⁷ Yo khuruma okhuweliwa maaswihaapa apale awiri Pheeturu na Yaahaya. Khusala owoozela araka: "Mwirettaniyeeyo vitthu epi owahi-ni wala nzinani?"

⁸ Pheeturu aari wa wiitaazaniwa Rooho Ttakatthiifu, khusala alupa awoozaka: "Afwalume na mashawuriya, ⁹ yoori mweeyo mwanikhuwela leelo yoori mwinuuzele vitthu zooshaphe ninretteliyeozo ntthu otule woorakala na nanna ovonisiweezo. ¹⁰ Ila apho mwijuwe saana mweeyo mooshi mpakha na atthu a nti wa Ezirayeele yooshi yoori khwa nzina la Yinsa Al-Masihu wa Nazareeti, othuutule mweeyo ena mwankhomeliyeeyo na othuuto Nnyizinku ansisimuliyeeyo muufwa, nzina lawe tthi linvoniyeeyo namarakala otu mwinimoonaaye apha. ¹¹ Yinsa othuuto

'liwe lookatthaliwa ti mweeyo
anamajeka manyupa,
ila khurettiwa wiiya
ti liwe linkhomaazaaye nyupa.'

¹² Khaavo ntthu nkina ariina owahi wa owoosuru atthu: vathi apha wooshivo khahiivo nzina la ntthu nkina linuusurwaaye."

¹³ Attunkhulu apale ooshi khwiya onshankela Pheeturu na Yaahaya mwaasa wa ominala aarinaaye, yo khuaakikhi yoori khweele apa Yinsa ori vamote na-yo. ¹⁴ Mwaasa yoori aari oretta omoonaka ntthu otule woorakala aavonisiweeyo, yo khuhisala oona hatha paatuli khwa Yaahaya na Pheeturu. ¹⁵ Khuwooza yoori asaruliwemo nnyupa mphule aathukumaneliweemo. Aphano atthunkhulu apale khwaaza onyakulisana atthaaporu, ¹⁶ oozelanaka yoori: "Nkahayani niwaarettele niini? Atthu

ooshi Yeruzaleemu eti ajuwa yoori yo aretta minjuza zawooneya zi-hinikheeteyaazo. ¹⁷ Apho yoori vitthu epo zihitepe omwajeyela mmuti wooshimo, nlaweni na atthu ooshi asiila, nlaweni niwoopopisa niwoozaka yoori ahirutele owooja atthu vitthu monkoni wa nzina la Yinsa.”

¹⁸ Aphano khukhuweliwa Pheeturu na Yaahaya khurutela nnyupa nt-tumpule aasaruliyeemo, khuriwa yoori ahittakhule hatha etthu na ahisomise monkoni wa Yinsa. ¹⁹ Pheeturu na Yaahaya khuwaajipu araka: “Mwinoona yoori etthu ya eto ti yoohaakhi mmakhono wa Nnyizinku wushututelani mweeyo khunlikha Nnyizinku. ²⁰ Fweeyo khaninwahi olıkha olupa epile nooniyeezo na nisiiliyeezo.”

²¹ Khuwaatutushu khuwoojela khuwaalikha, maana khaari woona etthu woowaahukhumwela na atthu ooshi aari onsifwu Nnyizinku mwaasa wa minjuza epile zarettikhiiyeeyo. ²² Mwinyi otule aavonisiweeyo wa minjuzavo aarina hirimu yooziti nyaakha arupayiini.

Lompa ya anamalothela a Yinsa a mwanzo

²³ Wakathi Pheeturu na Yaahaya aleviweevo, n'oofiya vahali aarivo ashirikhaaya, khusala awaathatelela zooshi epile aari wuuziwaaye phi attunkhulu a mahaakhimu na anamalokozela a tiini. ²⁴ Paata ya ashirikhaaya apale osiila mattakhuzi apale, ooshi aya khusala alompa araka: “Mb-wana, ti weyo wumpiyeyo pinku na vathi, pahari na vitthu zooshi ziriye voolumwenku. ²⁵ Weeyo wattakhula khwa Rooho Ttakatthiifu vakatthi wa papeethu Daawuuda nrumeaya awo oraka:

‘Makaafiri ankatipkhaka-ni
wala atthu anaakanyerelaka-ni vitthu zoohiiyi ethiipo?

²⁶ Attunkhulu a vathi ajilokottela
na afwalume akhusanyeya yoori
anlupatthe Mbwana na alupatthe Al-Masihu
otule Ye anthawuliyeeyo.’

²⁷ Ekhweele-khweele, Herooti na Pontiyu Pilaatu akusanyeya na makaafiri na atthu akina a Ezirayeele, ooshi ari sitati ethiiti na niiya yonlupattha Yinsa nrumeaya awo othuutu onthawaziyeeyo. ²⁸ Na theenya amarisela maana aretta zooshi epile weeyo walakeliyeeyo oretta khwa owahi ori-naaye. ²⁹ Apho weeyo Mbwana, woone shawuri ariinazo zootakhala khwa fweeyo na onikhomaze yoori nilaleye nttakhuzi lawo woohoovi hatha etthu. ³⁰ Wookole nkhono awo waaze ovonisa na oretta minjuza na vitthu zooshankisa khwa nzina la nrumeaya awo Yinsa.”

³¹ Paata ya maaswihaapa apale wiisha olompa puuro etile aari akhusanyeyiyeovo, khusala esakhinyeya ooshi khuweelaala Rooho Ttakatthiifu, khusala alaleya nttakhuzi la Nnyizinku woohoovi hatha etthu.

Anakhiyonu vitthu zaya eeta omelana

³² Ooshi rooho zaya zaari moote, akhili zaya zaari sawa-sawa. Khaarivo hatha mmote aari yoonaaye etthu yawe wiiya yaawe. Apale aari opatthaaye ama apattha etta waawanya na azaaya zooshi aari wiiyanaazo.

³³ Maaswihaapa aari ovira alawelaka oshaahiti osisimuwa wa Bwana Yinsa na owahi nwulweene, na yaaweeshukheliye rehema khuluyeene.

³⁴ Vakatthi vaya khaarivo hatha ntthu mmote woorthowiwa, apale aarina mapuwa ama manyupa eetta wuuzanyisa, nzurukhu aya n'ootiisa,

³⁵ n'oowenkha maaswihaapa yoori awaawanyeze atthu ooshi wakhula ntthu khwa kхиima yoothowiwa wawe.

³⁶ Yuusufu, antthajiweeyo nzina la Baranabe, aari haakhimu, owawe waari Shiipere, nzina lawe lirina maana oori ‘maatumerela’, ³⁷ khuuzanyisa nshapa lawe, nzurukhu aya khutiisa khuwenkhe maaswihaapa.

5

Ananiyya na Safira

¹ Aarivo mwinyi mmote ari wiitthiwaaye Ananiyya, muukhaawe aari wiitthiwa Safiira, na-yo khuzanyisa nshapa laya. ² Ye khusilana na muukhaawe yoori nzurukhu opule ahilawane wooshi olawa Owenka maaswihaapa wooshi, khuthuula nkina khupweha opule nkina muukhaaya khulawana wa maaswihaapa.

³ Aphano, Pheeturu khumuuzela Ananiyya yoori: “Weyo, wanlikhelela toovi sheetwani oozokaka nrooho mwawo mpakha weeyo ofiyelela ohata Rooho Ttakathiifu na khujivithela nzurukhu wuuzanyisiyeeyo nshapa lawo? ⁴ Niri talili khalaari nshapa lawo? Wala paata ya wuuzanyisa nzurukhu aya khawarina weeyo enu omwennyewe? Khi eti ewuupuwelisiye oretta vitthu nkhama epo niini? Weeyo apho ohooni yoori wawaahata anaatamu, ila wanhata Nnyizinku.”

⁵ Paata ya Pheeturu wiisha olupa mattakhuzi apale, Ananiyya eetta ofwa attaphale. Attu ooshi apale aari omoonaaye na aari osilaaye mattakhuzi aya apale khwiya awoova. ⁶ Khuta attu khunkafwani khusala alawa onzikha.

⁷ Eviriyeovo woora mittatthu muukhaawe khuteela weekesa ojuwa ethhu emuuliyeeyo mannawe. ⁸ Pheeturu khumuuzela yoori: “Nkahaya nkakuze nzurukhu muuzanyisiyeeyo nshapa lenu pi otthuupo?”

Muukha otule khujipu yoori: “Pi otthuupo.”

⁹ Pheeturu khumuza yoori: “Epo za niini mweeyo osiilana yoori mootoote Rooho ya Mbwana? Attu apo oniwoonaaye vamilako apho pi atthaapo anzikhiiyeeyo mannawo, alawa oozikhe na-weyo.”

¹⁰ Kharipuzeena attaphale, na-ye etta ofwa. Khuthuuliwa khulawa khuzikhwa mpawa wa mannawe. ¹¹ Attu ooshi a khuntti etile yaari onlottaaye Nnyizinku khwiya awoova na apale ooshi aasiiliyeeyo vitthu epo zaarettikhaniyeeko.

Maaswihaapa aniwaavonisa alwele enkeene

¹² Minjuza za waatta zaari orettikhanaazo vakatthi wa attu zaari orettiwaazo pi maaswihaapa. Attu ooshi apale onkhupaliyeeyo Yinsa aari okusanyeya nlipantta laajekiyeyo ti Seleyimaana. ¹³ Attu akina etta woova okusanyeyana yo, ila attu enkeene aari owaattottopela maaswihaapa apale. ¹⁴ Attu omwamini Yinsa khusala atepa weekezelya waaya alume mpakha aakha, ¹⁵ khufiyelela attu akina awaathulu alwele n'oowaapweha ntarikhi awaatthiiye vanrepa ama voolili yoori nenkawu Pheeturu amana avirikha, yo owaapatthe mwiifuli awe. ¹⁶ Aari ota attu enkeene theenyi oolankha miti mikina za waattamelia Yeruzaleemu awaatisika alwele aya na apale aari ohoochiwaaye pi majini: ooshi khusala eeya oovonisiwa.

Olupattiwa wa Maaswihaapa

¹⁷ Aphano, ntunkhulu a mahaakhimu na ashirikhaaya ooshi mpakha na attu ooshi a khuntti ya masatukhi khuwaata nrima. ¹⁸ Khuruma yoori okholiwa maaswihaapa khuwaafukela nkalapooso. ¹⁹ Aphano osikhu wa siikhu ethiitile, nlayikha la Nnyizinku khufukula milako za kalapooso

khuwaasarulela vaje,²⁰ khuwooza yoori: "Mwilawe nnyupa wa Nnyizinku, mwilawe mwawaasomise atthu monkoni wa ohaayi opu mpheya."

²¹ Maaswihaapa khushututela mattakhuzi apale ooziweeyo ti nlayikha ntthile, n'oocha khulawa mpakha vaje wa nyuupa ya Nnyizinku, khwaaza owaasomisa atthu. Aphano ntthunkhulu a mahaakhimu a tiini na ashirikhaaya khuwaakusanya atthu na anamalokozela a tiini ooshi a Ezirayeele, khuruma olawa olaziwamo maaswihaapa apale nkalapooso. ²² Anamweekesela apale a kalapooso, n'oofiya nkalapooso khuhiiwasikanimo, khuruti n'oota khusala alupa yoori: ²³ "Khaniwaasikaneenimo na nasikana kalapooso ya eri etthiipile naafukiyezo na vaje aarivo anamweekesela akina, ila vakatthi nifukuliyeeyo milako khuhiiimo hatha ntthu." ²⁴ Paata ya atthunkhulu apale, anamweekesela a nyuupa ya Nnyizinku na atthunkhula a mahaakhimu osiila mattakhuzi apale, yo khwiya ooshanka mwaasa woohijuwi nanna eettettiyezo maaswihaapa apale.

²⁵ Wakathi otthuupule khutavo ntthu aari olupaaye owoozaka yoori: "Atthu apale mweeyo mwawaatthiyeeyo nkalapooso, miiyo kawaasikana vaje wa nyuupa wa Nnyizinku eettaka owaasomisa atthu." ²⁶ Khulankha anamweekesela na ntthunkhulu aya khuweettela khusala awaatiisa, woohi-waalazili hatha kuvu, maana aari woova ovonyiwa pi atthu apale aari owaasomisaaye.

²⁷ Khuwalawana nnyupa aari othukumanaamo atthunkhulu yoori oozeliwe ti ntthunkhulu wa mahaakhimu. ²⁸ Khuwooza yoori: "Fweeyo khanaawuuziyeni yoori mwihiirutete owaasomisa atthu mattakhuzi monkoni wa nzina nttho. Ila mweeyo khusala mwivira mwisomisaka Yeruzaleemu yooshi na olikha toowo mwintakha onilokoveza fweeyo ofwa wa ntthu aya oto."

²⁹ Pheeturu na ashirikhaawe khujipu araka: "Ti yooshapweya yamwanzo onshututela Nnyizinku zayita anaatamu! ³⁰ Nnyizinku wa apapa zetthu ansisimula Yinsa nkhopuri, othuuto mweeyo mwankhomeliyeeyo vansalapa khumuula. ³¹ Ila Nnyizinku antta phantte ya nkhono-nlume awe khumwinkha ofwalume na khunretta wiiya namusuru yoori atthu a Ezirayeele apatthe othupwiya na opokherele nswammaha wa twampi zaya. ³² Fweeyo n'aamashahiti a vitthu zaya epo, vamote na Rooho Ttakatthiifu, etile Nnyizinku Owenkhiyeeyo apale aninshututelaaye."

³³ Paata ya maaswihaapa olupa matthakhuzi apale, yo khwiya okafilikha khusala atakha owoola. ³⁴ Aarivo mfwarizeewu mmote aari wiitthiwaaye Kamaliyeele, aari namanozela wa kano na aari ntthu wooshitahiwa pi atthu a waatta. Ye khulankha khweemela vakatthi wa afwalume apale, khulupa yoori maaswihaapa asuruleliwe vaje khapula vattithiiru. ³⁵ Khuwooza attunkhulu azaawe apa yoori: "Mweeyo atthu a nti ya Ezirayeele, mwi-iyane ophoole na vitthu mwintakhaazo owaarettela apo. ³⁶ Khwa siikhu ziviriyezo nyumanu aapuweleliye ntthu aari wiitthiwaaye Thewuda aari ojilupezaaye wiiya mfwalume, aarina atthu aari onlottaaye ooffiya miiya nne. Aphano ye khuuliwa, atthu awe apale aari onlottaaye khuhiiheli hatha vahali ooshi khumwazeya. ³⁷ N'oofwa ye aapuweleliye nkina wa Kalileya aari wiitthiwaaya Yuuda, wakathi atthu aari waatikhiaayo yoori alawe anthawule mfwalume, oto atthu enkeene aakhupaleliye onlotta, ila na-ye khuuliwa anamalottela awe ooshi khumwazeya. ³⁸ Apho, kiniuuuzani yoori atthu apa awiri mwiwaarettele hatha ethu, mwiwaalikhe alawe maana nkhamma shawuri za ntthu na khaazi ya ntthu khinrupaza ehiisheeni. ³⁹ Ila

nkhama ti ya Nnyizinku, mweeyo khaninteela wiishisa, amana mwitakha oretta toowo mwinshittanana Nnyizinku.”

⁴⁰ Attunkhulu apale khukhupalela mattakhuzi apale alupiyeyo Kamaliy-ele, khuruma okhuweliwa maaswihaapa apale yoori avire nnyupa, khu-japhiwa khuuri yoori ahirutela olaleya hapari za Yinsa, nawiisha khu-likhiwa.

⁴¹ Maaswihaapa apale khusaruwa ari woofurahi mwaasa woohukhumweliwa olaleya nzina la Yinsa. ⁴² Yo khuhilikhi khusala avira alaleya wakhula siikhu nnyupa wa Nnyizinku na nyuupa khwa nyuupa, woohilikhi olupa Yinsa ti Al-Masiihu.

6

Othawuliwa wa attu sapa

¹ Siikhu ethhiipile eettaka ovira aattaka atthu aari anlattaaye Yinsa, mayaahuuti aari ettakhulaaye ekereeku atthaaporu aari owaattakhula mayaahuuti apale aari attakhulaaye eheberayiku, mwaasa yoori manankhwele aya eetta osahawiwaka amana yaawanyiwaka etthu-yooja ya wakhula siikhu. ² Tiito maaswihaapa apale khumi na awiri aawaakhussanyiyeyo anakhiyon ooshi, khusala awooza yoori: “Ajama zetthu, khaninwahi alikha alaleya ntakhuzi la Nnyizinku khusala nawanya etthu-yoojiwa. ³ Attwiizetthu, mwiwaathawule vakatthi venu atthu sapa ooshitahiwa, awitaala Rooho Ttakatthiifu na oofuwa yoori niwenkhe khaazi eto, ⁴ na-fweyo nisala nilompa na olaleya ntakhuzi la Nnyizinku.

⁵ Mattakhuzi apale khuwaatuvela ooshi aya, khunthawula Shiteefanu, nlume wa wiitaala amini na Rooho Ttakatthiifu, anlikha Filipi, Porokoro, Nikanore, Timomu, Parimenashi na Nikolawu, otule aari owaalatteelaaye mayaahuuti wa nti wa Antiyookiya. ⁶ Khuwaathoonyeza atthu apale vakatthi wa maaswihaapa, atthaapo khuwaalampela awaattheliye a makhono.

⁷ Etthiipile ntakhuzi la Nnyizinku khusala limwazeya. Khusala avira awulaka anakhiyooni wa waakhuvavo Yeruzaleemu. Theenya khuntti khu-luyene ya mahaakhimu a tiini khusala ashutulele amini.

Kalapooso ya Shiteefanu

⁸ Stefanu nthu wa wiitaala mahala na owahi wa Nnyizinku aari oretta vitthu zootikinisa na alama vakatthi wa atthu. ⁹ Attaaphale khupuwa atthu a nnyupa enthukumaniwaamo apale ‘Ooleviwa’, mayaahuuti a Sireene na Alishanteriya na apale a nti ya Silisiya na Aasiya. Atthu aya apo khwaaza onyakulisanana Shiteefanu, ¹⁰ ila khuhisala awahi oshintta opuwa na Rooho etile aari ottakhulanaaye.

¹¹ Aphano khupankiwa atthu akinoko alupe yoori: “Nansiila Shiteefanu attakhulaka mattakhuzi onkufurwela napiyu Munsa na Nnyizinku.”

¹² Mwaasa wa mattakhuzi atthaapo, khuwaatapanya atthu, anamalokozela a tiini na anamanozela kano khunkhola Shiteefanu khunthuula khulawana onyuupa woophuteyiwawo milattu. ¹³ N’oofiya khusala anlokoveza mattakhuzi oovanyeya aari oraaye: “Mwinyi otu okhitiri ottakhulawo pure opuuro okhuno woottakatthifubo na nkathi wa kano. ¹⁴ Nasiila eriwaka Yinsa Nnazareeti apwechela puuro eti na khuzukuliza thwapiya aalikhieezo napiyu Munsa.”

¹⁵ Wakathi amweekesiyeovo, ooshi apale eekhaliye onyuupa woophukani-wawo khoona omaasho wawe ompuwaka nkhama nlayikha.

Ojakisa wa Shiteefanu

¹ Aphano, nttunkhulu wa mahaakhimu a tiini khumuuzela Shitefaanu yoori: "Shariya mattakhuzi apa onlokoveziwaaye?"

² Shiteefanu khujipu araka: "Atwiizaku na apapazaku mwisiileze! Nnyizinku wa Nuuru ampuweleliye Eburahiima, papeethu, wakathi ari nti wa Mesopotamiya ahinalawe wiikhala Harani, ³ khumuuzza yoori: "Oleemo mmuti mwawo vakatthi wa ajamaazo, olawe nti kinttelaaye wuuthoonyeza." ⁴ Eburahiima khulankha nti wa Akaliteeni, khulawa khwiihala Harani. Paata yoofwa papaaawe, Nnyizinku khuntiisa nti opu mwiniikhalaaye. ⁵ Nnyizinku khawinkheene hatha eritho moote, wala puuro ya luwattho yawe, ila amwaahitiye yoori: 'Paata ya weeyo, peewu yawe enlawa yapatthe olumwenku.' Hatha nkhamma wakathi aya opule eettiye hiina pure mwaana. ⁶ Nnyizinku anttakhulaniye khwa nanna ethiipo yoori: 'Peewu yawe enttela osafirela nti wa malaponi, anlawa arettiwe oviitthwaana na ohukhumwiwa nyaakha miiya nne. ⁷ Miiyo kinhukhumu nti ontalaaye owaareetta oviitthwaana, attaapho aleewo okhulewa ate akaaputu puuro etthiiti.' ⁸ Nnyizinku khumwinkha Eburahiima osilana wa okiriya. T'iito, Eburahiima khunvokola Esiyaakha khunkhiriyyisa siikhu yanaane yoovokoliwa wawe. Elottelanaka Esiyaakha khunvokola Yaakhumpa, khwa apaapa atthaapa khupuwa khumi na awiri.

⁹ Apapa zethu aya atthaapo khusala anlazela nrima Yuusufu. Khumuuzanisa a mwiitthwaana khulawaniwa Misuri, ila Nnyizinku aari vamote na ye. ¹⁰ Khunkholelela muhoowa wawe wooshimo na khumwinkha akhili khumpatthisa oshapweyiwa mmakhono wa lipili Firawuuna, mfwalume wa Misuri. Mfwalume otu aamwinkhiye Yuusufu onsatoro wa Misuri na khumwinkha ottunkhulu wa atthu ooshi a vaje vawe.

¹¹ Paata ya toole, khupuwa jala Misuri yooshi na Kanaani na ohoowa mwinkeene, amarehemu ethu khuhisala awahi opattha etthu-yoojiwa. ¹² Yaakhumpa n'oosiila yoori eewaakho tiriku Misuri, khuwaaperekha amarehemu etthu swaafu yamwanzo. ¹³ Swaafu yaphiiri yoorutelawo amarehemu etthu, Yuusufu khujijuwisa vakatthi wa attwiize, Firawuuna khuwahi owaajuwa ajaama a Yuusufu. ¹⁴ N'oojijuwisa Yuusufu khuwaaruma atthu omweetala papaaaze na ajamaaze ooshi, aari sapiini na athaanu atthu eene. ¹⁵ Aphano Yaakhumpa khusala alawa Misuri, ottuukho afwiyeewo ye na amarehemu etthu akina. ¹⁶ Mwiili aya khuthuuliwa khrutiseliwa Shekemu khuzikhwa nlikulukupo ntthile oozanyiyeyo Eburahiima na aana Hamori wa nzurukhu khata. ¹⁷ Ofiyaka wakathi Nnyizinku aari weettelaaye oretta etile aamwaahitiyeeyo Eburahiima, khuweekezela atthu etthu khwiiya a waatta nti wa Misuri. ¹⁸ Khwinkhiwa ofwalume ntthu nkina, ahaari ojuwaawe hatha etthu monkoni wa Yuusufu, khwiiya mfwalume wa Misuri. ¹⁹ Mfwalume otule khusukuliwela ajama etthu na khuwaahukhumu amarehemu etthu, awaakhanyerelaka owaalikha aana aya yoori ahiwahi owula.

²⁰ Wakathi otthuupule khuvokoliwa Munsa, oto aari mwaana wooshapweya oomaasho wa Nnyizinku. Khwa nyeezi mittatthu eettaka oleliwa vaje wa apapaze. ²¹ N'oolikha oleliwa pi apapaze, mwaana wa Firawuuna khunthuula khusala anlela nkhamma mwanawе wonvokola. ²² Munsa khuleliwa na ojuwa wooshi wa Amisuri, khwiiya ntthu woowahi khwa a mattakhuzi awe na khaazi zawe. ²³ Apatthiyeevo hirimu ya nyaakha arupayiini, Munsa khulekela olawa owaathotola attwiize Meezirayeele.

²⁴ Amooniyeevo Mmisuri anhukhumwaka Mwiizirayeele, khumpattha kat-apu mwaasa woohukhumwiwa, khumuula Mmisuri otule. ²⁵ Ye aari woona yoori attwiize enlawa yaweeleye yoori Nnyizinku ontta onrumeyela yoori awoosuru, ila yo khayaari oweenleya hatha etthu. ²⁶ Siikhu yaphiiri, Munsa khulawa vahali aari oshezaavo Meezirayeele awiri, khusala awooza yoori: ‘Alume, mweeyo mwa ntthu na ttwiye; khi mwaasa aya niini mwilwaazanaka?’

²⁷ Ila nlume otule aari onlwaaazaaye nzaawe, khunsukhuma Munsa khu-muuza yoori: ‘Paani oothawuliyeeyo yoori wiiye namalokozela etthu na namphuka milattu zetthu fweeyo? ²⁸ Ontakha okuula nkama omuuliyeozo Mmisuri taana?’ ²⁹ N’oosiila mattakhuzi apale, Munsa khutthirela nti wa Midiyana, khusala eekhala ottuukho nkama nletto, khuwaapattha aana awe awiri.

³⁰ Avirisiyeevo nyaakha arupayiini ottuukhule, khumpuwelela nlayikha vamweeke wa moottho wa haari ozimaaye n’yaara, kharipu ya mwaako Sinaayi. ³¹ Munsa vakatthi wa moottho opule khwiyya wootikinisiwa. Khususela attaaphale yoori oonachache, khusila huula ya Mbwana Nnyizinku: ³² ‘Miiyo ki Nnyizinku wa amarehemu apapazenu, Nnyizinku wa Eburahiima, Nnyizinku wa Esiyaakha, Nnyizinku wa Yaakhumpa.’ Munsa eettaka othukumela mwaasa wa woova, khuhisala awahi ofunula maasho awe. ³³ Aphano Mbwana Nnyizinku khumuza yoori: ‘Ovule jumpali epo ziri mmoolu mwawo, mwaasa wa puuro li weeyo oriyo nti ttakatthiifu. ³⁴ W’eekhweele keetta owoona atthu aka ahukhumwiwaka nti wa Misuri. Kasiila olila waya khwiishuka yoori kiwoosuru aphi. Ote nasaapi, miiyo kurutisele nti wa Misuri. ³⁵ Otu ti napiyu Munsa, othuuto mwankatthaliyeeyo na mattakhizi apa yoori: ‘Ti paani oothawuliyeeyo yoori wiiye namalokozela etthu na namaphuka etthu?’ Ye aaperekhiwe ti Mwennyewe Nnyizinku yoori eeye namalokozela na namwawuni aya vakatthi wa nlayikha lampuweleliyeeyo vamweeke wa moottho wa haari ozimaaye. ³⁶ Munsa othuuto awaalaziyeewo amarehemu etthu Meezirayeele nti wa Misuri, arettaka vitthu zootikinisa na minjuza za waatta nti wa Misuri, pahari yookhuttuwa na nyaara aavirisiyeeemo nyaakha arupayiini.

³⁷ Otu ti Munsa othuuto awooziyeeyo Meezirayeele yoori: ‘Nnyizinku on-lawa ampuwise vakatthi wa attwiizenu napiya mmote nkama miiyo.’ ³⁸ Ye aari woothukumana, n’yaara na nlayikha laari ontakhalanaaye vamwaako Sinaayi na amarehemu etthu, khupwekherela mattakhuzi haayi yoori anu-uze na fweyo.

³⁹ Ila amarehemu etthu khukatthala oshututela, na theenya khunkhijilela na nroho mwaya khurutela Misuri. ⁴⁰ Khumuza Arawu yoori: ‘Onaat-talele nluku yoori anilokoze maana Munsa aya otule anilaziyeeyo Misuri khanijuweeni etthu empatthiyeeyo.’ ⁴¹ Wakathi otthuupule khwaattala sanamu yoolattanana mompe. Khutiisela twaha na khuretta njampo khwa osifu etile aarettiyeeyo na makhono aya. ⁴² Ila Nnyizinku khuwaasusu na khuwenkha waaputu matthottowa nkama ethiipo yaatikhieeyo a kithaapu ya manapiyu yoori:

‘Kaari miiyo
otule mweeyo mwanliseliyeeyo
twaha na zaakha
nyaakhu epile arupayiini mweekhaliyeozo n’yaara,
mweeyo omathi wa Ezirayeele?
⁴³ Olikha toowo, mwajeka

puuro ttakatthiifu ya Moloke
 na mathottowa a nluku enu Reefwa
 sanamu mweeyo mwaattaliyeeyo yoori
 mwisale mwaaputu wa attaapho,
 miiyo kintta wuuperekhani
 ohali okinoko olikha Babiloniya.'

⁴⁴ N'yaara amarehemu etthu aarina huma yoosilana, nttumpho Nnyizinku aari ottakhulananaamo Munsa heema yaya eto yaattaliwe nkhamma etthiipo Nluku anrumiyeezo Musa yoori aattale, alikanisanaka etile anthoonyeziweeyo. ⁴⁵ N'oopwekherela heema etile yoosilana, amarehemu etthu khuthuula khumwinkha olkozela Yoshuwa, wakathi athuuliyeovo nti wa omathi opule Nnyizinku eekariyeeyo. Heema yaya eto khwiiya nti otthuupo mpakha wakathi wa Daawuuda. ⁴⁶ Otu khupwekherala mahala mmakhono wa Nnyizinku, khuveka yoori anjekeliye nyuupa Nnyizinku wa Yaakhumpa. ⁴⁷ Ila ti Seleyimaana anjekeliye nyuupa yaya.

⁴⁸ T'iito Nnyizinku khaniikhala nnyuupa yoojekiwa ti pinaatamu, nkhamma etthiipo alupiyeezo napiyu yoori:

⁴⁹ 'Pingu khukulu yaka,
 vathi tarikhi ya moolu aka.
 Nanna-ni ya nyuupa
 mweeyo mwinttelaaye okijekela?
 alupaka Mbwana,
 ama, onteela wiiya vayi
 puuro yaka yoovumula?
⁵⁰ Khihiye miiyo kaattaliyeeyo
 vitthu zaya epo zooshi?'

⁵¹ Atthu ookifilina ootakhala rooho zaya epo zooshi! Mweeyo mwinlikanana na amarehemu enu aari okatthalaaye Rooho Ttakatthiifu!
⁵² Napiyu-ni amarehemu enu ahinlupattheeni? Yo amuula otule aari ohaayi wa anashariya, othuuto mwinrettiyeeyo onamalupattha na ohusuti.
⁵³ Mweeyo mwipwekhereliyeeyo kano khwa khaazi za malayikha wala khuhi shutuleli."

Ofwa wa Shiteefanu

⁵⁴ Asiliyeevo mattakhuzi apale khuwaapattha katapu nroho mwaya, khusala anlumele meeno. ⁵⁵ Ila Shiteefanu wawiitaala wene Rooho Ttakatthiifu khweekesa otulu khoona siifwa za Nnyizinku na Yinsa ari nkholo-nlume wa Nnyizinku. ⁵⁶ Khulupa yoori: "Kinoona pingu eri yoo-fukuwa na Mwaana wa Pinaatamu eemeliye nkholo-nlume wa Nnyizinku."

⁵⁷ Ye khwaaza okhuwa woonyakulavo, yo khuttiyela mashiilo aya na khunrikanya. ⁵⁸ Khunsusisela othetekeliwa sitati khusala anoonya na mawe, oshahiti aya khunlikhavo shapu aari wiitthiwaaye Saawulu yoori asalane kuwo zawe epile aawaliyeeyo. ⁵⁹ Eettaka onvonya etthiipile, Shiteefanu khusala alompa araka: "Mbwanaaka Yinsa, pwekherela nafusi yaka." ⁶⁰ Attaaphale khukokhora khusala akuwa channu araka: "Mb-wanaaka, ohiwaalokoveze twampi eti!" Nawiisha olupa mattakhuzi apale, khufwa.

8

¹ Saawulu na-ye aari khuntti ya atthu atthaapale akhupaleliyeyo wuuliwa Shiteefanu.

Saawulu oniwaalupattha anamalottela a Yinsa

Siihu zaya epile yaapuwiye lupattha khuluweene ya anamalottela a Yinsa Yeruzaleemu. Ila maaswihaapa khayaawaasikaniye maana yo aarettiye amwazeyiye ari Yudeya mpakha Samariya. ² Atthu akina ooshapweya rooho khunthuula Shiteefanu otule khulawa khunzikha eettaka onlilela. ³ Aphano Saawulu aari ojilipisa yoori eeshise khunthti ya atthu apale aari onlottaaye Yinsa. Ye aari ovira nyuupa khwa nyuupa khusala awaakho alume na aakha apale aari onlottaaye Yinsa n'oowaattha nkalapooso.

Otafusiri wa Filiipe nti wa Samariya

⁴ Atthu apale omwaziyeeyeyo aari ovira alaleyaka hapari wakhula vahali aari ofiyaavo. ⁵ Filiipe eettiye sitati ya Samariya, n'oofiya khusala owooza atthu monkoni wa Yinsa. ⁶ Wakathi atthu asiiliyeevo saneene hapari epile aari olupaazo Filiipe na knoona minjuza aari arettaza, yo aashineheliye mattakhuzi apale ye aari olupaaye. ⁷ Atthu akina aariina majini aari owaasaruwa eettaka onyakhula, alupa oorakala enkeene opiya ti sapiyeene na apale oorakala. ⁸ Sitati yaya etile waapuwiye furaha khuluyeene.

Simawu Namajintta

⁹ Aarivo mwinyi mmote aari wiithiwaaye Simawu, aari wiikhalaaye sitati ethiitile, aari nshawi, atthu ooshi asamariya aari onshankela vitthu za majintta aari arettaza. Ye aari ojoona wiiya munumunu, ¹⁰ atthu ooshi, waaza ntunkhulu mpakha nsimaana na ontottopela araka: “Otu onaaye aariinaaye walankha pinkuuni, onjuwiwaaye yoori owahi nwulweene.” ¹¹ Aphano, yo khusala alipana othuuuto mwaasa yoori aaziye raku arettaviththu za majintta za owaatikinisa. ¹² Ila paata ya Filiipe owaatafusirela monkoni wa hapari zooshapweya ya ofwalume wa Nnyizinku khwa nzina la Yinsa Al-Masihu, yo khukhupali na khulawa khoosiwa, alume enkeene mpakha aakha. ¹³ Simawu othuuto aari arettaya majintta, na-ye khunkhupali Yinsa khoosiwa, khusala onlottelela Filiipe wakhula phantte aari weettaaye, oonaka vitthu zootikinisa na minjuza miwuluzene zaari arettikhanaazo.

¹⁴ Wakathi maaswihaapa asiiliyeevo ari Yeruzaleemu, oriwa atthu a Samariya opokherela ntakkhuza la Nnyizinku, khumperekhawo Pheeturu na Yaahaya. ¹⁵ Yo n'oofiya khwaalompela atthu aya apale yoori apokherela Rooho Ttakatthiifu. ¹⁶ Maana khaarivo hatha mmote wa yo ompokhereleyeyo Rooho Ttakatthiifu, ila eettiye woosiwa paasi khwa nzina la Bwana Yinsa. ¹⁷ Pheeturu na Yaahaya khuwaattela makhono atthu apale khupokherela Rooho Ttakatthiifu. ¹⁸ Simawu nawoona yoori ntthu aari opokherela Rooho Ttakatthiifu paata ya ottheeliwa makhono ti maaswihaapa, ye khulaza nzurukhu, ¹⁹ khuwoza maaswihaapa yoori: “Kintakha na-miyo mwinkhe owahi nkama otthuupo mwiriina, kisala kiwaattheela makhono atthu n'oopokherela Rooho Ttakatthiifu.”

²⁰ Pheeturu khunjipu yoori: “Nzurukhu awo otthuupo ontta wuuthowelelisa! Weeyo onoona yoori tthuovo ya Nnyizinku enuuzanyiwa na nzurukhu? ²¹ Weeyo nkatthi wa khaazi yetthu eti Nnyizinku khaniwinkha hatha phantte maana rooho yawo khahi rooho saana. ²² Othupwiye vitthu zootakhala na olompe khwa nzina la Nnyizinku. Talili othuuto oswammihii

khwa ofikhiri opo woovonyeya wa nroho mwawo,²³ kinoona yoori nroho mwawo ziwaamo pure vitthu zoovonyeya na washawashawiwa ti twampi.”

²⁴ Simawu khujipu yoori: “Mwikilopele, yoori zooshi epo mwilupiyeezo khwa miiyo zihikirettikhanele.”

²⁵ Paata ya Pheeturu na Yaahaya olawela oshahipi na otafusiri ntakhuzi la Nnyizinku khulankha khusala arutela Yeruzaleemu, olawaka aari ovira atafusiraka miti mikina za Samariya ethiitile.

Filiipe na Mwiitiyoopiya

²⁶ Nlayikha la Mbwana khumuza Filiipe yoori: “Weette ntarikhi elikhiya raku oviriwa eriye phantte ya kusini elankhiyeyo Yeruzaleemu enishukhelaaye sitati ya Kaaza.” ²⁷ Filiipe nawuuziwa khulankha khusala alawa. Ntarikhi khunsikana mwinyi mmote wa Etiyoopiya woohimemi, alankhaka Yeruzaleemu eettaka owawe. Oto aya aari nakhazi nwulu enkhiweeyo othokorela mizurukhu za Rayisi nwulu wa Etiyoopiya aari wiithiwaaya Khantase. Eettiye Yeruzaleemu omwaapetu Nnyizinku. ²⁸ Arutaka, apakhiriye varikisho khusala asoma kithaapu ya napiyu Ezaaya. ²⁹ Aphano, Rooho Ttakatthiifu khumuza Filiipe yoori: “Otthirele rikisho etile osala olottelela.”

³⁰ Filiipe khutthirela rikisho etile khusikana khusala ansiila mwiitiyoopiya otule asomaka kithaapu ya napiyu Ezaaya, ye khumuuzela yoori: “Mattakhuzi apo mwinsomaaye aniweleyani?” ³¹ Ye khujipu araka: “Anikeeleza toovi kihina ntthu wookeeleza?” Khumuza Filiipe yoori owele varikisho attaphale aarivo ye. ³² Mattakhuzi aari osomaaye mwiitiyoopiya otu a nkithaapu mpule ari olupa toono:

“Ye aathuuliwe nkhamma pwittipwitthi eneettelaaye wuuliwa,
nkha pwittipwitthi yoohittakhuli

 eri vakatthi wa apale ankasaaye ovuziwa pwittipwitthi,
Ye khaattakhuliye hatha etthu.

³³ Ye aari woojipushuwisa ila khukattaliwa
 khuretteliwa vitthu zoohiyi ya shariya.

Khi paani ariina ruhusa ya owaattakhula
 apale aninlottaaye?

Ye ohaayi awe khahiyo wa vathi apha.”

³⁴ Aphano, mwiitiyoopiya khumuuzela Filiipe yoori: “Mattakhuzi apa a nkithaapu eti ya Ezaaya aninlupa paani? Ye mwennyewe ama ntthu nkina?” ³⁵ Paata ya toole, Filiipe khwaaza omuuza hapari zooshapweya mwiitiyoopiya otule, khwa mattakhuzi atthaapale ari osomaaye a nkithaapu ya Ezaaya.

³⁶ Ari ntarikhi enttaka olawa ooshi, khufiya vahali aarivo maati. Mwiitiyoopiya otu khumuza Filiipe yoori: “Apha awaapho maati. Niini ekhattazaaye woosiwa miiyo?” ³⁷ Filiipe khunjipu yoori: “Khayiivo hatha etthu moote enkhattazaaye paata ya weeyo okhupali na rooho yawo yooshi.” Ye khujipu yoori: “Miiyo kinkhupali yoori Yinsa Mwaana wa Nnyizinku.” ³⁸ Aphano, khweemesa rikisho etile, khwiishukha owiri, Filiipe khulawa khumoosa mwiitiyoopiya otule. ³⁹ Wakathi ovuwiyeemo mmati, Rooho Ttakatthiifu khunthuula Filiipe, mwiitiyoopiya otule khuhimooni theenya, na-ye khurutela safari yawe etile aari weettaaye ari woofurahi saaneene. ⁴⁰ Filiipe khulawaniwa sitati ya Azotu, khulikhiwa ottuukho ti Rooho Ttakatthiifu,

khusala avira alawaka mpakha Sezareeya alaleyaka hapari zooshapweya wakhula vahali aari ofiyaavo.

9

Okhupali wa Saawulu

¹ Zinrettikhanaru vitthu zaya epo, Saawulu aarettiye ahilikhelelaka owaatuturucha na owaala maaswihaapa a Mbwana. Khulankha khu-lawa wa ntunkhulu a mahaakhimu a tiini, ² khumvekela warakha yoori alawe mmamanyupa anthukumaniwaamo sitati ya Damashiku yoori amana awaasikanamo anamalottela a Yinsa, waaza alumé mpakha aakha awaathu-ule awaalawane Yeruzaleemu awaatthe nkalapooso. ³ Khulankha khusala alotta tarikhi, asaleelaka ofiya Damashiku, khumpuwela nuuru yaalankha pinkuuni khusala yaara aphale aarivo, ⁴ Aphano ye khukwela vathi, khusiila huula yaari omuzaaye yoori: “Saawulu, Saawulu mwaasa aya niini onikilupatthelaaye?”

⁵ Saawulu khuuzela yoori: “O paani weeyo, Mbwana?”

Ye khujipu araka: “Miiyo ki Yinsa, otule weeyo oninlupatthaaye. ⁶ Olankhe olawe nsitati ena anttelaaaye owuza weeyo etthu yooretta.”

⁷ Atthu aari olawanaaye vamote Saawulu khweemela ari oosuthuwa, khusiila huula khuhisala amoona hatha ntthu. ⁸ Saawulu khulankha vathi aphale akweliyeevo, afumulaka maasho khuhisala awahi woona hatha etthu, atthu khunkholela khunlawana mpakha Damashiku. ⁹ Khwiikhala siikhu ttatthu ari woohooni, woohiji etthu na woohinywi etthu.

¹⁰ Damashiku aarivo namalottela aari wiithiwaaye Ananiyya. Mbwana khunkhwela muulottha yoori: “Ananiyya!”

Khujipu yoori: “Lape, Mbwana.”

¹¹ Mbwana khumuza yoori: “Olawe owawe Yuuda, tarikhi enithiwaaye Yookowa, omuzelele ntthu mmote wa Tarusu aniithiwaaye Saawulu. Otu aya entta olompa; ¹² muulottha khumoona mwinyi aari wiithiwaaye Ananiyya atiye anttheeliye makhono yoori arutele woona.”

¹³ Ananiyya khujipu yoori: “Mbwanaaka, kaaza raku osiila vitthu anret-tazo mwinyi oto na vitthu zooshi zootakhala aniwaarettelaazo mattakatthi-ifu awo Yeruzaleemu. ¹⁴ Ye ata okhuno khwa ruhusa ya attunkhulu a tiini yoori ate awaakhole ooshi apale ansifwaaye nzina lawo.”

¹⁵ Ila Mbwana khumuza Ananiyya yoori: “Olawe! Mwinyi oto tu waaka, yaana yaka ethawuliweeyo yoori ethuule nzina laka ewaalawanelaka makafiri na afwalume awe na vakathi wa atthu a Ezirayeele. ¹⁶ Kinlawa kooothoonyezeni nanna atthu anttelaaazo ohoowa mwaasa wa nzina laka.”

¹⁷ Aphano, Ananiyya khulankha khulawa. N'oofiya khuvira nnyupa khunt-theela makhono khumuza yoori: “Ttwiiyaku Saawulu, Mbwana Yinsa, otule oopuweleliyeyo ntarikhi ataaka ohali waari olankhaawo, akiperekha miiyo yoori orutele woona na wiiye wa wiitaala Rooho Ttakatthiifu.”

¹⁸ Nasaapiru vitthu nkhama mavalako khusaruwa mmaasho, khwaaza woona opheya. N'oolankha khulawa khoosiwa. ¹⁹ Wakathi ajiyyeovo ethu-yoojiwa, khurutelamo kuvu zawe.

Saawulu onaleya hapari zooshapweya

Saawulu aaviriskiye siikhu vattithiiru aari na anamalottela sitati wa Damashiku. ²⁰ Wakathi otthuupule khwaaza olaleya mmamanyupa a Nnyizinku yoori Yinsa mwaana wa Nnyizinku. ²¹ Ooshi apale aari onsiilaaye khwiyya ootkinisiwa channu, khusala alupa yoori: “Khahiyo otthuutu nlume otule aari weekesakaaye owoola apale ooshi aari osifwaaye nzina la

Yinsa? Khaatiye okhuno oteela owaathuula atthu nkhamma anamafukiwa yoori awaalawane Yeruzaleemu wa attunkhulu a anamalokozela a tiini?”²² Saawulu khusala avira ajilipisaka wakhula siikhu, mayaahuuti khusala amwaakanyerela yoori oniikhala Damashiku athoonyezaka yoori Yinsa ti Almasiihu.

²³ Ziviriyeovo siikhu za waatta, mayaahuuti khusilana ooshi aya wahati woomuula, ²⁴ ila Saawulu khwiya woojuwa shawuri zaya epile. Nthana na osikhu aari wiya oothotolela milako za sitati etile yoori apatthe omuula. ²⁵ Anakhiyoni awe khunthuula n'oosikhu khunwelisa khumwishushela onyuma khwa vahali wa pwejiweeve wa muuri.

²⁶ Wakathi afiyyeovo Yeruzaleemu khutakha owaakusanya anakhiyoni a Yinsa, ila ooshi khusala amoova mwaasa woohinkhupali yoori khweele nakhiyoni. ²⁷ Aphano Baranabe khuwaathuula maswihaapa khusala awooza yoori ntarikhi, Saawulu amoona Mbwana amuuziyeeyo nanna awahiyeozo olaleya hapari zooshapweya woominyalavo khwa nzina la Yinsa Damashiku. ²⁸ Attaaphale, Saawulu khwiya vamote na yo, khusala eettetta woohoovi Yeruzaleemu, alaleyaka woominyalavo khwa nzina la Mbwana. ²⁹ Khusala attakhula na weelezana na mayaahuuti aari ottakhulaaye luuka ya ekereku, ila apo aya aari otakha omuula. ³⁰ Attwiize n'oojuwa mattakhuzi apale, khunthuula khunlawana nti wa Sezareeya khumpakhirisa yoori alawe nti wa Tarusu.

³¹ Siikhu zaya epo kereja yaari ya heeri nti wooshi wa Yudeya, Kalileya na wa Samariya. Atthu a waamini aari otepa okhomaala na Rooho Ttakatthiifu na waatta, khwa meekhazi oomoova Mbwana.

Aneya na Dooroka

³² Pheeturu khusala eettetta wakhula phantte, khulawa owaathotola attakatthiifu apale aari wiikhalaaye Liida. ³³ Otthuukhule khunsikana ntthu woorakala aari wiitthiwaaye Aneya eettiye orapalela nyaakha minaane. ³⁴ Pheeturu khumuaza yoori: “Aneya, Yinsa Al-Masiihu ontta wuvonisa! Olankhe okhaje olili awo.” Ye khulanka nasaapiru. ³⁵ Atthu ooshi apale aari wiikhalaaye Liisa na Sarona, n'oosiila khunkhupali Mbwana.

³⁶ Yoopa aariwo nakhiyoni wankha aari wiitthiwaaye Tabita, khwa luuka ya ekereku lina maana a Dooroka. Ye aari orettakaaye vitthu zooshapweya na winkha zimola. ³⁷ Khumpattha olwele khufwa, mwiili awe khoosiwa khupwehiwa nnyupa ya korofwa yootulu. ³⁸ Liida waattamaniye nti wa Yoopa. Wakathi asiiliyeovo anakhiyoni yooriwa Pheeturu ari nti wa Liida, khuwaaruma atthu awiri olawa omuuza yoori: “Ohirupaze ota okhuno niriiwo.”

³⁹ Pheeturu khulawa vamote na yo, n'oofiya khuthuuliwa khulawaniwa nnyupa ya korofwa y'oottulu. Anakhwele ooshi khunzukulela khusala alila na anthoonyezaka ajapi na kuwo kiina Dooroka aattaliyeozo ari vamote na yo.

⁴⁰ Pheeturu khuwooza ooshi osaruwa okatthi okhule, attaaphale khukokhora khusala alompa. Khulankha khulawa aphale aarivo muukha otule woofwa, khumuaza yoori: “Tabita, olankhe!” Ye khufunula maasho awe, khumoona Pheeturu khwiikhala. ⁴¹ Khunkholela khusala anlansa yoori eemele, aphano khuwaakhuwela anakhiyoni a anakhwele apale khuwenkha eettaka woona. ⁴² Vitthu epile khwiya zoofuwiwa sitati yooshi ya Yoopa, atthu a waatta khunkhupali Mbwana. ⁴³ Pheeturu eekhaliye nti wa Yoopa siikhu za waatta, owawe mwinyi mmote aari wiithiwaaye Simawi aari waattalaaye shapala za nyama.

Warakha ya mwanzo ya Paawulu amwaatikhelaka Timootiyu

Salamu

¹ Miyo Paawulu, aswihaapa wa Yinsa Al-Masiihu khwa oruma wa Nnyizinku namuusuru etthu na wa Yinsa Al-Masiihu nroromelo etthu, ² kiniwaatikhela weeyo Timootiyu, mwanaka w'eekhweele nkatthi wa tiini yoori rehema, huruma na heeri ya Nnyizinku papeetthu na ya Yinsa Al-Masiihu Mbwaneetthu, yiiye vamote na-weyo.

Phoole na anamanozela a mwentto woovonyeya

³ Nkhama ethiipo kaawuuziyezo wakathi opule kaari weettaavo nti wa Masedoniya, yoori amana osala nti wa Efeeziyu owaahirimize atthu akina yoori ahikhanyarele osomisa mwentto woovonyeya. ⁴ Owoozaka theenya yoori alikhe olottela hantisi na waalaka mazina a marehemu. Epo zaya zintiisa onyakulisana na enlikhisa mwentto wa Nnyizinku onlottaniwaaye amini. ⁵ Maana a masomi aya apa ophetana wa rooho y'ookemaani, na ojuwa othawula yooshapweya vakatthi wa yootakhala, na amini yoohiiyi yoonaafikhi. ⁶ Akinoko ajilaziyeemo, arutelaka olottela vitthu zootakhala zoohiina fwayita. ⁷ Yo antakha ojiretta wiiya anamanozela a kano za Nnyizinku, ila khiniweeleya, wala epile anlupaazo na haakhi yaya khanjuwa.

⁸ Apha ninjuwacha yoori kano pi zooshapweya zirumeeeyeliwaru khwa nanna zinlupaazo. ⁹ Nijuwaka ethiipo yoori kano khazaawaateeliye atthu apale aneettettelaaye shariya, ila zaawaateeliye apale ooheeiyi a shariya na anamakhijili, zaawaateeliye makaafiri na anatwampi, zaawaateeliye anamatakhala-rooho na anamakufuru, zaawaateeliye apale aniwoolaaye apapazaya na amamazaya, zaawaateeliye apale aniwoolaaye azaaya, ¹⁰ zaawaateeliye anamajansili na apale aniwaalalanaaye alumbe azaaya, zaawaateeliye apale aniwaakholaaye atthu na owoozanyisa na anamahata, zaawaateeliye apale anlaphaaye eettaka ohata, na ooshi apale mwentto woozuri ahintakhaaye. ¹¹ Mwentto opo ori nhapari zooshapweya zinlankhaaye nkatthi wa nuuru ya Nnyizinku wa parakha, kinkhiweeyo miiyo olaley.

¹² Yinsa Al-Masiihu Mbwaneetthu akinkhiyeeyo kuvu, Ye akoona wiiya nt-thu wa waamineya, khukinkha onrumeeyela, kininshukhurwela. ¹³ Miiyena omwanzo kaari namakufuru, namalupattha, namahusuti, wakathi aya opule miiyo akaarina amini, etthu kaari orettaaye akaari ojuwa, apha kooneliwa huruma. ¹⁴ Rehema yooziti ya Mbwaneetthu khukiishukhela, khukipatthisa ompheta na omwaamini Ye. ¹⁵ Mattakhuzi apa pi ookhweele na ansuhi okhupaleliwa: Yinsa Al-Masiihu ti ye aatiyyeeyo voolumwenku oteela owoosuru anatwampi, wootepacha waya ti miyo. ¹⁶ Ti eto kooneliweeyo huruma, yoori khwa miiyo, wootepacha waya, Yinsa Al-Masiihu akivilela yoori awaathoonyeze ooshi apale anttelaaaye omwaamini apatthe ohaayi wa mileele. ¹⁷ Apho, Mfwalume wa mileele attottopeliwe na asifwiwe siikhu zooshi, Ye ahinifwaaye wala ahinooneyaaye, Nnyizinku mmote othu-uto. Amiina!

¹⁸ Masomi atthaapo kinuutumerela weeyo mwanaka Timootiyu, nkhamma khwa weyo yuulupeziyezo Rooho Ttakatthiifu, wuupuwelaka mattakhuzi apa wuuziweeyo, ontela owahi wuumana viitha ya nnafusi, ¹⁹ ojilipisanaka amini na ojuwa othawula yooshapweya vakatthi wa

yootakhala. Mwaasa woohitakhi othawula yooshapweya, atthu akina amini yaya apwetech. ²⁰ Akina aya ti Hemeeni na Alishantere. Yo kawaalikhela Epiliisi yoori awaahoowise, ajuwe ohikufuru.

2

Nina yoowaalompela atthu ooshi

¹ Apho, ehinarettiwe hatha etthu, kinuuhirimizani olompa; lompa yookhola moolu, yoovekeleliwa anaatamu ooshi na lompa yooshukhurwela.

² Mwiwaalompele afwalume na attunkhulu ooshi apale ariinaaye yenzi yoori fweeyo niiyane meekhazi a wiithaala, a heeri, eemaani na hishma khuluyeene. ³ Epo pi ziiyiye zooshapweya na zontuvela Nnyizinku Namuusuru etthu. ⁴ Ye ontakha yoori eeye a wuusurukha atthu ooshi na ajuwe haakhi.

⁵ Nnyizinku ori mmote paasi,
na namasilanisa wa atthu na Nnyizinku
na-ye ori mmote paasi,
Yinsa Al-Masiihu pinaatamu,

⁶ otu aleviyeyo ohaayi awe
khuripha hisapu za twampi za atthu ooshi,
oshaahiti opu Nnyizinku enkha wakathi khwaamili.

⁷ Akintta ohata kinlupa khweele, keetta othawuliwa yoori kiiye namalaleya, kiiye aswihaapa na kiiye namanozela wa mattakhuzi apa a amini na a haakhi, khwa khapila zooshi.

⁸ Apho, alume ooshi kintakha yoori wakhula vahali ankusanyeyaavo alompe alansaka makhono na rooho y'eemaani woohikatipukhi na woohinyakulisani.

Aakha apale eeyiye anamalottela a Yinsa

⁹ Aakha na-yo kintakha yoori awale kuwo wa hishimavo, ajishapweyise woohijitayiti khwa nanna eneezelaa, oshapweya waya ohiiye woofuka mattunttu oohifwayi wala owala thahapu wala osaka ama kuwo za waatta nzurukhu, ¹⁰ oshapweya waya wiiye wa khaazi zooshapweya nkhamma aakha animwaaputwaaye Nnyizinku.

¹¹ Aakha, amana anozeliwaka ana yoojiitthaaza na ojinyamaza.

¹² Akiniwaatakhisa aakha onozela wala ojinkha yenzi vakatthi wa alume, ana yawiyya oonyamala. ¹³ Maana tthakuzi wa wumpiwa ti Adamu, aphano khumpiwa Haawa. ¹⁴ Aattettekhiweeyo khahiyo Adamu, muukha ti ye aattettekhiweeyo pi ohata wa Epiliisi, khusutukhwana akwelaka ntwampi.

¹⁵ Apho, aakha hatha nkhamma awaapattha aana, anuusurukha eeyaru nkatthi wa epaata na pheta, na ottakatthifu na hishma.

3

Namalokozela wa ojama wa Nnyizinku

¹ Mattakhuzi apa pi ookhweele: amana ntthu atakha wiiya namalokozela wa Ojama wa Nnyizinku, onhithajiya khaazi yooshapweya. ² Namalokozela wa Ojama wa Nnyizinku eeye ntthu woohaakanyereliwi etthu, eeye nlume wa wiiyana muukha mmote, woojiinanel, woojiitthaaza, wooshitahiwa, woomakeleya na ankhituraaye osomisa. ³ Ahiiye ntthu woohapaliwa ama woohusuti, eeye ntthu woovilela na wa heeri. Ahiiye ntthu wontuvela nzurukhu. ⁴ Eeye ntthu wa weettettisa vaje vawe saana, wooshututeliwa

pi aanaawe na wooshitahanana. ⁵ Nkhama ntthu khaneettettisa saana vaje vawe, onlokozela toovi ojama wa Nnyizinku? ⁶ Namalokozela wa Ojama wa Nnyizinku ahiiye ntthu anttaaye onjuwaru Yinsa, maana enwahoya ompattha ojikhupali, khukwelana ophukiwa otthuupo aphukiweeyo Sheethwani. ⁷ Apho, namalokozela wa Ojama wa Nnyizinku eeye ntthu wooshitahiwa pi atthu apale oohiiyi a Ojama wa Nnyizinku, yoori ahikwele mmiraakho za Sheethwani eeya wootaraweya.

Anamarumeyela a ojama wa Nnyizinku

⁸ Khwa nanna ethiipo anamarumeyela na-yo eeye atthu ooshitahiwa, ahiiye amwanomwaano, ahiiye oohapaliwa wala oowaatuvela opattha fwayita yoohiiyi ya haakhi. ⁹ Eeye atthu oohikheetiwi pi rooho zaya na oojilipisana mwentto wa amini athoonyeziweeyo ti Nnyizinku. ¹⁰ Na-yo ahinenkhiwe orumeyela ana yawooniwa khpula mwentto aya, amana ahoonaniwi mwentto wootakhala phi aninkhiwaavo orumeyela. ¹¹ Khwa nanna ethiipo na-yo aakha anrumeyelaaye eeye ooshitahiwa, eeye atthu oohittakhuli pure, oosuluheya na awaamineya khwa zooshi. ¹² Anamarumeyela eeye alume awiiyana muukha mmote, oowaalela aanaaya saana na aweettettisa vaje vaya. ¹³ Amana arumeyela saana ampattha shitaha khuluyeene na okhomaala nkaththi wa amini ariinaaye na Yinsa Al-Masihu.

¹⁴ Kiniwaatikhela weeyo Timootiyu warakha eti, keekeselaka oteela wuuthotola nasaapi, ¹⁵ ila amana kirupaza, warakha eto entta owuuza nanna yoojeettettisa vakatthi wa Ojama wa Nnyizinku. Opu wiyyiyeyo kerezha ya Nluku Woohaayi, nripu na nchina l'ookhweele. ¹⁶ Khaavo hatha ntthu mmote antakhaaye okheeti yoori etile Nnyizinku athoonyeziyeeyo monkoni wa Yinsa Al-Masihu ti yootikinisa:

Ye aajithoonyeziye nkhamma pinaatamu
khuhakikhiwa ti Rooho Ttakatthiifu,
khooniwa pi malayikha,
khulaleyiwa tuniya zooshi,
khukhupaliwa voolumwenku,
khuweziwa pinkuuni nkaththi wa nuuru.

4

Ohirimiziwa wa Timootiyu

¹ Rooho Ttakatthiifu enlupa saaneene yoori omwiisho anlawa atthu akina alikhe amini, asiilezaka nafusi zoottettekha na masomi a masheethwani. ² Masomi aya apo arlankha mmakhono wa manaaifikhi na anamahata, ariina rooho zoolukula ahinjuwaaye etthu yootakhala wala yooshapweya. ³ Yo aniwoza atthu yoori oralana mwiikho na vitthu-zoojiwa kinoko zaya haraamu. Vitthu-zoojiwa epile Nnyizinku aphattucha yoori apale animwaaminaaye na anjuwaaye haakhi, aje anshukhurwelaka. ⁴ W'eekhweele, epile Nnyizinku aphattuchiyeeyo pi zooshapweya zooshi, ehiyyeveo hatha moote enthanyiwaaye amana yiiya yoopokhereliwa wonshukhurwelavo Nnyizinku. ⁵ Vitthu-zoojiwa zaya epo zinhalaalishiwa ti ntthakuzi la Nnyizinku na lompa.

Karumeya woororomeleya wa Yinsa

⁶ Amana weeyo owaanozela attwiizo mattakhuzi apa, oniiya karumeya wa Yinsa Al-Masihu wookemaani, ojilipisanaka mattakhuzi a amini na masomi ookhweele apa olottiyeeyo. ⁷ Masomi oovonyeya na hantisi zoololo ojiwerawerisane. Ojikhomaaze na emaani. ⁸ Okhomaaza makhonkolo

fwayita yaya vattitthiiru, ila emaani ti ye eriina fwayita khwa zooshi, maana entana nroromelo w'oohaayi otthuupo na aahera. ⁹ Mattakhuzi apa pi awaamineya na ansuhi okhupaleliwa. ¹⁰ Ti eto ninjuumanisaaye na okhola khaazi mwaasa yoori nroromelo etthu nattha wa Nnyizinku Woohaayi. Ye Namusuru wa anaatamu ooshi, haaswa-haaswa khwa apale animwaami-naaye.

¹¹ Mattakhuzi apa ohirimize na osomise. ¹² Hatha ntthu mmote ahitarawu oshaapu awo, ila khwa ottakhula wawo, menttezi awo, pheta, amini na wookemaanivo wiiye nthoonyezo wa anamwaamini. ¹³ Vakatthi wa analalottela, mpakha miyo ota, olipane osoma, otafusiri na osomisa Nttakhuzi la Nnyizinku. ¹⁴ Wakathi waattheeliweeve makhono pi attunkhulu veeshwa vawo oolompelaka, Nnyizinku nkatthi wa Rooho Ttakatthiifu awinkha thtuvo. Ohisahawu orumeyela.

¹⁵ Vitthu epi weettettise saana na ojilipisane ethiipi yoori okhomaala wawo nkatthi wa amini wiiye wa wooniwa pi atthu ooshi. ¹⁶ Ojiinanele weeyo na wiiyane phoole na mwentto opu onsomisaaye, vitthu epo ojilipise oretta. Amana okhanyarela oretta ethiipo, ontta ojuusuru weeyo na apale anuusilaaye.

5

Nanna yoowaatthantta anamafweliwa pi amanna zaya

¹ Nlume wa wuuziti owula ohisala ommaruwela, ila onlipisele saana nkhamma papaawo, mashaapu nkhamma attwiizo, ² aakha a wuuziti owula nkhamma amamazo, na aamwari nkhamma alupuwo wookemaanivo.

³ Owaatthantte aakha oofweliwa pi amanna zaya, apale khweele ahina ntthu woowaatthantta. ⁴ Ila nkhamma owaapho namafweliwa ti mannawe ariina aana ama atuulu, atthaapo mwanzo asome mwentto wa tiini antthanattaka jamaayaya. Etthiipo apapazaya phi aniwaariphavo. Eto etthu enintuvelaaye Nnyizinku. ⁵ Muukha woofweliwa ti mannawe, woohiina ntthu wontthannta, nroromelo awe onttha wa Nnyizinku, akhanyarelaka olompa avekaka waawunikha nthana na osikhu. ⁶ Ila otule anjitupweezaaye nkatthi wa tuvela z'olumwenku, hatha nkhamma ori haayi oniyya woofwa. ⁷ Owaarume oretta ethiipo theenya, yoori vakatthi vaya ehooniweeve paathuli. ⁸ Ntthu amana ajamaaze haaswa-haaswa mamaawe na pipiyaawe ahiaatthantti, akatthala epaata yawe na oninziti kaafiri.

⁹ Ahaatikhewe nwarakha yawiinaneliwa namafweliwa ti mannawe muukha woohiina nyaakha siithiini na eeye muukha araliweeyo nlume moote paasi. ¹⁰ Amana eeya muukha woojuwaniwa oretta vitthu zooshapweya, woowaalela saana aanaawe, woomakeleya, amana eeya muukha aari woosakaaye moolu a atthu oottakatthiifu a Nnyizinku, aari owaawunakaaye anamathowiwa na aari okholakaaye khaazi zooshi zooshapweya, othuuto ti aatikhewe nwarakha ya anamafweliwa pi amanna zaya.

¹¹ Aakha awiyya anakhinzi nwarakha ya anamafweliwa pi amanna zaya ohiaatikhemo, maana amana tuvela zaya ziziti ojinkha mmakhono wa Yinsa Al-Masiihu, antakha oraliwa. ¹² Khwa nanna ethiito, antta ojipatthisa paathuli mwaasa wookattha wahati aya opule wamwanzo aaret-taniyeeyo Nnyizinku. ¹³ Theenya antta ojinozela oviliwa, weettetta nyuupa khwa nyuupa, khahiyo oviliwaru paasi, ohankawaani, waapa na ottakhula vitthu zoohifwayi. ¹⁴ Apho, kintumerela yoori anamafweliwa pi amanna zaya apale eeyiye anakhinzi araliwe, eeyane aana alokozele vaje

vaya, ahimwinkhe kiphenyo atuwi etthu yoowaalupeza vitthu zootakhala.
¹⁵ Akinoko aya apathuli anlotta Epiliisi.

¹⁶ Muumini amana eeyana jamaaye woofweliwa ti mannawe, ona yont-thantta, ahinlikhele Ojama wa Nnyizinku. Alikhe yoori owahi owaatthantta apale akina oofweliwa pi amanna zaya ahina ntthu woowaatthantta.

Monkoni wa attunkhulu oojama wa Nnyizinku

¹⁷ Attunkhulu apale ankholaaye khaazi saana, Ojama wa Nnyizinku ona yoowaashitahi swaafu piiri, haaswa-haaswa apale antafusiraaye na apale ansomisaaye. ¹⁸ Nttakhuzi la Nnyizinku linlupa yoori: “Milomo za mompe ettukuttaka tiriku mwihifuke.” Khulupa theenya liraka: “Nakhaazi onsuhi wiiyana phakari yawe.” ¹⁹ Otule eeyiye nttunkhulu wa Ojama wa Nnyizinku ohikhupalele olokoveziwa, aheetteeni opuwa atthu awiri ama attatthu awi-iya mashaahiti. ²⁰ Wakhula otule anrettaaye twampi onshowere vakatthi wa Ojama wa Nnyizinku yoori theenya apale akina aya oove.

²¹ Miyo kiniwuza kuulipiselaka channu mmakhono wa Nnyizinku na Yinsa Al-Masiihu na malayikha apale oothawaziwa, kuutumerelaka yoori mattakhuzi apa oshututele, ohiinanelaka wala ohinthawulaka hatha ntthu.

²² Ohaakuve onthawaza ntthu nkatthi wa khaazi ya Nnyizinku yoori oheettemo ntwampi za atthu akina; ojiwerawerise wookemaanivo.

²³ Mwaasa wa ejohojojo yawo na marati apale oniiyanakaaye, ohisala onywa maatiru paasi, osala onywa nenkawu viinyu vattithiiru.

²⁴ Awaapho atthu akinoko zinooneyaaye twampi zaya ahineeyane paathuli, ila twampi za atthu akinoko wooneya waya ziniya zoorupaza.

²⁵ Khwa nanna ethiito na-ye khaazi zooshapweya zinooneya, hatha epile zoohooneyi khazinwahi ojivitha.

6

¹ Ooshi apale eeyiye amwiitthwaana ambwana zaya ana yoowaashitahi, yoori nzina la Nnyizinku na masomi etthu ahitarawiwe. ² Apale ariina mbwana wa wiiya namalottela wa Yinsa, ahilikhe onshitahi maana ttwi-iyaya. Okinoko waya ana yoowaakholela khaazi yooshapweyacha, maana apale ampatthelaaye fwayita khaazi etile ankholaaye yo mamuumini na pi oophetiwa.

Pheta ya Nzurukhu

Mattakhuzi apa osomise na ohirimize. ³ Nkhama ntthu onsomisa mwentto woofwarikhana ohinkholananaaye na mattakhuzi oolikana a Mbwaneetthu Yinsa na mwentto wa emaani, ⁴ ntthu aya oto tu woojikhupali na woohi-juwi hatha etthu. Onaaye olwele wontuvela onyakulisana na okheetisana nkatthi wa mattakhuzi antisaaye nrima, wuuman, mattukhano, waakany-erelana vitthu zootakhala, ⁵ na oshinttana woohilikhel. Nkhama ethi-ipile azowereliyeezo atthu awiiyana akhili za wuntuwanyiwa, eeyeliweeyo haakhi yaya, apo aya anoona yoori tiini etthu enreelisaaye. ⁶ W'ekhweele, tiini enreelisa channu khwa atthu apale amfurahelaaye epile ariinaazo. ⁷ Voolumwenku apha khanaataniyevo hatha etthu na khaninthuulavo hatha etthu. ⁸ Amana niiyana kuwo na etthu-yoojiwa nifurahele ethiipo. ⁹ Ila apale aneekesaaye oreela ankwela muuzayiniwa na mmiraakho za Sheeth-wani, allottelelaka tuvela zoololo zimpwetechaaye. Etthiipo eniwaatup-weeza muuthowelela na nwantipweya. ¹⁰ W'ekhweele pheta ya nzurukhu nchina la vitthu zooshi zootakhala. Mwaasa w'oomaashokopho na nzurukhu, atthu akina alikha epaata yaya khusala ajihoowisa venkivene.

Meekhazi omwaamini Nnyizinku

¹¹ Ila weeyo, ntthu wa Nnyizinku, vitthu zaya epo owerawere. Weekese weettettisa shariya, emaani, epaata, pheta, ovilela na ojithuza. ¹² Wuumane viittha yooshapweya y'epaata, okholelele ohaayi wa mileele. Okhuweleli-weeyo n'oolaza oshaahiti wooshapweya wa tukhuru yawo omaasho wa atthu a waatta. ¹³ Aphano, mmakhono wa Nnyizinku otule aninkhaaye ohaayi zumpe zooshi, na mmakhono wa Yinsa Al-Masiihu, otule alaziyeeyo oshaahiti wooshapweya wa tukhuru omaasho wa Pontiyu Pilaatu, miiyo kinuuruma weeyo, ¹⁴ yoori otthe nroho nrumo swaafi na woohilokoveziwi hatha ethu, mpakha epuwelelo ya Mbwaneetthu Yinsa Al-Masiihu. ¹⁵ Etthu yaya eto Nnyizinku onlawa arettikhanise, amana ofiya wakathi wa khweele.

Nnyizinku othuuto eeyiyeeyo wooshapweya na ariina owahi vatulu wa zooshi,

Mfwalume wa afwalume na mbwana wa ambwana.

¹⁶ Ye othwe khamfwa

na oniikhala nnuuru ehinaattameyaaye,
khina anamoone,

wala anwahaaye omoona.

Ottitthimisiwa wiiye Waawe na owahi khwa mileele. Amiina.

¹⁷ Monkoni wa mathaajiri voolumwenku apha, owaahirimize yoori ahisala ajinkhelela, wala thwaama zaya ahitthe nkatthi wa maali epile zoohilipaneyi; ila thwaama zaya atthe wa Nnyizinku, Ye oninkha wa waat-tavo vitthu zooshi yoori nisala nijirela. ¹⁸ Owaahirimize oretta saana na eeye mathaajiri a khaazi zooshapweya, awiiyana rooho yooleva na wiiya atthu anwahaaye omeela epile aniiyanaazo. ¹⁹ Khwa nanna ethiito antta wiiyana okhu ninttaawo akhipa yookhomaala, yoori apatthe ohaayi wa khweele.

²⁰ Weyo Timootiyu! Etile olkheliweeyo otthe nroho. Owerawere mat-takhuzi oololo aninveyisaaye Nnyizinku na akhili zoovonyeya zinooni-waaye nkhama ojuwa ila zihiyeeni. ²¹ Akinoko aari olottelaaye akhili zaya epo, alaamo mwiipaata.

Rehema ya Nnyizinku yiiye vamote na mweeyo.